

॥ नमो तस्स भगवतो अरहतो सम्मासम्बुद्धस्स ॥

अङ्गुत्तरनिकाये

दुकनिपात-टीका

१. पठमपण्णासकं

१. कम्मकारणवग्गो

१. वज्जसुत्तवण्णना

१. दुकनिपातस्स पठमे **पहारसाधनत्थन्ति** दण्डप्पहारस्स सुखसिद्धि-अत्थं । कज्जितो निब्बत्तं कज्जियं, आरनालं, यं बिलङ्गन्तिपि वुच्चति, तं यत्थ सिञ्चति, सा कज्जियउक्खलिका बिलङ्गथालिका, तंसदिसं कारणं **बिलङ्गथालिकं** । **सीसकटाहं उप्पाटेत्वाति** अयोगुळप्पवेसप्पमाणं छिद्वं कत्वा । **सङ्खमुण्डकम्मकारणन्ति** सङ्खं विय मुण्डकरणं कम्मकारणं । **राहुमुखकम्मकारणन्ति** राहुमुखगतसूरियसदिसकम्मकारणं ।

जोतिमालिकन्ति जोतिमालवन्तं कम्मकारणं । **हत्थपज्जोतिकन्ति** हत्थस्स पज्जोतनकम्मकारणं । **एरकवत्तकम्मकारणन्ति** एरकवत्तसदिसे सरीरतो चम्मवत्ते उप्पाटनकम्मकारणं । **चीरकवासिककम्मकारणन्ति** सरीरतो उप्पाटितवत्तचीरकेहि निवासापनकम्मकारणं । तं करोन्ता यथा गीवतो पट्टाय वद्धे कन्तित्वा कटियं ठपेन्ति, एवं गोप्फकतो पट्टाय कन्तित्वापि कटियमेव ठपेन्ति । अट्टकथायं पन “कटितो पट्टाय कन्तित्वा गोप्फकेसु ठपेन्ती”ति वुत्तं । **एणेय्यककम्मकारणन्ति** एणिमिगसदिसकम्मकारणं । **अयवलयाणि दत्त्वाति** अयवलयाणि पटिमुञ्चित्वा । **अयसूलानि कोट्टेन्तीति** कप्परजण्णुककोटीसु अयसूलानि पवेसेन्ति । तन्ति तं तथाकतकम्मकारणं सत्तं ।

बलिसमंसिकन्ति बलिसेहि मंसुप्पाटनकम्मकारणं । **कहापणिकन्ति** कहापणमत्तसो छिन्दनकम्मकारणं । **कोट्टेन्तीति** छिन्दन्ति । **खारापतच्छिकन्ति** तच्छेत्वा खारापसिञ्चनकम्मकारणं । **पलिघपरिवत्तिकन्ति** पलिघस्स विय परिवत्तनकम्मकारणं । **एकाबद्धं करोन्ति** अयसूलस्स कोट्टेनेन । **पलालपीठकन्ति** पलालपीठस्स विय सरीरस्स संवेल्लनकम्मकारणं । **कारणिकाति** घातनकारका । **पलालवट्ठिं विय कत्वाति** यथा पलालपीठं करोन्ता पलालं वट्ठिं कत्वा संवेल्लनवसेन पुन वेठेन्ति, एवं करोन्तीति अत्थो । **छातकसुनखेहीति** खुह्णकेहि कोलेय्यकसुनखेहि । ते हि बलवन्ता जवयोगा सूरा च होन्ति । **सहस्सभण्डिकन्ति** सहस्सत्थविकं ।

याहन्ति यं अहं । **यन्ति** च कारणवचनं । तेनाह “येन अह”न्ति । **छिन्नमूलकेति** तण्हामूलस्स उच्छिन्नत्ता सञ्छिन्नमूलके ।

वज्जसुत्तवण्णना निट्ठिता ।

२. पधानसुत्तवण्णना

२. दुतिये उभतोब्यूळहसङ्गामप्पवेसनसदिसन्ति युद्धत्थाय उभतोरासिकतचतुरङ्गिनिसेनामज्झप्पवेसनसदिसं ।
दानञ्च युद्धञ्च समानमाहूति एत्थ कथं पनीदमुभयं समानं? जीवितविनासभीरुको हि युज्झितुं न सक्कोति,
 भोगक्खयभीरुको दानं दातुं न सक्कोति । “जीवितञ्च रक्खिस्सामि, युज्झिस्सामी”ति हि वदन्तो न युज्झति, जीविते पन
 आलयं विस्सज्जेत्वा “हत्थपादादिच्छेदो वा होतु मरणं वा, गण्हिस्सामेतं इस्सरिय”न्ति उस्सहन्तोव युज्झति । “भोगे च
 रक्खिस्सामि, दानञ्च दस्सामी”ति वदन्तोपि न ददाति, भोगेसु पन आलयं पिस्सज्जेत्वा “महादानं दस्सामी”ति
 उस्सहन्तोव देति । एवं दानञ्च युद्धञ्च समं होति । किञ्च भिय्यो — **अप्पापि सन्ता बहुके जिनन्ति**, यथा च युद्धे
 अप्पकापि वीरपुरिसा बहुके भीरुपुरिसे जिनन्ति, एवं सद्वादिसम्पन्नो अप्पकम्पि दानं ददन्तो बहुविधं
 लोभदोसइस्सामच्छरियदिट्ठिविचिकिच्छादिभेदं तप्पटिपक्खं अभिभवति, बहुञ्च दानविपाकं अधिगच्छति । एवम्पि दानञ्च
 युद्धञ्च समानं । तेनाह “**अप्पम्पि चे सद्वहानो ददाति, तेनेव सो होति सुखी परत्था**”ति ।

अगारस्स हितं कसिगोरक्खादि अगारियं, तं नत्थि एत्थाति **अनगारियं**, पब्बज्जाति आह “**अगारस्स...पे०...
 अनगारियं पब्बज्ज**”न्ति । **सब्बूपधिपटिनिस्सगत्थायाति** एत्थ चत्तारो उपधी — कामुपधि, खन्धुपधि, किलेसुपधि,
 अभिसङ्खारुपधीति । कामापि हि “यं पञ्च कामगुणे पटिच्च उप्पज्जति सुखं सोमनस्सं, अयं कामानं अस्सादो”ति (अ०
 नि० ९.३४) एवं वुत्तस्स सुखस्स, तदस्सादनिमित्तस्स वा दुक्खस्स अधिद्वानभावतो उपधीयति एत्थ सुखन्ति इमिना
 वचनत्थेन “उपधी”ति वुच्चन्ति । खन्धापि खन्धमूलकस्स दुक्खस्स अधिद्वानभावतो, किलेसापि अपायदुक्खस्स
 अधिद्वानभावतो, अभिसङ्खारापि भवदुक्खस्स अधिद्वानभावतो “उपधी”ति वुच्चन्ति । सब्बेसं उपधीनं पटिनिस्सगो पहानं
 एत्थाति सब्बूपधिपटिनिस्सगं, निब्बानं । तेनाह “**सब्बेसं खन्धूपधि...पे०... निब्बानस्स अत्थाया**”ति ।

पधानसुत्तवण्णना निट्ठिता ।

३. तपनीयसुत्तवण्णना

३. ततिये **तपनीयाति** एत्थ कत्तुअत्थे अनीय-सद्दोति आह “**तपन्तीति तपनीया**”ति । **तपन्तीति** विबाधेन्ति,
 विहेठेन्तीति अत्थो । तपनं वा दुक्खं, दिट्ठे चेव धम्मे अभिसम्परायञ्च तस्स उप्पादनेन चेव अनुबलप्पदानेन च हिताति
तपनीया । अथ वा तपन्ति तेनाति तपनं, अनुतापो, विप्पटिसारीति अत्थो । तस्स हेतुभावतो हिताति **तपनीया** ।
अनुसोचतीति विप्पटिसारी हुत्वा कताकतं अनुगम्म सोचति । सोचनज्झि कतत्ता च होति अकतत्ता च । तथा चेव पाळियं
 विभत्तं । नन्दयक्खादीनं वत्थूनि पाकटानीति तानि अदस्सेत्वा द्वेभातिकवत्थुं दस्सेन्तो “**ते किरा**”ति आदिमाह । तत्थ तेति
 द्वे भातरो । **पुन किं मग्गसीति** पुन किं इच्छसि ।

तपनीयसुत्तवण्णना निट्ठिता ।

५. उपज्जातसुत्तवण्णना

५. पञ्चमे **इमज्झि धम्मद्वयन्ति** कुसलेसु धम्मेसु असन्तुट्ठिता, पधानस्मिं अनोसक्कनसङ्घातं धम्मद्वयं । **इमिनाति**
 “असन्तुट्ठिता कुसलेसु धम्मेसू”ति वचनेन । **इमं दीपेतीति** “याव सो उप्पज्जति, न तावाहं सन्तुट्ठो अहोसि”न्ति एतं
 परियन्तं कत्वा वक्खमानत्थं दीपेति । **पधानस्मिन्ति** वीरियारम्भे । **इममत्थन्ति** “पधानस्मिञ्चा”ति आदिना वृत्तमत्थं ।
 वीरियप्पवाहे वत्तमाने अन्तरा एव पटिगमनं निवत्तनं पटिवानं, तदस्स अत्थीति पटिवानी, न पटिवानी अप्पटिवानी, तस्स

भावो अप्पटिवानिता, अनोसक्कनाति आह “अप्पटिवानिताति अप्पटिक्कमना अनोसक्कना”ति। तत्थ अनोसक्कनाति अप्पटिनिवत्ति।

आगमनीयपटिपदाति समथविपस्सनासङ्घाता पुब्बभागपटिपत्ति। सा हि आगच्छन्ति विसेसमधिगच्छन्ति एताय, आगच्छति वा विसेसाधिगमो एतायाति आगमनीया, सा एव पटिपज्जितब्बतो पटिपदाति आगमनीयपटिपदा। अप्पटिवानपधानन्ति ओसक्कनारहितपधानं, अन्तरा अनोसक्कित्वा कतवीरियन्ति अत्थो।

उपज्जातसुत्तवण्णना निड्डिता।

६. संयोजनसुत्तवण्णना

६. छट्ठे संयोजनानं हिता पच्चयभावेनाति संयोजनिया, तेभूमका धम्मा। तेनाह “दसन्नं संयोजनानं”न्तिआदि। संयोजनिये धम्मे अस्सादतो अनुपस्सति सीलेनाति अस्सादानुपस्सी, तस्स भावो अस्सादानुपस्सिता। निब्बिदानुपस्सिताति एत्थापि एसेव नयो। उक्कण्ठनवसेनाति संयोजनियेसु तेभूमकधम्मेसु निब्बिन्दनवसेन। जननं जाति, खन्धानं पातुभावोति आह “जातियाति खन्धनिब्बत्तितो”ति, खन्धानं तत्थ तत्थ भवे अपरापरं निब्बत्तितोति अत्थो। खन्धपरिपाको एकभवपरियापन्नानं खन्धानं पुराणभावो। एकभवपरियापन्नजीवितिन्द्रियप्पबन्धविच्छेदवसेन खन्धानं भेदो इध मरणन्ति आह “मरणेनाति खन्धभेदतो”ति। अन्तोनिज्झानं चित्तसन्तापो। परिदेवो नाम जातिव्यसनादीहि फुट्टस्स वाचाविप्पलापो। सो च सोकसमुद्धानोति आह “तन्निस्सितलालप्पितलक्खणेहि परिदेवेही”ति। लालप्पितं वाचाविप्पलापो, सो च अत्थतो सद्दोयेव।

दुक्खन्ति इध कायिकं दुक्खं अधिप्पेतन्ति आह “कायपटिपीळनदुक्खेही”ति। मनोविघातदोमनस्सेहीति मनसो विघातकरेहि दोमनस्सेहि। व्यापादसम्पयोगेन मनसो विहननरसज्झि दोमनस्सं। भुसो आयासो उपायासो यथा “भुसमादानं उपादानं”न्ति, सो च अत्थतो जातिव्यसनादीहि फुट्टस्स अधिमत्तचेतोदुक्खप्पभावितो दोसोयेव। कायचित्तानज्झि आयासनवसेन दोसस्सेव पवत्तिआकारो उपायासोति वुच्चति सङ्खारक्खन्धपरियापन्नो। तं चुद्धसहि अकुसलचेतसिकेहि अज्जो एको चेतसिकधम्मोति एके। यं विसादोति च वदन्ति।

संयोजनसुत्तवण्णना निड्डिता।

७. कण्हसुत्तवण्णना

७. सत्तमे यथा “कण्हा गावी”तिआदीसु काळवण्णेन समन्नागता “कण्हा”ति वुच्चति, न एवं काळवण्णताय धम्मा “कण्हा”ति वुच्चन्ति, अथ खो कण्हाभिजातिनिब्बत्तिहेतुतो अप्पभस्सरभावकरणतो वा “कण्हा”ति वुच्चन्तीति दस्सेन्तो “न काळवण्णताया”तिआदिमाह। कण्हतायाति कण्हाभिजातिताय। कण्हाभिजातीति च अपाया वुच्चन्ति मनुस्सेसु च दोभगियं। सरसेनाति सभावेन। न हिरीयति न लज्जतीति अहिरिको, पुगलो, चित्तं, तं सम्पयुत्तधम्मसमुदायो वा। तस्स भावो अहिरिक्कन्ति वत्तब्बे एकस्स क-कारस्स लोपं कत्वा अहिरिक्कन्ति वुत्तन्ति आह “अहिरिक्कन्ति अहिरिकभावो”ति। न ओत्तप्पतीति अनोत्तापी, पुगलो, यथावुत्तधम्मसमुदायो वा, तस्स भावो अनोत्तप्पन्ति आह “अनोत्तापिभावो”ति।

कणहसुत्तवण्णना निट्ठिता ।

८. सुक्कसुत्तवण्णना

८. अट्ठमे “सुक्कं वत्थ”न्ति आदीसु विय न वण्णसुक्कताय धम्मनं सुक्कता, अथ खो सुक्काभिजातिहेतुतो पभस्सरभावकरणतो चाति दस्सेन्तो “न वण्णसुक्कताया”ति आदिमाह । सुक्कतायाति सुक्काभिजातिताय । हिरी पापधम्मे गूथं विय पस्सन्ती जिगुच्छतीति आह “पापतो जिगुच्छनलक्खणा हिरी”ति । ओत्तप्पं ते उण्हं विय पस्सन्तं ततो भायतीति वुत्तं “भायनलक्खणं ओत्तप्प”न्ति । इदञ्च हिरोत्तप्पं अज्जमज्जविप्पयोगी पापतो विमुखभूतञ्च, तस्मा नेसं इदं नानाकरणं — अज्जत्तसमुद्धाना हिरी, बहिद्वासमुद्धानं ओत्तप्पं । अत्ताधिपति हिरी, लोकाधिपति ओत्तप्पं । लज्जासभावसण्ठिता हिरी, भयसभावसण्ठितं ओत्तप्पं । सप्पतिस्सवलक्खणा हिरी, वज्जभीरुकभयदस्साविलक्खणं ओत्तप्पन्ति ।

तत्थ अज्जत्तसमुद्धानं हिरिं चतूहि कारणेहि समुद्वापेति जातिं पच्चवेक्खित्वा, वयं, सूरभावं, बाहुसच्चं पच्चवेक्खित्वा । कथं? “पापकरणं नामेतं न जातिसम्पन्नानं कम्मं, हीनजच्चानं केवट्टादीनं कम्मं, मादिसस्स जातिसम्पन्नस्स इदं कातुं न युत्त”न्ति एवं ताव जातिं पच्चवेक्खित्वा पापं अकरोन्तो हिरिं समुद्वापेति । तथा “पापकरणं नामेतं दहरेहि कत्तब्बं कम्मं, मादिसस्स वये ठितस्स इदं कातुं न युत्त”न्ति एवं वयं पच्चवेक्खित्वा पापं अकरोन्तो हिरिं समुद्वापेति । तथा “पापकरणं नामेतं दुब्बलजातिकानं कम्मं, मादिसस्स सूरभावसम्पन्नस्स इदं कातुं न युत्त”न्ति एवं सूरभावं पच्चवेक्खित्वा पापं अकरोन्तो हिरिं समुद्वापेति । तथा “पापकम्मं नामेतं अन्धबालानं कम्मं, न पण्डितानं, मादिसस्स पण्डितस्स बहुस्सुतस्स इदं कातुं न युत्त”न्ति एवं बाहुसच्चं पच्चवेक्खित्वा पापं अकरोन्तो हिरिं समुद्वापेति । एवं अज्जत्तसमुद्धानं हिरिं चतूहि कारणेहि समुद्वापेति, समुद्वापेन्तो च हिरिं निस्साय पापकम्मं न करोति ।

कथं बहिद्वासमुद्धानं ओत्तप्पं? “सचे त्वं पापकम्मं करिस्ससि, चतूसु परिसासु गरहप्पत्तो भविस्ससि, ततो तं सीलवन्तो सब्रह्मचारी विवज्जिस्सन्ती”ति पच्चवेक्खित्वा बहिद्वासमुद्धानं ओत्तप्पं निस्साय पापकम्मं न करोति । एवं बहिद्वासमुद्धानं ओत्तप्पं ।

कथं अत्ताधिपति हिरी? इधेकच्चो कुलपुत्तो अत्तानं अधिपतिं जेट्ठकं कत्वा “मादिसस्स सद्धापब्बजितस्स बहुस्सुतस्स धुतधरस्स न युत्तं पापकम्मं कातु”न्ति पापं न करोति । एवं अत्ताधिपति हिरी । तेनाह भगवा “सो अत्तानंयेव अधिपतिं करित्वा अकुसलं पजहति, कुसलं भावेति, सावज्जं पजहति, अनवज्जं भावेति, सुद्धं अत्तानं परिहरती”ति (अ० नि० ३.४०) ।

कथं लोकाधिपति ओत्तप्पं? इधेकच्चो कुलपुत्तो लोकं अधिपतिं जेट्ठकं कत्वा “सचे खो त्वं पापकम्मं करेय्यासि, सब्रह्मचारिनो ताव तं जानिस्सन्ति, महिद्धिका महानुभावा लोके च समणब्राह्मणा देवता च, तस्मा ते न युत्तं पापं कातु”न्ति पापकम्मं न करोति । यथाह — “महा खो पनायं लोकसन्निवासो, महन्तस्मिं खो पन लोकसन्निवासे सन्ति समणब्राह्मणा इद्धिमन्तो दिब्बचक्खुका परचित्तविदुनो । ते दूरतोपि पस्सन्ति, आसन्नापि न दिस्सन्ति, चेतसापि चित्तं जानन्ति, तेपि मं एवं जानिस्सन्ति ‘पस्सथ, भो, इमं कुलपुत्तं, सद्धा अगारस्मा अनगारियं पब्बजितो समानो वोकिण्णो विहरति पापकेहि अकुसलेहि धम्मेही’ति । सन्ति देवता इद्धिमन्तिनियो दिब्बचक्खुका परचित्तविदुनियो, ता दूरतोपि पस्सन्ति, आसन्नापि न दिस्सन्ति, चेतसापि चित्तं जानन्ति, तापि मं जानिस्सन्ति ‘पस्सथ, भो, इमं कुलपुत्तं, सद्धा अगारस्मा अनगारियं पब्बजितो

समानो वोकिण्णो विहरति पापकेहि अकुसलेहि धम्मोही'ति...पे०... सो लोकंयेव अधिपतिं करित्वा अकुसलं...पे०... परिहरती'ति । एवं लोकाधिपति ओत्तप्पं ।

लज्जासभावसण्ठिताति एत्थ लज्जाति लज्जनाकारो, तेन सभावेन सण्ठिता हिरी । भयन्ति अपायभयं, तेन सभावेन सण्ठितं ओत्तप्पं । तदुभयं पापपरिवज्जने पाकटं होति । तत्थ यथा द्वीसु अयोगुळेसु एको सीतलो भवेय्य गूथमक्खितो, एको उण्हो आदित्तो । तेसु यथा सीतलं गूथमक्खितत्ता जिगुच्छन्तो विज्जुजातिको न गण्हाति, इतरं डाहभयेन । एवं पण्डितो लज्जाय जिगुच्छन्तो पापं न करोति, ओत्तप्पेन अपायभयभीतो पापं न करोति, एवं **लज्जासभावसण्ठिता हिरी, भयसभावसण्ठितं ओत्तप्पं** ।

कथं सप्पतिस्सवलक्खणा हिरी, वज्जभीरुकभयदस्साविलक्खणं ओत्तप्पं? एकच्चो हि जातिमहत्तपच्चवेक्खणा, सत्थुमहत्तपच्चवेक्खणा, दायज्जमहत्तपच्चवेक्खणा, सब्रह्मचारिमहत्तपच्चवेक्खणाति एवं चतूहि कारणेहि तत्थ गारवेन सप्पतिस्सवलक्खणं हिरिं समुट्ठापेत्वा पापं न करोति । एकच्चो अत्तानुवादभयं, परानुवादभयं, दण्डभयं, दुग्गतिभयन्ति एवं चतूहि कारणेहि वज्जतो भायन्तो वज्जभीरुकभयदस्साविलक्खणं ओत्तप्पं पच्चुपट्ठापेत्वा पापकम्मं न करोति । एत्थ च अज्झत्तसमुट्ठानादिता हिरोत्तप्पानं तत्थ तत्थ पाकटभावेन वुत्ता, न पन नेसं कदाचि अज्जमज्जविष्ययोगो । न हि लज्जनं निब्भयं, पापभयं वा अलज्जनं अत्थीति । एवमेत्थ वित्थारतो अत्थवण्णना वेदितब्बा ।

सुक्कसुत्तवण्णना निड्डिता ।

९. चरियसुत्तवण्णना

९. नवमे लोकन्ति सत्तलोकं । **सन्धारेन्ती**ति आचारसन्धारणवसेन धारेन्ति । **ठपेन्ती**ति मरियादायं ठपेन्ति । **रक्खन्ती**ति आचारसन्धारणेन मरियादायं ठपेत्वा रक्खन्ति । **गरुचिन्ती**कारवसेन न पज्जायेथाति गरुं कत्वा चित्ते करणवसेन न पज्जायेथ, अयमाचारो न लब्धेय्य । **मातुच्छाति** वाति एत्थ इति-सद्दो आद्यत्थो । तेन मातुलानीति वा आचरियभरियाति वा गरून् दाराति वाति इमे सङ्गण्हाति । तत्थ मातु भगिनी **मातुच्छा** । मातुलभरिया **मातुलानी** । **गरून् दारा** महापितुचूळपितुजेट्ठभातुआदीनं गरुट्ठानियानं भरिया । **यथा अजेळकाति**आदीसु अयं सङ्केपत्थो — यथा अजेळकादयो तिरच्छाना हिरोत्तप्परहिता माताति सज्जं अकत्वा भिन्नमरियादा सब्बत्थ सम्भेदेन वत्तन्ति, एवमयं मनुस्सलोको यदि लोकपालधम्मा न भवेय्युं, सब्बत्थ सम्भेदेन वत्तेय्य । यस्मा पनिमे लोकपालकधम्मा लोकं पालेन्ति, तस्मा नत्थि सम्भेदोति ।

चरियसुत्तवण्णना निड्डिता ।

१०. वस्सूपनायिकसुत्तवण्णना

१०. दसमे अपज्जत्ताति अननुज्जाता, अविहिता वा । **वस्सेति** वस्सारत्तं सन्धाय वदति, **उतुवस्सेति** हेमन्तं सन्धाय । **एकिन्द्रियं जीवं विहेठेन्ताति** रुक्खलतादीसु जीवसज्जिताय एवमाहंसु । **एकिन्द्रियन्ति** च कायिन्द्रियं अत्थीति मज्जमाना वदन्ति । **सङ्घातं आपादेन्ताति** विनासं आपादेन्ता । **संकसायिस्सन्तीति** अप्पोस्सुक्का निबद्धवासं वसिस्सन्ति । **अपरज्जुगताय आसाळ्हिया उपगन्तब्बाति** एत्थ अपरज्जु गताय अस्साति अपरज्जुगता, तस्सा अपरज्जुगताय अतिक्कन्ताय, अपरस्मिं दिवसेति अत्थो, तस्मा आसाळ्हिपुण्णमाय अनन्तरे पाटिपददिवसे उपगन्तब्बाति एवमेत्थ अत्थो

ददुब्बो । मासगताय आसाळिहया उपगन्तब्बाति मासो गताय अस्साति मासगता, तस्सा मासगताय अतिक्कन्ताय, मासे परिपुण्णेति अत्थो । तस्मा आसाळिहपुण्णमतो पराय पुण्णमाय अनन्तरे पाटिपददिवसे उपगन्तब्बाति अत्थो ददुब्बो ।

वस्सूपनायिकसुत्तवण्णना निट्ठिता ।

कम्मकारणवग्गवण्णनाय लीनत्थप्पकासना निट्ठिता ।

२. अधिकरणवग्गवण्णना

११. दुतियवग्गस्स पठमे अप्पटिसङ्खाने न कम्पतीति पटिसङ्खानबलं, उपपरिक्खनपञ्जायेतं नामं । वीरियसीसेन सत्त बोज्झङ्गे भावेन्तस्स उप्पन्नं बलं भावनाबलं । वीरियुपत्थम्भेन हि कुसलभावना बलवती थिरा उप्पज्जति, तथा उप्पन्ना बलवती कुसलभावना बलवन्तो सत्त बोज्झङ्गातिपि वुच्चन्ति । अत्थतो वीरियसम्बोज्झङ्गसीसेन सत्त बोज्झङ्गा होन्ति । वुत्तम्पि चेत्तं — “तत्थ कतमं भावनाबलं? या कुसलानं धम्मानं आसेवना भावना बहुलीकम्मं, इदं वुच्चति भावनाबलं । सत्तपि बोज्झङ्गा भावनाबल”न्ति (ध० स० १३६१) ।

अकम्पियट्टेनाति पटिपक्खेहि अकम्पनीयट्टेन । दुरभिभवनट्टेनाति दुरभिभवनीयट्टेन । अनज्झोमदनट्टेनाति अधिभवित्वा अनवमदनट्टेन । एतानीति एतानि यथावुत्तानि द्वेपि बलानि । एतदग्गं नागतन्ति “एतदग्गं, भिक्खवे, द्विन्नं बलानं यदिदं भावनाबल”न्ति एवमेत्थ एतदग्गं नागतन्ति अत्थो ।

१२. दुतिये विवेकं निस्सितन्ति विवेकनिस्सितं, यथा वा विवेकवसेन पवत्तं ज्ञानं “विवेकज”न्ति वुत्तं, एवं विवेकवसेन पवत्तो सतिसम्बोज्झङ्गो “विवेकनिस्सितो”ति ददुब्बो । निस्सयट्टो च विपस्सनामग्गानं वसेन मग्गफलानं वेदितब्बो, असतिपि वा पुब्बापरभावे “पटिच्चसमुप्पादो”ति एत्थ पच्चयेन समुप्पादनं विय अविनाभाविधम्मब्यापारा निस्सयनभावना सम्भवन्तीति । “तदङ्गसमुच्छेदनिस्सरणविवेकनिस्सित”न्ति वत्वा पटिप्पस्सद्विवेकनिस्सितस्स अवचनं “सतिसम्बोज्झङ्गं भावेती”ति आदिना इध भावेतब्बानं सम्बोज्झङ्गानं वुत्तत्ता । भावितबोज्झङ्गस्स हि सच्छिकातब्बा बलबोज्झङ्गा, तेसं किच्चं पटिप्पस्सद्विवेको । अज्झासयतोति “निब्बानं सच्छिकरिस्सामी”ति पवत्तअज्झासयतो । यदिपि हि विपस्सनाक्खणे सङ्खारारम्भणं चित्तं, सङ्खारेसु पन आदीनवं दिस्वा तप्पटिपक्खे निब्बाने निन्नताय अज्झासयतो निस्सरणविवेकनिस्सितो होति उण्हाभिभूतस्स पुग्गलस्स सीतनिन्नचित्तता विय ।

“पञ्चविधविवेकनिस्सितम्पीति एके”ति वत्वा तत्थ यथावुत्तविवेकत्तयतो अज्जं विवेकद्वयं उद्धरित्वा दस्सेतुं “ते ही”ति आदि वुत्तं । तत्थ ज्ञानक्खणे ताव किच्चतो विक्खम्भनविवेकनिस्सितं, विपस्सनाक्खणे अज्झासयतो पटिप्पस्सद्विवेकनिस्सितं भावेतीति वत्तब्बं “एवाहं अनुत्तरं विमोक्खं उपसम्पज्ज विहरिस्सामी”ति तत्थ निन्नज्झासयताय । तेनाह “तस्मा तेसं मतेना”ति आदि । हेट्ठा कसिणज्झानग्गहणेन आरुप्पानम्पि गहणं ददुब्बं, तस्मा “एतेसं ज्ञानान”न्ति इमिनापि तेसं सङ्गहो वेदितब्बो । यस्मा पहानविनयो विय विरागनिरोधापि इधाधिप्पेतविवेकेन अत्थतो निब्बिसिट्ठा, तस्मा वुत्तं “एस नयो विरागनिस्सितन्ति आदीसू”ति । तेनाह “विवेकत्था एव हि विरागादयो”ति ।

वोस्सग्ग-सद्दो परिच्चागत्यो पक्खन्दनत्थो चाति वोस्सग्गस्स दुविधता वुत्ता । वोस्सज्जनज्झि पहानं विस्सट्ठभावेन निरोधनपक्खन्दनम्पि च । तस्मा विपस्सनाक्खणे तदङ्गवसेन मग्गक्खणे समुच्छेदवसेन पटिपक्खस्स पहानं वोस्सग्गो, तथा

विपस्सनाक्खणे तन्निन्नभावेन, मग्गक्खणे आरम्मणकरणेन विस्सट्ठसभावता वोस्सग्गोति वेदितब्बं । तेनेवाह “तत्थ परिच्चागवोस्सग्गो”तिआदि । अयं सतिसम्बोज्झङ्गोति अयं मिस्सकवसेन वुत्तो सतिसम्बोज्झङ्गो । यथावुत्तेन पकारेणाति तदङ्गप्पहानसमुच्छेदप्पहानप्पकारेन तन्निन्नतदारम्मणप्पकारेन च । पुब्बे वोस्सग्गवचनस्सेव अत्थस्स वुत्तत्ता आह “सकलेन वचनेना”ति । परिणमन्तन्ति विपस्सनाक्खणे तदङ्गतन्निन्नप्पकारेन परिणमन्तं । परिणतन्ति मग्गक्खणे समुच्छेदतदारम्मणप्पकारेन परिणतं । परिणामो नाम इध परिपाकोति आह “परिपच्चन्तं परिपक्कञ्चा”ति । परिपाको च आसेवनलाभेन लद्धसामत्थियस्स किलेसे परिच्चजितुं निब्बानं पक्खन्दितुं तिक्खविसदभावो । तेनाह “अयञ्ही”तिआदि । एस नयोति ख्वायं नयो “विवेकनिस्सित”न्तिआदिना सतिसम्बोज्झङ्गे वुत्तो, सेसेसु धम्मविचयसम्बोज्झङ्गादीसुपि एसेव नयो, एवं तत्थ नेतब्बन्ति अत्थो ।

“विवेकनिस्सित”न्तिआदीसु लब्धमानमत्थं सामञ्जसो दस्सेत्वा इदानी इधाधिप्पेतमत्थं दस्सेन्तो “इध पना”तिआदिमाह । तत्थ सब्बसङ्खतेहीति सब्बेहि पच्चयसमुप्पन्नधम्मोहि । सब्बेसन्ति सङ्खतधम्मानं । विवेकं आरम्मणं कत्वाति निब्बानसङ्घातं विवेकं आरम्मणं कत्वा । तच्च खोति तदेव सतिसम्बोज्झङ्गं ।

१३. ततिये चित्तेकग्गत्थायाति चित्तसमाधानत्थाय, दिट्ठधम्मे सुखविहारायाति अत्थो । चित्तेकग्गतासीसेन हि दिट्ठधम्मसुखविहारो वुत्तो । सुक्खविपस्सकखीणासवानं वसेन हेतं वुत्तं । ते हि समापज्जित्वा “एकग्गचित्ता सुखं दिवसं विहरिस्सामा”ति इच्चेव कसिणपरिकम्मं कत्वा अट्ठ समापत्तियो निब्बत्तेन्ति । विपस्सनापादकत्थायातिआदीसु पन सेक्खपुत्थुज्जना “समापत्तितो वुट्ठाया समाहितेन चित्तेन विपस्सामा”ति निब्बत्तेन्ता विपस्सनापादकत्थाय भावेन्ति ।

ये पन अट्ठ समापत्तियो निब्बत्तेत्वा अभिज्जापादकज्झानं समापज्जित्वा समापत्तितो वुट्ठाया “एकोपि हुत्वा बहुधा होती”ति (दी० नि० १.२३८; म० नि० १.१४७; सं० नि० २.७०; ५.८३४, ८४२) वुत्तनया अभिज्जायो पत्थेन्ता निब्बत्तेन्ति, ते अभिज्जापादकत्थाय भावेन्ति । ये अट्ठ समापत्तियो निब्बत्तेत्वा निरोधसमापत्तिं समापज्जित्वा “सत्ताहं अचित्ता हुत्वा दिट्ठेव धम्मे निरोधं निब्बानं पत्वा सुखं विहरिस्सामा”ति निब्बत्तेन्ति, ते निरोधपादकत्थाय भावेन्ति । ये पन अट्ठ समापत्तियो निब्बत्तेत्वा “अपरिहीनज्झाना ब्रह्मलोके उप्पज्जिस्सामा”ति निब्बत्तेन्ति, ते भवविसेसत्थाय भावेन्ति ।

युत्तं ताव चित्तेकग्गताय भवविसेसत्थता विय विपस्सनापादकत्थतापि चतुक्कज्झानसाधारणाति तेसं वसेन “चत्तारि ज्ञानानी”ति वचनं, अभिज्जापादकत्थता पन निरोधपादकत्थता च चतुत्थस्सेव ज्ञानस्स आवेणिका, सा कथं चतुक्कज्झानसाधारणा वुत्ताति? परम्पराधिष्ठानभावतो । पदट्ठानपदट्ठानम्पि हि पदट्ठानन्ति वुच्चति कारणकारणन्ति यथा “तिणेहि भत्तं सिद्ध”न्ति ।

१४. चतुत्थे ससकस्स उप्पतनं विय होतीति पथविजिगुच्छनससकस्स उप्पतनं विय होति । तत्थायं अत्थसल्लापिका उपमा — पथवी किर ससकं आह — “हे ससका”ति । ससको आह — “को एसो”ति । कस्मा ममेव उपरि सब्बइरियापथे कप्पेन्तो उच्चारपस्सावं करोन्तो मं न जानासीति? सुट्ठु तया अहं दिट्ठो, मया अक्कन्तट्ठानज्झि अङ्गुलगोहि फुट्ठट्ठानं विय होति, विस्सट्ठुदकं अप्पमत्तकं, करीसं कटकफलमत्तं, हत्थिअस्सादीहि पन अक्कन्तट्ठानम्पि महन्तं, पस्सावोपि नेसं घटमत्तो, उच्चारोपि पच्छिमत्तो होति, अलं मय्हं तयाति उप्पतित्वा अज्जस्मिं ठाने पतितो । ततो नं पथवी आह — “अहो दूरं गतोपि ननु मय्हंयेव उपरि पतितोसी”ति? सो पुन तं जिगुच्छन्तो उप्पतित्वा अज्जत्थ पतितो । एवं वस्ससहस्सम्पि उप्पतित्वा उप्पतित्वा पतमानो ससको नेव पथविया अन्तं पापुणितुं सक्कोति । न कोटिन्ति न पुब्बकोटिं । इतरेसन्ति विपज्चित्तज्जुनेय्यपदपरमानं ।

१५. पञ्चमे समर्थेहि अधिकरीयति वूपसम्मतीति अधिकरणं, अट्टारस भेदकरवत्थूनि निस्साय उप्पन्नो विवादोयेव **विवादाधिकरणं** । “इध भिक्खू भिक्खुं अनुवदन्ति सीलविपत्तिया वा”तिआदिना (चूळव० २१५) चतस्सो विपत्तियो निस्साय उप्पन्नो अनुवादोयेव **अनुवादाधिकरणं** । पञ्चपि आपत्तिक्खन्धा **आपत्ताधिकरणं** । “सत्तपि आपत्तिक्खन्धा आपत्ताधिकरणं”न्ति (चूळव० २१५) वचनतो आपत्तियेव **आपत्ताधिकरणं** । “या सङ्घस्स किच्चयता करणीयता अपलोकनकम्मं जत्तिकम्मं जत्तिदुतियकम्मं जत्तिचतुत्थकम्मं”न्ति (चूळव० २१५) एवमागतं चतुब्बिधं सङ्घकिच्चं **किच्चाधिकरणन्ति** वेदितव्वं । सेसमेत्थ उत्तानमेव ।

१६. छट्ठे **अपाकटनामोति** “सेलो, कूटदन्तो”तिआदिना अनभिज्जातो । **येन वा कारणेनाति** हेतुम्हि इदं करणवचनं । हेतुअत्थो हि किरियाकारणं, न करणं विय किरियत्थो, तस्मा नानप्पकारगुणविसेसाधिगमत्था इध उपसङ्कमनकिरियाति “अन्नेन वसति, अज्जेनेन वसती”तिआदीसु विय हेतुअत्थमेवेतं करणवचनं युत्तं, न करणत्थं तस्स अयुज्जमानत्ताति वुत्तं “येन वा कारणेना”ति । अविभागतो सततं पवत्तितनिरतिसयसादुविपुलामतरससद्धम्मफलताय सादुफलनिच्चफलितमहारुक्खेन भगवा उपमितो । सादुफलूपभोगाधिप्पायगहणेनेव हि रुक्खस्स सादुफलता गहिताति । **उपसङ्कमीति** उपसङ्कन्तो । सम्पत्तकामताय हि किञ्चि ठानं गच्छन्तो तंतंपदेसातिक्कमनेन उपसङ्कमि, उपसङ्कन्तोति च वत्तव्वतं लभति । तेनाह “गतोति वुत्तं होती”ति, उपगतोति अत्थो । **उपसङ्कमित्वाति** पुब्बकालकिरियानिद्देसोति आह “उपसङ्कमनपरियोसानदीपन”न्ति । ततोति यं ठानं पत्तो “उपसङ्कमी”ति वुत्तो, ततो उपगतट्ठानतो ।

यथा खमनीयादीनि पुच्छन्तोति यथा भगवा “कच्चि ते, ब्राह्मण, खमनीयं, कच्चि यापनीय”न्तिआदिना खमनीयादीनि पुच्छन्तो तेन ब्राह्मणेन सद्धिं समप्पवत्तमोदो अहोसि पुब्बभासिताय, एवं सोपि ब्राह्मणो तदनुकरणेन भगवता सद्धिं समप्पवत्तमोदो अहोसीति योजना । तं पन समप्पवत्तमोदतं उपमाय दस्सेतुं “सीतोदकं विया”तिआदि वुत्तं । तत्थ **सम्मोदितन्ति** संसन्दितं । **एकीभावन्ति** सम्मोदनकिरियाय समानतं । **खमनीयन्ति** “इदं चतुचकं नवद्वारं सरीरयन्तं दुक्खबहुलताय सभावतो दुस्सहं, कच्चि खमितुं सक्कुणेय्य”न्ति पुच्छति । **यापनीयन्ति** आहारादिप्पटिबद्धवुत्तिकं चिरप्पबन्धसङ्घाताय यापनाय कच्चि यापेतुं सक्कुणेय्यं । सीसरोगादिआबाधाभावेन **कच्चि अप्पाबाधं** । दुक्खजीविकाभावेन **कच्चि अप्पातङ्कं** । तंतंकिच्चकरणे उट्ठानसुखताय **कच्चि लहुट्ठानं** । तदनुरूपबलयोगतो **कच्चि बलं** । सुखविहारसम्भवेन **कच्चि फासुविहारो** अत्थीति सब्बत्थ कच्चि-सद्वं योजेत्वा अत्थो वेदितव्वो ।

बलप्पत्ता पीति **पीतियेव** । तरुणपीति **पामोज्जं** । सम्मोदं जनेति करोतीति सम्मोदनीकं, तदेव **सम्मोदनीयं** । सम्मोदितव्वतो सम्मोदनीयन्ति इमं पन अत्थं दस्सेतुं “सम्मोदितुं युत्तभावतो”ति आह । **सरितव्वभावतोति** अनुस्सरितव्वभावतो । “सरणीय”न्ति वत्तव्वे दीघं कत्वा “सारणीय”न्ति वुत्तं । **सुय्यमानसुखतोति** आपाथगतमधुरतं आह, **अनुस्सरियमानसुखतोति** विमद्वरमणीयतं । **व्यञ्जनपरिसुद्धतायाति** सभावनिरुत्तिभावेन तस्सा कथाय वचनचातुरियमाह । **अत्थपरिसुद्धतायाति** अत्थस्स निरुपक्विकलेसतं । **अनेकेहि परियायेहीति** अनेकेहि कारणेहि ।

अतिदूरअच्चासन्नप्पटिक्खेपेन नातिदूरं नच्चासन्नं नाम गहितं, तं पन अवकंसतो उभिन्नं पसारितहत्थासङ्घट्टेनेन दट्ठव्वं । **गीवं पसारेत्वाति** गीवं परिवट्ठनवसेन पसारेत्वा ।

एतदवोचाति एतं “को नु खो, भन्ते, हेतू”तिआदिपुच्छावचनं अवोच । तेनेव “एतदवोचा”ति पदं उद्धरित्वा **दुविधा हि पुच्छाति**आदिना पुच्छाविभागं दस्सेति । तत्थ अगारे नियुत्तो अगारिको, तस्स पुच्छा **अगारिकपुच्छा** । अगारिकतो अज्जो अनगारिको पब्बज्जूपगतो, तस्स पुच्छा **अनगारिकपुच्छा** । किञ्चापि अज्जत्थ “जनको हेतु, पग्गाहको पच्चयो ।

असाधारणो हेतु, साधारणो पच्चयो । सभागो हेतु, असभागो पच्चयो । पुब्बकालिको हेतु, सहपवत्तो पच्चयो”ति आदिना हेतुपच्चया विभज्ज वुच्चन्ति । इध पन “चत्तारो खो, भिक्खवे, महाभूता हेतु चत्तारो महाभूता पच्चयो रूपक्खन्धस्स पज्जापनाया”ति आदीसु (म० नि० ३.८६) विय हेतुपच्चयसद्वा समानत्थाति दस्सेन्तो “उभयम्पेतं कारणवेवचनमेवा”ति आह । विसमचरियाति भावनपुंसकनिदेसो ।

अभिवक्कन्ताति अतिक्कन्ता, विगताति अत्थोति आह “खये दिस्सती”ति । तथा हि “निक्खन्तो पठमो यामो”ति उपरि वुत्तं । अभिवक्कन्ततरोति अतिविय कन्ततरो मनोरमो, तादिसो च सुन्दरो भद्दको नाम होतीति आह “सुन्दरे दिस्सती”ति । कोति देवनागयक्खगन्धब्बादीसु को कतमो? मेति मम । पादानीति पादे । इद्धियाति इमाय एवरूपाय देविद्धिया । यससाति इमिना एदिसेन परिवारेन परिच्छेदेन च । जलन्ति विज्जोतमानो । अभिवक्कन्तेनाति अतिविय कन्तेन कमनीयेन अभिरूपेन । वण्णेनाति छविवण्णेन सरीरवण्णनिभाय । सब्बा ओभासयं दिसाति दस दिसा पभासेन्तो, चन्दो विय सूरियो विय च एकोभासं एकालोकं करोन्तोति गाथाय अत्थो । अभिरूपेति उल्लाररूपे सम्पन्नरूपे ।

“चोरो, चोरो; सप्पो, सप्पो”ति आदीसु भये आमेडितं । “विज्झ, विज्झ; पहर, पहरा”ति आदीसु कोधे । “साधु, साधू”ति आदीसु (म० नि० ३.२७.सं० नि० २.१२७; ३.३५; ५.१०८५) पसंसायं । “गच्छ, गच्छ; लुनाहि, लुनाही”ति आदीसु तुरिते । “आगच्छ, आगच्छा”ति आदीसु कोतूहले । “बुद्धो, बुद्धोति चिन्तेन्तो”ति आदीसु (बु० वं० २.४४) अच्छरे । “अभिवक्कमथायस्मन्तो, अभिवक्कमथायस्मन्तो”ति आदीसु हासे । “कहं एकपुत्तक, कहं एकपुत्तका”ति आदीसु (म० नि० २.३५३; सं० नि० २.६३) सोके । “अहो सुखं, अहो सुख”न्ति आदीसु (उदा० २०; दी० नि० ३.३०५; चूळव० ३३२) पसादे । च-सद्दो अवुत्तसमुच्चयतो । तेन गरहाअसम्मानादीनं सङ्गहो दट्ठब्बो । तत्थ “पापो, पापो”ति आदीसु गरहायं । “अभिरूपक, अभिरूपका”ति आदीसु असम्माने दट्ठब्बं ।

नयिदं आमेडितवसेन द्विक्खत्तुं वुत्तं, अथ खो अत्थद्वयवसेनाति दस्सेन्तो “अथ वा”ति आदिमाह । “अभिवक्कन्त”न्ति वचनं अपेक्खित्वा नपुंसकवसेन वुत्तं, तं पन भगवतो वचनं धम्मस्स देसनाति कत्वा तथा वुत्तं “भोतो गोतमस्स धम्मदेसना”ति । दुतियपदेपि एसेव नयो । दोसनासनतोति रागादिकिलेसविधमनतो । गुणाधिगमनतोति सीलादिगुणानं सम्पापनतो । ये गुणे देसना अधिगमेति, तेसु पधानभूते ताव दस्सेतुं “सद्भाजननतो पज्जाजननतो”ति वुत्तं । सद्भापमुखा हि लोकिया गुणा, पज्जापमुखा लोकुत्तरा ।

सीलादिअत्थसम्पत्तिया सात्थतो, सभावनिरुत्तिसम्पत्तिया सब्यज्जनतो । सुविज्जेय्यसद्वप्ययोगताय उत्तानपदतो, सण्हसुखमभावेन दुविज्जेय्यत्थताय गम्भीरत्थतो । सिनिद्धमुदुमधुरसद्वप्ययोगताय कण्णसुखतो, विपुलविसुद्धपेमनीयत्थताय हृदयङ्गमतो । मानातिमानविधमनेन अनत्तुक्कंसनतो, थम्भसारम्भनिम्मदनेन अपरवम्भनतो । हिताधिप्पायप्पवत्तिया परेसं रागपरिळाहादिवूपसमनेन करुणासीतलतो, किलेसन्धकारविधमनेन पज्जावदाततो । करवीकरुतमज्जुताय आपाथरमणीयतो, पुब्बापराविरूद्धसुविसुद्धत्थताय विमदक्खमतो । आपाथरमणीयताय एवं सुय्यमानसुखतो, विमदक्खमताय हितज्झासयप्पवत्तितताय च वीमंसियमानहिततो । एवमादीहीति आदि-सद्देन संसारचक्कनिवत्तनतो, सद्धम्मचक्कप्पवत्तनतो, मिच्छावादविगमनतो, सम्मावादपतिट्ठापनतो, अकुसलमूलसमुद्धरणतो, कुसलमूलसंरोपनतो, अपायद्वारपिधानतो, सगगमोक्खद्वारविवरणतो, परियुट्ठानवूपसमनतो, अनुसयसमुग्घातनतोति एवमादीनं सङ्गहो दट्ठब्बो ।

अधोमुखदुपितन्ति केनचि अधोमुखं ठपितं । हेट्टामुखजातन्ति सभावेनेव हेट्टामुखजातं । उपरिमुखन्ति उद्धंमुखं ।

उग्घाटेय्याति विवटं करेय्य । हत्थे गहेत्वाति “पुरत्थाभिमुखो उत्तराभिमुखो वा गच्छा”ति आदीनि अवत्वा हत्थे गहेत्वा “निस्सन्देहं एस मग्गो, एवं गच्छेय्या”ति वदेय्य । काळपक्खचातुदसीति काळपक्खे चातुदसी ।

निककुज्जितं आधेय्यस्स अनाधारभूतं भाजनं आधारभावापादनवसेन उक्कुज्जेय्य । हेट्टामुखजातताय सद्धम्मविमुखं, अधोमुखठपितताय असद्धम्मे पतितन्ति एवं पदद्वयं यथारहं योजेतब्बं, न यथासङ्ख्यं । कामं कामच्छन्दादयोपि पटिच्छादका नीवरणभावतो, मिच्छादिट्ठि पन सविसेसं पटिच्छादिका सत्ते मिच्छाभिनिवेसनवसेनाति आह “मिच्छादिट्ठिगहनपटिच्छन्न”न्ति । तेनाह भगवा “मिच्छादिट्ठिपरमाहं, भिक्खवे, वज्जं वदामी”ति (अ० नि० १.३१०) । सब्बो अपायगामिमग्गो कुम्मग्गो “कुच्छितो मग्गो”ति कत्वा । सम्मादिट्ठिआदीनं उजुपटिपक्खताय मिच्छादिट्ठिआदयो अट्ठ मिच्छत्तधम्मा मिच्छामग्गो । तेनेव हि तदुभयप्पटिपक्खतं सन्धाय “सग्गमोक्खमग्गं आविकरोन्तेना”ति वुत्तं । सप्पिआदिसन्निस्सयो पदीपो न तथा उज्जलो, यथा तेलसन्निस्सयोति तेलपज्जोतग्गहणं । एतेहि परियायेहीति एतेहि निककुज्जितुक्कुज्जनप्पटिच्छन्नविवरणादिउपमोपमितब्बाकारेहि ।

पसन्नकारन्ति पसन्नेहि कातब्बं सक्कारं । सरणन्ति पटिसरणं । तेनाह “परायण”न्ति । परायणभावो च अनत्थनिसेधनेन अत्थसम्पटिपादनेन च होतीति आह “अघस्स, ताता, हितस्स च विधाता”ति । अघस्साति दुक्खतोति वदन्ति, पापतोति पन अत्थो युत्तो । निस्सक्के चेत्तं सामिवचनं । एत्थ च नायं गमि-सद्धो नी-सद्धादयो विय द्विकम्मको, तस्मा यथा “अजं गामं नेती”ति वुच्चति, एवं “भगवन्तं सरणं गच्छामी”ति वत्तुं न सक्का । “सरणन्ति गच्छामी”ति पन वत्तब्बं । इति-सद्धो चेत्थ लुत्तनिद्धिट्ठो । तस्स चायमत्थो — गमनञ्च तदधिप्पायेन भजनं जाननं वाति दस्सेन्तो “इति इमिना अधिप्पायेना”ति आदिमाह । तत्थ भजामीति आदीसु पुरिमस्स पुरिमस्स पच्छिमं पच्छिमं अत्थवचनं । भजनं वा सरणाधिप्पायेन उपसङ्गमनं । सेवनं सन्तिकावचरता । पयिरुपासनं वत्तप्पटिवत्तकरणेन उपट्ठानन्ति एवं सब्बथापि अनञ्जसरणतंयेव दीपेति । “गच्छामी”ति पदस्स बुज्झामीति अयमत्थो कथं लब्धतीति आह “येसं ही”ति आदि ।

अधिगतमग्गे सच्छिकतनिरोधेति पदद्वयेनपि फलट्ठा एव दस्सिता, न मग्गट्ठाति ते दस्सेन्तो “यथानुसिद्धं पटिपज्जमाने चा”ति आह । ननु च कल्याणपुथुज्जनोपि यथानुसिद्धं पटिपज्जतीति वुच्चतीति? किञ्चापि वुच्चति, निप्परियायेन पन मग्गट्ठा एव तथा वत्तब्बा, न इतरे सम्मत्तनियामोक्कमनाभावतो । तथा हि ते एव वुत्ता “अपायेसु अपतमाने धारेती”ति । सम्मत्तनियामोक्कमनेन हि अपायविनिमुत्तिसम्भवो । अक्खायतीति एत्थ इति-सद्धो आद्यत्थो, पकारत्थो वा । तेन “यावता, भिक्खवे, धम्मा सङ्गता वा असङ्गता वा, विरागो तेसं अग्गमक्खायती”ति (इतिवु० ९०; अ० नि० ४.३४) सुत्तपदं सङ्गण्हाति, “वित्थारो”ति वा इमिना । एत्थ च अरियमग्गो निय्यानिकताय, निब्बानं तस्स तदत्थसिद्धिहेतुतायाति उभयमेव निप्परियायेन धम्मोति वुत्तो । निब्बानज्झि आरम्भणपच्चयभूतं लभित्वा अरियमग्गो तदत्थसिद्धिया संवत्तति, तथापि यस्मा अरियफलानं “ताय सद्धाय अवूपसन्ताया”ति आदिवचनतो मग्गेन समुच्छिन्नानं किलेसानं पटिप्पस्सद्धिप्पहानकिच्चताय निय्यानानुगुणताय निय्यानपरियोसानताय च । परियत्तिधम्मस्स पन निय्यानिकधम्मसमधिगमहेतुतायाति इमिना परियायेन वुत्तनयेन धम्मभावो लब्धति एव । स्वायमत्थो पाठारुळ्हो एवाति दस्सेन्तो “न केवल”न्ति आदिमाह ।

कामरागो भवरागोति एवमादिभेदो सब्बोपि रागो विरज्जति पहीयति एतेनाति रागविरागोति मग्गो कथितो । एजासङ्घाताय तण्हाय अन्तोनिज्झानलक्खणस्स सोकस्स च तदुप्पत्तियं सब्बसो परिक्खीणत्ता अनेजमसोकन्ति फलं कथितं । अप्पटिकूलन्ति अविरोधदीपनतो केनचि अविरुद्धं, इट्ठं पणीतन्ति वा अत्थो । पगुणरूपेन पवत्तितत्ता,

पकट्टगुणविभावनतो वा **पगुणं** । सब्बधम्मकखन्धा कथिताति योजना ।

दिट्ठिसीलसङ्घातेनाति “यायं दिट्ठि अरिया निय्यानिका निय्याति तक्करस्स सम्मा दुक्खक्खयाय, तथारूपाय दिट्ठिया दिट्ठिसामज्जगतो विहरती”ति (दी० नि० ३.३२४, ३५७; म० नि० १.४९२; ३.५४; अ० नि० ६.१२; परि० २७४) एवं वुत्ताय दिट्ठिया, “यानि तानि सीलानि अखण्डानि अच्छिद्धानि असबलानि अकम्मासानि भुजिस्सानि विज्जुप्पसत्थानि अपरामद्धानि समाधिसंवत्तनिकानि, तथारूपेहि सीलेहि सीलसामज्जगतो विहरती”ति (दी० नि० ३.३२४; म० नि० १.४९२; ३.५४; अ० नि० ६.१२; परि० २७४) च एवं वुत्तानं सीलानञ्च संहतभावेन, दिट्ठिसीलसामज्जेनाति अत्थो । **संहतो**ति घटितो, समेतोति अत्थो । अरियपुग्गला हि यत्थ कत्थचि दूरे ठितापि अत्तनो गुणसामग्गिया संहता एव । **अट्ट च पुग्गल धम्मदसा** तेति ते पुरिसयुगवसेन चत्तारोपि पुग्गलवसेन अट्टेव अरियधम्मस्स पच्चक्खदस्साविताय धम्मदसा । तीणि वत्थूनि सरणन्ति गमनेन तिक्खत्तुं गमनेन च **तीणि सरणगमनानि** । **पटिवेदेसी**ति अत्तनो हृदयगतं वाचाय पवेदेसि ।

सरणगमनस्स विसयप्पभेदफलसंकिलेसभेदानं विय कत्तुविभावना तत्थ कोसल्लाय होतीति सरणगमनेसु अत्थकोसल्लत्थं “**सरणं, सरणगमनं, यो च सरणं गच्छति, सरणगमनप्पभेदो, सरणगमनफलं, संकिलेसो, भेदोति अयं विधि वेदितब्बो**”ति वुत्तं तेन विना सरणगमनस्सेव असम्भवतो । कस्मा पनेत्थ वोदानं न गहितं, ननु वोदानविभावनापि तत्थ कोसल्लाय होतीति? सच्चमेतं, तं पन संकिलेसग्गहणेन अत्थतो दीपितं होतीति न गहितं । यानि हि नेसं संकिलेसकारणानि अज्जाणादीनि, तेसं सब्बेन सब्बं अनुप्पन्नानं अनुप्पादनेन, उप्पन्नानञ्च पहानेन वोदानं होतीति ।

हिंसत्थस्स धातुसदस्स वसेनेतं पदं दट्ठब्बन्ति “**हिंसतीति सरणं**”न्ति वत्त्वा तं पन हिंसनं केसं, कथं, कस्स वाति चोदनं सोधेन्तो “**सरणगतानं**”न्ति आदिमाह । तत्थ भयन्ति वट्ठभयं । **सन्तासन्ति** चित्तुत्रासं । तेनेव चेतसिकदुक्खस्स गहितत्ता **दुक्खन्ति** कायिकं दुक्खं । **दुग्गतिपरिकिलेसन्ति** दुग्गतिपरियापन्नं सब्बम्पि दुक्खं । तयिदं सब्बं परतो **फलकथाय** आवि भविस्सति । **एतन्ति** सरणन्ति पदं । एवं अविसेसतो सरणसदस्स पदत्थं दस्सेत्वा इदानि विसेसतो दस्सेत्तुं “**अथ वा**”ति आदि वुत्तं । **हिते पवत्तनेनाति** “सम्पन्नसीला, भिक्खवे, विहरथा”ति आदिना (म० नि० १.६४, ६९) अत्थे नियोजनेन । **अहिता निवत्तनेनाति** “पाणातिपातस्स खो पापको विपाको अभिसम्पराय”न्ति आदिना आदीनवदस्सनादिमुखेन अनत्थतो निवत्तनेन । **भयं हिंसतीति** हिताहितेसु अप्पवत्तिप्पवत्तिहेतुकं ब्यसनं अप्पवत्तिकरणेन विनासेति बुद्धो । **भवकन्तारा उत्तारणेन** मग्गसङ्घातो धम्मो । इतरो अस्सासदानेन सत्तानं भयं हिंसतीति योजना । **कारानन्ति** दानवसेन पूजावसेन च उपनीतानं सक्कारानं । **विपुलफलप्पटिलाभकरणेन** सत्तानं भयं हिंसति सङ्घो अनुत्तरदक्खिण्येय्यभावतोति अधिप्पायो । **इमिनापि परियायेनाति** इमिनापि विभजित्वा वुत्तेन कारणेन ।

“सम्मासम्बुद्धो भगवा, स्वाक्खातो धम्मो, सुप्पटिपन्नो सङ्घो”ति एवं पवत्तो तत्थ रतनत्तये पसादो तप्पसादो, तदेव रत्तनत्तयं गरु एतस्साति तग्गरु, तब्भावो तग्गरुता, तप्पसादो च तग्गरुता च तप्पसादतग्गरुता । ताहि **तप्पसादतग्गरुताहि** । विधुतदिट्ठिविचिकिच्छासम्मोहअस्सद्धियादिताय **विहतकिलेसो** । तदेव रतनत्तयं परायणं गति ताणं लेणन्ति एवं पवत्तिया **तप्परायणताकारप्पवत्तो चित्तुप्पादो सरणगमनं** सरणन्ति गच्छति एतेनाति । **तंसमङ्गी**ति तेन यथावुत्तचित्तुप्पादेन समन्नागतो । **एवं उपेतीति** एवं भजति सेवति पयिरुपासति, एवं वा जानाति बुज्झतीति एवमत्थो वेदितब्बो ।

एत्थ च पसादग्गहणेन लोकियसरणगमनमाह । तज्हि पसादप्पधानं । गरुताग्गहणेन लोकुत्तरं । अरिया हि

रतनत्तयगुणाभिज्जताय पासाणच्छत्तं पिय गरुं कत्वा पस्सन्ति, तस्मा तप्पसादेन विक्खम्भनवसेन विहतकिलेसो, तग्गरुताय समुच्छेदवसेनाति योजेतब्बं अगारवकरणहेतूनं समुच्छिन्दनतो। तप्परायणता पनेत्थ तग्गतिकताति ताय चतुब्बिधम्पि वक्खमानं सरणगमनं गहितन्ति दट्ठब्बं। अविसेसेन वा पसादगरुता जोतिताति पसादग्गहणेन अवेच्चप्पसादस्स इतरस्स च गहणं, तथा गरुतागहणेनाति उभयेनपि उभयं सरणगमनं योजेतब्बं।

मग्गक्खणे इज्झतीति योजना। **निब्बानारम्मणं** हुत्वाति एतेन अत्थतो चतुसच्चाधिगमो एव लोकुत्तरसरणगमनन्ति दस्सेति। तत्थ हि निब्बानधम्मो सच्छिकिरियाभिसमयवसेन, मग्गधम्मो भावनाभिसमयवसेन पटिविज्झियमानोयेव सरणगमनत्तं साधेति, बुद्धगुणा पन सावकगोचरभूता परिज्जाभिसमयवसेन, तथा अरियसङ्गुणा। तेनाह “**किच्चतो सकलेपि रतनत्तये इज्झती**”ति। इज्झन्तज्ज सहेव इज्झति, न लोकियं विय पटिपाटिया असम्मोहप्पटिवेधेन पटिविद्धत्ताति अधिप्पायो। ये पन वदन्ति “न सरणगमनं निब्बानारम्मणं हुत्वा पवत्तति, मग्गस्स अधिगतत्ता पन अधिगतमेव होति एकच्चानं तेविज्जादीनं लोकियविज्जादयो विया”ति, तेसं लोकियमेव सरणगमनं सिया, न लोकुत्तरं, तज्ज अयुत्तं दुविधस्सपि इच्छितब्बत्ता।

तन्ति लोकियसरणगमनं। **सद्धापटिलाभो** “सम्मासम्बुद्धो भगवा”तिआदिना। **सद्धामूलिका**ति यथावुत्तसद्धापुब्बङ्गमा। **सम्मादिट्ठि** बुद्धसुबुद्धत्तं, धम्मसुधम्मत्तं, सङ्गसुप्पटिपत्तिज्ज लोकियावबोधवसेनेव सम्मा जायेन दस्सनतो। **सद्धामूलिका च सम्मादिट्ठी**ति एतेन सद्धूपनिस्सया यथावुत्तलक्खणा पज्जा लोकियसरणगमनन्ति दस्सेति। तेनाह “**दिट्ठिजुकम्मन्ति वुच्चती**”ति। दिट्ठियेव अत्तनो पच्चयेहि उजु करीयतीति कत्वा, दिट्ठि वा उजु करीयति एतेनाति **दिट्ठिजुकम्मं**, तथापवत्तो चित्तुप्पादो। एवज्ज कत्वा “तप्परायणताकारप्पवत्तो चित्तुप्पादो”ति इदज्ज वचनं समत्थितं होति, सद्धापुब्बङ्गमसम्मादिट्ठिग्गहणं पन चित्तुप्पादस्स तप्पधानतायाति दट्ठब्बं। **सद्धापटिलाभो**ति इमिना मातादीहि उस्साहितदारकादीनं विय जाणविप्पयुत्तं सरणगमनं दस्सेति, **सम्मादिट्ठी**ति इमिना जाणसम्पयुत्तं सरणगमनं।

तयिदं लोकियं सरणगमनं। अत्ता सन्निय्यातीयति अप्पीयति परिच्चजीयति एतेनाति **अत्तसन्निय्यातनं**, यथावुत्तं दिट्ठिजुकम्मं। तं रतनत्तयं परायणं पटिसरणं एतस्साति तप्परायणो, पुग्गलो चित्तुप्पादो वा, तस्स भावो **तप्परायणता**, यथावुत्तं दिट्ठिजुकम्ममेव। सरणन्ति अधिप्पायेन सिस्सभावं अन्तेवासिकभावं उपगच्छति एतेनाति **सिस्सभावूपगमनं**। सरणगमनाधिप्पायेनेव पणिपतति एतेनाति **पणिपातो**। सब्बत्थ यथावुत्तदिट्ठिजुकम्मवसेनेव अत्थो वेदितब्बो। **अत्तपरिच्चजनन्ति** संसारदुक्खनिस्सरणत्थं अत्तनो अत्थभावस्स परिच्चजनं। एस नयो सेसेसुपि। **बुद्धादीनंयेवाति** अवधारणं अत्तसन्निय्यातनादीसुपि तत्थ तत्थ वत्तब्बं। एवज्जि तदज्जनिवत्तनं कतं होति।

एवं अत्तसन्निय्यातनादीनि एकेन पकारेन दस्सेत्वा इदानी अपरेहिपि पकारेहि दस्सेतुं “**अपिचा**”तिआदि आरब्धं। तेन परियायन्तरेहिपि अत्तसन्निय्यातनं कतमेव होति अत्थस्स अभिन्नत्ताति दस्सेति। **आळवकादीनन्ति आदि-**सद्देन सातागिरिहेमवतादीनं सङ्गहो दट्ठब्बो। ननु चेते आळवकादयो मग्गेनेव आगतसरणगमना, कथं तेसं तप्परायणतासरणगमनं वुत्तन्ति? मग्गेनागतसरणगमनेहिपि “सो अहं विचरिस्सामि...पे०... सुधम्मत्तं (सं० नि० १.२४६; सु० नि० १९४)। ते मयं विचरिस्साम, गामा गामं नगा नगं...पे०... सुधम्मत्त”न्ति (सु० नि० १८२) च तेहि तप्परायणताकारस्स पवेदितत्ता तथा वुत्तं।

सो पनेस जाति...पे०... वसेनाति एत्थ जातिवसेन, भयवसेन, आचरियवसेन, दक्खिण्येयवसेनाति पच्चेकं “वसेना”ति पदं योजेतब्बं। तत्थ **जातिवसेनाति** जातिभाववसेन। एवं सेसेसुपि। **दक्खिण्येयपणिपातेनाति**

दक्खिण्येय्यताहेतुकेन पणिपतनेनाति अत्थो । इतरेहीति जातिभावादिवसप्पवत्तेहि तीहि पणिपातेहि । इतरेहीतिआदिना सङ्खेपतो वुत्तमत्थं वित्थारतो दस्सेतुं “तस्मा”तिआदि वुत्तं । वन्दतीति पणिपातस्स लक्खणवचनं । एवरूपन्ति दिट्ठधम्मिकं सन्धाय वदति । सम्परायिकज्झि निय्यानिकं वा अनिय्यानिकं वा अनुसासनिं पच्चासीसन्तो दक्खिण्येय्यपणिपातमेव करोतीति अधिप्पायो । सरणगमनप्यभेदोति सरणगमनविभागो ।

अरियमग्गो एव लोकोत्तरं सरणगमनन्ति आह “चत्तारि सामञ्जफलानि विपाकफल”न्ति । सब्बदुक्खक्खयोति सकलस्स वट्ठदुक्खस्स अनुप्पादनरोधो । एतन्ति “चत्तारि अरियसच्चानि, सम्मपञ्जाय पस्सती”ति (ध० प० १९०) एवं वुत्तं अरियसच्चानं दस्सनं ।

निच्चतो अनुपगमनादिवसेनाति निच्चन्ति अगगहणादिवसेन । अट्टानन्ति हेतुप्पटिक्खेपो । अनवकासोति पच्चयप्पटिक्खेपो । उभयेनपि कारणमेव पटिक्खिपति । यन्ति येन कारणेन । दिट्ठिसम्पन्नोति मग्गदिट्ठिया समन्नागतो सोतापन्नो । कज्झि सङ्खारन्ति चतुभूमकेसु सङ्खतसङ्खारेसु एकसङ्खारम्पि । निच्चतो उपगच्छेय्याति निच्चोति गणहेय्य । सुखतो उपगच्छेय्याति “एकन्तसुखी अत्ता होति अरोगो परं मरणा”ति (दी० नि० १.७६, ७९) एवं अत्तदिट्ठिवसेन सुखतो गाहं सन्धयेतं वुत्तं । दिट्ठिविप्पयुत्तचित्तेन पन अरियसावको परिळाहवूपसमनत्थं मत्तहत्थिपरितासितो विय चोक्खब्राह्मणो उक्कारभूमिं कज्झि सङ्खारं सुखतो उपगच्छति । अत्तवारे कसिणादिपञ्चत्तिसङ्गहत्थं “सङ्खार”न्ति अवत्वा “कज्झि धम्म”न्ति वुत्तं । इमेसुपि ठानेसु चतुभूमकवसेनेव परिच्छेदो वेदितब्बो तेभूमकवसेनेव वा । यं यज्झि पुथुज्जनो गाहवसेन गणहाति, ततो ततो अरियसावको गाहं विनिवेठेति ।

मातरन्तिआदीसु जनिका माता, जनको पिता, मनुस्सभूतो खीणासवो अरहाति अधिप्पेतो । किं पन अरियसावको अज्जं जीविता वोरोपेय्याति? एतम्पि अट्टानं, पुथुज्जनभावस्स पन महासावज्जभावदस्सनत्थं अरियभावस्स च फलदस्सनत्थं एवं वुत्तं । पदुट्ठचित्तोति वधकचित्तेन पदुट्ठचित्तो । लोहितं उप्पादेय्याति जीवमानकसरीरे खुद्दकमक्खिकाय पिवनमत्तम्पि लोहितं उप्पादेय्य । सङ्खं भिन्देय्याति समानसंवासकं समानसीमायं ठितं सङ्खं “कम्मेन उदेसेन वोहरन्तो अनुस्सावनेन सलाकगाहेना”ति (परि० ४५८) एवं वुत्तेहि पञ्चहि कारणेहि भिन्देय्य । अज्जं सत्थारन्ति अज्जं तित्थकरं “अयं मे सत्था”ति एवं गणहेय्याति नेतं ठानं विज्जतीति अत्थो ।

न ते गमिस्सन्ति अपायन्ति ते बुद्धं सरणं गता तन्निमित्तं अपायं न गमिस्सन्ति, देवकायं पन परिपूरेस्सन्तीति अत्थो । दसहि ठानेहीति दसहि कारणेहि । अधिगणहन्तीति अधिभवन्ति ।

वेलामसुत्तादिवसेनाति एत्थ “करीसस्स चतुत्थभागप्पमाणानं चतुरासीतिसहस्ससङ्खानं सुवण्णपातिरूपियपातिकंसपातीनं यथाक्कमं रूपियसुवण्णहिरज्जपूरानं सब्बालङ्कारप्पटिमण्डितानं चतुरासीतिया हत्थिसहस्सानं, चतुरासीतिया अस्ससहस्सानं, चतुरासीतिया रथसहस्सानं, चतुरासीतिया धेनुसहस्सानं, चतुरासीतिया कज्जासहस्सानं, चतुरासीतिया पल्लङ्कसहस्सानं, चतुरासीतिया वत्थकोटिसहस्सानं, अपरिमाणस्स च खज्जभोज्जादिभेदस्स आहारस्स परिच्चजनवसेन सत्तमासाधिकानि सत्त संवच्छरानि निरन्तरं पवत्तवेलाममहादानतो एकस्स सोतापन्नस्स दिन्नदानं महप्फलतरं । ततो सतं सोतापन्नानं दिन्नदानतो एकस्स सकदागामिनो, ततो एकस्स अनागामिनो, ततो एकस्स अरहतो, ततो एकस्स पच्चेकबुद्धस्स, ततो सम्मासम्बुद्धस्स, ततो बुद्धप्पमुखस्स सङ्खस्स दिन्नदानं महप्फलतरं, ततो चातुद्दिसं सङ्खं उद्दिस्स विहारकरणं, ततो सरणगमनं महप्फलतरं”न्ति इममत्थं पकासेन्तस्स वेलामसुत्तस्स (अ० नि० ९.२०) वसेन । वुत्तज्हेतं “यं, गहपति, वेलामो ब्राह्मणो दानं अदासि महादानं, यो एकं दिट्ठिसम्पन्नं

भोजेय्य, इदं ततो महप्फलतर”न्तिआदि (अ० नि० ९.२०)। **वेलामसुत्तादीति आदि-**सद्देन अगगप्पसादसुत्तादीनं (अ० नि० ४.३४; इतिवु० ९०) सङ्गहो दट्ठब्बो।

अज्जाणं वत्थुत्तयस्स गुणानं अजाननं तत्थ सम्मोहो, “बुद्धो नु खो, न नु खो”तिआदिना विचिकिच्छा **संसयो। मिच्छाज्जाणं** तस्स गुणानं अगुणभावपरिकप्पनेन विपरीतग्गाहो। **आदि-**सद्देन अनादरागारवादीनं सङ्गहो। **न महाजुतिकन्ति** न उज्जलं, अपरिसुद्धं अपरियोदातन्ति अत्थो। **न महाविप्फारन्ति** अनुळारं। **सावज्जोति** दिट्ठितण्हादिवसेन सदोसो। लोकियं सरणगमनं सिक्खासमादानं विय अगगहितकालपरिच्छेदं जीवितपरियन्तमेव होति, तस्मा तस्स खन्धभेदेन भेदोति आह “**अनवज्जो कालकिरियाया**”ति। **सोति** अनवज्जो सरणगमनभेदो। सतिपि अनवज्जत्ते इट्ठफलोपि न होतीति आह “**अफलो**”ति। कस्मा? **अविपाकत्ता**। न हि तं अकुसलन्ति।

को उपासकोति सरूपपुच्छा, तस्मा “किंलक्खणो उपासको”ति वुत्तं होति। **कस्माति** हेतुपुच्छा। तेन केन पवत्तिनिमित्तेन उपासकसद्दो तस्मिं पुग्गले निरुळ्होति दस्सेति। तेनाह “**कस्मा उपासकोति वुच्चती**”ति। सद्दस्स अभिधेय्यो पवत्तिनिमित्तं तदत्थस्स तब्भावकारणं। **किमस्स सीलन्ति** कीदिसं अस्स उपासकस्स सीलं, कित्तेन सीलेनायं सीलसम्पन्नो नाम होतीति अत्थो। **को आजीवोति** को अस्स सम्माआजीवो? सो पन मिच्छाजीवस्स परिवज्जनेन होतीति सोपि विभजीयतीति। **का विपत्तीति** का सीलस्स, आजीवस्स वा विपत्ति। अनन्तरस्स हि विधि वा पटिसेधो वाति। **का सम्पत्तीति** एत्थापि एसेव नयो।

यो कोचीति खत्तियादीसु यो कोचि। तेन सरणगमनमेवेत्थ कारणं, न जातिआदिविसेसोति दस्सेति। **उपासनतोति** तेनेव सरणगमनेन तत्थ च सक्कच्चकिरियाय आदरगारवबहुमानादियोगेन पथिरुपासनतो। **वेरमणियोति** वेरं वुच्चति पाणातिपातादिदुस्सील्यं, तस्स मणनतो हननतो विनासनतो वेरमणियो, पञ्च विरतियो विरतिप्पधानत्ता तस्स सीलस्स। तेनेवाह “**पटिविरतो होती**”ति।

मिच्छावणिज्जाति न सम्मावणिज्जा अयुत्तवणिज्जा असारुप्पवणिज्जा। **पहायाति** अकरणेनेव पजहित्वा। **धम्मेनाति** धम्मतो अनपेतेन। तेन अज्जम्पि अधम्मिकं जीविकं पटिक्खपति। **समेनाति** अविसमेन। तेन कायविसमादिदुच्चरितं वज्जेत्वा कायसमादिना सुचरितेन आजीवं दस्सेति। **सत्थवणिज्जाति** आयुधभण्डं कत्वा वा कारेत्वा वा यथाकतं वा पटिलभित्वा तस्स विक्कयो। **सत्तवणिज्जाति** मनुस्सविक्कयो। **मंसवणिज्जाति** सूनकारादयो विय मिगसूकरादिके पोसेत्वा मंसं सम्पादेत्वा विक्कयो। **मज्जवणिज्जाति** यं किञ्चि मज्जं योजेत्वा तस्स विक्कयो। **विसवणिज्जाति** विसं योजेत्वा विसं गहेत्वा वा तस्स विक्कयो। तत्थ सत्थवणिज्जा परोपरोधनिमित्तताय अकरणीया वुत्ता। सत्तवणिज्जा अभुजिस्सभावकरणतो, मंसविसवणिज्जा वधहेतुतो, मज्जवणिज्जा पमादट्ठानतो।

तस्सेवाति पञ्चवेरमणिलक्खणस्स सीलस्स चेव पञ्चमिच्छावणिज्जालक्खणस्स आजीवस्स च। **विपत्तीति** भेदो पकोपो च। **यायाति** याय पटिपत्तिया। **चण्डालोति** उपासकचण्डालो। **मलन्ति** उपासकमलं। **पटिकुट्ठोति** उपासकनिहीनो। बुद्धादीसु कम्मकम्मफलेसु च सद्भावविपरियायो अस्सद्ध्यं मिच्छाधिमोक्खो, यथावुत्तेन अस्सद्ध्येन समन्नागतो **अस्सद्दो**। यथावुत्तसीलविपत्तिआजीवविपत्तिवसेन **दुस्सीलो**। “इमिना दिट्ठादिना इदं नाम मङ्गलं होती”ति — एवं बालजनपरिकप्पितकोतूहलसङ्घातेन दिट्ठसुतमुतमङ्गलेन समन्नागतो **कोतूहलमङ्गलिको**। **मङ्गलं पच्चेतीति** दिट्ठमङ्गलादिभेदं मङ्गलमेव पत्तियायति। **नो कम्मन्ति** कम्मस्सकतं नो पत्तियायति। **इतो बहिद्धाति** इतो सब्बज्जुबुद्धसासनतो बहिद्धा बाहिरकसमये। **दक्खिणेय्यं परियेसतीति** दुप्पटिपन्नं दक्खिणारहसज्जी गवेसति। **पुब्बकारं**

करोतीति दानमाननादिकं कुसलकिरियं पठमतरं करोति । एत्थ च दक्खिण्यपरियेसनपुब्बकारे एकं कत्वा पञ्च धम्मा वेदितब्बा ।

विपत्तियं वृत्तविपरियायेन सम्पत्तिं वेदितब्बा । अयं पन विसेसो — चतुन्नम्पि परिसानं रतिजननद्वेन उपासकोव रतनं उपासकरतनं । गुणसोभाकित्तिसद्वसुगन्धताहि उपासकोव पदुमं उपासकपदुमं । तथा उपासकपुण्डरीको ।

आदिम्हीति आदिअत्थे । कोटियन्ति परियन्तकोटियं । विहारग्गेनाति ओवरककोट्टासेन, “इमस्मिं गब्भे वसन्तानं इदं नाम फलं पापुणाती”तिआदीना तं तं वसनट्टानकोट्टासेनाति अत्थो । अज्जतन्ति अज्ज इच्चेव अत्थो ।

पाणेहि उपेतन्ति इमिना तस्स सरणगमनस्स आपाणकोटिकतं दस्सेन्तो “याव मे जीवितं पवत्तती”तिआदीनि वत्वा पुन जीवितेनपि तं वत्थुत्तयं पटिपूजेन्तो सरणगमनं रक्खामीति उप्पन्नं तस्स ब्राह्मणस्स अधिप्पायं विभावेन्तो “अहज्ही”तिआदिमाह । पाणेहि उपेतन्ति हि याव मे पाणा धरन्ति, ताव सरणं उपेतं । उपेन्तो च न वाचामत्तेन न एकवारं चित्तुप्पादमत्तेन, अथ खो पाणानं परिच्चजनवसेनपि यावजीवं उपेतन्ति एवमेत्थ अत्थो वेदितब्बो ।

१७-१९. सत्तमे जाणुस्सोणीति नेतं तस्स मातापितूहि कतं नामं, अपिच खो ठानन्तरप्पटिलाभलद्धन्ति दस्सेन्तो आह “जाणुस्सोणीति ठानन्तरं किरा”तिआदि । एकं ठानन्तरन्ति एकं पुरोहितट्टानं । उण्हीसआदिककुधभण्डेहि सद्धिं लद्धं तथा चस्स रज्जा दिन्नन्ति वदन्ति । तेनाह “रज्जो सन्तिके च लद्धजाणुस्सोणिसक्कारत्ता”ति । सेसमेत्थ उत्तानमेव । अट्टमनवमेसु नत्थि वत्तब्बं ।

२०-२१. दसमे दुन्निक्खित्तन्ति दुट्ठु निक्खित्तं पदपच्चाभट्ठं कत्वा मनसि ठपितं । पज्जति जायति अत्थो एतेनाति पदं, अत्थं ब्यज्जयति पकासेतीति ब्यज्जनं, पदमेव । तेनेवाह “उप्पटिपाटिया...पे०... ब्यज्जनन्ति वुच्चती”ति । पदसमुदायव्यतिरेकेन विसुं पाळि नाम नत्थीति आह “उभयमेतं पाळियाव नाम”न्ति । पकट्टानज्झि वचनप्पबन्धानं आळियेव पाळीति वुच्चति । सेसमेत्थ एकादसमज्ज उत्तानत्थमेव ।

अधिकरणवग्गवण्णना निट्ठिता ।

३. बालवग्गवण्णना

२२-२४. ततियस्स पठमदुतियततियानि उत्तानत्थानेव ।

२५. चतुत्थे नेतब्बोति अज्जतो आहरित्वा बोधेतब्बो, जापेतब्बोति अत्थो ।

२७. छट्ठे नो चेपि पटिच्छादेत्वा करोन्तीति पाणातिपातादीनि करोन्तो सचेपि अप्पटिच्छादेत्वा करोन्ति । पटिच्छन्नमेवाति विज्जूहि गरहितब्बभावतो पटिच्छादनारहत्ता पटिच्छन्नमेवाति वुच्चति । अवीचिआदयो पदेसविसेसा तत्थूपपन्ना सत्ता च निरयग्गहणेन गहिताति आह “निरयोति सहोकासका खन्धा”ति । तिरच्छानयोनि नाम विसुं पदेसविसेसो नत्थीति आह “तिरच्छानयोनियं खन्धाव लब्धन्ती”ति ।

३१. दसमे अत्थो फलं तदधीनवृत्तिताय वसो एतस्साति अत्थवसो, हेतूति आह “अत्थवसेति कारणानी”ति ।

अरञ्जवनपत्थानीति अरञ्जलक्खणप्पत्तानि वनपत्थानि । वनपत्थ-सद्वो हि सण्डभूते रुक्खसमूहेषि वत्ततीति अरञ्जगहणं । वनीयति विवेककामेहि भजीयति, वनुते वा ते अत्तसम्पत्तिया वसनत्थाय याचन्तो विय होतीति वनं, पतिट्ठहन्ति एत्थ विवेककामा यथाधिपेतविसेसाधिगमेनाति पत्थं, वनेसु पत्थं गहनट्टाने सेनासनं वनपत्थं । किञ्चापीति अनुजाननसम्भावनत्थे निपातो । किं अनुजानाति? निप्परियायतो अरञ्जभावं गामतो बहि अरञ्जन्ति । तेनाह “निप्परियायेना”तिआदि । किं सम्भावेति? आरञ्जकङ्गनिष्पादकत्तं । यच्चि आरञ्जकङ्गनिष्पादकं, तं विसेसतो अरञ्जन्ति वत्तब्बन्ति । तेनाह “यं तं पञ्चधनुसतिक”न्तिआदि । निक्खमित्वा बहि इन्दखीलाति इन्दखीलतो बहि निक्खमित्वा, ततो बहि पट्टायाति अत्थो । बहि इन्दखीलाति वा यत्थ द्वे तीणि इन्दखीलानि, तत्थ बहिद्धा इन्दखीलतो पट्टाय । यत्थ तं नत्थि, तदरहट्टानतो पट्टायाति वदन्ति । गामन्तन्ति गामसमीपं । अनुपचारट्टानन्ति निच्चकिच्चवसेन न उपचरितब्बट्टानं । तेनाह “यत्थ न कसीयति न वपीयती”ति ।

अत्तनो च दिट्ठधम्मसुखविहारन्ति एतेन सत्था अत्तनो विवेकाभिरतिं पकासेति । तत्थ दिट्ठधम्मो नाम अयं पच्चक्खो अत्तभावो, सुखविहारो नाम चतुन्नं इरियापथविहारानं फासुता । एककस्स हि अरञ्जे अन्तमसो उच्चारवस्सावकिच्चं उपादाय सब्बे इरियापथा फासुका होन्ति, तस्मा दिट्ठधम्मे सुखविहारं दिट्ठधम्मसुखविहारन्ति एवं वा एत्थ अत्थो दट्ठब्बो ।

पच्छिमञ्च जनतं अनुकम्पमानोति कथं अरञ्जवासेन पच्छिमा जनता अनुकम्पिता होति? सद्भापब्बजिता हि कुलपुत्ता भगवतो अरञ्जवासं दिस्वा “भगवापि नाम अरञ्जसेनासनानि न मुञ्चति, यस्स नेवत्थि परिज्जातब्बं न पहातब्बं न भावेतब्बं न सच्छिकातब्बं, किमङ्गं पन मय”न्ति चिन्तेत्वा तत्थ वसितब्बमेव मज्जिस्सन्ति, एवं खिप्पमेव दुक्खस्सन्तकरा भविस्सन्ति । एवं पच्छिमा जनता अनुकम्पिता होति । एतमत्थं दस्सेन्तो आह “पच्छिमे मम सावके अनुकम्पन्तो”ति ।

३२. एकादसमे विज्जं भजन्तीति विज्जाभागिया, विज्जाभागे विज्जाकोट्टासे वत्तन्तीतिपि विज्जाभागिया । पदं पच्छिन्दतीति मग्गचित्तस्स पतिट्ठं उपच्छिन्दति, मग्गचित्तं पतिट्ठापेतुं न देतीति अत्थो । उब्बट्टेत्वाति समुच्छेदवसेन समूलं उद्भरित्वा । अट्ठसु ठानेसूति बुद्धादीसु अट्ठसु ठानेसु । रागस्स खयविरागेनाति रागस्स खयसङ्घातेन विरागेन, रागस्स अनुप्पत्तिधम्मतापादनेनाति वुत्तं होति ।

बालवग्गवण्णना निट्ठिता ।

४. समचित्तवग्गवण्णना

३३. चतुत्थस्स पठमे भवन्ति एत्थ पतिट्ठहन्तीति भूमि, असप्पुरिसानं भूमि असप्पुरिसभूमि । सप्पुरिसभूमियम्पि एसेव नयो । कतं न जानातीति अकतञ्जू, असमत्थसमासोयं गमकत्ता “असूरियपस्सा”तिआदीसु विय । तेनाह “कतं न जानाती”ति । अकतवेदीति एत्थापि एसेव नयो । पाकटं कत्वा न जानातीति “इदञ्चिदञ्च मय्हं इमिना कत”न्ति सङ्गमज्झगणमज्झादीसु पाकटं कत्वा न जानाति, न पकासेतीति वुत्तं होति । उपज्जातन्ति थोमनावसेन उपगन्त्वा जातं । तेनाह “वण्णित”न्तिआदि ।

३४. दुतिये वस्ससतपरिमाणमायु अस्साति वस्ससतायुको, वस्ससतायुकतञ्च वस्ससतायुककाले जातस्सेव होति, नाञ्जस्साति आह “वस्ससतायुककाले जातो”ति । वस्ससतं जीवति सीलेनाति वस्ससतजीवी । वस्ससतन्ति च

अच्चन्तसंयोगे उपयोगवचनं । तेनाह “**सकलं वस्ससतं जीवन्तो**”ति । मातापितॄन् माताव बहूपकारतराति तस्सायेव प्रधानभावेन पटिकातब्बत्ता दक्खिणं अंसकूटं वदन्ति । **हृदयलोहितं पायेत्वा**ति खीरं सन्धाय वदति । लोहितज्झि खीरभावेन परिणामं गच्छति । **त्यास्सा**ति ते अस्स । सेसमेत्थ उत्तानमेव ।

३५. ततिये **तेनुपसङ्कमी**ति एत्थ येनाधिप्पायेन सो ब्राह्मणो भगवन्तं उपसङ्कमि, तं पाकटं कत्वा दस्सेतुं “**सो हि ब्राह्मणो**”ति आदिमाह । **विरज्जनपज्जन्ति** यं पज्जं पुट्ठो विरज्जित्वा कथेसि, अविपरीतं कत्वा सम्पादेतुं न सक्कोति, तादिसं पज्जन्ति अत्थो । **उभतोकोटिकं पज्जन्ति** उभोहि कोटीहि युतं पज्जं । “किंवादी भवं गोतमो”ति हि पुट्ठो “किरियवादिम्ही”ति वा वदेय्य “अकिरियवादिम्ही”ति वा, तस्मा इमस्स पज्जस्स विस्सज्जने “किरियवादिम्ही”ति एका कोटि, “अकिरियवादिम्ही”ति दुतियाति कोटिद्वययुत्तो अयं पज्जो । **उगिलितुन्ति** द्वे कोटियो मोचेत्वा कथेतुं असक्कोन्तो बहि नीहरितुं अत्थतो अपनेतुं न सक्खिस्सति । द्वे कोटियो मोचेन्तो हि तं बहि नीहरति नाम । **निगिलितुन्ति** पुच्छाय दोसं दत्वा हारेतुं असक्कोन्तो पवेसेतुं न सक्खिस्सति । तत्थ दोसं दत्वा हारेन्तो हि गिलित्वा विय अदस्सनं गमेन्तो पवेसेति नाम । **किंलद्धिको**ति किंदिट्ठिको । वदन्ति एतेनाति वादो, दिट्ठि । को वादो एतस्साति **किंवादी** । **किमक्खायी**ति किमभिधायी, कीदिसी धम्मकथा । तेनाह “**किं नाम...पे... पुच्छती**”ति । सेसमेत्थ उत्तानमेव ।

३६. चतुत्थे दक्खिणं अरहन्तीति **दक्खिणेय्या** । आहुनं वुच्चति दानं, तं अरहन्तीति **आहुनेय्या** ।

३७. पञ्चमे कथमयं मिगारमाता नाम जाताति आह “**सा ही**”ति आदि । **सब्बजेट्ठकस्स पुत्तस्सा**ति अत्तनो पुत्तेसु सब्बपठमं जातस्स पुत्तस्स । **अय्यकसेट्ठिनोव समाननामकत्ता**ति मिगारसेट्ठिना एव सदिसनामकत्ता । तस्सा किर सब्बजेट्ठस्स पुत्तस्स नामगगहणदिवसे अय्यकस्स मिगारसेट्ठिस्सेव नामं अकंसु । **अनिबद्धवासो हुत्वा**ति एकस्मिंयेव विहारे निबद्धवासो अहुत्वा । **धुवपरिभोगानी**ति नियतपरिभोगानि । ननु भगवा कदाचि चारिकम्पि पक्कमति, कथं तानि सेनासनानि धुवपरिभोगेन परिभुज्जीति आह “**उतुवस्सं चारिकं चरित्वापी**”ति आदि । तत्थ **उतुवस्सन्ति** हेमन्तगिम्हे सन्धाय वदति । **मगं ठपेत्वा**ति थेरस्स आगमनमगं ठपेत्वा । **उण्हवलाहका**ति उण्हउतुनो पच्चयभूतमेघमालासमुट्ठापका देवपुत्ता । तेसं किर तथाचित्तुप्पादसमकालमेव यथिच्छितं ठानं उण्हं फरमाना, वलाहकमाला नातिबहला इतो चितो नभं छादेन्ती विधावति । एस नयो **सीतवलाहकवस्सवलाहकासु** । **अब्भवलाहका** पन देवता सीतुण्हवस्सेहि विना केवलं अब्भपटलस्सेव समुट्ठापका वेदितब्बा । केवलं वा वातस्सेव, तेनेव देवता वातवलाहका ।

एत्थ च यं वस्साने च सिसिरे च अब्भं उप्पज्जति, तं उतुसमुट्ठानं पाकतिकमेव । यं पन अब्भम्हियेव अतिअब्भं सत्ताहम्पि चन्दसूरिये छादेत्वा एकन्धकारं करोति, यच्च चित्तवेसाखमासेसु अब्भं, तं देवतानुभावेन उप्पन्नं अब्भन्ति वेदितब्बं । यो च तस्मिं तस्मिं उतुम्हि उत्तरदक्खिणादिपकतिवातो होति, अयं उतुसमुट्ठानो । वातेपि वनरुक्खक्खन्धादिप्पदालनो अतिवातो नाम अत्थि । अयज्जेव, यो च अज्जोपि अकालवातो, अयज्ज देवतानुभावेन निब्बत्तो । यं गिम्हाने उण्हं, तं उतुसमुट्ठानिकं पाकतिकमेव । यं पन उण्हेपि अतिउण्हं सीतकाले च उप्पन्नं उण्हं, तं देवतानुभावेन निब्बत्तं । यं वस्साने च हेमन्ते च सीतं होति, तं उतुसमुट्ठानमेव । यं पन सीतेपि अतिसीतं, गिम्हे च उप्पन्नं सीतं, तं देवतानुभावेन निब्बत्तं । यं वस्सिके चत्तारो मासे वस्सं, तं उतुसमुट्ठानमेव, यं पन वस्सेयेव अतिवस्सं, यच्च चित्तवेसाखमासेसु वस्सं, तं देवतानुभावेन निब्बत्तं ।

तत्रिदं वत्थु — एको किर वस्सवलाहकदेवपुत्तो तगरकूटवासिखीणासवत्थेरस्स सन्तिकं गन्त्वा वन्दित्वा अट्ठासि । थेरो — “कोसि त्व”न्ति पुच्छि । अहं, भन्ते, वस्सवलाहको देवपुत्तोति । तुम्हाकं किर चित्तेन देवो वस्सतीति? आम,

भन्तेति । पस्सितुकामा मयन्ति । तेमिस्सथ, भन्तेति । मेघसीसं वा गज्जितं वा न पज्जायति, कथं तेमिस्सामाति? भन्ते, अम्हाकं चित्तेन देवो वस्सति, तुम्हे पण्णसालं पविसथाति । साधु देवपुत्ताति पादे धोवित्वा पण्णसालं पाविसि । देवपुत्तो तस्मिं पविसन्तेयेव एकं गीतं गायित्वा हत्थं उक्खिपि, समन्ता तियोजनद्वानं एकमेघं अहोसि । थेरो अड्ढतिन्तो पण्णसालं पविट्ठोति ।

कामं हेट्ठा वुत्तापि देवता चातुमहाराजिकाव, ता पन तेन तेन विसेसेन वत्वा इदानि तदज्जे पठमभूमिके कामावचरदेवे सामज्जतो गणहन्तो **“चातुमहाराजिका”**ति आह । धतरद्विवरूळहकविरूपक्खकुवेरसङ्घाता चत्तारो महाराजानो एतेसन्ति **चातुमहाराजिका**, ते सिनेरुस्स पब्बतस्स वेमज्जे होन्ति । तेसु पब्बतद्वकापि अत्थि आकासद्वकापि । तेसं परम्परा चक्कवाळपब्बतं पत्ता । खिड्डापदोसिका मनोपदोसिका चन्दिमा देवपुत्तो सूरियो देवपुत्तोति एते सब्बेपि चातुमहाराजिकदेवलोकट्ठा एव ।

तावतिसाति त्रावतिसानं देवानं नामं, तेपि अत्थि पब्बतद्वका, अत्थि आकासद्वका, तेसं परम्परा चक्कवाळपब्बतं पत्ता । तथा **यामादीनं** । एकदेवलोकपि हि देवानं परम्परा चक्कवाळपब्बतं अप्पत्ता नाम नत्थि । तत्थ मघेन माणवेन सद्धिं मचलगामे कालं कत्वा तेत्तिस सहपुज्जकारिनो एत्थ निब्बत्ताति तं सहचारितं ठानं तेत्तिसं, तदेव त्रावतिसं, तं निवासो एतेसन्ति त्रावतिसाति वदन्ति । यस्मा पन सेसचक्कवाळेसुपि छकामावचरदेवलोका अत्थि । वुत्तम्पि चेत्तं **“सहस्सं चातुमहाराजिकानं सहस्सं त्रावतिसानं”**न्ति (अ० नि० ३.८१) । तस्मा नामपण्णत्तियेवेसा तस्स देवलोकस्साति वेदितब्बा । दुक्खतो याता अपयाताति **यामा** । अत्तनो सिरिसम्पत्तिया तुसं इता गताति **तुसिता** । निम्माने रति एतेसन्ति **निम्मानरतिनो** । **वसवत्ती देवताति** परनिम्मितवसवत्तिनो देवा । परनिम्मितेसु भोगेसु वसं वत्तेन्तीति **परनिम्मितवसवत्तिनो** ।

बूहितो परिवुद्धो तेहि तेहि ज्ञानादीहि विसिद्धेहि गुणेहीति ब्रह्मा । वण्णवन्तताय च व दीघायुक्ताय च ब्रह्मपारिसज्जादीहि महन्तो ब्रह्माति **महाब्रह्मा** । तस्स परिसायं भवा परिचारिकाति **ब्रह्मपारिसज्जा** । तस्सेव पुरोहितद्वाने ठिताति **ब्रह्मपुरोहिता** । आभस्सरेहि परित्ता आभा एतेसन्ति **परित्ताभा** । अप्पमाणा आभा एतेसन्ति **अप्पमाणाभा** । दीपिकाय अच्चि विय एतेसं सरीरतो आभा छिज्जित्वा छिज्जित्वा पतन्ती विय सरति विस्सरतीति **आभस्सरा**, यथावुत्तप्पभाय आभासनसीला वा **आभस्सरा** । **सुभाति** सोभना पभा । **सुभाति** हि एकग्घना निच्चला सरीराभा वुच्चति, सा परित्ता सुभा एतेसन्ति **परित्तसुभा** । अप्पमाणा सुभा एतेसन्ति **अप्पमाणसुभा** । सुभेन ओकिण्णा विकिण्णा, सुभेन सरीरप्पभावण्णेन एकग्घना सुवण्णमज्जूसाय ठपितसम्पज्जलितकज्जनपिण्डसस्सरिकाति **सुभकिण्णा** । तत्थ सोभनाय पभाय किण्णा सुभाकिण्णाति वत्तब्बे भा-सदस्स रस्सत्तं अन्तिम ण-कारस्स ह-कारज्ज कत्वा **“सुभकिण्हा”**ति वुत्तं । विपुलफला वेहप्फला । **विपुलफलाति** च विपुलसन्तसुखवण्णादिफला । अप्पकेन कालेन अत्तनो ठानं न विजहन्तीति **अविहा** । केनचि न तपनीयाति **अतप्पा** । अकिच्छेन सुखेन पस्सितब्बा मनुज्जरूपतायाति **सुदस्सा** । सुपरिसुद्धदस्सनताय सम्मा पस्सन्ति सीलेनाति **सुदस्सी** । उक्कट्टसम्पत्तीहि योगतो नत्थि एतेसं कनिट्ठा सम्पत्तीति **अकनिट्ठा** ।

कायसक्खीहीति नामकायेन देसनाय सम्पटिच्छनवसेन सक्खिभूतेहि । **हलाहलन्ति** कोलाहलं । **महग्गतचित्तेनाति** चतुत्थज्ज्ञानपादकेन अभिज्जाचित्तेन ।

ननु च **“अज्झत्तन्ति कामभवो, बहिद्धाति रूपारूपभवो”**ति च अयुत्तमेत्तं? यस्मिज्हि भवे सत्ता बहुतरं कालं वसन्ति, सो नेसं अज्झत्तं । यस्मिज्च अप्पतरं कालं वसन्ति, सो नेसं बहिद्धाति वत्तुं युत्तं । रूपारूपभवे च सत्ता चिरतरं वसन्ति, अप्पतरं कामभवे, तस्मा **“अज्झत्तन्ति कामभवो, बहिद्धाति रूपारूपभवो”**ति कस्मा वुत्तन्ति आह **“किज्जापी”**तिआदि ।

चतुर्थमेव कोट्टासन्ति विवट्टट्ठाणिसङ्घातं चतुर्थं असङ्ख्येय्यकप्पं । **इतरेसूति** संवट्टसंवट्टट्ठाणिविवट्टसङ्घातेसु तीसु असङ्ख्येय्यकप्पेसु । **आलयोति** सङ्गो । **पत्थनाति** “कथं नाम तत्तूपपन्ना भविस्सामा”ति अभिपत्थना । **अभिलासोति** तत्तूपपज्जितुकामता । **तस्माति** आदिना यथावुत्तमत्थं निगमेति ।

एत्थायं अधिप्पायो — कस्सचिपि किलेसस्स अविक्खम्भितत्ता केनचिपि पकारेण विक्खम्भनमत्तेनपि अविमुत्तो कामभवो अज्झत्तगहणस्स अत्तानं अधिकिच्च उद्दिस्स पवत्तग्गाहस्स विसेसपच्चयोति अज्झत्तं नाम । तत्थ बन्धनं अज्झत्तसंयोजनं, तेन संयुत्तो **अज्झत्तसंयोजनो** । तब्बिपरियायतो **बहिद्धासंयोजनोति** ।

छन्दरागवसेनेव अज्झत्तसंयोजनं बहिद्धासंयोजनञ्च पुग्गलं दस्सेत्वा इदानीं ओरम्भागियउद्धम्भागियसंयोजनवसेनेपि दस्सेतुं “**ओरम्भागियानि वा**”ति आदिमाह । ओरं वुच्चति कामधातु, पटिसन्धिया पच्चयभावेन तं ओरं भजन्तीति **ओरम्भागियानि** । तत्थ च कम्मुना विपाकं सत्तेन च दुक्खं संयोजेन्तीति **संयोजनानि**, सक्कायदिट्ठिविचिकिच्छासीलब्बतपरामासकामरागपटिघा । उद्धं वुच्चति रूपारूपधातु, वुत्तनयेनेतं उद्धं भजन्तीति **उद्धम्भागियानि**, संयोजनानि । रूपरागारूपरागमानुद्धच्चाविज्जा । अथ वा ओरम्भागो वुच्चति कामधातु रूपारूपभवतो हेट्ठाभूतत्ता, तत्तूपपत्तिया पच्चयभावतो ओरम्भागस्स हितानीति **ओरम्भागियानि** यथा “वच्छायोगो दुहको”ति । उद्धम्भागो नाम महग्गतभावो, तस्स हितानि **उद्धम्भागियानि** । पादेसु बद्धपासाणो विय पञ्चोरम्भागियसंयोजनानि हेट्ठा आकड्डमानाकारानि होन्ति । हत्थेहि गहितरुक्खसाखा विय पञ्चुद्धम्भागियसंयोजनानि उपरि आकड्डमानाकारानि । येसज्झि सक्कायदिट्ठिआदीनि अप्पहीनानि, ते भवग्गेपि निब्बत्ते एतानि आकड्डित्वा कामभवेयेव पातेन्ति, तस्मा एतानि पञ्च गच्छन्तं वारेन्ति, गतं पुन आनेन्ति । रूपरागादीनि पञ्च गच्छन्तं न वारेन्ति, आगन्तुं पन न देन्ति ।

असमुच्छिन्नेसु ओरम्भागियसंयोजनेसु लद्धपच्चयेसु उद्धम्भागियानि संयोजनानि अगणनूपगानि होन्तीति लब्धमानानमपि पुथुज्जनानं वसेन अविभजित्वा अरियानं योगवसेन विभजितुकामो “**उभयमपि चेत**”न्ति आदिमाह । तत्थ **वट्टनिस्सितमहाजनस्साति** पुथुज्जने सन्धाय वदति । द्वेधा **परिच्छिन्नोति** कामसुगतिरूपारूपभववसेन द्वीहि पकारेहि परिच्छिन्नो ।

वच्छकसालोपमं उत्तानत्थमेव । ओपम्मसंसन्दने पन कस्सचि किलेसस्स अविक्खम्भितत्ता, कथञ्चिपि अविमुत्तो कामभवो अज्झत्तगहणस्स विसेसपच्चयत्ता, इमेसं सत्तानं अब्भन्तरट्ठेन **अन्तो** नाम । रूपारूपभवो तब्बिपरियायतो **बहि** नाम । तथा हि यस्स ओरम्भागियानि संयोजनानि अप्पहीनानि, सो अज्झत्तसंयोजनो वुत्तो । यस्स तानि पहीनानि, सो बहिद्धासंयोजनो । तस्मा अन्तो असमुच्छिन्नबन्धनताय बहि च पवत्तमानभवङ्गसन्तानताय **अन्तोबद्धो बहिसयितो** नाम । निरन्तरप्पवत्तभवङ्गसन्तानवसेन हि सयितवोहारो । कामं नेसं बहिबन्धनमपि असमुच्छिन्नं, अन्तोबन्धनस्स पन मूलताय एवं वुत्तं । तेनाह “**संयोजनं पन तेसं कामावचरूपनिबद्धमेवा**”ति । इमिना नयेन सेसत्तयेपि अत्थो वेदितब्बो ।

एत्तावता च किराति किर-सद्दो अरुचिसंसूचनत्थो । तेनेत्थ आचरियवादस्स अत्तनो अरुच्चनभावं दीपेति । “सीलवा”ति अनामट्टविसेससामञ्जतो सीलसङ्खेपेन गहितं, तज्ज चतुब्बिधन्ति आचरियत्थेरो “**चतुपारिसुद्धिसीलं उद्दिस्सित्वा**”ति आह । तत्थाति चतुपारिसुद्धिसीलेसु । **जेट्टकसीलन्ति** पधानसीलं । **उभयत्थाति** उद्देसनिद्देसेसु, निद्देसे विय उद्देसेपि पातिमोक्खसंवररोव थरेन वुत्तो “सीलवा”ति वुत्तत्ताति अधिप्पायो । सीलगहणज्झि पाळियं पातिमोक्खसंवरवसेनेव आगतं । तेनाह “**पातिमोक्खसंवररोयेवा**”ति आदि । तत्थ अवधारणेन इतरेसं तिण्णं एकदेसेन पातिमोक्खन्तो गधभावं दीपेति । तथा हि अनोलोकि योलोकने आजीवहेतु च सिक्खापदवीतिक्कमे गिलानपच्चयस्स

अपचवेक्खितपरिभोगे च आपत्ति विहिताति । तीणीति इन्द्रियसंवरसीलादीनि । सीलन्ति वुत्तद्धानं नाम अत्थीति सीलपरियायेन तेसं कत्थचि सुत्ते गहितद्धानं नाम किं अत्थि यथा “पातिमोक्खसंवरो”ति? आचरियस्स सम्मुखताय अप्पटिक्खपन्तो उपचारेन पुच्छन्तो विय वदति । तेनाह “अननुजानन्तो”ति । छद्धाररक्खामत्तकमेवाति तस्स सल्लहुकभावमाह चित्ताधिद्धानभावमत्तेन पटिपाकतिकभावापत्तितो । इतरद्वयेपि एसेव नयो । पच्चयुप्पत्तिमत्तकन्ति फलेन हेतुं दस्सेति । उप्पादनहेतुका हि पच्चयानं उप्पत्ति । इदमत्थन्ति इदं पयोजनं इमस्स पच्चयस्स परिभुज्जनेति अधिप्पायो । निप्परियायेनाति इमिना इन्द्रियसंवरादीनि तीणि पधानस्स सीलस्स परिपालनवसेन पवत्तिया परियायसीलानि नामाति दस्सेति । इदानी पातिमोक्खसंवरस्सेव पधानभावं व्यतिरेकतो अन्वयतो च उपमाय विभावेतुं “यस्सा”तिआदिमाह । तत्थ सो पातिमोक्खसंवरो । सेसानि इन्द्रियसंवरादीनि ।

पातिमोक्खसंवरसंवृतोति यो हि नं पाति रक्खति, तं मोक्खेति मोचेति आपायिकादीहि दुक्खेहीति पातिमोक्खन्ति लद्धनामेन सिक्खापदसीलेन पिहितकायवचीद्धारो । सो पन यस्मा एवंभूतो तेन समन्नागतो नाम होति, तस्मा वुत्तं “पातीमोक्खसंवरेन समन्नागतो”ति ।

अपरो नयो — किलेसानं बलवभावतो, पापकिरियाय च सुकरभावतो, पुज्जकिरियाय च दुक्करभावतो बहुक्खत्तुं अपायेसु पतनसीलोति पाती, पुथुज्जनो । अनिच्चताय वा भवादीसु कम्मवेगक्खित्तो घटियन्तं विय अनवद्धानेन परिब्भमनतो गमनतो गमनसीलोति पाती, मरणवसेन तम्हि तम्हि सत्तनिकाये अत्तभावस्स पातनसीलो वा पाती, सत्तसन्तानो, चित्तमेव वा । तं पातिं संसारदुक्खतो मोक्खेतीति पातिमोक्खं । चित्तस्स हि विमोक्खेन सत्तो विमुत्तोति वुच्चति । वुत्तज्झि “चित्तवोदाना विसुज्झन्ती”ति, “अनुपादाय आसवेहि चित्तं विमुत्त”न्ति (महाव० २८) च ।

अथ वा अविज्जादिना हेतुना संसारे पतति गच्छति पवत्ततीति पाति, “अविज्जानीवरणानं सत्तानं तण्हासंयोजनानं सन्धावतं संसरत”न्ति (सं० नि० २.१२४) हि वुत्तं, तस्स पातिनो सत्तस्स तण्हादिसंकिंसेसत्तयतो मोक्खो एतेनाति पातिमोक्खो । “कण्ठेकाळो”तिआदीनं वियस्स समाससिद्धि वेदितव्वा ।

अथ वा पातेति विनिपातेति दुक्खेति पाति, चित्तं । वुत्तज्झि —

“चित्तेन नीयते लोको, चित्तेन परिकस्सती”ति । (सं० नि० १.६२) ।

तस्स पातिनो मोक्खो एतेनाति पातिमोक्खो । पतति वा एतेन अपायदुक्खे संसारदुक्खे चाति पाति, तण्हादिसंकिंसेसो । वुत्तज्झि —

“तण्हा जनेहि पुरिसं, (सं० नि० १.५६-५७) तण्हादुतियो पुरिसो”ति (इतिवुं १५, १०५; अ० नि० ४.९) च आदि ।

ततो पातितो मोक्खोति पातिमोक्खो ।

अथ वा पतति एत्थाति पाति, छ अज्झत्तिकबाहिरानि आयतनानि । वुत्तज्झि —

“छसु लोको समुप्पन्नो, छसु कुब्बति सन्थव”न्ति (सं० नि० १.७०; सु० नि० १७१) ।

ततो छअज्झत्तिकबाहिरायतनसङ्घाततो पातितो मोक्खोति **पातिमोक्खो** ।

अथ वा पातो विनिपातो अस्स अत्थीति पाती, संसारो । ततो मोक्खोति **पातिमोक्खो** ।

अथ वा सब्बलोकाधिपतिभावतो धम्मिस्सरो भगवा “पती”ति वुच्चति, मुच्चति एतेनाति मोक्खो, पतिनो मोक्खो पतिमोक्खो तेन पज्जत्ताति, पतिमोक्खो एव **पातिमोक्खो** । सब्बगुणानं वा मूलभावतो उत्तमद्वेन पति च सो यथावुत्तद्वेन मोक्खो चाति पतिमोक्खो, पतिमोक्खो एव **पातिमोक्खो** । तथा हि वुत्तं “पातिमोक्खन्ति आदिमेतं मुखमेतं पमुखमेतं”न्ति (महाव० १३५) वित्थारो ।

अथ वा प-इति पकारे, अतीति अच्चन्तत्थे निपातो, तस्मा पकारेहि अच्चन्तं मोक्खेतीति **पातिमोक्खो** । इदञ्चि सीलं सयं तदङ्गवसेन, समाधिसहितं पज्जासहितञ्च विक्खम्भनवसेन, समुच्छेदवसेन च अच्चन्तं मोक्खेति मोचेतीति **पातिमोक्खो** । पति पति मोक्खोति वा पतिमोक्खो, तम्हा तम्हा वीतिक्कमदोसतो पच्चेकं मोक्खोति अत्थो । पतिमोक्खो एव **पातिमोक्खो** । मोक्खो वा निब्बानं, तस्स मोक्खस्स पतिबिम्बभूतोति पतिमोक्खो । सीलसंवरो हि सूरियस्स अरुणुगमनं विय निब्बानस्स उदयभूतो तप्पटिभागो विय यथारहं किलेसनिब्बापनतो पतिमोक्खं, पतिमोक्खंयेव **पातिमोक्खं** ।

अथ वा मोक्खं पति वत्तति, मोक्खाभिमुखन्ति वा पतिमोक्खं, पतिमोक्खमेव **पातिमोक्खन्ति** एवमेत्थ पातिमोक्खसदस्स अत्थो वेदितब्बो ।

आचारगोचरसम्पन्नोति कायिकवाचसिकअवीतिक्कमसङ्घातेन आचारेन, नवेसियादिगोचरतादिसङ्घातेन गोचरेन सम्पन्नो, सम्पन्नआचारगोचरोति अत्थो । **अप्पमत्तकेसू**ति परित्तकेसु अनापत्तिगमनीयेसु । “दुक्कटदुब्भासितमत्तेसू”ति अपरे । **वज्जेसू**ति गारह्येसु । ते पन एकन्ततो अकुसलसभावा होन्तीति आह “अकुसलधम्मेषू”ति । **भयदस्सी**ति भयतो दस्सनसीलो, परमाणुमत्तप्पि वज्जं सिनेरुप्पमाणं विय कत्वा भायनसीलो । **सम्मा आदियित्वा**ति सम्मदेव सक्कच्चं सब्बसोव आदियित्वा । **सिक्खापदेसू**ति निद्धारणे भुम्मन्ति समुदायतो अवयवनिद्धारणं दस्सेन्तो “सिक्खापदेसु तं तं सिक्खापदं समादियित्वा सिक्खती”ति अत्थमाह, सिक्खापदमेव हि समादातब्बं सिक्खितब्बञ्चाति अधिप्पायो । यं **किञ्चि सिक्खापदेसू**ति सिक्खाकोट्टासेसु मूलपज्जत्तिअनुपज्जत्तिसब्बत्थपज्जत्तिपदेसपज्जत्तिआदिभेदं यं किञ्चि सिक्खितब्बं । यं पटिपज्जितब्बं पूरेतब्बं सीलं, तं पन द्वारवसेन दुविधमेवाति आह “कायिकं वा वाचसिकं वा”ति । इमस्मिं अत्थविकप्पे **सिक्खापदेसू**ति आधारे भुम्मं सिक्खाभागेसु कस्सचि विसुं अगगहणतो । तेनाह “तं सब्ब”न्ति ।

अज्जतरं देवघटन्ति अज्जतरं देवनिकायं । **आगामी होती**ति पटिसन्धिवसेन आगमनसीलो होति । **आगन्ता**ति एत्थापि एसेव नयो । **इमिना अङ्गेना**ति इमिना कारणेन ।

सुखविपस्सको येभुय्येन चतुधातुववत्थानमुखेन कम्मट्ठानाभिनिवेसी होतीति आह “**सुखविपस्सकस्स धातुकम्मट्ठानिकभिक्खुनो**”ति । वुत्तमेवत्थं सम्पिण्डेत्वा निगमेन्तो “**पठमेन अङ्गेना**”तिआदिमाह ।

चित्तस्स सुखुमभावो इध सुखमत्तभावमापन्नेन दट्ठब्बोति आह “**सब्बापि हि ता**”तिआदि । **तन्तिवसेना**ति केवलं तन्तिट्ठपनवसेन, न पन थेरस्स कस्सचि मग्गस्स वा फलस्स वा उप्पादनत्थाय, नापि सम्मापटिपत्तियं योजनत्थायाति

अधिष्पायो ।

३८. छट्टे महाकच्चानोति गिहिकाले उज्जेनिरज्जो पुरोहितपुत्तो अभिरूपो दस्सनीयो पासादिको सुवण्णवण्णो च । वरणा नाम रुक्खो, तस्स अविदूरे भवत्ता नगरम्पि वरणसद्देन वुच्चतीति आह “वरणा नाम एकं नगरं”ति । द्वन्द्वपदस्स पच्चेकं अभिसम्बन्धो होतीति हेतुसद्दं पच्चेकं योजेत्वा दस्सेन्तो “कामरागाभिनिवेसहेतू”ति आदिमाह । हेतुसद्देन सम्बन्धे सति यो अत्थो सम्भवति, तं दस्सेतुं “इदं वुत्तं होती”ति आदिमाह । तत्थ कामरागेन अभिनिविट्ठत्ताति एतेन कामरागाभिनिवेसहेतूति इमस्स अत्थं दीपेति, तथा विनिबद्धत्ताति आदीहि कामरागविनिबद्धहेतूति आदीनं । ततो मुखोति तदभिमुखो । मानन्ति आळहकादिमानभण्डं । सेसमेत्थ उत्तानमेव ।

३९. सत्तमे मधुरायन्ति उत्तरमधुरायं । गुन्दावनेति कण्हगुन्दावने, काळपिप्पलिवनेति अत्थो । जराजिण्णेति जराय जिण्णे, न ब्याधिआदीनं वसेन जिण्णसदिसे नापि अकालिकेन जराय अभिभूते । वयोवुद्धेति जिण्णत्ता एव चस्स वयोवुद्धिप्पत्तिया वुद्धेन सीलादिवुद्धिया । जातिमहल्लकेति जातिया महन्तताय चिररत्तताय महल्लके, न भोगपरिवारादीहीति अत्थो । अद्धगतेति एत्थ अद्ध-सद्दो दीघकालवाचीति आह “दीघकालद्धानं अतिक्कन्ते”ति । वयोति पुरिमपदलोपेनायं निद्वेसोति आह “पच्छिमवयं”न्ति, वस्ससतस्स ततियकोट्टाससङ्घातं पच्छिमवयं अनुप्पत्तेति अत्थो ।

भवति एत्थ फलं तदायत्तवुत्तितायाति भूमि, कारणन्ति आह “येन कारणेना”ति आदि । परिपक्वोति परिणतो, वुद्धिभावं पत्तोति अत्थो । मोघजिण्णोति अन्तो थिरकरणानं धम्मनं अभावेन तुच्छजिण्णो नाम । बालदारकोपि दहरोति वुच्चतीति ततो विसेसनत्थं “युवा”ति वुत्तं । अतिक्कन्तपठमवया एव सत्ता सभावेन पलितसिरा होन्तीति पठमवये ठितभावं दस्सेतुं “सुसुकाळकेसो”ति वुत्तं । भद्रेनाति लद्धकेन । एकच्चो हि दहरोपि समानो काणो वा होति कुणिआदीनं वा अज्जतरो, सो न भद्रेन योब्बनेन समन्नागतो नाम होति । यो पन अभिरूपो होति दस्सनीयो पासादिको सब्बसम्पत्तिसम्पन्नो यं यदेव अलङ्कारपरिहारं इच्छति, तेन तेन अलङ्कृतो देवपुत्तो विय चरति, अयं भद्रेन योब्बनेन समन्नागतो नाम होति । तेनेवाह “येन योब्बनेन समन्नागतो”ति आदि ।

यम्हि सच्चच्च धम्मो चाति यम्हि पुग्गले सोळसहाकारेहि पटिविद्धत्ता चतुब्बिधं सच्चं, जाणेन सच्छिकतत्ता नवविधलोकुत्तरधम्मो च अत्थि । अहिंसाति देसनामत्तमेतं, यम्हि पन चतुब्बिधापि अप्पमज्जाभावना अत्थीति अत्थो । संयमो दमोति सीलज्येव इन्द्रियसंवरो च । वन्तमलोति मग्गजाणेन नीहटमलो । धीरोति धितिसम्पन्नो । थेरोति सो इमेहि थिरभावकारणेहि समन्नागतत्ता थेरोति पवुच्चतीति अत्थो ।

४०. अट्टमे “चोरा बलवन्तो होन्ती”ति पदं उद्धरित्वा येहि कारणेहि ते बलवन्तो होन्ति, तेसं सत्त्वावं दस्सेन्तो “पक्खसम्पन्ना”ति आदिमाह । तत्थ निवासट्ठानसम्पन्नता गिरिदुग्गादिसत्त्वावतो । अतियातुन्ति अन्तो यातुं, गन्तुं पविसितुन्ति अत्थो । तं पन अन्तोपविसनं केनचि कारणेन बहिगतस्स होतीति आह “बहिद्धा जनपदचारिकं चरित्वा”ति आदि । निव्यातुन्ति बहि निक्खमितुं । तज्ज बहिनिक्खमनं बहिद्धाकरणीये सति सम्भवतीति आह “चोरा जनपदं विलुम्पन्ती”ति आदि । अनुसज्जातुन्ति अनुसज्जरितुं । सेसमेत्थ उत्तानमेव ।

४१. नवमे मिच्छापटिपत्ताधिकरणहेतूति एत्थ अधि-सद्दो अनत्थकोति आह “मिच्छापटिपत्तिया करणहेतू”ति । न आराधकोति न सम्पादको न परिपूरको । जायति पटिविज्जनवसेन निब्बानं गच्छतीति जायो, सो एव तंसमङ्गिनं

वट्टदुक्खपाततो धारणट्ठेन धम्मोति जायो धम्मो, अरियमग्गो। सो पनेत्थ सह विपस्सनाय अधिप्पेतोति आह “सहविपस्सनकं मग्ग”न्ति। आराधनं नाम संसिद्धि, सा पन यस्मा सम्पादनेन परिपूरणेन इच्छिता, तस्मा वुत्तं “सम्पादेतुं पूरेतु”न्ति।

४२. दसमे दुग्गहितेहीति अत्थतो ब्यञ्जनतो च दुट्ठु गहितेहि, ऊनाधिकविपरीतपदपच्चाभट्ठादिवसेन विलोमेत्वा गहितेहीति अत्थो। उप्पटिपाटिया गहितेहीति इदं पन निदस्सनमत्तं दुग्गहस्स ऊनाधिकादिवसेनपि सम्भवतो। तेनेवाह “अत्तनो दुग्गहितसुत्तन्तानयेव अत्थञ्च पाळिञ्च उत्तरितरं कत्वा दस्सेन्ती”ति।

समचित्तवग्गवण्णना निड्ढिता।

५. परिसवग्गवण्णना

४३. पञ्चमस्स पठमे उद्धच्चेन समन्नागताति अकप्पिये कप्पियसज्जिताय, कप्पिये अकप्पियसज्जिताय, अवज्जे वज्जसज्जिताय, वज्जे अवज्जसज्जिताय उद्धच्चप्पकतिका। ये हि विनये अपकतञ्जुनो संकिलेसवोदानियेसु धम्मेषु न कुसला सकिञ्चनकारिनो विप्पटिसारबहुला, तेसं अनुप्पन्नञ्च उद्धच्चं उप्पज्जति, उप्पन्नञ्च भिय्योभावं वेपुल्लं आपज्जति। साराभावेन तुच्छत्ता नळो वियाति नळो, मानोति आह “उन्नळाति उग्गतनळा”ति। तेनाह “उट्ठिततुच्छमाना”ति। मानो हि सेय्यस्स सेय्योति सदिसोति च पवत्तिया विसेसतो तुच्छो। चापल्लेनाति चपलभावेन, तण्हालोलुप्पेनाति अत्थो। मुख्खराति मुखेन फरुसा, फरुसवादिनोति अत्थो।

विकिण्णवाचाति विस्सटवचना सम्फप्पलापिताय अपरियन्तवचना। तेनाह “असंयतवचना”तिआदि। विस्सट्टसतिनोति सतिविरहिता। पच्चयवेकल्लेन विज्जमानायपि सतिया सतिकिच्चं कातुं असमत्थताय एवं वुत्ता। न सम्पजानन्तीति असम्पजाना, तंयोगनिवत्तियं चायं अकारो “अहेतुका धम्मा (ध० स० दुक्कमातिका २), अभिक्खुको आवासो”तिआदीसु (चूळव० ७६) वियाति आह “निप्पज्जा”ति, पज्जारहिताति अत्थो। पाळियं विब्भन्तचित्ताति उब्भन्तचित्ता। समाधिविरहेन लद्धोकासेन उद्धच्चेन तेसं समाधिविरहानं चित्तं नानारम्मणेषु परिब्भमति वनमक्कटो विय वनसाखासु। पाकतिन्द्रियाति संवराभावेन गिहिकाले विय विवटइन्द्रिया। तेनाह “पकतिया ठितेही”तिआदि। विवटेहीति असंवृतेहि।

४४. दुतिये भण्डनं वुच्चति कलहस्स पुब्बभागोति कलहस्स हेतुभूता परिभासा तंसदिसी च अनिट्ठिकिरिया भण्डनं नाम। कलहजाताति हत्थपरामासादिवसेन मत्थकप्पत्तो कलहो जातो एतेसन्ति कलहजाताति एवमेत्थ अत्थो दट्ठब्बो। विरुद्धवादन्ति “अयं धम्मो, नायं धम्मो”तिआदिना विरुद्धवादभूतं विवादं। मुखसन्निस्सितताय वाचा इध “मुख”न्ति अधिप्पेताति आह “दुब्भासिता वाचा मुखसत्तियोति वुच्चन्ती”ति। चतुब्बिधम्मि सङ्गकम्मं सीमापरिच्छिन्नेहि पकतत्तेहि भिक्खूहि एकतो कत्तब्बत्ता एककम्मं नाम। पञ्चविधोपि पातिमोक्खुद्देसो एकतो उद्दिसितब्बत्ता एकुद्देसो नाम। पञ्चत्तं पन सिक्खापदं सब्बेहिपि लज्जीपुग्गलेहि समं सिक्खितब्बभावतो समसिक्खता नाम। पाळियं खीरोदकीभूताति यथा खीरञ्च उदकञ्च अज्जमज्जं संसन्दति, विसुं न होति, एकत्तं विय उपेति। सतिपि हि उभयेसं कलापानं परमत्थतो भेदे पचुरजनेहि पन दुविज्जेय्यनानत्तं खीरोदकं समोदितं अच्चन्तमेव संसट्ठं विय हुत्वा तिड्ढति, एवं सामग्गिवसेन एकतूपगतचित्तुप्पादा वियाति खीरोदकीभूताति एवमेत्थ अत्थो दट्ठब्बो। मेत्ताचक्खूहीति मेत्ताचित्तं पच्चुपट्टपेत्वा ओलोकनचक्खूहि। तानि हि पियभावदीपनतो “पियचक्खूनी”ति वुच्चन्ति।

४५. ततिये अगगवतीति एत्थ अगग-सद्वो उत्तमपरियायो, तेन विसिद्धस्स पुग्गलस्स, विसिद्धाय वा पटिपत्तिया गहणं इधाधिपेत्तन्ति आह “अगगवतीति उत्तमपुग्गलवती”ति आदि । अविगततण्हाय तं तं परिक्रारजातं बहुं लन्ति आदियन्तीति बहुला, बहुला एव बाहुलिका यथा “वेनयिको”ति (अ० नि० ८.११; पारा० ८; म० नि० १.२४६) । ते पन यस्मा पच्चयबहुभावाय युत्तप्पयुत्ता नाम होन्ति, तस्मा आह “चीवरादिबाहुल्लाय पटिपन्ना”ति । सिक्खाय आदरगारवाभावतो सिथिलं अदळ्हं गणहन्तीति साथलिकाति वुत्तं । सिथिलन्ति च भावनपुंसकनिद्देशो, सिथिलसद्देन वा समानत्थस्स साथलसद्दस्स वसेन साथलिकाति पदसिद्धि वेदितब्बा । अवगमनट्टेनाति अधोगमनट्टेन, ओरम्भागियभावेनाति अत्थो । उपधिविवेकेति सब्बूपधिपटिनिस्सग्गताय उपधिविवित्ते । ओरोपितधुराति उज्झितुस्साहा । दुविधम्पि वीरियन्ति कायिकं चेतसिकञ्च वीरियं ।

४६. चतुत्थे इदं दुक्खन्ति दुक्खस्स अरियसच्चस्स पच्चक्खतो अगगहितभावदस्सनत्थं वुत्तं । एत्तकमेव दुक्खन्ति तस्स परिच्छिज्ज अगगहितभावदस्सनत्थं । इतो उद्धं दुक्खं नत्थीति अनवसेसेत्वा अगगहितभावदस्सनत्थं । यथासभावतो नप्पजानन्तीति सरसलक्खणप्पटिवेधेन असम्मोहतो नप्पटिविज्झन्ति । असम्मोहपटिवेधो च यथा तस्मिं जाणे पवत्ते पच्चा दुक्खस्स रूपादिपरिच्छेदे सम्मोहो न होति, तथा पवत्ति । अच्चन्तक्खयोति अच्चन्तक्खयनिमित्तं निब्बानं । असमुप्पत्तीति एत्थापि एसेव नयो । यं निब्बानं मग्गस्स आरम्मणपच्चयट्टेन कारणभूतं आगम्म तदुभयम्पि निरुज्झति, तं तेसं असमुप्पत्ति निब्बानं दुक्खनिरोधोति वुच्चति ।

४७. पञ्चमे विसेसनस्स परनिपातेन “परिसाकसटो”ति वुत्तन्ति आह “कसटपरिसा”ति आदि । “कसटपरिसा”ति हि वत्तब्बे “परिसाकसटो”ति वुत्तं । परिसामण्डोति एत्थापि एसेव नयो । सेसमेत्थ उत्तानमेव ।

४८. छट्ठे गम्भीराति अगाधा दुक्खोगाळ्हा । पाळिवसेनाति इमिना यो धम्मपटिसम्भिदाय विसयो गम्भीरभावो, तमाह । धम्मपटिवेधस्स हि दुक्करभावतो धम्मस्स पाळिया दुक्खोगाळ्हाय गम्भीरभावो । “पाळिवसेन गम्भीरा”ति वत्त्वा “सल्लसुत्तसदिसा”ति वुत्तं तस्स “अनिमित्तमनञ्जात”न्ति आदिना (सु० नि० ५७९) पाळिवसेन गम्भीरताय लब्धनतो । तथा हि तत्थ ता गाथा दुविज्जेय्यरूपा तिड्ढन्ति । दुविज्जेय्यज्झि जाणेन दुक्खोगाळ्हन्ति कत्वा “गम्भीरा”न्ति वुच्चति । पुब्बापरम्पेत्थ कासज्जि गाथानं दुविज्जेय्यताय दुक्खोगाळ्हमेव, तस्मा तं “पाळिवसेन गम्भीरा”ति वुत्तं । इमिनाव नयेन “अत्थवसेन गम्भीरा”ति एत्थापि अत्थो वेदितब्बो । महावेदल्लसुत्तस्स (म० नि० १.४४९ आदयो) अत्थवसेन गम्भीरता सुविज्जेय्याव । लोकं उत्तरतीति लोकुत्तरो, नवविधो अप्पमाणधम्मो । सो अत्थभूतो एतेसं अत्थीति लोकुत्तरा । तेनाह “लोकुत्तरअत्थदीपका”ति ।

सत्तसुज्जं धम्ममत्तमेवाति सत्तेन अत्तना सुज्जं केवलं धम्ममत्तमेव । उग्गहेतब्बं परियापुणितब्बन्ति लिङ्गवचनविपल्लासेन वुत्तन्ति आह “उग्गहेतब्बे च परियापुणितब्बे चा”ति । कविनो कम्मं कविता । यं पनस्स कम्मं, तं तेन कतन्ति वुच्चतीति आह “कविताति कवीहि कता”ति । इतरन्ति कावेय्याति पदं, काव्यन्ति वुत्तं होति । काव्यन्ति च कविना वुत्तन्ति अत्थो । तेनाह “तस्सेव वेवचन”न्ति । विचित्रअक्खराति विचित्ताकारक्खरा विज्जापनीया । सासनतो बहिभूताति न सासनावचरा । तेसं सावकेहीति बुद्धानं सावकाति अपञ्जातानं येसं केसज्जि सावकेहि । न चेव अज्जमज्जं पटिपुच्छन्तीति ये वाचेन्ति, ये च सुणन्ति, ते अज्जमज्जं अत्थादिं नप्पटिपुच्छन्ति, केवलं वाचनसवनमत्तेनेव परितुट्ठा होन्ति । चारिकं न विचरन्तीति असुकस्मिं ठाने अत्थादिं जानन्ता अत्थीति पुच्छन्तथाय चारिकं न गच्छन्ति तादिसस्स पुग्गलस्स अभावतो तस्स च पुब्बापरविरोधतो । कथं रोपेतब्बन्ति केन पकारेन निक्खिपितब्बं । अत्थो नाम

सभावतो अनुसन्धितो सम्बन्धतो पुब्बापरतो आदिपरियोसानतो च जातो सम्माजातो होतीति आह “को अत्थो”तिआदि। अनुत्तानीकतन्ति अक्खरसन्निवेसादिना अनुत्तानीकतं। कङ्कयाति संसयस्स।

४९. सत्तमे किलेसेही आमसितब्बतो आमिसं, चत्तारो पच्चया। तदेव गरु गरुकातब्बं एतेसं, न धम्मोति आमिसगरू। तेनाह “लोकुत्तरधम्मं लामकतो गहेत्वा ठितपरिसा”ति। उभतो भागतो विमुत्तोति उभतोभागविमुत्तो। द्वीहि भागेहि द्वे वारे विमुत्तो। पज्जाय विमुत्तोति समथसन्निस्सयेन विना अग्गमग्गपज्जाय विमुत्तो। तेनाह “सुक्खविपस्सकखीणासवो”ति। कायेनाति नामकायेन। ज्ञानफस्सं फुसित्वाति अट्टसमापत्तिसज्जितं ज्ञानफस्सं अधिगमवसेन फुसित्वा। पच्छा निरोधं निब्बानं यथा आलोचितं नामकायेन सच्छिकरोतीति कायसक्खी। न तु विमुत्तो एकच्चानं आसवानं अपरिक्खीणत्ता। दिट्ठन्तं पत्तोति दिट्ठस्स अन्तो अनन्तरो कालो दिट्ठन्तो, दस्सनसङ्घातस्स सोतापत्तिमग्गजाणस्स अनन्तरं पत्तोति अत्थो। पठमफलतो पट्टाय हि याव अग्गमग्गा दिट्ठिप्पत्तो। तेनाह “इमे द्वेपि छसु ठानेसु लब्धन्ती”ति।

सद्वहन्तो विमुत्तोति एतेन सब्बथा अविमुत्तस्स सद्दामत्तेन विमुत्तभावदस्सनेन सद्भावविमुत्तस्स सेक्खभावमेव विभावेति। सद्भावविमुत्तोति वा सद्भाय अविमुत्तोति अत्थो। छसु ठानेसूति पठमफलतो पट्टाय छसु ठानेसु। धम्मं अनुस्सरतीति पठममग्गपज्जासङ्घातं धम्मं अनुस्सरति। सद्धं अनुस्सरतीति एत्थापि एसेव नयो। उभोपि हेते सोतापत्तिमग्गट्टायेव। इमं कस्मा गणहन्तीति एवं एकन्तपासंसेसु अरियेसु गय्हमानेसु इमं एकन्तनिन्दितं लामकं दुस्सीलं कस्मा गणहन्ति। सब्बेसु सब्बता सदिसेसु लब्धमानोपि विसेसो न पज्जायति, विसभागे पन सति एव पज्जायति पटभावेन विय चित्तपटस्साति आह “एकच्चेसु पना”तिआदि। गन्थिताति अवबद्धा। मुच्छिताति मुच्छं सम्मोहं आपन्ना। छन्दरागअपकङ्कनायाति छन्दरागस्स अपनयनत्थं। निस्सरणपज्जायाति ततो निस्सरणावहाय पज्जाय विरहिता।

पज्जाधुरेनाति विपस्सनाभिनिवेसेन। अभिनिविट्ठोति विपस्सनामग्गं ओतिण्णो। तस्मिं खणेति सोतापत्तिमग्गक्खणे। धम्मानुसारी नाम पज्जासङ्घातेन धम्मेन अरियमग्गसोतस्स अनुस्सरणतो। कायसक्खी नाम नामकायेन सच्छिकातब्बस्स निब्बानस्स सच्छिकरणतो। विक्खम्भनसमुच्छेदानं वसेन द्विक्खत्तुं। अरूपज्झानेहि रूपकायतो, अग्गमग्गेन सेसकायतोति द्वीहि भागेहि निस्सक्कवचनज्चेतं। दिट्ठन्तं पत्तो, दिट्ठता वा पत्तोति दिट्ठिप्पत्तो। तत्थ दिट्ठन्तं पत्तोति दस्सनसङ्घातस्स सोतापत्तिमग्गजाणस्स अनन्तरं पत्तोति अत्थो। दिट्ठताति चतुसच्चदस्सनसङ्घाताय पज्जाय निरोधस्स दिट्ठता। ज्ञानफस्सरहिताय सातिसयाय पज्जाय एव विमुत्तोति पज्जाविमुत्तो। सेसं वुत्तनयत्ता सुविज्जेय्यमेव।

५०. अट्टमे न समाति विसमा। कायकम्मादीनं विसमत्ता ततो एव तत्थ पक्खलनं सुलभन्ति आह “सपक्खलनट्टेना”ति। निप्पक्खलनट्टेनाति पक्खलनाभावेन। उद्धम्मानीति धम्मतो अपेतानि। उब्बिनयानीति एत्थापि एसेव नयो।

५१. नवमे अधम्मिकाति अधम्मे नियुत्ता। तेनाह “निद्धम्मा”ति, धम्मरहिताति अत्थो।

५२. दसमे गणहन्तीति पवत्तेन्ति। न चेव अज्जमज्जं सज्जापेन्तीति मूलतो पट्टाय तं अधिकरणं यथा वूपसम्मति, एवं अज्जमज्जं इतरीतरे न सम्मा जानापेन्ति। सज्जापनत्थं सन्निपाते सति तत्थ युत्तपत्तकरणेन सज्जत्तिया भवितब्बं, ते पन सज्जापनत्थं न सन्निपत्तन्ति। न पेक्खापेन्तीति तं अधिकरणं मूलतो पट्टाय अज्जमज्जं न पेक्खापेन्ति। असज्जत्तियेव

अत्तना गहितपक्खस्स बलं एतेसन्ति असञ्जत्तिबला । न तथा मन्तेन्तीति
सन्दिट्ठिपरामासिआधानग्गाहिदुप्पटिनिस्सग्गिभावेन तथा न मन्तेन्ति । तेनाह “थामसा”तिआदि । उत्तानत्थोयेव
कण्हपक्खे वुत्तप्पटिपक्खेन गहेतब्बत्ता ।

परिसवग्गवण्णना निट्ठिता ।

पठमपण्णासकं निट्ठितं ।

२. दुतियपण्णासकं

(६) १. पुग्गलवग्गवण्णना

५३. दुतियपण्णासकस्स पठमे हितग्गहणेन मेत्ता वुत्ता होति, न करुणा, अनुकम्पागहणेन पन करुणाति
चक्कवत्तिना सद्धिं गहितत्ता “लोकानुकम्पाया”ति न वुत्तं । निप्परियायतो लोकानुकम्पा नाम सम्मासम्बुद्धाधीनाति ।
द्वेति मनुस्सदेवसम्पत्तिवसेन द्वे सम्पत्तियो । ता द्वे, निब्बानसम्पत्ति चाति तिस्सो ।

५४. दुतिये बहुसो लोके न चिण्णा न पवत्ता मनुस्साति आचिण्णमनुस्सा । कदाचिदेव हि नेसं लोके निब्बत्ति
अभूतपुब्बा भूताति अब्भुतमनुस्सा ।

५५. ततिये दससु चक्कवाळसहस्सेसु अनुतापं करोति तस्स एकबुद्धखेत्तभावतो ।

५६. चतुत्थे थूपस्स युत्ताति धातुयो पक्खिपित्वा थूपकरणस्स युत्ता ।

५७. पञ्चमे अत्तनो आनुभावेनाति सयम्भुजाणेन । बुद्धाति बुद्धवन्तो ।

५८. छट्ठे पहीनत्ता न भायतीति अत्तसिनेहाभावतो न भायति । सक्कायदिट्ठिग्गहणञ्चेत्थ निदस्सनमत्तं,
अत्तसिनेहस्स पटिघस्स तदेकट्ठसम्मोहस्स च वसेन भायनं होतीति तेसम्पि पहीनत्ता न भायति, अञ्जथा सोतापन्नादीनं
अभयेन भवितब्बं सिया । सक्कायदिट्ठिया बलवत्ताति एत्थ अहंकारसम्मोहनतादीनम्पि बलवत्ताति वत्तब्बं ।

५९. सत्तमे अस्साजानीयोति लिखन्ति, उस्साजानीयोति पन पाठोति ।

६१. नवमे तत्थाति अन्तरापणे । एकोति द्वीसु किन्नरेसु एको । अम्बिलिकाफलञ्च अदसाति आनेत्वा सम्बन्धो ।
अम्बिलिकाफलन्ति तित्तिणीफलन्ति वदन्ति, चतुरम्बिलन्ति अपरे । द्वे अत्थेति पाळियं वुत्ते द्वे अत्थे ।

६२. दसमे यथाआरद्धे किच्चे वत्तमाने अन्तरा एव पटिगमनं पटिवानं, नत्थि एतस्स पटिवानन्ति अप्पटिवानो । तत्थ
असंकोचप्पत्तो । तेनाह “अनुक्कण्ठितो”तिआदि ।

६३. एकादसमे सन्निवासन्ति सहवासं । यथा असप्पुरिसा सह वसन्ता अञ्जमञ्जं अगारवेन अनादरियं करोन्ति,
तप्पटिक्खेपेन सप्पुरिसानं सगारवप्पटिपत्तिदस्सनपरमिदं सुत्तं दट्ठब्बं ।

६४. द्वादसमे द्वीसुपि पक्खेसूति विवादापन्नानं भिक्खूनं द्वीसुपि पक्खेसु । संसरमानाति पवत्तमाना । दिट्ठिपळासोति दिट्ठिसन्निस्सयो पळासो युगगाहो । आघातेन्तोति आहनन्तो बाधेन्तो । अनभिराधनवसेनाति यस्स उप्पज्जति, तस्स तदज्जेसज्च अत्थस्स अनभिराधनवसेन । सब्बम्पेतन्ति वचीसंसारोति सब्बम्पेतं । अत्तनो चित्ते परिसाय च चित्तेति आनेत्वा सम्बन्धो ।

पुगलवग्गवण्णना निट्ठिता ।

(७) २. सुखवग्गवण्णना

६५. दुतियस्स पठमे सब्बकामनिप्फत्तिमूलकं सुखन्ति अनवसेसउपभोगपरिभोगवत्थुनिप्फत्तिहेतुकं कामसुखं । पब्बज्जामूलकं सुखन्ति पब्बज्जाहेतुकं पविवेकसुखं ।

६६. दुतिये कामेति पञ्च कामगुणे, सब्बेपि वा तेभूमके धम्मे । वुत्तज्हेतं “सब्बेपि तेभूमका धम्मा कमनीयद्वेन कामा”ति (महानि० १) । नेक्खम्मं वुच्चति पब्बज्जा घरबन्धनतो निक्खन्तत्ता । निब्बानमेव वा —

“पब्बज्जा पठमं ज्ञानं, निब्बानञ्च विपस्सना ।

सब्बेपि कुसला धम्मा, नेक्खम्मन्ति पवुच्चरे”ति ॥ (इतिवु० अट्ठ० १०९) —

हि वुत्तं ।

६७. ततिये उपधी वुच्चन्ति पञ्चुपादानक्खन्धा, तन्निस्सितं सुखं उपधिसुखं । तप्पटिपक्खतो निरुपधिसुखं लोकुत्तरसुखं ।

६८. चतुत्थे वट्टपरियापन्नं सुखं वट्टसुखं । निब्बानारम्मणं सुखं विवट्टसुखं ।

६९. पञ्चमे संकिलेसन्ति संकिलिट्ठं । तेनाह “वट्टगामिसुखं”न्ति । विवट्टसुखन्ति मग्गफलसहगतं सुखं ।

७०. छट्ठे अरियानमेव सुखं अरियसुखं, अरियञ्च तं सुखञ्चातिपि अरियसुखं । अनरियानमेव सुखं अनरियसुखं । अनरियञ्च तं सुखञ्चातिपि अनरियसुखं ।

७१. सत्तमे तन्ति चेतसिकसुखं ।

७२. अट्ठमे सह पीतिया वत्ततीति सप्पीतिकं, पीतिसहगतं सुखं । सभावतो विरागतो च नत्थि एतस्स पीतीति निप्पीतिकं सुखं । अट्ठकथायं पनेत्थ ज्ञानसुखमेव उद्धटं, तथा च “लोकियसप्पीतिकसुखतो लोकियनिप्पीतिकसुखं अगं”न्ति वुत्तं । लोकियनिप्पीतिकम्पि हि अगं लब्भतेवाति भूमन्तरं भिन्दित्वा अगगभावो वेदितब्बो ।

७३. नवमे सातसभावमेव सुखं सातसुखं, न उपेक्खासुखं विय असातसभावं । कामञ्चेत्थ कायविज्जाणसहगतम्पि सातसुखमेव, अट्ठकथायं पन “तीसु ज्ञानेसु सुखं”न्तेव वुत्तं ।

७४. दसमे समाधिसम्पयुत्तं सुखं समाधिसुखं । न समाधिसम्पयुत्तं सुखं असमाधिसुखं ।

७५. एकादसमे सुत्तन्तकथा एसाति “सप्पीतिकं ज्ञानद्वय”न्ति वुत्तं ।

७७. तेरसमे रूपज्झानं रूपं उत्तरपदलोपेन, तं आरम्मणं एतस्साति रूपारम्मणं । चतुत्थज्झानगगहणं पन यदस्स पटियोगी, तेन समानयोगक्खमदस्सनपरं । यं किञ्चि रूपन्ति यं किञ्चि रूपनलक्खणं रूपं । तप्पटिक्खेपेन अरूपं वेदितब्बं ।

सुखवग्गवण्णना निट्ठिता ।

(८) ३. सनिमित्तवग्गवण्णना

७८-७९. ततियस्स पठमे निमीयति एत्थ फलं अवसेसपच्चयेहि पक्खिपीयति वियाति निमित्तं, कारणन्ति आह “सनिमित्ताति सकारणा”ति । दुतियादीसूति दुतियसुत्तादीसु । एसेव नयोति इमिना निदानादिपदानम्पि कारणपरियायमेव दीपेति । निददाति फलन्ति निदानं, हिनोति फलं पतिट्ठाति एतेनाति हेतु, सङ्खरोति फलन्ति सङ्खारो, पटिच्च एतस्मा फलं एतीति पच्चयो, रूपति निरूपति फलं एत्थाति रूपन्ति एवं निदानादिपदानम्पि हेतुपरियायता वेदितब्बा ।

८४. सत्तमे पच्चयभूतायाति सहजातादिपच्चयभूताय ।

८७. दसमे समेच्च सम्भुय्य पच्चयेहि कतोति सङ्खतो, सङ्खतो धम्मो आरम्मणं एतेसन्ति सङ्खतारम्मणा । मग्गक्खणे न होन्ति नाम पहीयन्तीति कत्वा । नाहेसुन्ति एत्थ “वुच्चन्ती”ति अज्झाहरितब्बं । याव अरहत्ता देसना देसिता तंतंसुत्तपरियोसाने “न होन्ती”ति वुत्तत्ता ।

सनिमित्तवग्गवण्णना निट्ठिता ।

(९) ४. धम्मवग्गवण्णना

८८. चतुत्थस्स पठमे फलसमाधीति चतूसुपि अरियफलेसु समाधि । तथा फलपज्जा वेदितब्बा ।

८९. दुतिये सम्पयुत्तधम्मे परिग्गणहातीति पग्गाहो । न विक्खिपतीति अविक्खेपो ।

९०. ततिये नमनट्ठेन नामं । रूपनट्ठेन रूपं । सम्मसनचारस्स अधिप्पेतत्ता “चत्तारो अरूपक्खन्धा”त्वेव वुत्तं । तेनाह “धम्म-कोट्टासपरिच्छेदजाणं नाम कथित”न्ति ।

९१. चतुत्थे विजाननट्ठेन विज्जा । विमुच्चनट्ठेन विमुत्ति ।

९२. पञ्चमे भवो नाम सस्सतं सदा भावतो, सस्सतवसेन उप्पज्जनदिट्ठि भवदिट्ठि । विभवो नाम उच्छेदो

विनासनद्वेन, विभववसेन उप्पज्जनदिट्ठि विभवदिट्ठि । उत्तानत्थानेव हेट्ठा वुत्तनयत्ता ।

१५. अट्ठमे दुक्खं वचो एतस्मिं विप्पटिकूलगाहिम्हि विपच्चनीकसाते अनादरे पुग्गलेति दुब्बचो, तस्स कम्मं दोवचस्सं, तस्स दुब्बचस्स पुग्गलस्स अनादरियवसेन पवत्ता चेतना । तस्स भावो **दोवचस्सता** । तस्स भावोति च तस्स यथावुत्तस्स दोवचस्सस्स अत्थिभावो, अत्थतो दोवचस्समेव । वित्थारतो पनेसा “तत्थ कतमा दोवचस्सता? सहधम्मिके वुच्चमाने दोवचस्साय”न्ति **अभिधम्मे** आगता । सा अत्थतो सङ्खारक्खन्धो होति । चतुन्नं वा खन्धानं एतेनाकारेन पवत्तानं एतं अधिवचनन्ति वदन्ति ।

पापयोगतो पापा अस्सद्वादयो पुग्गला एतस्स मित्ताति पापमित्तो, तस्स भावो **पापमित्तता** । वित्थारतो पनेसा “तत्थ कतमा पापमित्तता? ये ते पुग्गला अस्सद्वा दुस्सीला अप्पस्सुता मच्छरिनो दुप्पज्जा । या तेसं सेवना निसेवना संसेवना भजना सम्भजना भत्ति सम्भत्ति तंसम्पवङ्कता”ति (ध० स० १३३३) एवं आगता । सापि अत्थतो दोवचस्सता विय दट्ठब्बा । याय हि चेतनाय पुग्गलो पापसम्पवङ्को नाम होति, सा चेतना चत्तारोपि वा अरूपिनो खन्धा तदाकारप्पवत्ता **पापमित्तता** ।

१६. नवमे सुखं वचो एतस्मिं पदक्खिणगाहिम्हि अनुलोमसाते सादरे पुग्गलेति **सुब्बचो**ति आदिना, कल्याणा सद्वादयो पुग्गला एतस्स मित्ताति **कल्याणमित्तो**ति आदिना वुत्तविपरियायेन अत्थो वेदितब्बो ।

१७. दसमे पथवीधातुआदयो सुखधातुकामधातुआदयो च एतास्वेव अन्तोगधाति एतासु कोसल्ले दस्सिते तासुपि कोसल्लं दस्सितमेव होतीति “**अट्ठारस धातुयो**”ति वुत्तं । **धातूति जाननन्ति** इमिना अट्ठारसन्नं धातूनं सभावपरिच्छेदिका सवनधारणसम्मसनप्पटिवेधपज्जा वुत्ता । तत्थ धातूनं सवनधारणपज्जा सुतमया, इतरा भावनामया । तत्थापि सम्मसनपज्जा लोकिया । विपस्सना हि सा, इतरा लोकोत्तरा । लक्खणादिवसेन अनिच्चादिवसेन च मनसिकरणं मनसिकारो, तत्थ कोसल्लं **मनसिकारकुसलता** । अट्ठारसन्नंयेव धातूनं सम्मसनप्पटिवेधपच्चवेक्खणपज्जा मनसिकारकुसलता, सा आदिमज्झपरियोसानवसेन तिधा भिन्ना । तथा हि सम्मसनपज्जा तस्सा आदि, पटिवेधपज्जा मज्झे, पच्चवेक्खणपज्जा परियोसानं ।

१८. एकादसमे आपत्तियोव आपत्तिक्खन्धा । ता पन अन्तरापत्तीनं अगगहणेन पच्च, तासं गहणेन सत्त होन्तीति आह “**पच्चन्नज्ज सत्तन्नज्ज आपत्तिक्खन्धान**”न्ति । **जाननन्ति** “इमा आपत्तियो, एतका आपत्तियो, एवज्ज तासं आपज्जनं होती”ति जाननं । एवं तिप्पकारेन जाननपज्जा हि आपत्तिकुसलता नाम । आपत्तितो वुट्ठापनप्पयोगताय कम्मभूता वाचा कम्मवाचा, तथाभूता अनुस्सावनवाचा । “इमाय कम्मवाचाय इतो आपत्तितो वुट्ठानं होति, होन्तज्ज पठमे, ततिये वा अनुस्सावने य्य-कारं पत्ते, ‘संवरिस्सामी’ति वा पदे परियोसिते होती”ति एवं तं तं आपत्तीहि वुट्ठानपरिच्छेदजाननपज्जा **आपत्तिवुट्ठानकुसलता** । वुट्ठानन्ति च यथापन्नाय आपत्तिया यथा तथा अनन्तरायतापादनं । एवं वुट्ठानगहणेनेव देसनायपि सङ्गहो सिद्धो होति ।

धम्मवग्गवण्णना निट्ठिता ।

(१०) ५. बालवग्गवण्णना

१९. पच्चमस्स पठमे **अनागतं भारं वहतीति** अत्तनो असम्पत्तं भारं वहति । अथेरोव समानो थेरेहि वहितब्बं

बीजनगाहधम्मज्जेसनादिभारं वहतीति एवमेत्थ अत्थो दट्ठब्बो । **अट्ठकथायं** (महाव० अट्ठ० १५९-१६०) पन यस्मा सम्मज्जनादिनवविधं पुब्बकिच्चं आणत्तेनेव कातब्बं, पातिमोक्खञ्च आणत्तेनेव उद्दिसितब्बं, तस्मा तं सब्बं विना आणत्तिया करोन्तो अनागतं भारं वहति नामाति दस्सेतुं “**सम्मज्जनी पदीपो**”तिआदि वुत्तं । यज्झि “अनुजानामि, भिक्खवे, उपोसथागारं सम्मज्जितु”न्तिआदिना नयेन **पाळियं** आगतं । अट्ठकथासु च —

“सम्मज्जनी पदीपो च, उदकं आसनेन च ।
उपोसथस्स एतानि, ‘पुब्बकरण’न्ति वुच्चति ॥

“छन्दपारिसुद्धिउत्तुक्खानं, भिक्खुगणना च ओवादो ।
उपोसथस्स एतानि, ‘पुब्बकिच्च’न्ति वुच्चती”ति ॥ (महाव० अट्ठ १६८) —

एवं द्वीहि नामेहि नवविधं पुब्बकिच्चं दस्सितं, तं अकत्वा उपोसथं कातुं न वट्ठति । तस्मा “अनुजानामि, भिक्खवे, थेरेन भिक्खुना नवं भिक्खुं आणापेतु”न्ति वचनतो थेरेन आणत्तेन अगिलानेन भिक्खुना उपोसथागारं सम्मज्जितब्बं, पानीयं परिभोजनीयं उपट्ठपेतब्बं, आसनं पज्जापेतब्बं, पदीपो कातब्बो, अकरोन्तो दुक्कटं आपज्जति ।

थेरेनपि पतिरूपं जत्वा आणापेतब्बं, आणापेत्तेनपि यं किञ्चि कम्मं करोन्तो वा सदा कालमेव एको वा भारनित्थरणको वा सरभाणकधम्मकथिकादीसु वा अज्जतरो न उपोसथागारसम्मज्जनत्थं आणापेतब्बो, अवसेसा पन वारेन आणापेतब्बा । सचे आणत्तो सम्मज्जनिं तावकालिकम्पि न लभति, साखाभङ्गं कप्पियं कारेत्वा सम्मज्जितब्बं, तम्पि अलभन्तस्स लद्धकप्पियं होति । पदीपकरणेपि वुत्तनयेनेव आणापेतब्बो, आणापेत्तेन च “अमुकस्मिं नाम ओकासे तेलं वा कपल्लिका वा अत्थि, तं गहेत्वा करोही”ति वत्तब्बो । सचे तेलादीनि नत्थि, परियेसितब्बानि । परियेसित्वा अलभन्तस्स लद्धकप्पियं होति । अपि च कपाले अग्नि जालेतब्बो । आसनपज्जापनाणत्तियम्पि वुत्तनयेनेव आणापेतब्बो, आणत्तेन च सचे उपोसथागारे आसनानि नत्थि, सङ्घिकावासतो आहरित्वा पज्जापेत्वा पुन आहरितब्बानि, आसनेसु असति कटसारकेपि तट्टिकायोपि पज्जापेतुं वट्ठति, तासुपि असति साखाभङ्गानि कप्पियं कारेत्वा पज्जापेतब्बानि । कप्पियकारकं अलभन्तस्स लद्धकप्पियं होति ।

छन्दपारिसुद्धीति एत्थ उपोसथकरणत्थं सन्निपतिते सङ्घे बहि उपोसथं कत्वा आगतेन सन्निपातट्ठानं गन्त्वा कायसामग्निं अदेन्तेन छन्दो दातब्बो । योपि गिलानो वा किच्चप्पसुतो वा, तेन पारिसुद्धिं देन्तेन छन्दो दातब्बो । कथं दातब्बो? एकस्स भिक्खुनो सन्तिके “छन्दं दम्मि, छन्दं मे हर, छन्दं मे आरोचेही”ति अयमत्थो कायेन वा वाचाय वा उभयेन वा विज्जापेतब्बो । एवं दिन्नो होति छन्दो । अकतूपोसथेन पन गिलानेन वा किच्चप्पसुतेन वा पारिसुद्धिं दातब्बा । कथं दातब्बा? एकस्स भिक्खुनो सन्तिके “पारिसुद्धिं दम्मि, पारिसुद्धिं मे हर, पारिसुद्धिं मे आरोचेही”ति अयमत्थो कायेन वा वाचाय वा उभयेन वा विज्जापेतब्बो । एवं दिन्ना होति पारिसुद्धि । तं पन देन्तेन छन्दोपि दातब्बो । वुत्तज्हेतं भगवता — “अनुजानामि, भिक्खवे, तदहुपोसथे पारिसुद्धिं देन्तेन छन्दम्पि दातुं, सन्ति सङ्घस्स करणीय”न्ति । तत्थ पारिसुद्धिदानं सङ्घस्सपि अत्तनोपि उपोसथकरणं सम्पादेति, न अवसेसं सङ्घकिच्चं । छन्ददानं सङ्घस्सेव उपोसथकरणञ्च सेसकिच्चञ्च सम्पादेति, अत्तनो पन उपोसथो अकतोयेव होति, तस्मा पारिसुद्धिं देन्तेन छन्दोपि दातब्बो ।

उत्तुक्खानन्ति “हेमन्तादीनं उत्तूनं एत्तकं अतिक्कन्तं, एत्तकं अवसिट्ठ”न्ति एवं उत्तूनं आचिक्खनं । **भिक्खुगणनाति** “एत्तका भिक्खू उपोसथगे सन्निपतिता”ति भिक्खूनं गणना । इदम्पि उभयं कत्वाव उपोसथो कातब्बो । **ओवादोति**

भिक्षुनोवादो । न हि भिक्षुनीहि याचितं ओवादं अनारोचेत्वा उपोसथं कातुं वट्टति । भिक्षुनियो हि “स्वे उपोसथो”ति आगन्त्वा “अयं उपोसथो चातुहसो, पन्नरसो”ति पुच्छित्वा पुन उपोसथदिवसे आगन्त्वा “भिक्षुनिसङ्घो, अय्य, भिक्षुसङ्घस्स पादे वन्दति, ओवादूपसङ्कमनञ्च याचति, लभतु किर, अय्य, भिक्षुनिसङ्घो ओवादूपसङ्कमन”न्ति एवं ओवादं याचन्ति । तं ठपेत्वा बालगिलानगमिये अञ्जो सचेपि आरञ्जको होति, अप्पटिग्गहेतुं न लभति, तस्मा येन सो पटिग्गहितो, तेन भिक्षुना उपोसथगो पातिमोक्खुद्देसको भिक्षु एवं वत्तब्बो “भिक्षुनिसङ्घो, भन्ते, भिक्षुसङ्घस्स पादे वन्दति, ओवादूपसङ्कमनञ्च याचति, लभतु किर, भन्ते, भिक्षुनिसङ्घो ओवादूपसङ्कमन”न्ति ।

पातिमोक्खुद्देसकेन वत्तब्बं — “अत्थि कोचि भिक्षु भिक्षुनोवादको सम्मतो”ति । सचे होति कोचि भिक्षु भिक्षुनोवादको सम्मतो, ततो तेन सो वत्तब्बो — “इत्थन्नामको भिक्षु भिक्षुनोवादको सम्मतो, तं भिक्षुनिसङ्घो उपसङ्कमतू”ति । सचे नत्थि, ततो तेन पुच्छितब्बं — “को आयस्मा उस्सहति भिक्षुनियो ओवदितु”न्ति । सचे कोचि उस्सहति, सोपि च अट्ठहि अङ्गेहि समन्नागतो, तं तत्थेव सम्मन्नित्वा ओवादप्पटिग्गाहको वत्तब्बो — “इत्थन्नामो भिक्षु भिक्षुनोवादको सम्मतो, तं भिक्षुनिसङ्घो उपसङ्कमतू”ति । सचे पन न कोचि उस्सहति, पातिमोक्खुद्देसकेन वत्तब्बं — “नत्थि कोचि भिक्षु भिक्षुनोवादको सम्मतो, पासादिकेन भिक्षुनिसङ्घो सम्पादेतू”ति । एत्तावता हि सिक्खत्तयसङ्गहितं सकलं सासनं आरोचितं होति । तेन भिक्षुना “साधू”ति सम्पटिच्छित्वा पाटिपदे भिक्षुनीनं आरोचेतब्बं । पातिमोक्खम्पि “न, भिक्षवे, अनज्झिद्वेन पातिमोक्खं उद्दिसितब्बं, यो उद्दिसेय्य, आपत्ति दुक्कटस्सा”ति वचनतो अनानत्तेन न उद्दिसितब्बं । “थेराधेय्यं पातिमोक्खं”न्ति हि वचनतो सङ्गत्थेरो वा पातिमोक्खं उद्दिसेय्य, “अनुजानामि, भिक्षवे, यो तत्थ भिक्षु ब्यत्तो पटिबलो, तस्साधेय्यं पातिमोक्खं”न्ति वचनतो नवकतरो वा थेरेन आणत्तो । दुतियादीनि उत्तानत्थानेव ।

१०९. एकादसमे न कुक्कुच्चायितब्बं कुक्कुच्चायतीति न कुक्कुच्चायितुं युत्तकं कुक्कुच्चायति । सूकरमंसं लभित्वा “अच्छमंसं”न्ति कुक्कुच्चायति, “सूकरमंसं”न्ति जानन्तोपि “अच्छमंसं”न्ति कुक्कुच्चायति, न परिभुञ्जतीति वुत्तं होति । एवं मिगमंसं “दीपिमंसं”न्ति, काले सन्तेयेव “कालो नत्थी”ति, अप्पवारेत्वा “पवारितोम्ही”ति, पत्ते रजस्मिं अपतितेयेव “पतितं”न्ति, अत्तानं उद्दिस्स मच्छमंसे अकतेयेव “मं उद्दिस्स कतं”न्ति कुक्कुच्चायति । **कुक्कुच्चायितब्बं न कुक्कुच्चायतीति** कुक्कुच्चायितुं युत्तं न कुक्कुच्चायति । अच्छमंसं लभित्वा “सूकरमंसं”न्ति न कुक्कुच्चायति, “अच्छमंसं”न्ति जानन्तोपि “सूकरमंसं”न्ति न कुक्कुच्चायति, मद्दित्वा वीतिक्कमतीति वुत्तं होति । एवं दीपिमंसं मिगमंसन्ति...पे०... अत्तानं उद्दिस्स मच्छमंसे कते “मं उद्दिस्स कतं”न्ति न कुक्कुच्चायतीति एवमेत्थ अत्थो दट्ठब्बो । अट्ठकथायं पन “न कुक्कुच्चायितब्बन्ति सङ्गभोगस्स अपट्ठपनं अविचारणं न कुक्कुच्चायितब्बं नाम, तं कुक्कुच्चायति । कुक्कुच्चायितब्बन्ति तस्सेव पट्ठपनं विचारणं, तं न कुक्कुच्चायती”ति एत्तकमेव वुत्तं । तत्थ **सङ्गभोगस्साति** सङ्गस्स चतुपच्चयपरिभोगत्थाय दिन्नखेत्तवत्थुतळाकादिकस्स, ततो उप्पन्नधज्जहिरज्जादिकस्स च सङ्गस्स भोगस्स । **अपट्ठपनन्ति** असंविदहनं । तेनाह “**अविचारणं**”न्ति । **तस्सेवाति** यथावुत्तस्सेव सङ्गभोगस्स ।

बालवग्गवण्णना निट्ठिता ।

दुतियपण्णासकं निट्ठितं ।

३. ततियपण्णासकं

(११) १. आसादुप्पजहवग्गवण्णना

११९. ततियपण्णासकस्स पठमे दुक्खेन पजहितब्बाति दुप्पजहा । दुच्चजातिआदीसुपि एसेव नयो । द्विन्नं आसानं दुच्चजभावो कथं जानितब्बाति पठमं ताव लाभासाय दुच्चजभावं विभावेति “लाभासाया”तिआदिना । उभतोब्यूळहन्ति युद्धत्थाय उभतो सन्निपतितं । पक्खन्दन्तीति अनुप्पविसन्ति । जीवितासाय दुप्पजहत्तातिआदिना जीवितासाय दुच्चजभावं विभावेति ।

१२०. दुतिये दुल्लभाति न सुलभा । इणं देमीति सज्जं करोतीति एवं सज्जं करोन्तो विय होतीति अत्थो । एत्थ च “पुब्बकारीति पठमं उपकारस्स कारको । कतञ्जू कतवेदीति तेन कतं जत्वा पच्छा कारको । तेसु पुब्बकारी ‘इणं देमी’ति सज्जं करोति, पच्छा कारको ‘इणं जीरापेमी’ति सज्जं करोती”ति एत्तकमेव इध वुत्तं । पुगलपण्णत्तिसंवण्णनायं (पु० प० अट्ठ० ८३) पन —

“पुब्बकारीति पठममेव कारको । कतवेदीति कतं वेदेति, विदितं पाकटं करोति । ते अगारियानगारियेहि दीपेतब्बा । अगारिकेसु हि मातापितरो पुब्बकारिनो नाम, पुत्तधीतरो पन मातापितरो पटिजग्गन्ता अभिवादनादीनि तेसं कुरुमाना कतवेदिनो नाम । अनगारियेसु आचरियुपज्झाया पुब्बकारिनो नाम, अन्तेवासिकसद्धिविहारिका आचरियुपज्झाये पटिजग्गन्ता अभिवादनादीनि च तेसं कुरुमाना कतवेदिनो नाम । तेसं आविभावत्थाय उपज्झायपोसकसोणत्थेरादीनं वत्थूनि कथेतब्बानि ।

“अपरो नयो — परेन अकतेयेव उपकारे अत्तनि कतं उपकारं अनपेक्खित्वा कारको पुब्बकारी, सेय्यथापि मातापितरो चेव आचरियुपज्झाया च । सो दुल्लभो सत्तानं तण्हाभिभूतत्ता । परेन कतस्स उपकारस्स अनुरूपप्पवत्तिं अत्तनि कतं उपकारं उपकारतो जानन्तो वेदियन्तो कतञ्जुकतवेदी सेय्यथापि मातापितुआचरियुपज्झायेसु सम्मापटिपन्नो । सोपि दुल्लभो सत्तानं अविज्जाभिभूतत्ता । अपिच अकारणवच्छलो पुब्बकारी, सकारणवच्छलो कतञ्जुकतवेदी । ‘करिस्सति मे’ति एवमादिकारणनिरपेक्खकिरियो पुब्बकारी, ‘करिस्सति मे’ति एवमादिकारणसापेक्खकिरियो कतञ्जुकतवेदी । तमोजोतिपरायणो पुब्बकारी, जोतिजोतिपरायणो कतञ्जुकतवेदी । देसेता पुब्बकारी, पटिपज्जिता कतञ्जुकतवेदी । सदेवके लोके अरहं सम्मासम्बुद्धो पुब्बकारी, अरियसावको कतञ्जुकतवेदी”ति वुत्तं ।

तत्थ कारणेन विना पवत्तहितचित्तो अकारणवच्छलो । अनागतम्हि पयोजनं अपेक्खमानो “करिस्सति मे”तिआदिना चित्तेन पठमं गहितं तादिसं कतं उपादाय कतञ्जू एव नाम होति, न पुब्बकारीति अधिप्पायेन “करिस्सति मेति एवमादिकारणसापेक्खकिरियो कतञ्जुकतवेदी”ति वुत्तं । तमोजोतिपरायणो पुज्जफलानि अनुपजीवन्तो एव पुज्जानि करोतीति “पुब्बकारी”ति वुत्तो । पुज्जफलं उपजीवन्तो हि कतञ्जुपक्खे तिट्ठति ।

१२१. ततिये तित्तोति सुहितो परियोसितो निट्ठितकिच्चताय निरुस्सुक्को । गुणपारिपूरिया हि परिपुण्णो यावदत्थो इध तित्तो वुत्तो । तप्पेताति अज्जेसम्पि तित्तिकरो । पच्चेकबुद्धो च तथागतसावको च खीणासवो तित्तोति एत्थ पच्चेकबुद्धो नवलोकुत्तरधम्मोहि सयं तित्तो परिपुण्णो, अज्जं पन तप्पेतुं न सक्कोति । तस्स हि धम्मकथाय अभिसमयो न होति, सावकानं पन धम्मकथाय अपरिमाणानं देवमनुस्सानं अभिसमयो होति । एवं सन्तेपि यस्मा ते धम्मं देसेन्ता न अत्तनो वचनं कत्वा कथेन्ति, बुद्धानं वचनं कत्वा कथेन्ति, सोतुं निसिन्नपरिसापि — “अयं भिक्खु न अत्तना पटिविद्धं धम्मं कथेती”ति चित्तीकारं करोति । इति सो चित्तीकारो बुद्धानंयेव होति । एवं तत्थ सम्मासम्बुद्धोव तप्पेता नाम । यथा हि “असुकस्स नाम इदञ्चिदज्ज देथा”ति रज्जा आणत्ते किञ्चापि आनेत्वा देन्ति, अथ खो राजाव तत्थ दायको । येहिपि लद्धं

होति, ते “रज्जा अम्हाकं ठानन्तरं दिन्नं, इस्सरियविभवो दिन्नो” त्वेव गणहन्ति, न “राजपुरिसेही”ति एवंसम्पदमिदं वेदितव्वं ।

१२२. चतुर्थे दुत्तप्पयाति अतप्पया, न सक्का केनचि तप्पेतुं । यो हि उपट्ठाककुलं वा जातिकुलं वा निस्साय वसमानो चीवरे जिण्णे तेहि दिन्नं चीवरं निक्खिपति, न परिभुज्जति । पुनप्पुनं दिन्नम्पि गहेत्वा निक्खिपतेव । यो च तेनेव नयेन लद्धं लद्धं विस्सज्जेति, परस्स देति, पुनप्पुनं लद्धम्पि तथेव करोति । इमे द्वे पुग्गला सकटेहिपि पच्चये उपनेन्तेन तप्पेतुं न सक्काति दुत्तप्पया ।

१२३. पच्चमे न विस्सज्जेतीति अत्तनो अकत्वा परस्स न देति, अतिरेके पन सति न निक्खिपति, परस्स देति । तेनेवाह “सब्बंयेव परेसं न देती”तिआदि । इदं वुत्तं होति “यो भिक्खु उपट्ठाककुला वा जातिकुला वा जिण्णचीवरो साटकं लभित्वा चीवरं कत्वा परिभुज्जति न निक्खिपति, अग्गळं दत्वा पारुपन्तोपि पुनपि दिव्यमाने सहसा नप्पटिगणहाति । यो च लद्धं लद्धं अत्तना परिभुज्जति, परेसं न देति । इमे द्वेपि सुखेन सक्का तप्पेतुन्ति सुतप्पया”ति ।

१२४-१२७. छट्ठसत्तमादीनि उत्तानत्थानेव ।

आसादुप्पजहवग्गवण्णना निट्ठिता ।

(१२) २. आयाचनवग्गवण्णना

१३१. सद्धो भिक्खूति सद्धाय समन्नागतो भिक्खु । यो भिक्खु सारिपुत्तमोग्गल्लानेहि सदिसभावं पत्थेति, सो येहि गुणेहि सारिपुत्तमोग्गल्लाना एतदग्गे ठपिता, ते गुणे अत्तनो अभिक्खेय्याति आह “यादिसो सारिपुत्तथेरो पज्जाया”तिआदि । इतो उत्तरि पत्थेन्तो मिच्छा पत्थेय्याति सारिपुत्तमोग्गल्लानानं ये पज्जादयो गुणा उपलब्धन्ति, ततो उत्तरि पत्थेन्तो मिच्छा पत्थेय्य । अग्गसावकगुणपरमा हि सावकगुणमरियादा । तेसं सावकगुणानं यदिदं अग्गसावकगुणा, न ततो परं सावकगुणा नाम अत्थि । तेनेवाह “यं नत्थि, तस्स पत्थितत्ता”ति । सेसमेत्थ उत्तानमेव ।

१३५. पच्चमे यस्स गुणा खता उपहता च, सो खतो उपहतो नाम होतीति आह “गुणानं खतत्ता”तिआदि । खतत्ताति छिन्नत्ता । उपहतत्ताति नट्टत्ता । तेनाह “छिन्नगुणं नट्टगुणन्ति अत्थो”ति । अपुज्जस्स पसवो नाम अत्थतो पटिलाभोति आह “पसवतीति पटिलभती”ति, अत्तनो सन्ताने उप्पादेतीति अत्थो । अननुपविसित्वाति जाणेन अनोगाहेत्वा । सेसमेत्थ छट्ठादीनि च सुविज्जेय्यानेव ।

आयाचनवग्गवण्णना निट्ठिता ।

(१३) ३. दानवग्गवण्णना

१४२. ततियस्स पठमे दीयतीति दानं, देय्यधम्मस्सेतं अधिवचनं । दीयति अनेनाति वा दानं, परिच्चागचेतनायेतं अधिवचनं । अयं दुविधोपि अत्थो इधाधिप्पेतोति आह “दिय्यनकवसेन दानानी”तिआदि । तत्थ दिय्यनकवसेनाति दातव्ववसेन । अमतपत्तिपटिपदन्ति अमतप्पत्तिहेतुभूतं सम्मापटिपदं ।

१४३-१५१. दुतियादीनि च सुविज्जेय्यानेव ।

दानवग्गवण्णना निड्ढिता ।

(१४) ४. सन्थारवग्गवण्णना

१५२. चतुत्थस्स पठमे आमिसस्स च धम्मस्स च अलाभेन अत्तनो परस्स च अन्तरे सम्भवन्तस्स छिद्दस्स विवरस्स भेदस्स सन्थरणं पिदहनं सङ्गणहनं सन्थारो । अयज्हि लोकसन्निवासो अलब्भमानेन आमिसेन धम्मेन चाति द्वीहि छिद्दो । तस्स तं छिद्दं यथा न पज्जायति, एवं पीठस्स विय पच्चत्थरणेन आमिसेन धम्मेन च सन्थरणं सङ्गणहनं सन्थारोति वुच्चति । एत्थ च आमिसेन सङ्गहो आमिससन्थारो नाम । तं करोन्तेन मातापितूनं भिक्खुगतिकस्स वेय्यावच्चकरस्स रज्जो चोरानञ्च अग्गं अग्गहेत्वापि दातुं वट्ठति । आमसित्वा दिन्नेहि राजानो च चोरा च अनत्थम्पि करोन्ति, जीवितक्खयम्पि पापेन्ति । अनामसित्वा दिन्नेन अत्तमना होन्ति, चोरनागवत्थुआदीनि चेत्थ वत्थूनि कथेतब्बानि । तानि समन्तपासादिकाय विनयट्ठकथायं (पारा० १८५) वित्थारितानि । सक्कच्चं उद्देसदानं पाळिवण्णना धम्मकथाकथनन्ति एवं धम्मेन सङ्गहो धम्मसन्थारो नाम ।

१५३-१६३. दुतियादीनि उत्तानत्थानेव ।

सन्थारवग्गवण्णना निड्ढिता ।

(१५) ५. समापत्तिवग्गवण्णना

१६४. पञ्चमस्स पठमे “इतो पुब्बे परिकम्मं पवत्तं, इतो परं भवङ्गं मज्झे समापत्ती”ति एवं सह परिकम्मेन अप्पनापरिच्छेदप्पजानना पज्जा समापत्तिकुसलता । वुट्ठाने कुसलभावो वुट्ठानकुसलता । पगेव वुट्ठानपरिच्छेदकजाणन्ति एवमेत्थ अत्थो दट्ठब्बो ।

१६५. दुतिये उज्जुनो भावो अज्जवं, अजिम्हता अकुटिलता अवङ्कताति अत्थो । अभिधम्मेपि (ध० स० १३४६) वुत्तं — “तत्थ कतमो अज्जवो? या अज्जवता अजिम्हता अकुटिलता अवङ्कता, अयं वुच्चति अज्जवो”ति । अनज्जवञ्च अज्जवप्पटिक्खेपेन वेदितब्बं । गोमुत्तवङ्कता, चन्दलेखावङ्कता, नङ्गलकोटिवङ्कताति हि तयो अनज्जवा । एकच्चो हि भिक्खु पठमवये मज्झिम-पच्छिमवये च एकवीसतिया अनेसनासु छसु च अगोचरेसु चरति, अयं गोमुत्तवङ्कता नाम, आदितो पट्टाय याव परियोसाना पटिपत्तिया वङ्कभावतो । एको पठमवये पच्छिमवये च चतुपारिसुद्धिसीलं पूरेति, लज्जी कुक्कुच्चको सिक्खाकामो होति, मज्झिमवये पुरिमसदिसो, अयं चन्दलेखावङ्कता नाम, पटिपत्तिया मज्झिद्वाने वङ्कभावापत्तितो । एको पठमवयेपि मज्झिमवयेपि चतुपारिसुद्धिसीलं पूरेति, लज्जी कुक्कुच्चको सिक्खाकामो होति, पच्छिमवये पुरिमसदिसो, अयं नङ्गलकोटिवङ्कता नाम, परियोसाने वङ्कभावापत्तितो । एको सब्बम्पेतं वङ्कतं पहाय तीसु वयेसु पेसलो लज्जी कुक्कुच्चको सिक्खाकामो होति, तस्स यो सो उज्जुभावो, इदं अज्जवं नाम, सब्बत्थ उज्जुभावसिद्धितो ।

मद्वन्ति एत्थ “लज्जव”न्तिपि पठन्ति । एवं पनेत्थ अत्थो — “तत्थ कतमो लज्जवो? यो हिरीयति हिरीयितब्बेन हिरीयति पापकानं अकुसलानं धम्मानं समापत्तिया, अयं वुच्चति लज्जवो”ति एवं वुत्तो लज्जिभावो लज्जवं नाम । इदं

पनेत्थ निब्बचनं — लज्जतीति लज्जो, हिरिमा, तस्स भावो **लज्जवं**, हिरितीति अत्थो । लज्जा एतस्स अत्थीति लज्जी यथा “माली मायी”ति, तस्स भावो लज्जिभावो, सा एव लज्जा ।

१६६. ततिये **अधिवासनखन्तीति** एत्थ अधिवासनं वुच्चति खमनं । तज्हि परेसं दुक्कटं दुरुत्तञ्च पटिविरोधाकरणेन अत्तनो उपरि आरोपेत्वा वासनतो “अधिवासन”न्ति वुच्चति । अधिवासनलक्खणा खन्ति अधिवासनखन्ति । सुचिसीलता **सोरच्चं** । सा हि सोभनकम्मरतता । सुट्ठु वा पापतो ओरतभावो विरतताति आह “**सुरतभावो**”ति । तेनेव **अभिधम्मेपि** (ध० स० १३४९) —

“तत्थ कतमं सोरच्चं? यो कायिको अवीतिक्कमो वाचसिको अवीतिक्कमो कायिकवाचसिको अवीतिक्कमो, इदं वुच्चति सोरच्चं, सब्बोपि सीलसंवरो सोरच्च”न्ति — आगतो ।

१६७. चतुत्थे सखिलो वुच्चति सण्हवाचो, तस्स भावो **साखल्यं**, सण्हवाचता । तेनाह “**सण्हवाचावसेन सम्मोदमानभावो**”ति । सण्हवाचावसेन हि सम्मोदमानस्स पुगलस्स भावो नाम सण्हवाचता । तेनेव **अभिधम्मे** (ध० स० १३५०) —

“तत्थ कतमं साखल्यं? या सा वाचा अण्डका कक्कसा परकटुका पराभिसज्जनी कोधसामन्ता असमाधिसंवत्तनिका, तथारूपिं वाचं पहाय या सा वाचा नेला कण्णसुखा पेमनीया हृदयङ्गमा पोरी बहुजनकन्ता बहुजनमनापा, तथारूपिं वाचं भासिता होति, या तत्थ सण्हवाचता सखिलवाचता अफरुसवाचता, इदं वुच्चति **साखल्यं**”न्ति वुत्तं ।

तत्थ **अण्डका**ति सदोसे सवणे रुक्खे निय्यासपिण्डो, अहिच्छत्तादीनि वा उट्ठितानि अण्डकानीति वदन्ति, फेगुरुक्खस्स पन कुथितस्स अण्डानि विय उट्ठिता चुण्णपिण्डियो वा गण्ठियो वा अण्डका । इध पन ब्यापज्जनकक्कसादिसभावतो कण्टकप्पटिभागेन वाचा अण्डकाति वुत्ता । पदुमनाळं विय सोतं धंसयमाना पविसन्ती **कक्कसा** दट्ठुब्बा । कोधेन निब्बत्ता तस्स परिवारभूता **कोधसामन्ता** । पुरे संवद्धनारी **पोरी** । सा विय सुकुमारा मुदुका वाचा पोरी वियाति पोरी । **सण्हवाचता**तिआदिना तं वाचं पवत्तमानं दस्सेति ।

१६८. पञ्चमे “**अविहिंसाति करुणापुब्बभागो**”ति एत्तकमेव इध वुत्तं, दीघनिकायट्ठकथाय **सङ्गीतिसुत्तवण्णनायं** (दी० नि० अट्ठ० ३.३०४) पन “अविहिंसाति करुणापि करुणापुब्बभागोपी”ति वुत्तं । **अभिधम्मेपि** (विभ० १८२) “तत्थ कतमा अविहिंसा? या सत्तेसु करुणा करुणायना करुणायितत्तं करुणाचेतोविमुत्ति, अयं वुच्चति अविहिंसा”ति आगतं । एत्थापि हि या काचि करुणा “करुणा”ति वुत्ता, करुणाचेतोविमुत्ति पन अप्पनाप्पत्ताव ।

सुचिसद्धतो भावे यकारं इकारस्स च उकारादेसं कत्वा अयं निद्वेसोति आह “**सोचब्बं सुचिभावो**”ति । एत्थ च **सोचब्बन्ति** सीलवसेन सुचिभावोति वुत्तं । दीघनिकायट्ठकथाय **सङ्गीतिसुत्तवण्णनायं** (दी० नि० अट्ठ० ३.३०४) पन “सोचेय्यन्ति मेत्ताय च मेत्तापुब्बभागस्स च वसेन सुचिभावो”ति वुत्तं । तेनेव **अभिधम्मेपि** “तत्थ कतमं सोचब्बं? या सत्तेसु मेत्ति मेत्तायना मेत्तायितत्तं मेत्ताचेतोविमुत्ति, इदं वुच्चति सोचब्ब”न्ति निद्वेसो कतो । एत्थापि हि “मेत्ती”तिआदिना या काचि मेत्ता वुत्ता, मेत्ताचेतोविमुत्ति पन अप्पनाप्पत्ताव ।

१६९-१७१. छट्ठसत्तमअट्ठमानि हेट्ठा वुत्तनयानेव ।

१७२. नवमे कामं सम्पयुत्तधम्मेषु थिरभावोपि बलट्ठो एव, पटिपक्खेहि पन अकम्पनीयतं सातिसयं बलट्ठोति वुत्तं “मुट्ठस्सच्चे अकम्पनेना”तिआदि ।

१७३. दसमे पच्चनीकधम्मसमनतो समथो, समाधीति आह “समथोति चित्तेकग्गता”ति । अनिच्चादिना विविधेनाकारेन दस्सनतो पस्सनतो विपस्सना, पज्जाति आह “सङ्खारपरिग्गाहकजाण”न्ति ।

१७४. एकादसमे दुस्सील्यन्ति समादिन्नस्स सीलस्स भेदकरो वीतिक्कमो । दिट्ठिविपत्तीति “अत्थि दिन्न”न्तिआदिनयप्पवत्ताय सम्मादिट्ठिया दूसिका मिच्छादिट्ठीति आह “दिट्ठिविपत्तीति मिच्छादिट्ठी”ति ।

१७५. द्वादसमे सीलसम्पदाति सब्बभागतो तस्स अनूनतापत्ति परिपुण्णभावो सीलसम्पदा । परिपूरणत्थो हेत्थ सम्पदासद्दो । तेनेवाह “परिपुण्णसीलता”ति । दिट्ठिसम्पदाति अत्थिकदिट्ठिआदिसम्मादिट्ठिपारिपूरिभावेन पवत्तं जाणं । तज्ज कम्मस्सकतासम्मादिट्ठिआदिवसेन पज्जविधं होतीति आह “तेन कम्मस्सकता”ति ।

१७६. तेरसमे सीलविसुद्धीति विसुद्धिं पापेतुं समत्थं सीलं, चित्तविसुद्धिआदिउपरिविसुद्धिया पच्चयो भवितुं समत्थं विसुद्धसीलन्ति वुत्तं होति । सुविसुद्धमेव हि सीलं तस्सा पदट्ठानं होति । तेनाह “सीलविसुद्धीहि विसुद्धिसम्पापकं सील”न्ति । एत्थापि विसुद्धिसम्पापकन्ति चित्तविसुद्धिआदिउपरिविसुद्धिया सम्पापकन्ति अत्थो दट्ठब्बो । अभिधम्मे (ध० स० १३७२) पनायं “तत्थ कतमा सीलविसुद्धि? कायिको अवीतिक्कमो वाचसिको अवीतिक्कमो कायिकवाचसिको अवीतिक्कमो, अयं वुच्चति सीलविसुद्धी”ति एवं विभत्ता ।

दिट्ठिविसुद्धीति विसुद्धिं पापेतुं समत्थं दस्सनजाणं दस्सनविसुद्धि, परमत्थविसुद्धिं निब्बानज्ज पापेतुं उपनेतुं समत्थं कम्मस्सकतजाणादि सम्मादस्सनन्ति अत्थो । तेनाह “विसुद्धिसम्पापिका...पे०... पज्जविधापि वा सम्मादिट्ठी”ति । एत्थापि विसुद्धिसम्पापिकाति जाणदस्सनविसुद्धिया दस्सननिब्बानसङ्घाताय परमत्थविसुद्धिया च सम्पापिकाति एवमत्थो दट्ठब्बो । अभिधम्मे (ध० स० १३७३) पनायं “तत्थ कतमा दिट्ठिविसुद्धि? कम्मस्सकतजाणं, सच्चानुलोमिकं जाणं, मग्गस्स मग्गसमङ्गिस्स जाणं, फलसमङ्गिस्स जाण”न्ति एवं वुत्तं ।

एत्थ च इदं अकुसलकम्मं नो सकं, इदं पन कम्मं सकन्ति एवं ब्यतिरेकतो अन्वयतो च कम्मस्सकतजाननजाणं कम्मस्सकतजाणं । तिविधदुच्चरितज्झि अत्तना कतम्पि परेन कतम्पि नो सककम्मं नाम होति अत्थभज्जनतो, सुचरितं सककम्मं नाम अत्थजननतो । विपस्सनाजाणं पन वचीसच्चज्ज अनुलोमेति, परमत्थसच्चज्ज न विलोमेतीति सच्चानुलोमिकजाणन्ति वुत्तं । विपस्सनाजाणज्झि लक्खणानि पटिविज्जनत्थं आरम्भकाले “अनिच्चं दुक्खं अनत्ता”ति पवत्तं वचीसच्चज्ज अनुलोमेति, तथेव पटिविज्जनतो परमत्थसच्चं निब्बानज्ज न विलोमेति न विरार्थेति एकन्तेनेव सम्पापनतो ।

१७७. चुट्ठसमे दिट्ठिविसुद्धीति पठममग्गसम्मादिट्ठि वुत्ता । यथादिट्ठिस्स च पधानन्ति तंसम्पयुत्तमेव वीरियं । तेनेव दीघनिकायट्ठकथायं (दी० नि० अट्ठ० ३.३०४) “दिट्ठिविसुद्धीति जाणदस्सनं कथितं । यथादिट्ठिस्स च पधानन्ति तंसम्पयुत्तमेव वीरिय”न्ति वुत्तं । एत्थ हि जाणदस्सनन्ति जाणभूतं दस्सनं । तेन दस्सनमग्गं वदति । तंसम्पयुत्तमेव

वीरियन्ति पठममगसम्पयुत्तवीरियमाह । अपिच दिट्ठिविसुद्धीति सब्बापि मगसम्मादिट्ठि । यथादिट्ठिस्स च पधानन्ति तंसम्पयुत्तमेव वीरियं । तेनेव दीघनिकायट्ठकथायं “अपिच पुरिमपदेन चतुमग्गजाणं, पच्छिमपदेन तंसम्पयुत्तं वीरियं”न्ति वुत्तं ।

अथ वा दिट्ठिविसुद्धीति कम्मस्सकतजाणादिसङ्घाता सब्बापि सम्मादिट्ठि वुत्ता । यथादिट्ठिस्स च पधानन्ति यो चेतसिको वीरियारम्भो...पे०... सम्मावायामोति । अयमेव पाळिया समेति । अभिधम्मे हि “दिट्ठिविसुद्धि खो पनाति या पज्जा पजानना...पे०... अमोहो धम्मविचयो सम्मादिट्ठि । यथादिट्ठिस्स च पधानन्ति यो चेतसिको वीरियारम्भो...पे०... सम्मावायामो”ति एवमयं दुको विभत्तो । तेनेव अभिधम्मट्ठकथायं (ध० स० अट्ठ० १३७४) “या पज्जा पजाननातिआदीहि हेट्ठा वुत्तानि कम्मस्सकतजाणादीनेव चत्तारि जाणानि विभत्तानि । ‘यो चेतसिको वीरियारम्भो’तिआदीहि पदेहि निहिट्ठं वीरियं गहितं पज्जाय लोकियट्ठाने लोकियं, लोकुत्तरट्ठाने लोकुत्तरं”न्ति वुत्तं ।

इधापि विसुद्धिसम्पापिका चतुमगसम्मादिट्ठि, पञ्चविधापि वा सम्मादिट्ठि दिट्ठिविसुद्धीति अधिप्पायेन “दिट्ठिविसुद्धीति विसुद्धिसम्पापिका सम्मादिट्ठियेवा”ति वुत्तं । हेट्ठिमगसम्पयुत्तं वीरियन्ति इदं पन “यथादिट्ठिस्स च पधानन्ति पठममगसम्पयुत्तं वीरियन्ति वुत्तं”न्ति अधिप्पायेन वदति । एत्थ च तंतंभाणकानं मतभेदेनायं वण्णनाभेदोति न अट्ठकथावचनानं अज्जमज्जविरोधो सङ्कितब्बो । अथ यथादिट्ठिस्स च पधानन्ति हेट्ठिमगसम्पयुत्तमेव वीरियं कस्मा वुत्तन्ति आह “तज्झि तस्सा दिट्ठिया अनुरूपत्ता”तिआदि । तत्थ तस्सा दिट्ठियाति हेट्ठिमगसम्पयुत्ताय दिट्ठिया । यथादिट्ठिस्साति अनुरूपदिट्ठिस्स कल्याणदिट्ठिस्स निब्बत्तितप्पकारदिट्ठिस्स वा निब्बत्तेतब्बपधानानुरूपदिट्ठिस्स यथादिट्ठिप्पवत्तकिरियस्स वाति एवम्पेत्य अत्थं संवण्णयन्ति ।

१७८. पन्नरसमे समत्तं तुस्सनं तित्ति सन्तुट्ठि, नत्थि एतस्स सन्तुट्ठीति असन्तुट्ठि, असन्तुट्ठिस्स भावो असन्तुट्ठिता । या कुसलानं धम्मानं भावनाय असन्तुट्ठिस्स भिय्योकम्यता, तस्सा एतं अधिवचनं । ताय हि समङ्गिभूतो पुग्गलो सीलं पूरेत्वा ज्ञानं उप्पादेति, ज्ञानं लभित्वा विपस्सनं आरभति, आरद्धविपस्सको अरहत्तं अगगहेत्वा अन्तरा वोसानं नापज्जति, “अलमेत्तावता कतमेत्तावता”ति सङ्कोचं न पापुणाति । तेनाह “अज्जत्र अरहत्तमग्गा कुसलेसु धम्मेसु असन्तुट्ठिभावो”ति । तत्र अज्जत्र अरहत्तमग्गाति अरहत्तमगसम्पत्तं विनाति अत्थो । “अप्पटिवानिता च पधानस्मि”न्ति इदं हेट्ठा वुत्तनयत्ता उत्तानत्थमेवाति न विभत्तं ।

१७९. सोळसमे मुट्ठा नट्ठा सति एतस्साति मुट्ठस्सति, तस्स भावो मुट्ठस्सच्चन्ति आह “मुट्ठस्सच्चन्ति मुट्ठस्सतिभावो”ति । मुट्ठस्सतिभावोति च सतिप्पटिपक्खो धम्मो, न सतिया अभावमत्तं । असम्पजज्जन्ति “तत्थ कतमं असम्पजज्जं? यं अज्जाणं अदस्सनं...पे०... अविज्जालङ्घी मोहो अकुसलमूल”न्ति (ध० स० १३५७) एवं वुत्ता अविज्जायेव । तथा हि विज्जापटिपक्खो अविज्जा विज्जाय पहातब्बतो, एवं सम्पजज्जप्पटिपक्खो असम्पजज्जं । यस्मा पन सम्पजज्जप्पटिपक्खे सति तस्स वसेन जाणस्स अभावो होति, तस्मा वुत्तं “अज्जाणभावो”ति ।

१८०. सत्तरसमे अपिलापनलक्खणा सतीति उदके लाबु विय येन चित्तं आरम्मणे पिलवित्वा विय तिट्ठति, न ओगाहति, तं पिलापनं । न पिलापनं अपिलापनं, तं लक्खणं सभावो एतिस्साति अपिलापनलक्खणा ।

समापत्तिवग्गवण्णना निट्ठिता ।

ततियपण्णासकं निट्ठितं ।

१. कोधपेय्यालं

१८१. इतो परेसु कोधवग्गादीसु उपनन्धनलक्खणोति कुज्झनवसेन “अक्कोच्छि मं अवधि म”न्ति आदिना (ध० प० ३, ४) चित्तपरियोनन्धनलक्खणो । पुब्बकालिकं कोधं उपनहति बन्धति, कुज्झनाकारं पबन्धति घटेति । आघातवत्थुना चित्तं बन्धन्ती विय होतीति अपरकालो कोधो उपनाहो । सुट्ठु कतं कारणं उपकारो सुकतकारणं, तस्स पुब्बकारितालक्खणस्स गुणस्स मक्खनं उदकपुञ्चनिया विय सरीरानुगतस्स उदकस्स पुञ्चनं विनासनं लक्खणमेतस्साति सुकतकरणमक्खनलक्खणो । तथा हि सो परेसं गुणानं मक्खनद्वेन मक्खोति वुच्चति । बहुस्सुतेपि पुग्गले अज्झोत्थरिंसु, “ईदिसस्स च बहुस्सुतस्स अनियता गहिता, तव च मम च को विसो”ति आदिना नयेन उप्पज्जमानो युग्गाही पलासोति आह “युग्गाहलक्खणो पलासो”ति । तत्थ युग्गाहो नाम समधुरग्गाहो, असमम्पि अत्तना समं कत्वा गणहनं । पलासतीति पलासो, परेसं गुणे डंसित्वा दन्तेहि विय छिन्दित्वा अत्तनो गुणेहि समे करोतीति अत्थो ।

उसूयनलक्खणाति परेसं सक्कारादीनि खिय्यनलक्खणा । मच्छेरस्स भावो मच्छरियं । तज्ज आवासमच्छरियादिवसेन पज्जविधन्ति आह “पज्जमच्छेरभावो मच्छरिय”न्ति । मच्छरायनलक्खणान्ति अत्तनो सम्पत्तिया परेहि साधारणभावे असहनलक्खणं । कतप्पटिच्छादनलक्खणाति कतपापप्पटिच्छादनलक्खणा । केराटिकभावेन उप्पज्जमानं साठेय्यन्ति आह “केराटिकलक्खणं साठेय्य”न्ति । अज्जथा अत्तनो पवेदनपुग्गलो केराटिको नेकतिकवाणिजोति वदन्ति । केराटिको हि पुग्गलो आनन्दमच्छो विय होति ।

१८७. यथाभतं निक्खित्तो एवं निरयेति यथा आभतं कज्जि आहरित्वा ठपितो, एवं अत्तनो कम्मुना निक्खित्तो निरये ठपितोयेवाति अत्थो ।

२. अकुसलपेय्यालं

१९१-२००. दुक्खस्स वट्ठि एतेसन्ति दुक्खवट्ठिका । ये हि दुक्खं वट्ठेन्ति, पुनप्पुनं उप्पादेन्ति, दुक्खस्स वट्ठि तेसं अत्थीति एवं वुत्तं । सुखवट्ठिकाति एत्थापि एसेव नयो ।

३. विनयपेय्यालं

२०१. अत्थवसेति वुद्धिविसेसे आनिसंसविसेसे । तेसं पन सिक्खापदपज्जत्तिकारणत्ता आह “द्वे कारणानि सन्धाया”ति । अत्थोयेव वा अत्थवसो, द्वे अत्थे द्वे कारणानीति वुत्तं होति । अथ वा अत्थो फलं तदधीनवुत्तिताय वसो एतस्साति अत्थवसो, कारणान्ति एवम्पेत्य अत्थो दट्ठब्बो । यथा “अनभिज्झा धम्मपद”न्ति वुत्ते अनभिज्झा एको धम्मकोट्टासोति अत्थो होति । एवमिधापि सिक्खापदन्ति सिक्खाकोट्टासो सिक्खाय एको पदेसोति अयमेत्थ अत्थो दट्ठब्बोति आह “सिक्खापदं पज्जत्तन्ति सिक्खाकोट्टासो ठपितो”ति ।

सङ्गसुट्ठु नाम सङ्गस्स सुट्ठुभावो “सुट्ठु देवा”ति (पारा० अट्ठ० ३९) आगतद्वाने विय “सुट्ठु, भन्ते”ति वचनसम्पटिच्छनभावो । तेनाह “सङ्गसुट्ठुतायाति सङ्गस्स सुट्ठुभावाया”ति आदि । दुम्मङ्कनं पुग्गलानं निग्गहायाति

दुम्मङ्कू नाम दुस्सीलपुग्गला । ये मङ्कूतं आपादियमानापि दुक्खेन आपज्जन्ति, वीतिक्कमं करोन्ता वा कत्वा वा न लज्जन्ति, तेसं निग्गहत्थाय । ते हि सिक्खापदे असति “किं तुम्हेहि दिट्ठं, किं सुतं, किं अम्हेहि कतं, कतरस्मिं वत्थुस्मिं कतमं आपत्तिं रोपेत्वा अम्हे निग्गण्हथा”ति सङ्घं विहेटेस्सन्ति, सिक्खापदे पन सति तेसं सङ्घो सिक्खापदं दस्सेत्वा धम्मेन विनयेन सत्थुसासनेन निग्गहेस्सति । तेन वुत्तं “दुम्मङ्कूनं पुग्गलानं निग्गहाया”ति ।

पेसलानं भिक्खूनां फासुविहारायाति पेसलानं पियसीलानं भिक्खूनां फासुविहारत्थाय । पियसीला हि भिक्खू कत्तब्बाकत्तब्बं सावज्जानवज्जं वेलं मरियादं अजानन्ता सिक्खत्तयपारिपूरिया घटमाना किलमन्ति, उब्बाळ्हा होन्ति, कत्तब्बाकत्तब्बं पन सावज्जानवज्जं वेलं मरियादञ्च जत्वा सिक्खत्तयपारिपूरिया घटेन्ता न किलमन्ति, न उब्बाळ्हा होन्ति । तेन तेसं सिक्खापदपञ्जापना फासुविहाराय संवत्ति । यो वा दुम्मङ्कूनं पुग्गलानं निग्गहो, स्वेव एतेसं फासुविहारो । दुस्सीलपुग्गले निस्साय हि उपोसथो न तिट्ठति, पवारणा न तिट्ठति, सङ्घकम्मानि नप्पवत्तन्ति, सामग्गी न होति, भिक्खू अनेकग्गा उद्देसपरिपुच्छाकम्मद्वानादीनि अनुयुज्जितुं न सक्कोन्ति । दुस्सीलेसु पन निग्गहितेसु सब्बोपि अयं उपद्वो न होति, ततो पेसला भिक्खू फासु विहरन्ति । एवं “पेसलानं भिक्खूनां फासुविहाराया”ति एत्थ द्विधा अत्थो वेदितब्बो ।

“न वो अहं, चुन्द, दिट्ठधम्मिकानंयेव आसवानं संवराय धम्मं देसेमी”ति (दी० नि० ३.१८२) एत्थ विवादमूलभूता किलेसा आसवाति आगता ।

“येन देवूपपत्यस्स, गन्धब्बो वा विहङ्गमो ।

यक्खत्तं येन गच्छेय्यं, मनुस्सत्तञ्च अब्बजे ।

ते मय्हं आसवा खीणा, विद्धस्ता विनलीकता”ति ॥ (अ० नि० ४.३६) —

एत्थ तेभूमकं कम्मं अवसेसा च अकुसला धम्मा । इध पन परूपवादविप्पटिसारवधबन्धनादयो चेव अपायदुक्खभूता च नानप्पकारा उपद्ववा आसवाति आह — “**दिट्ठधम्मे इमस्मिंयेव अत्तभावे वीतिक्कमपच्चया पटिलद्धब्बान**”न्तिआदि । यदि हि भगवा सिक्खापदं न पञ्जापेय्य, ततो असद्धम्मप्पटिसेवनअदिन्नादानपाणातिपातादिहेतु ये उप्पज्जेय्युं परूपवादादयो दिट्ठधम्मिका नानप्पकारा अनत्था, ये च तन्निमित्तमेव निरयादीसु निब्बत्तस्स पज्जविधबन्धनकम्मकारणादिवसेन महादुक्खानुभवनप्पकारा अनत्था, ते सन्धाय इदं वुत्तं “**दिट्ठधम्मिकानं आसवानं संवराय सम्परायिकानं आसवानं पटिघाताया**”ति । दिट्ठधम्मो वुच्चति पच्चक्खो अत्तभावो, तत्थ भवा **दिट्ठधम्मिका** । सम्परेतब्बतो पेच्च गन्तब्बतो सम्परायो, परलोको, तत्थ भवा **सम्परायिका** ।

अकुसलवेरानन्ति पाणातिपातादिपञ्चदुच्चरितानं । तानि वेरकारणत्ता “वेरानी”ति वुच्चन्ति, पुग्गलेसु पन उप्पज्जमानानि वेरानि । ते **एव वा दुक्खधम्मा**ति हेट्ठा वुत्ता वधबन्धनादयो । तेसं **पक्खुपच्छेदनत्थायाति** तेसं पापिच्छानं पक्खुपच्छेदाय गणभोजनसदिसं सिक्खापदं पज्जत्तं । **पण्डितमनुस्सानन्ति** लोकियपरिक्खकजनानं । ते हि सिक्खापदपज्जत्तिया सति सिक्खापदपज्जत्तिं जत्वा वा यथापज्जत्तं पटिपज्जमाने भिक्खू दिस्वा वा — “यानि वत लोके महाजनस्स रज्जनदुस्सनमुह्नद्वानानि, तेहि इमे समणा सक्कपुत्तिया आरका विहरन्ति, दुक्करं वत करोन्ति, भारियं वत करोन्ती”ति पसादं आपज्जन्ति विनयपिटके पोत्थकं दिस्वा मिच्छादिट्ठिकतवेदिब्राह्मणो विय । **उपरूपरिपसादभावायाति** भिय्यो भिय्यो पसादुप्पादनत्थं । येपि हि सासने पसन्ना कुलपुत्ता, तेपि सिक्खापदपज्जत्तिं वा जत्वा यथापज्जत्तं पटिपज्जमाने भिक्खू वा दिस्वा “अहो, अय्या, दुक्करकारिनो, ये यावजीवं एकभत्तं ब्रह्मचरियं विनयसंवरं अनुपालेन्ती”ति भिय्यो भिय्यो पसीदन्ति ।

सद्धम्मस्स चिरट्ठितत्थन्ति परियत्तिसद्धम्मो, पटिपत्तिसद्धम्मो, अधिगमसद्धम्मोति तिविधस्सपि सद्धम्मस्स चिरट्ठितत्थं । तत्थ पिटकत्तयसङ्गहितं सब्बम्पि बुद्धवचनं **परियत्तिसद्धम्मो** नाम । तेरस धुतगुणा, चुद्दस खन्धकवत्तानि, द्वेअसीति महावत्तानि, सीलसमाधिविपस्सनाति अयं **पटिपत्तिसद्धम्मो** नाम । चत्तारो अरियमग्गा चत्तारि च सामञ्जफलानि निब्बानञ्चाति अयं **अधिगमसद्धम्मो** नाम । सो सब्बो यस्मा सिक्खापदपञ्जत्तिया सति भिक्खू सिक्खापदञ्च तस्स विभङ्गञ्च तदत्थजोतनत्थं अञ्जञ्च बुद्धवचनं परियापुणन्ति, यथापञ्जत्तञ्च पटिपज्जमाना पटिपत्तिं पूरेत्वा पटिपत्तिया अधिगन्तब्बं लोकुत्तरधम्मं अधिगच्छन्ति, तस्मा सिक्खापदपञ्जत्तिया चिरट्ठितिको होति ।

पञ्चविधस्सपि विनयस्साति तदङ्गविनयादिवसेन पञ्चप्पकारस्स विनयस्स । **विनयट्ठकथायं** (पारा० अट्ठ० ३९) पन सिक्खापदपञ्जत्तिया सति संवरविनयो च पहानविनयो च समथविनयो च पञ्जत्तिविनयो चाति चतुब्बिधोपि विनयो अनुगहितो होति उपत्थम्भितो सुपत्थम्भितो । तेन वुत्तं “**विनयानुगहाया**”ति । तत्थ **संवरविनयो**ति सीलसंवरो, सतिसंवरो, जाणसंवरो, खन्तिसंवरो, वीरियसंवरोति पञ्चविधोपि संवरो यथासकं संवरितब्बानं विनेतब्बानञ्च कायदुच्चरितादीनं संवरणतो संवरो, विनयनतो विनयोति वुच्चति । **पहानविनयो**ति तदङ्गप्पहानं, विक्खम्भनप्पहानं, समुच्छेदप्पहानं, पटिप्पस्सद्धिप्पहानं, निस्सरणप्पहानन्ति पञ्चविधम्पि पहानं यस्मा चागट्ठेन पहानं, विनयनट्ठेन विनयो, तस्मा पहानविनयोति वुच्चति । **समथविनयो**ति सत्त अधिकरणसमथा । **पञ्जत्तिविनयो**ति सिक्खापदमेव । सिक्खापदपञ्जत्तिया हि विज्जमानाय एव सिक्खापदसम्भवतो सिक्खापदसङ्घातो पञ्जत्तिविनयोति सिक्खापदपञ्जत्तिया अनुगहितो होति ।

२०२-२३०. भिक्खूनं पञ्चाति निदानपाराजिकसङ्घादिसेसानियतवित्थारुद्देसवसेन पञ्च भिक्खूनं उद्देसा । **भिक्खुनीनं चत्तारोति** भिक्खूनं वुत्तेसु अनियतुद्देसं ठपेत्वा अवसेसा चत्तारो ।

एहिभिक्खूपसम्पदाति “एहि भिक्खू”ति वचनमत्तेन पञ्जत्तउपसम्पदा । भगवा हि एहिभिक्खुभावाय उपनिस्सयसम्पन्नं पुगलं दिस्वा रत्तपंसुकूलन्तरतो सुवण्णवण्णं दक्खिणहत्थं नीहरित्वा ब्रह्मघोसं निच्छारेन्तो “एहि भिक्खु, चर ब्रह्मचरियं सम्मा दुक्खस्स अन्तकिरियाया”ति वदति । तस्स सहेव भगवतो वचनेन गिहिलिङ्गं अन्तरधायति, पब्बज्जा च उपसम्पदा च रुहति, भण्डु कासाववसनो होति — एकं निवासेत्वा एकं पारुपित्वा एकं अंसे ठपेत्वा वामअंसकूटे आसत्तनीलुप्पलवण्णमत्तिकापतो ।

“तिचीवरञ्च पत्तो च, वासि सूचि च बन्धनं ।

परिस्सावनेन अट्ठेते, युत्तयोगस्स भिक्खुनो”ति ॥ (दी० नि० अट्ठ० १.२१५; म० नि० अट्ठ० १.२९४; २.३४९; अ० नि० अट्ठ० २.४.१९८; पारा० अट्ठ० ४५ पदभाजनीयवण्णना; अप० अट्ठ० १.अविदूरेनिदानकथा; बु० वं० अट्ठ० २७.अविदूरेनिदानकथा; जा० अट्ठ० १.अविदूरेनिदानकथा; महानि० अट्ठ० २०६) —

एवं वुत्तेहि अट्ठहि परिकखारेहि सरीरे पटिमुक्केहियेव वस्ससतिकत्थेरो विय इरियापथसम्पन्नो बुद्धाचरियको बुद्धपज्झायको सम्मासम्बुद्धं वन्दमानोयेव तिट्ठति ।

सरणगमनूपसम्पदाति “बुद्धं सरणं गच्छामी”तिआदिना नयेन तिक्खत्तुं वाचं भिन्दित्वा वुत्तेहि तीहि सरणगमनेहि अनुज्जातउपसम्पदा । **ओवादूपसम्पदाति** ओवादप्पटिग्गहणउपसम्पदा । सा च “तस्मातिह ते, कस्सप, एवं सिक्खितब्बं ‘तिब्बं मे हिरोत्तप्यं, पच्चुपट्ठितं भविस्सति थेरेसु नवेसु मज्झिमेसू”ति । एवज्जि ते, कस्सप, सिक्खितब्बं । तस्मातिह ते,

कस्सप, एवं सिक्खितब्बं ‘यं किञ्चि धम्मं सुणिस्सामि कुसलूपसंहितं, सब्बं तं अट्ठिं कत्वा मनसि करित्वा सब्बचेतसा समन्नाहरित्वा ओहितसोतो धम्मं सुणिस्सामी’ति, एवहि ते, कस्सप, सिक्खितब्बं । तस्मातिह ते, कस्सप, एवं सिक्खितब्बं ‘सातसहगता च मे कायगतासति न विजहिस्सती’ति, एवहि ते, कस्सप, सिक्खितब्बं’न्ति (सं० नि० २.१५४) इमिना ओवादप्पटिग्गहणेन महाकस्सपत्थेरस्स अनुज्जातउपसम्पदा ।

पज्जव्याकरणूपसम्पदा नाम सोपाकस्स अनुज्जातउपसम्पदा । भगवा किर पुब्बारामे अनुचङ्कमन्तं सोपाकसामणेरं “उद्धुमातकसज्जाति वा, सोपाक, रूपसज्जाति वा इमे धम्मा नानत्था नानाव्यञ्जना, उदाहु एकत्था व्यञ्जनमेव नान”न्ति दस असुभनिस्सिते पज्जे पुच्छि । सो व्याकासि । भगवा तस्स साधुकारं दत्वा “कतिवस्सोसि, त्वं सोपाका”ति पुच्छि । सत्तवस्सोहं भगवाति । सोपाक, त्वं मम सब्बज्जुतज्जाणेन सद्धिं संसन्दित्वा पज्जे व्याकासीति आरद्धचित्तो उपसम्पदं अनुजानि । अयं पज्जव्याकरणूपसम्पदा ।

अत्तिचतुत्थउपसम्पदा नाम भिक्खूनं एतरहि उपसम्पदा । **गरुधम्मूपसम्पदा**ति गरुधम्मप्पटिग्गहणेन उपसम्पदा । सा च महापजापतिया अट्ठगरुधम्मप्पटिग्गहणेन अनुज्जाता । **उभतोसङ्गे उपसम्पदा** नाम भिक्खुनिया भिक्खुनिसङ्गतो अत्तिचतुत्थेन, भिक्खुसङ्गतो अत्तिचतुत्थेनाति इमेहि द्वीहि कम्मेहि अनुज्जाता अट्ठवाचिकूपसम्पदा । **दूतेन उपसम्पदा** नाम अट्ठकासिया गणिकाय अनुज्जाता उपसम्पदा ।

अत्तिकम्मं नव ठानानि गच्छतीति कतमानि नव ठानानि गच्छति? ओसारणं, निस्सारणं, उपोसथो, पवारणा, सम्मुति, दानं, पटिग्गहं, पच्चुक्कड्डनं, कम्मलक्खणज्जेव नवमन्ति एवं वुत्तानि नव ठानानि गच्छति । तत्थ “सुणातु मे, भन्ते, सङ्गो, इत्थन्नामो इत्थन्नामस्स आयस्मतो उपसम्पदापेक्खो, अनुसिट्ठो सो मया, यदि सङ्गस्स पत्तकल्लं, इत्थन्नामो आगच्छेय्य, आगच्छाहीति वत्तब्बो”ति (महाव० १२६) एवं उपसम्पदापेक्खस्स ओसारणा **ओसारणा** नाम ।

“सुणन्तु मे, आयस्मन्ता, अयं इत्थन्नामो भिक्खु धम्मकथिको, इमस्स नेव सुत्तं आगच्छति, नो सुत्तविभङ्गो, सो अत्थं असल्लक्खेत्वा व्यञ्जनच्छायाय अत्थं पटिबाहति । यदायस्मन्तानं पत्तकल्लं, इत्थन्नामं भिक्खुं वुट्ठापेत्वा अवसेसा इमं अधिकरणं वूपसमेय्यामा”ति एवं उब्बाहिकविनिच्छये धम्मकथिकस्स भिक्खुनो निस्सारणा **निस्सारणा** नाम ।

“सुणातु मे, भन्ते, सङ्गो, अज्जुपोसथो पन्नरसो । यदि सङ्गस्स पत्तकल्लं, सङ्गो उपोसथं करेय्या”ति एवं उपोसथकम्मवसेन ठपिता अत्ति **उपोसथो** नाम ।

“सुणातु मे, भन्ते, सङ्गो, अज्ज पवारणा पन्नरसी । यदि सङ्गस्स पत्तकल्लं, सङ्गो पवारेय्या”ति एवं पवारणाकम्मवसेन ठपिता अत्ति **पवारणा** नाम ।

“सुणातु मे, भन्ते, सङ्गो, इत्थन्नामो इत्थन्नामस्स आयस्मतो उपसम्पदापेक्खो । यदि सङ्गस्स पत्तकल्लं, अहं इत्थन्नामं अनुसासेय्य”न्ति, “यदि सङ्गस्स पत्तकल्लं, इत्थन्नामो इत्थन्नामं अनुसासेय्या”ति, “यदि सङ्गस्स पत्तकल्लं, अहं इत्थन्नामं अन्तरायिके धम्मे पुच्छेय्य”न्ति, “यदि सङ्गस्स पत्तकल्लं, इत्थन्नामो इत्थन्नामं अन्तरायिके धम्मे पुच्छेय्या”ति, “यदि सङ्गस्स पत्तकल्लं, अहं इत्थन्नामं विनयं पुच्छेय्य”न्ति, “यदि सङ्गस्स पत्तकल्लं, इत्थन्नामो इत्थन्नामं विनयं पुच्छेय्या”ति, “यदि सङ्गस्स पत्तकल्लं, अहं इत्थन्नामेन विनयं पुट्ठो विस्सज्जेय्य”न्ति, “यदि सङ्गस्स पत्तकल्लं, इत्थन्नामो इत्थन्नामेन विनयं पुट्ठो विस्सज्जेय्या”ति एवं अत्तानं वा परं वा सम्मन्तितुं ठपिता अत्ति **सम्मुति** नाम ।

“सुणातु मे, भन्ते, सङ्गो, इदं चीवरं इत्थन्नामस्स भिक्खुनो निस्सगियं सङ्गस्स निस्सट्ठं। यदि सङ्गस्स पत्तकल्लं, सङ्गो इमं चीवरं इत्थन्नामस्स भिक्खुनो ददेय्या”ति, “यदायस्मन्तानं पत्तकल्लं, आयस्मन्ता इमं चीवरं इत्थन्नामस्स भिक्खुनो ददेय्यु”न्ति एवं निस्सट्ठचीवरपत्तादीनं दानं **दानं** नाम।

“सुणातु मे, भन्ते, सङ्गो, अयं इत्थन्नामो भिक्खु आपत्तिं सरति विवरति उत्तानिं करोति देसेति। यदि सङ्गस्स पत्तकल्लं, अहं इत्थन्नामस्स भिक्खुनो आपत्तिं पटिग्गहेय्य”न्ति, “यदायस्मन्तानं पत्तकल्लं, अहं इत्थन्नामस्स भिक्खुनो आपत्तिं पटिग्गहेय्य”न्ति, तेन वत्तब्बो “पस्ससी”ति? आम पस्सामीति। “आयतिं संवरेय्यासी”ति एवं आपत्तिप्पटिग्गहो **पटिग्गहो** नाम।

“सुणन्तु मे, आयस्मन्ता आवासिका, यदायस्मन्तानं पत्तकल्लं, इदानि उपोसथं करेय्याम, पातिमोक्खं उद्दिसेय्याम, आगमे काले पवारेय्यामा”ति, ते चे, भिक्खवे, भिक्खू भण्डनकारका कलहकारका सङ्गे अधिकरणकारका तं कालं अनुवसेय्युं, आवासिकेन भिक्खुना व्यत्तेन पटिबलेन आवासिका भिक्खू जापेतब्बा “सुणन्तु मे, आयस्मन्ता आवासिका, यदायस्मन्तानं पत्तकल्लं, इदानि उपोसथं करेय्याम, पातिमोक्खं उद्दिसेय्याम, आगमे जुण्हे पवारेय्यामा”ति एवं कता पवारणा **पच्चुक्कड्डना** नाम।

सब्बेहेव एकज्झं सन्निपतितब्बं, सन्निपतित्वा व्यत्तेन भिक्खुना पटिबलेन सङ्गो जापेतब्बो “सुणातु मे, भन्ते, सङ्गो, अम्हाकं भण्डनजातानं कलहजातानं विवादापन्नानं विहरतं बहु अस्सामणकं अज्झाचिण्णं भासितपरिवकन्तं। सचे मयं इमाहि आपत्तीहि अज्जमज्जं कारेस्साम, सियापि तं अधिकरणं कक्खळत्ताय वाळत्ताय भेदाय संवत्तेय्य। यदि सङ्गस्स पत्तकल्लं, सङ्गो इमं अधिकरणं तिणवत्थारकेन वूपसमेय्य ठपेत्वा थुल्लवज्जं, ठपेत्वा गिहिपटिसंयुत्त”न्ति एवं तिणवत्थारकसमथे कता सब्बपठमा सब्बसङ्गाहिकजत्ति **कम्मलक्खणं** नाम।

जत्तिदुतियं कम्मं सत्त ठानानि गच्छतीति कतमानि सत्त ठानानि गच्छति? ओसारणं, निस्सारणं, सम्मुति, दानं, उद्धरणं, देसनं, कम्मलक्खणज्जेव सत्तमन्ति एवं वुत्तानि सत्त ठानानि गच्छति। तत्थ वड्डस्स लिच्छविनो पत्तनिककुज्जनवसेन खन्धके वुत्ता **निस्सारणा**, तस्सेव पतउक्कुज्जनवसेन वुत्ता **ओसारणा** च वेदितब्बा। सीमासम्मुति तिचीवरेन अविप्पवाससम्मुति सन्थतसम्मुति भत्तुद्देसकसेनासनग्गाहापकभण्डागारिक- चीवरप्पटिग्गाहक-चीवरभाजक-यागुभाजक-फलभाजक-खज्जभाजक-अप्पमत्तकविस्सज्जक- साटियग्गाहापक-पत्तग्गाहापक-आरामिकपेसक-सामणेरेपेसकसम्मुतीति एतासं सम्मुतीनं वसेन **सम्मुति** वेदितब्बा। कठिनचीवरदानमतकचीवरदानवसेन **दानं** वेदितब्बं। कठिनुद्धारणवसेन **उद्धारो** वेदितब्बो। कुटिवत्थुविहारवत्थुदेसनावसेन **देसना** वेदितब्बा। या पन तिणवत्थारकसमथे सब्बसङ्गाहिकजत्तिज्च एकेकस्मिं पक्खे एकेकं जत्तिज्चाति तिस्सोपि जत्तियो ठपेत्वा पुन एकस्मिं पक्खे एका, एकस्मिं पक्खे एकाति द्वेपि जत्तिदुतियकम्मवाचा वुत्ता। तासं वसेन **कम्मलक्खणं** वेदितब्बं।

जत्तिचतुत्थकम्मं सत्त ठानानि गच्छतीति कतमानि सत्त ठानानि गच्छति? ओसारणं, निस्सारणं, सम्मुति, दानं, निग्गहं, समनुभासनं, कम्मलक्खणज्जेव सत्तमन्ति एवं वुत्तानि सत्त ठानानि गच्छति। तत्थ तज्जनीयकम्मादीनं सत्तन्तं कम्मानं वसेन **निस्सारणा**, तेसंयेव च कम्मानं पटिप्पस्सम्भनवसेन **ओसारणा** वेदितब्बा। भिक्खुनोवादकसम्मुतिवसेन **सम्मुति** वेदितब्बा। परिवासदानमानत्तदानवसेन **दानं** वेदितब्बं। मूलायपटिकस्सनकम्मवसेन **निग्गहो** वेदितब्बो। उक्खित्तानुवत्तका, अट्ट यावततियका, अरिड्डो, चण्डकाळी च इमेते यावततियकाति इमासं एकादसन्नं समनुभासनानं वसेन **समनुभासना** वेदितब्बा। उपसम्पदकम्मअब्भानकम्मवसेन **कम्मलक्खणं** वेदितब्बं।

धम्मसम्मुखतातिआदीसु येन धम्मेन, येन विनयेन, येन सत्थुसासनेन सङ्घो कम्मं करोति, अयं धम्मसम्मुखता, विनयसम्मुखता, सत्थुसासनसम्मुखता । तत्थ धम्मोति भूतवत्थु । विनयोति चोदना चेव सारणा च । सत्थुसासनं नाम जत्तिसम्पदा चेव अनुसावनसम्पदा च । यावतिका भिक्खू कम्मप्पत्ता, ते आगता होन्ति, छन्दारहानं छन्दो आहतो होति, सम्मुखीभूता नप्पटिक्कोसन्ति, अयं सङ्घसम्मुखता । यस्स सङ्घो कम्मं करोति, तस्स सम्मुखीभावो पुग्गलसम्मुखता । सेसमेत्थ वुत्तनयत्ता उत्तानत्थमेव ।

इति मनोरथपूरणिया अङ्गुत्तरनिकाय-अट्ठकथाय

दुकनिपातवण्णनाय अनुत्तानत्थदीपना समत्ता ।

॥ नमो तस्स भगवतो अरहतो सम्मासम्बुद्धस्स ॥

अङ्गुत्तरनिकाये तिकनिपात-टीका

१. पठमपण्णासकं

१. बालवग्गो

१. भयसुत्तवण्णना

१. तिकनिपातस्स पठमे भयन्ति भीति चेतसो व्यधोति आह “चित्तुत्रासो”ति । उपह्वोति अन्तरायो । तस्स पन विक्खेपकारणत्ता वुत्तं “अनेकगताकारो”ति । उपसग्गोति उपसज्जनं, देवतोपपीळादिना अप्पटिकारविघातापत्ति । सा पन यस्मा पटिकाराभावेन विहज्जमानस्स किञ्चि कातुं असमत्थस्स ओसीदनकारणं, तस्मा वुत्तं “तत्थ तत्थ लग्गनाकारो”ति । यथावुत्ते दिवसे अनागच्छन्तेसूति वज्जेत्वा आगन्तुं नियमितदिवसे अनागच्छन्तेसु । द्वारे अग्गिं दत्त्वाति बहि अनिक्खमनत्थाय द्वारे अग्गिं दत्त्वा ।

नळेहि छन्नपटिच्छन्नाति नळेहि तिणच्छदनसङ्घेपेन उपरि छादेत्वा तेहियेव दारुकुटिकनियामेन परितोपि छादिता । एसेव नयोति इमिना तिणेहि छन्नतं सेससम्भारानं रुक्खमयतज्ज अतिदिसति ।

विधवपुत्तेति अन्तभावोपलक्खणं । ते हि निप्पितिका अविनीता असंयता यं किञ्चि कारिनो । सेसमेत्थ उत्तानमेव ।

भयसुत्तवण्णना निट्ठिता ।

२. लक्खणसुत्तवण्णना

२. दृतिये लक्खीयति बालो अयन्ति जायति एतेनाति लक्खणं, कम्मं लक्खणमेतस्साति **कम्मलक्खणो**ति आह “**कायद्वारादिपवत्तं कम्म**”न्तिआदि । अपदीयन्ति दोसा एतेन रक्खीयन्ति, लूयन्ति छिज्जन्ति वाति अपदानं, सत्तानं सम्मा, मिच्छा वा पवत्तप्पयोगो । तेन सोभतीति **अपदानसोभनी** । तेनाह “**पज्जा नामा**”तिआदि । **अत्तनो चरितेनेवाति** अत्तनो चरियाय एव । सेसमेत्थ उत्तानमेव ।

लक्खणसुत्तवण्णना निट्ठिता ।

३-४. चिन्तीसुत्तादिवण्णना

३-४. ततिये **एतेही**ति दुच्चिन्तितचिन्तितादीहि । एतेन लक्खणसद्वस्स सरणत्थतमाह । **तानेवाति** लक्खणानि एव । **अस्साति** बालस्स । बालो अयन्ति निमीयति सज्जानीयति एतेहीति **बालनिमित्तानि** । अपदानं वुच्चति, विख्यातं कम्मं, दुच्चिन्तितचिन्तितादीनि च बाले विख्यातानि असाधारणभावेन । तस्मा “**बालस्स अपदानानी**”ति । अभिज्झादीहि दुट्ठं दूषितं चिन्तितं दुच्चिन्तितं, तं चिन्तेतीति **दुच्चिन्तितचिन्ती** । लोभादीहि दुट्ठं भासितं मुसावादादिं भासतीति **दुब्भासितभासी** । तेसंयेव वसेन कत्तब्बतो दुक्कटकम्मं पाणातिपातादिं करोतीति **दुक्कटकम्मकारी** । तेनाह “**चिन्तयन्तो**”तिआदि । **वुत्तानुसारेनाति** “बालो अय”न्तिआदिना वुत्तस्स अत्थवचनस्स “पण्डितो अयन्ति एतेहि लक्खीयती”तिआदिना अनुस्सरणेन । **मनोसुचरितादीनं वसेनाति** “चिन्तयन्तो अनभिज्झाब्यापादसम्मादस्सनवसेन सुचिन्तितमेव चिन्तेती”तिआदिना मनोसुचरितादीनं तिण्णं सुचरितानं वसेन योजेतब्बानि । चतुत्थं वुत्तनयत्ता उत्तानत्थमेव ।

चिन्तीसुत्तादिवण्णना निट्ठिता ।

५-१०. अयोनिस्सोसुत्तादिवण्णना

५-१०. पञ्चमे कति नु खो अनुस्सतिट्ठानानीतिआदि छक्के आवि भविस्सतीति । **एवं चिन्तितन्ति** अयोनिस्सो चिन्तितं । **अपज्हमेव पज्हन्ति कथेसीति** अपज्हमेव पज्हो अयन्ति मज्जमानो विस्सज्जेसि । **दसविधं ब्यज्जनबुद्धिं अपरिहापेत्वाति** —

“सिथिलं धनितज्ज दीघरस्सं, गरुकं लहुकज्ज निग्गहीतं ।

सम्बन्धं ववत्थितं विमुत्तं, दसधा ब्यज्जनबुद्धिया पभेदो”ति ॥ (दी० नि० अट्ठ० १.१९०; म० नि० अट्ठ० २.२९१; परि० अट्ठ० ४८५; वि० सङ्ग० अट्ठ० २५२) —

एवं वुत्तं दसविधं ब्यज्जनबुद्धिं अपरिहापेत्वा ।

तत्थ ठानकरणानि सिथिलानि कत्वा उच्चारेतब्बं अक्खरं **सिथिलं**, तानियेव धनितानि असिथिलानि कत्वा उच्चारेतब्बं अक्खरं **धनितं** । द्विमत्तकालं **दीघं**, एकमत्तकालं **रस्सं** । **गरुकन्ति** दीघमेव, यं वा “आयस्मतो बुद्धरक्खितत्थेरस्सा”ति संयोगपरं कत्वा वुच्चति, **लहुकन्ति** रस्समेव, यं वा “आयस्मतो बुद्धरक्खितत्थेरस्सा”ति एवं विसंयोगपरं कत्वा वुच्चति । **निग्गहीतन्ति** यं करणानि निग्गहेत्वा अविस्सज्जेत्वा अविवटेन मुखेन सानुनासिकं कत्वा वत्तब्बं । **सम्बन्धन्ति** यं परपदेन सम्बन्धित्वा “तुण्हस्सा”ति वुच्चति । **ववत्थितन्ति** यं परपदेन असम्बन्धं कत्वा

विच्छिन्दित्वा “तुण्ही अस्सा”ति वुच्चति । विमुत्तन्ति यं करणानि अनिग्गहेत्वा विस्सज्जेत्वा विवटेन मुखेन सानुनासिकं अकत्वा वुच्चति । दसधा व्यञ्जनबुद्धिया पभेदोति एवं सिथिलादिवसेन व्यञ्जनबुद्धिया अक्खरुप्पादकचित्तस्स दसप्पकारेण पभेदो । सब्बानि हि अक्खरानि चित्तसमुद्धानानि यथाधिप्पेतत्थव्यञ्जनतो व्यञ्जनानि च ।

“अट्टानं खो एतं, आवुसो सारिपुत्ता”तिआदि पञ्चके आवि भविस्सति । “कति नु खो, आनन्द, अनुस्सतिट्ठानानी”तिआदि पन छक्के आवि भविस्सति । छट्ठादीसु नत्थि वत्तब्बं ।

अयोनिस्सोसुत्तादिवण्णना निट्ठिता ।

बालवग्गवण्णना निट्ठिता ।

२. रथकारवग्गो

१. जातसुत्तवण्णना

११. दुतियस्स पठमे जातोयेव पज्जातोति आह “जातो पज्जातो”ति । कस्स अननुलोमिकेति आह “सासनस्सा”ति, सासनस्स अननुलोमिके अप्पतिरूपेति अत्थो । इदानि अननुलोमिकसदस्स निब्बचनं दस्सेन्तो “न अनुलोमेतीति अननुलोमिक”न्ति आह । सासनस्साति वा सासनन्ति अत्थो । सासनं न अनुलोमेतीति अननुलोमिकन्ति एवमेत्थ सम्बन्धो दट्ठब्बो । सभागविसभागन्ति लिङ्गतो सभागविसभागं । “वियपुग्गले”ति आहाति लिङ्गसभागोहि अविसेसेत्वा आह । उम्मादं पापुणीति सो किर सीलं अधिट्ठाय पिहितद्वारगब्भे सयनपिट्ठे निसीदित्वा भरियं आरब्भ मेत्तं भावेन्तो मेत्तामुखेन उप्पन्नेन रागेन अन्धीकतो भरियाय सन्तिकं गन्तुकामो द्वारं असल्लक्खेत्वा भित्तिं भिन्दित्वापि निक्खमितुकामताय भित्तिं पहरन्तो सब्बरत्तिं भित्तिरुद्धमकासि । सेसमेत्थ सुविज्जेय्यमेव ।

जातसुत्तवण्णना निट्ठिता ।

२. सारणीयसुत्तवण्णना

१२. दुतिये चतुपारिसुद्धिसीलम्पि पब्बज्जानिस्सितमेवाति इमिना पब्बज्जूपगतसमनन्तरमेव चतुपारिसुद्धिसीलम्पि समादिन्नमेव होतीति दस्सेति । मग्गसन्निस्सितानेव होन्तीति मग्गाधिगमत्थाय पटिपज्जितब्बत्ता कसिणपरिकम्मादीनि मग्गसन्निस्सितानेव होन्ति, तस्मा मग्गागहणेनेव तेसम्पि गहणं वेदितब्बं, तेहि विना मग्गाधिगमस्स असम्भवतोति अधिप्पायो ।

अगमग्गाधिगमेन असम्मोहप्पटिवेधस्स सिखापत्तत्ता मग्गधम्मेषु विय फलधम्मेषुपि सातिसयो असम्मोहोति “सयं अभिज्जा”ति वुत्तं, सामं जानित्वाति अत्थो । तथा जानना पनस्स सच्छिकरणं अत्तपच्चक्खकिरियाति “सच्छिकत्वा”ति वुत्तं । तेनाह “अत्तनाव अभिविसिट्ठाय पज्जाय पच्चक्खं कत्वा”ति । तथा सच्छिकिरिया चस्स अत्तनि पटिलाभोति “उपसम्पज्जा”ति वुत्तन्ति आह “पटिलभित्वा”ति ।

सारणीयसुत्तवण्णना निट्ठिता ।

३. आसंससुत्तवण्णना

१३. ततिये सन्तोति एत्थ सन्त-सद्दो “दीघं सन्तस्स योजन”न्तिआदीसु (ध० प० ६०) किलन्तभावे आगतो । “अयञ्च वितक्को, अयञ्च विचारो सन्तो होन्ति समिता”तिआदीसु (विभ० ५७६) निरुद्धभावे । “अधिगतो खो म्यायं धम्मो, गम्भीरो दुद्दसो दुरनुबोधो सन्तो पणीतो”तिआदीसु (दी० नि० २.६७; म० नि० १.२८१; सं० नि० १.१७२; महाव० ७-८) सन्तज्जाणगोचरतायं । “उपसन्तस्स सदा सतिमतो”तिआदीसु (उदा० २७) किलेसवूपसमे । “सन्तो हवे सन्धि पवेदयन्ती”तिआदीसु (ध० प० १५१) साधूसु । “पञ्चिमे, भिक्खवे, महाचोरा सन्तो संविज्जमाना”तिआदीसु (पारा० १९५) अत्थिभावे । इधापि अत्थिभावेयेवाति आह “सन्तोति अत्थि उपलब्धन्ती”ति । तत्थ अत्थीति लोकसङ्केतवसेन संविज्जन्ति । अत्थिभावो हेत्थ पुग्गलसम्बन्धेन वुत्तत्ता लोकसमज्जावसेनेव वेदितब्बो, न परमत्थवसेन । अत्थीति चेतं निपातपदं दट्ठब्बं “अत्थि इमस्मिं काये केसा”तिआदीसु (म० नि० १.११०) विय ।

संविज्जमानाति उपलब्धमाना । यज्झि संविज्जति, तं उपलब्धति । तेनाह “संविज्जमानाति तस्सेव वेवचन”न्ति । अनासोति पत्थनारहितो । तेनाह “अपत्थनो”ति । आसंसति पत्थेतीति आसंसो । वेणुवेत्तादिविलीवेहि सुप्पादिभाजनकारका विलीवकारका । मिगमच्छादीनं निसादनतो नेसादा, मागविकमच्छबन्धादयो । रथेसु चम्मेन नहनकरणतो रथकारा, धम्मकारा । पुइति करीसस्स नामं, तं कुसेन्ति अपनेन्तीति पुक्कुसा, पुप्फच्छड्डुका ।

दुब्बण्णोति विरूपो । ओकोटिमकोति आरोहाभावेन हेट्ठिमको, रस्सकायोति अत्थो । तेनाह “लकुण्डको”ति । लकु विय घटिका विय डेति पवत्ततीति हि लकुण्डको, रस्सो । कणति निमीलतीति काणो । तं पनस्स निमीलनं एकेन अक्खिना द्वीहिपि चाति आह “एकक्खिकाणो वा उभयक्खिकाणो वा”ति । कुणनं कुणो, हत्थवेकल्लं । तं एतस्स अत्थीति कुणी । खज्जो वुच्चति पादविकलो । हेट्ठिमकायसङ्कातो सरीरस्स पक्खो पदेसो हतो अस्साति पक्खहतो । तेनाह “पीठसप्पी”ति । पदीपे पदीपने एतब्बं नेतब्बन्ति पदीपेय्यं, तेलादिउपकरणं ।

आसं न करोतीति रज्जाभिसेके कनिट्ठो पत्थनं न करोति जेट्ठे सति कनिट्ठस्स अनधिकारत्ता । अभिसेकं अरहतीति अभिसेकारहो, न अभिसेकारहो काणकुणिआदिदोससमन्नागतो ।

सीलस्स दुट्ठु नाम नत्थि, तस्मा अभावत्थो इध दु-सद्दोति आह “निस्सीलो”ति । “पापं पापेन सुकर”न्तिआदीसु (उदा० ४८; चूळव० ३४३) विय पाप-सद्दो निहीनपरियायोति आह “लामकधम्मो”ति । सीलविपत्तिया वा दुस्सीलो । दिट्ठिविपत्तिया पापधम्मो । कायवाचासंवरभेदेन वा दुस्सीलो, मनोसंवरभेदेन, सतिसंवरादिभेदेन वा पापधम्मो । असुद्धप्पयोगताय दुस्सीलो, असुद्धासयताय पापधम्मो । कुसलसीलविरहेन दुस्सीलो, अकुसलसीलसमन्नागमेन पापधम्मो । असुचीहीति अपरिसुद्धेहि । सङ्काहि सरितब्बसमाचारोति “इमस्स मज्जे इदं कम्म”न्ति एवं परेहि सङ्काय सरितब्बसमाचारो । तेनाह “किञ्चिदेवा”तिआदि । अत्तनायेव वा सङ्काहि सरितब्बसमाचारोति एतेनपि कम्मसाधनतंयेव सङ्कस्सरसद्दस्स दस्सेति । अत्तनो सङ्काय परेसं समाचारकिरियं सरति आसङ्कति विधावतीतिपि सङ्कस्सरसमाचारोति एवमेत्थ कत्तुसाधनतापि दट्ठब्बा । तस्स हि द्वे तयो जने कथेन्ते दिस्वा “मम दोसं मज्जे कथेन्ती”ति तेसं समाचारं सङ्काय सरति धावति ।

एवंपटिञ्जोति सलाकगहणादीसु “कित्ताका विहारे समणो”ति गणनाय आरद्धाय “अहम्पि समणो, अहम्पि समणो”ति पटिञ्जं दत्त्वा सलाकगहणादीनि करोतीति समणो अहन्ति एवंसमणपटिञ्जो । **सुम्भकपत्तधरेति** मत्तिकापत्तधरे । **पूतिना कम्मेनाति** संकिलिद्धकम्मेन, निग्गुणताय वा गुणसारविरहितता **अन्तोपूति** । कसम्बुकचवरो जातो सञ्जातो अस्साति **कसम्बुजातो**ति आह “**सञ्जातरागादिकचवरो**”ति । अथ वा कसम्बु वुच्चति तित्तकुणपकसटं उदकं, इमस्मिञ्च सासने दुस्सीलो नाम जिगुच्छनीयता तित्तकुणपउदकसदिसो, तस्मा कसम्बु विय जातोति **कसम्बुजातो** । **लोकुत्तरधम्मउपनिस्सयस्स नत्थितायाति** यत्थ पतिट्ठितेन सक्का भवेय्य अरहत्तं लब्धं, तस्सा पतिट्ठाय भिन्नता वुत्तं । **महासीलस्मिं परिपूरकारितायाति** यत्थ पतिट्ठितेन सक्का भवेय्य अरहत्तं पापुणितुं, तस्मिं परिपूरकारिताय ।

आसंससुत्तवण्णना निट्ठिता ।

४. चक्कवत्तिसुत्तवण्णना

१४. चतुत्थे **चतूहि सङ्गहवत्थूहीति** दानपियवचनअत्थचरियासमानत्ततासङ्गतेहि चतूहि सङ्गहकारणेहि । **चक्कं वत्तेतीति** आणाचक्कं पवत्तेति । **चक्कन्ति** वा इध रतनचक्कं वेदितब्बं । अयज्झि चक्कसद्धो सम्पत्तियं, लक्खणे, रथङ्गे, इरियापथे, दाने, रतनधम्मखुरचक्कादीसु च दिस्सति । “चत्तारिमानि, भिक्खवे, चक्कानि, येहि समन्नागतानं देवमनुस्सान”न्तिआदीसु (अ० नि० ४.३१) हि सम्पत्तियं दिस्सति । “पादतलेसु चक्कानि जातानी”ति (दी० नि० २.३५; ३.२०४) एत्थ लक्खणे । “चक्कं वहतो पद”न्ति (ध० प० १) एत्थ रथङ्गे । “चतुचक्कं नवद्वार”न्ति (सं० नि० १.२९) एत्थ इरियापथे । “ददं भुज्ज मा च पमादो, चक्कं वत्तय सब्बपाणिन”न्ति (जा० १.७.१४९) एत्थ दाने । “दिब्बं चक्करतनं पातुरहोसी”ति (दी० नि० २.२४३) एत्थ रतनचक्के । “मया पवत्तितं चक्क”न्ति (सु० नि० ५६२) एत्थ धम्मचक्के । “इच्छाहतस्स पोसस्स, चक्कं भमति मत्थके”ति (जा० १.५.१०३) एत्थ खुरचक्के । “खुरपरियन्तेन चक्केना”ति (दी० नि० १.१६६) एत्थ पहरणचक्के । “असनिविचक्क”न्ति (दी० नि० ३.६१) एत्थ असनिमण्डले । इध पनायं रतनचक्के दट्ठब्बो ।

कित्तावता पनायं चक्कवत्ती नाम होति? एकङ्गुलद्वङ्गुलमत्तम्पि चक्करतनं आकासं अब्भुगन्त्वा पवत्तति । सब्बचक्कवत्तीनज्झि निसिन्नासनतो उट्ठित्वा चक्करतनसमीपं गन्त्वा हत्थिसोण्डसदिसपनाळिं सुवण्णभिङ्गारं उक्खिपित्वा उदकेन अब्भुक्किरित्वा “अभिजिजाता भवं चक्करतन”न्ति वचनसमनन्तरमेव वेहासं अब्भुगन्त्वा चक्करतनं पवत्ततीति । यस्स पवत्तिसमकालमेव, सो राजा चक्कवत्ती नाम होति ।

धम्मोति दसकुसलकम्मपथधम्मो, दसविधं वा चक्कवत्तिवत्तं । दसविधे वा कुसलधम्मे अगरहिते वा राजधम्मे नियुत्तोति **धम्मिको** । तेन च धम्मेन सकललोकं रज्जेतीति **धम्मराजा** । धम्मेन वा लद्धरज्जता **धम्मराजा** । चक्कवत्तीहि धम्मेन जायेन रज्जं अधिगच्छति, न अधम्मेन । **दसविधेन चक्कवत्तिवत्तेनाति** दसप्पभेदेन चक्कवत्तीनं वत्तेन ।

किं पन तं दसविधं चक्कवत्तिवत्तन्ति? वुच्चते —

“कतमं पन तं, देव, अरियं चक्कवत्तिवत्तन्ति? तेन हि त्वं, तात, धम्मंयेव निस्साय धम्मं सक्करोन्तो धम्मं गरुं करोन्तो धम्मं मानेन्तो धम्मं पूजेन्तो धम्मं अपचायमानो धम्मद्वजो धम्मकेतु धम्माधिपतेय्यो धम्मिकं रक्खावरणगुत्तिं संविदहस्सु अन्तोजनस्मिं बलकायस्मिं खत्तियेसु अनुयन्तेसु ब्राह्मणगहपतिकेसु नेगमजानपदेसु समणब्राह्मणेसु मिगपक्खीसु । मा च ते, तात, विजिते अधम्मकारो पवत्तित्थ । ये च ते, तात, विजिते अधना अस्सु,

तेसञ्च धनमनुष्पदेय्यासि । ये च ते, तात, विजिते समणब्राह्मणा मदप्पमादा पटिविरता खन्तिसोरच्चे निविट्ठा एकमत्तानं दमेन्ति, एकमत्तानं समेन्ति, एकमत्तानं परिनिब्बापेन्ति । ते कालेन कालं उपसङ्कमित्वा परिपुच्छेय्यासि परिगणहेय्यासि — ‘किं, भन्ते, कुसलं किं अकुसलं, किं सावज्जं किं अनवज्जं, किं सेवितब्बं किं न सेवितब्बं, किं मे करियमानं दीघरत्तं अहिताय दुक्खाय अस्स, किं वा पन मे करियमानं दीघरत्तं हिताय सुखाय अस्सा’ति । तेसं सुत्वा यं अकुसलं, तं अभिनिवज्जेय्यासि, यं कुसलं, तं समादाय वत्तेय्यासि । इदं खो, तात, तं अरियं चक्कवत्तिवत्त’न्ति —

एवं **चक्कवत्तिसुत्ते** (दी० नि० ३.८४) आगतनयेन अन्तोजनस्मिं बलकाये एकं, खत्तियेसु एकं, अनुयन्तेसु एकं, ब्राह्मणगहपतिकेसु एकं, नेगमजानपदेसु एकं, समणब्राह्मणेसु एकं, मिगपक्खीसु एकं, अधम्मकारप्पटिक्खेपो एकं, अधनानं धनानुष्पदानं एकं, समणब्राह्मणे उपसङ्कमित्वा पज्जपुच्छनं एकन्ति एवमेवं तं चक्कवत्तिवत्तं दसविधं होति । गहपतिके पन पक्खिजाते च विसुं कत्वा गणहन्तस्स द्वादसविधं होति ।

अज्जथा वत्तितुं अदेन्तो सो धम्मो अधिट्ठानं एतस्साति तदधिट्ठानं । तेन तदधिट्ठानेन चेतसा । **सक्करोन्तो**ति आदरकिरियावसेन करोन्तो । तेनाह “**यथा**”तिआदि । **गरुं करोन्तो**ति पासाणच्छत्तं विय गरुकरणवसेन गरुं करोन्तो । तेनेवाह “**तस्मिं गारवुप्पत्तिया**”ति । **धम्माधिपतिभूतागतभावेना**ति इमिना यथावुत्तधम्मस्स जेट्ठकभावेन पुरिमतरं अत्तभावेसु सक्कच्चं समुपचितभावं दस्सेति । **धम्मवसेनेव च सब्बकिरियानं करणेना**ति एतेन ठाननिसज्जादीसु यथावुत्तधम्मनिन्नपोणपब्भारभावं दस्सेति । **अस्सा**ति रक्खावरणगुत्तिया । **परं रक्खन्तो**ति अज्जं दिट्ठधम्मिकादिअनत्थतो रक्खन्तो । तेनेव पररक्खसाधनेन खन्तिआदिगुणेन अत्तानं ततो एव रक्खति । **मेत्तचित्तता**ति मेत्तचित्तताय । **निवासनपारुपनगेहादीनि** सीतुण्हादिप्पटिबाहनेन **आवरणं** ।

अन्तोजनस्मिन्ति अब्भन्तरभूते पुत्तदारादिजने । **सीलसंवरे पतिट्ठापेन्तो**ति इमिना रक्खं दस्सेति । **वत्थगन्धमालादीनि चस्स ददमानो**ति इमिना आवरणं, इतरेन गुत्तिं । **सम्पदानेनपीति पि-**सद्देन सीलसंवरेसु पतिट्ठापनादीनं सम्पिण्डेति । एस नयो परेसुपि पि-सद्दगहणे । निगमो निवासो एतेसन्ति **नेगमा** । एवं **जानपदा**ति आह “**तथा निगमवासिनो**”तिआदिना ।

रक्खावरणगुत्तिया कायकम्मादीसु संविदहनं ठपनं नाम तदुपदेसोयेवाति वुत्तं “**कथेत्वा**”ति । **एतेसूति** पाळियं वुत्तेसु समणादीसु । **पटिवत्तेतुं न सक्का** खीणानं किलेसानं पुन अनुप्पज्जनतो । सेसमेत्थ सुविज्जेय्यमेव ।

चक्कवत्तिसुत्तवण्णना निट्ठिता ।

५. सचेतनसुत्तवण्णना

१५. पञ्चमे इसयो पतन्ति सन्निपतन्ति एत्थाति **इसिपतनन्ति** आह “**बुद्धपच्चेकबुद्धसङ्घातान**”न्तिआदि । **सब्बूपकरणानि सज्जेत्वा**ति सब्बानि रुक्खस्स छेदनतच्छनादिसाधनानि उपकरणानि रज्जा आणत्तदिवसेयेव सज्जेत्वा । नाना करीयति एतेनाति **नानाकरणं**, नानाभावोति आह “**नानत्त**”न्ति । **नेसन्ति** सरलोपेनायं निद्देसोति आह “**न एस**”न्ति । तथा **अत्थेसन्ति** एत्थापीति आह “**अत्थि एस**”न्ति । पवत्तनत्थं अभिसङ्खरणं **अभिसङ्खारो**, तस्स गति वेगसा पवत्ति । तं सन्धायाह “**पयोगस्स गमन**”न्ति ।

सगण्डाति खुद्धानुखुद्दकगण्डा । तेनाह “उण्णतोणतट्टानयुत्ता”ति । सकसावाति सकसटा । तेनाह “पूतिसारेना”तिआदि । एवं गुणपतनेन पतिताति यथा तं चक्कं नाभिअरनेमीनं सदोसताय न पतिट्टासि, एवमेकच्चे पुग्गला कायवङ्कादिवसेन सदोसताय गुणपतनेन पतिता सकट्टाने न तिट्टन्ति । एत्थ च फरुसवाचादयोपि अपायगमनीया सोतापत्तिमग्गेनेव पहीयन्तीति दट्टब्बा ।

सचेतनसुत्तवण्णना निट्ठिता ।

६. अपण्णकसुत्तवण्णना

१६. छट्ठे विरज्जनकिरिया नाम पच्छा समादातब्बताय अपण्णकप्पयोगसमादाना विय होति, अविरज्जनकिरिया पन पच्छा असमादातब्बताय अनूनाति तंसमङ्गिपुग्गलो अपण्णको, तस्स भावो अपण्णकताति आह “अपण्णकपटिपदन्ति अविरद्धपटिपद”न्तिआदि । यस्मा सा अधिप्पेतत्थसाधनेन एकंसिका वट्टतो निय्यानावहा, तत्थ च युत्तियुत्ता असारापगता अविरुद्धताय अपच्चनीका अनुलोमिका अनुधम्मभूता च, तस्मा वुत्तं “एकंसपटिपद”न्तिआदि । न तक्कग्गाहेन वा नयग्गाहेन वाति तक्कग्गाहेन वा पटिपन्नो न होति नयग्गाहेन वा अपण्णकपटिपदं पटिपन्नो । तत्थ तक्कग्गाहेन वाति आचरियं अलभित्वा “एवं मे सुगति, निब्बानं वा भविस्सती”ति अत्तनो तक्कग्गहणमत्तेन । नयग्गाहेनाति पच्चक्खतो अदिस्वा नयतो अनुमानतो गहणेन । एवं गहेत्वा पटिपन्नोति तक्कमत्तेन, नयग्गाहेन वा पटिपन्नो । पण्डितसत्थवाहो विय सम्पत्तीहि न परिहायतीति योजना ।

यं सन्धाय वुत्तन्ति परिहानञ्च अपरिहानञ्च सन्धाय जातके (जा० १.१.१) वुत्तं । अयं पनेत्थ गाथाय अत्थयोजना — अपण्णकं ठानं अविरद्धकारणं निय्यानिककारणं एके बोधिसत्तप्पमुखा पण्डितमनुस्सा गण्हिंस्सु । ये पन ते बालसत्थवाहपुत्तप्पमुखा तक्किक्का आहु, ते दुतियं सापराधं अनेकंसिकं ठानं अनिय्यानिकं कारणं अग्गहेसुं, ते कण्हपटिपदं पटिपन्ना । तत्थ सुक्कपटिपदा अपरिहानिपटिपदा, कण्हपटिपदा परिहानिपटिपदा, तस्मा ये सुक्कपटिपदं पटिपन्ना, ते अपरिहीना सोत्थिभावं पत्ता । ये पन कण्हपटिपदं पटिपन्ना, ते परिहीना अनयव्यसनं आपन्नाति इममत्थं भगवा अनाथपिण्डकस्स गहपतिनो वत्त्वा उत्तरि इदमाह “एतदज्जाय मेधावी, तं गण्हे यदपण्णक”न्ति ।

तत्थ एतदज्जाय मेधावीति मेधाति लद्धनामाय विसुद्धाय उत्तमाय पज्जाय समन्नागतो कुलपुत्तो एतं अपण्णकं ठानं दुतियज्जाति द्वीसु अतक्कग्गाहतक्कग्गाहसङ्घातेसु ठानेसु गुणदोसं वुद्धिहानिं अत्थानत्थं जत्त्वाति अत्थो । तं गण्हे यदपण्णकन्ति यं अपण्णकं एकंसिकं सुक्कपटिपदा अपरिहानियपटिपदासङ्घातं निय्यानिककारणं, तदेव गण्हेय्य । कस्मा? एकंसिकादिभावतोयेव । इतरं पन न गण्हेय्य । कस्मा? अनेकंसिकादिभावतोयेव ।

यवन्ति ताय सत्ता अमिस्सितापि समानजातिताय मिस्सिता विय होन्तीति योनि । सा पन अत्थतो अण्डादिउप्पत्तिट्टानविसिट्ठो खन्धानं भागसो पवत्तिविसेसोति आह “खन्धकोट्टासो योनि नामा”ति । कारणं योनि नाम, योनीति तं तं फलं अनुपचितजाणसम्भारेहि दुरवगाधभेदताय मिस्सितं विय होतीति । यतो एकत्तनयेन सो एवायन्ति बालानं मिच्छागाहो । पस्सावमग्गो योनि नाम यवन्ति ताय सत्ता योनिस्सम्बन्धेन मिस्सिता होन्तीति । पग्गहिता अनुट्टानेन, पुनप्पुनं आसेवनाय परिपुण्णा ।

“चक्खुतोपी”तिआदिमि पन चक्खुविज्जाणादिवीथीसु तदनुगतमनोविज्जाणवीथीसु च किञ्चापि कुसलादीनं

पवत्ति अत्थि, कामासवादयो एव पन वणतो यूंसं विय पग्घरनकअसुचिभावेन सन्दन्ति, तस्मा ते एव “आसवा”ति वुच्चन्ति । तत्थ हि पग्घरनकअसुचिम्हि आसवसद्दो निरुळ्होति । **धम्मतो याव गोत्रभूति** ततो परं मग्गफलेसु अप्पवत्तनतो वुत्तं । एते हि आरम्मणकरणवसेन धम्मे गच्छन्ता ततो परं न गच्छन्ति । ननु ततो परं भवङ्गादीनिपि गच्छन्तीति चे? न, तेसम्पि पुब्बे आलम्बितेसु लोकियधम्मेसु सासवभावेन अन्तोगधत्ता ततो परताभावतो । एत्थ च गोत्रभुवचनेन गोत्रभुवोदानफलसमापत्तिपुरेचारिकपरिकम्मानि वुत्तानीति वेदितब्बानि । पठममग्गपुरेचारिकमेव वा गोत्रभु अवधिनिदस्सनभावेन गहितं, ततो परं पन मग्गफलसमानताय अज्जेसु मग्गेसु मग्गवीथियं समापत्तिवीथीयं निरोधानन्तरञ्च पवत्तमानेसु फलेसु निब्बाने च आसवानं पवत्ति निवारिताति वेदितब्बं । **सवन्तीति** गच्छन्ति, आरम्मणकरणवसेन पवत्तन्तीति अत्थो । अवधिअत्थो आ-कारो, अवधि च मरियादाभिविधिभेदतो दुविधो । तत्थ मरियादं किरियं बहि कत्वा पवत्तति यथा “आपाटलीपुत्तं वुट्ठो देवो”ति । अभिविधि पन किरियं ब्यापेत्वा पवत्तति यथा “आभवग्गं भगवतो यसो पवत्तती”ति । अभिविधिअत्थो चायमा-कारो इध गहितोति वुत्तं “अन्तोकरणत्थो”ति ।

मदिरादयोति आदि-सद्देन सिन्धवकादम्बरिकापोतिकादीनं सङ्गहो दट्ठब्बो । **चिरपारिवासियट्ठो** चिरपरिवुट्ठता पुराणभावो । **अविज्जा नाहोसीतिआदीति** एत्थ **आदि-**सद्देन “पुरिमा, भिक्खवे, कोटि न पज्जायति भवतण्हाया”ति (अ० नि० १०.६२) इदं **सुत्तं** सङ्गहितं । अविज्जासवभवासवानं चिरपरिवुट्ठताय दस्सिताय तब्भावभाविनो कामासवस्स चिरपरिवुट्ठता दस्सिताव होति । अज्जेसु च यथावुत्तं धम्मे ओकासञ्च आरम्मणं कत्वा पवत्तमानेसु मानादीसु विज्जमानेसु अत्तत्तनियादिग्गाहवसेन अभिव्यापनं मदकरणवसेन आसवसदिसता च एतेसंयेव, न अज्जेसन्ति एतेस्वेव आसवसद्दो निरुळ्होति दट्ठब्बो । **आयतं** अनादिकालिकत्ता । **पसवन्तीति** फलन्ति । न हि किञ्चि संसारदुक्खं अत्थि, यं आसवेहि विना उप्पज्जेय्य । **पुरिमानि चेत्थाति** एतेसु चतूसु अत्थविकप्पेसु पुरिमानि तीणि । **यत्थाति** येसु सुत्ताभिधम्मप्पदेसेसु । **तत्थ युज्जन्ति** किलेसेसुयेव यथावुत्तस्स अत्थत्तयस्स सम्भवतो । **पच्छिमं कम्मेपीति** पच्छिमं “आयतं वा संसारदुक्खं सवन्ति पसवन्ती”ति वुत्तनिब्बचनं कम्मेपि युज्जति दुक्खप्पसवनस्स किलेसकम्मसाधारणत्ता ।

दिट्ठधम्मा वुच्चन्ति पच्चक्खभूता खन्धा, दिट्ठधम्मे भवा **दिट्ठधम्मिका** । **विवादमूलभूताति** विवादस्स मूलकारणभूता कोधूपनाहमक्खपलासइस्सामच्छरियमायासाठेय्यथम्भसारम्भमानातिमाना । **येन देवूपपत्यस्साति** येन कम्मकिलेसप्पकारेन आसवेन देवेसु उपपत्ति निब्बत्ति अस्स मय्हन्ति सम्बन्धो । **गन्धब्बो वा विहङ्गमो** आकासचारी अस्सन्ति विभत्तिं विपरिणामेत्वा योजेतब्बं । एत्थ च यक्खगन्धब्बविनिमुत्ता सब्बा देवता देवग्गहणेन गहिता । नळो वुच्चति मूलं, तस्मा **विनळीकताति** विगतनळा विगतमूला कताति अत्थो । **अवसेसा च अकुसला धम्माति** अकुसलकम्मतो अवसेसा अकुसला धम्मा आसवाति आगताति सम्बन्धो ।

पटिघातायाति पटिसेधनाय । **परूपवाद... पे०... उपहवाति** इदं यदि भगवा सिक्खापदं न पज्जापेय्य, ततो असद्धम्मप्पटिसेवनअदिन्नादानपाणातिपातादिहेतु ये उप्पज्जेय्यं परूपवादादयो दिट्ठधम्मिका नानप्पकारा अनत्था, ये च तन्निमित्तमेव निरयादीसु निब्बत्तस्स पञ्चविधबन्धनकम्मकारणादिवसेन महादुक्खानुभवादिप्पकारा अनत्था, ते सन्धाय वुत्तं ।

ते पनेतेति एते कामरागादिकिलेसतेभूमककम्मपरूपवादादिउप्पद्वप्पकारा आसवा । **यत्थाति** यस्मिं विनयादिपाळिप्पदेसे । **यत्थाति** येन दुविधादिप्पकारेन अवसेसेसु च सुत्तन्तेसु तिधा आगताति सम्बन्धो । निरयं गमेन्तीति **निरयगामिनिया** । **छक्कनिपातेति** छक्कनिपाते आहुनेय्यसुत्ते (अ० नि० ६.५८) । तत्थ हि आसवा छधा आगता ।

सरसभेदोति खणिकनिरोधो । **खीणाकारोति** अच्चन्ताय खीणता । आसवा खीयन्ति पहीयन्ति एतेनाति **आसवक्खयो**, मग्गो । आसवानं खयन्ते उप्पज्जनतो **आसवक्खयो**, फलं । आसवक्खयेन पत्तब्बतो आसवा खीयन्ति एत्थाति **आसवक्खयो**, निब्बानं । **विसुद्धिमग्गे** (विसुद्धि० २.५५७-५६०) वित्थारितो, तस्मा तत्थ, तं संवण्णनाय च वुत्तनयेन वेदितब्बो ।

तथाति इमिना विसुद्धिमग्गे वित्थारिततं उपसंहरति । कुसलप्पवत्तिं आवरन्ति निवारेन्तीति **आवरणीया** । **पुरिमप्पवत्तिवसेनाति** निद्वोक्कमनतो पुब्बे कम्मट्ठानस्स पवत्तिवसेन । **ठपेत्वाति** हत्थगतं किञ्चि ठपेन्तो विय कम्मट्ठानं सतिसम्पज्जवसेन ठपेत्वा कम्मट्ठानमेव मनसिकरोन्तो निद्वं ओक्कमति, ज्ञानसमापन्नो विय यथापरिच्छिन्नेनेव कालेन पबुज्झमानो कम्मट्ठानं ठपितट्ठाने गणहन्तोयेव पबुज्झति नाम । तेन वुत्तं “**तस्मा...पे०... नाम होती**”ति । **मूलकम्मट्ठानेति** आदितो पट्ठाय परिहरियमानकम्मट्ठाने । **परिग्गहकम्मट्ठानवसेनाति** सयनं उपगच्छन्तेन परिग्गहमानकम्मट्ठानमनसिकारवसेन । सो पन धातुमनसिकारवसेन इच्छितब्बोति दस्सेतुं “**अयं ही**”तिआदि वुत्तं ।

अपण्णकसुत्तवण्णना निट्ठिता ।

७. अत्तब्याबाधसुत्तवण्णना

१७. सत्तमे ब्याबाधनं दुक्खापनन्ति आह “**अत्तब्याबाधायाति अत्तदुक्खाया**”ति । मग्गफलचित्तुप्पादापि कायसुचरितादिसङ्गहो एवाति आह “**अवारितानेवा**”ति ।

अत्तब्याबाधसुत्तवण्णना निट्ठिता ।

८. देवलोकसुत्तवण्णना

१८. अट्ठमे इतीति **पदसन्धिब्यञ्जनसिलिट्ठिताति** पुरिमपदानं पच्छिमपदेहि अत्थतो सहितताय व्यञ्जनानं वाक्यानं सिलिट्ठिताय दीपने निपातो ।

देवलोकसुत्तवण्णना निट्ठिता ।

९. पठमपापणिकसुत्तवण्णना

१९. नवमे उग्घाटेत्वाति आसनद्वारज्चेव भण्डपसिब्बके च विवरित्वा । **नाधिट्ठातीति** तंतंकयविवक्कये अत्तना वोयोगं नापज्जति । **दिवाकालेति** मज्झन्हिकसमये । **अस्सामिको होति** तीसुपि कालेसु लब्धब्बलाभस्स अलभनतो । अपतिवाताबाधं **रत्तिट्ठानं** । छायुदकसम्पन्नं **दिवाट्ठानं** । **विपस्सनापि वट्ठति** विपस्सनाकम्मिकोयेव । तेनपि हि नवधा इन्द्रियानं तिव्खत्तं आपादेन्तेन समाधिनिमित्तं गहेतब्बं, विपस्सनानिमित्तं समाहिताकारसल्लक्खणाय ।

पठमपापणिकसुत्तवण्णना निट्ठिता ।

१०. दुतियपापणिकसुत्तवण्णना

२०. दसमे विसिद्धधुरोति विसिद्धधुरसम्पग्गाहो वीरियसम्पन्नो । जाणवीरियायत्ता हि अत्थसिद्धियो । तेनाह “उत्तमधुरो”तिआदि । विक्कायिकभण्डन्ति विक्कयेतब्बभण्डं । निक्खित्तधनेनाति निदहित्वा ठपितधनवसेन । वळञ्जनकवसेनाति दिवसे दिवसे दानूपभोगवसेन वळञ्जितब्बधनवसेन । उपभोगपरिभोगभण्डेनाति उपभोगपरिभोगूपकरणेन । निपतन्तीति निपातेन्ति, अत्तनो धनग्गहेन निपातवुत्तिके करोन्ति । तेनाह “निमन्तेन्ती”ति ।

जाणथामेनाति जाणस्स थिरभावेन । जाणपरक्कमेनाति जाणसहितेन वीरियेन । दिट्ठधम्मिकसम्परायिकपरमत्थभेदज्झि येन सुतेन इज्झति, तं सुतं नाम । उक्कट्टुनिद्वेसेन दस्सेन्तो “एकनिकाय...पे०... बहुस्सुता”ति आह । आगतोति सुप्पवत्तिभावेन स्वागतो । तेनाह “पगुणो पवत्तितो”ति । अभिधम्मे आगता कुसलादिक्खन्धादिभेदभिन्ना धम्मा सुत्तन्तपिटकेपि ओतरन्तीति “धम्मधराति सुत्तन्तपिटकधरा”इच्चेव वुत्तं । न हि आभिधम्मिकभावेन विना निप्परियायतो सुत्तन्तपिटकञ्जुता सम्भवति । द्वेमातिकाधराति भिक्खुभिक्खुनिमातिकावसेन द्वेमातिकाधराति वदन्ति, “विनयाभिधम्ममातिकाधरा”ति युत्तं । परिपुच्छतीति सब्बभागेन पुच्छितब्बं पुच्छति । तेनाह “अत्थानत्थं कारणाकारणं पुच्छती”ति । परिग्गण्हातीति विचारेति ।

न एवं अत्थो दट्ठब्बोति एवं देसनानुक्कमेन अत्थो न गहेतब्बो । अज्जो हि देसनावक्कमो वेनेय्यज्झासयवसेन पवत्तनतो, अज्जो पटिपत्तिक्कमो । हेट्ठिमेन वा परिच्छेदोति सीलसमाधिपज्जासङ्घातेसु तीसु भागेषु कत्थचि हेट्ठिमनयेन देसनाय परिच्छेदं वेदितब्बं सीलेन, कत्थचि उपरिमेन भागेन पज्जाय, कत्थचि द्वीहिपि भागेहि सीलपज्जावसेन । इध पन सुत्ते उपरिमेन भागेन परिच्छेदो वेदितब्बोति वत्वा तं दस्सेन्तो “तस्मा”तिआदिमाह । यस्मा वा भगवा वेनेय्यज्झासयवसेन पठमं कल्याणमित्तं दस्सेन्तो अरहत्तं पवेदेत्वा “तयिदं अरहत्तं इमाय आरद्धवीरियताय होती”ति दस्सेन्तो वीरियारम्भं पवेदेत्वा “स्वायं वीरियारम्भो इमिना कल्याणमित्तसन्निस्सयेन भवती”ति दस्सेन्तो निस्सयसम्पत्तिं पवेदेति हेट्ठा दस्सितनिदस्सनानुरूपन्ति दट्ठब्बं ।

दुतियपापणिकसुत्तवण्णना निट्ठिता ।

रथकारवग्गवण्णना निट्ठिता ।

३. पुग्गलवग्गो

१. समिद्धसुत्तवण्णना

२१. ततियस्स पठमे रुच्चतीति कायसक्खिआदीसु पुग्गलेसु अतिविय सुन्दरतरपणीतरभावेन ते चित्तस्स अभिरुचिउप्पादको कतमोति पुच्छति । सद्धिन्द्रियं धुरं अहोसि सद्धाधुरं मग्गवुट्ठानन्ति कत्वा, सेसिन्द्रियानि पन कथन्ति आह “सेसानी”तिआदि । पटिविद्धमग्गोवाति तीहिपि थरेहि अत्तनो अत्तनो पटिविद्धअरहत्तमग्गो एव कथितो, तस्मा न सुकरं एकंसेन ब्याकातुं “अयं...पे०... पणीततरो चा”ति । भुम्मन्तरेनेव कथेसि “तीसुपि पुग्गलेसु अग्गमग्गट्ठोव पणीततरो”ति ।

समिद्धसुत्तवण्णना निट्ठिता ।

२. गिलानसुत्तवण्णना

२२. दुतिये हितानीति भव्यानि । वुद्धिकरानीति आरोग्यादिवुद्धिकरानि । अनुच्छविकन्ति उपट्टानकिरियाय अनुरूपं । वातापमाररोगेनाति वातरोगेन च अपमाररोगेन च, वातनिदानेन वा अपमाररोगेन । निट्ठप्पत्तगिलानोति “इमिना रोगेन न चिरस्सेव मरिस्सती”ति निट्ठं पत्तो गिलानो । खिपितकं नाम वमथुरोगो । कच्छूति थुल्लकच्छुआबाधो । तिणपुप्फकजरो विसमवातसम्पस्सजरोगो । येसन्ति येसं रोगानं । पटिजग्गनेनाति पटिकारमत्तेन । फासुकन्ति ब्याधिवूपसमनेन सरीरस्स फासुभावो । ब्याधिनिदानसमुट्टानजाननेन पण्डितो, पटिकारकिरियाय युत्तकारिताय दक्खो, उट्टानवीरियसम्पत्तिया अनलसो ।

पदपरमो पुग्गलो कथितो सम्मत्तनियामोक्कमनस्स अयोग्गभावतो । अलभन्तोव तथागतप्पवेदितं धम्मविनयं सवनाय ओक्कमति नियामं कुसलेसु धम्मेसु सम्मत्तं पच्चेकबोधिं । यन्ति, यतो । ओवादं लभित्वाति आभिसमाचारिकवत्तं ओवादमत्तं । एत्तकोपि हि तस्स हितावहोति । तन्निस्सितोवाति विपज्चितञ्जुनिस्सितोव होति । पुनप्पुनं देसेतब्बोव सम्मत्तनियामोक्कमनस्स योग्गभावतो ।

गिलानसुत्तवण्णना निट्ठिता ।

३. सङ्खारसुत्तवण्णना

२३. ततिये विविधेहि आकारेहि आबाधनतो ब्याबाधोव ब्याबज्झं, कायिकं चेतसिकञ्च दुक्खं । सह ब्याबज्झेन वत्ततीति सब्याबज्झं । तेनाह “सदुक्ख”न्ति । चेतनारासिन्ति पुब्बचेतनादिरासिं । चेतनं पुनप्पुनं पवत्तेन्तो “रासिं करोति पिण्डं करोती”ति च वुत्तो । सदुक्खन्ति निरन्तरदुक्खं । तेनाह “साबाधं निरस्साद”न्ति । अत्थीति उजुक्कं दुक्खवेदना नत्थीति अवत्तब्बत्ता वुत्तं । अनिट्ठसभावत्ता अनिट्ठारम्मणत्ता च दुक्खपक्खिकाव सा दट्ठब्बा । न हि अकुसलविपाका इट्ठा नाम अत्थी, कुसलविपाका पन उपेक्खावेदना तत्थ अप्पावसरा । अट्ठकथायं पन निरयस्स दुक्खबहुलत्ता दुक्खस्स च तत्थ बलवताय सा अब्बोहारिकट्ठाने ठिताति वुत्तं । उपमं कत्वा आहटो विसेसो विय सामज्जस्स यथा अयोपिण्डरोहिनो विय रूपानन्ति । पटिभागउपमाति पटिबिम्बउपमा ।

ते अग्गहेत्वाति हेट्ठिमब्रह्मलोके अग्गहेत्वा । वोमिस्सकसुखदुक्खन्ति विमिस्सकसुखदुक्खं पीतिमिस्सकभावतो । कम्मन्ति पापकम्मं । कम्मसीसेन फलं वदति । कामज्जेत्थ “अब्याबज्झं लोकं उपपज्जती”ति आगतं, “अब्याबज्झा फस्सा फुसन्ती”ति पन वचनेन लोकुत्तरफस्सापि सङ्गहन्तीति “तीणि सुचरितानि लोकियलोकुत्तरमिस्सकानि कथितानी”ति वुत्तं ।

सङ्खारसुत्तवण्णना निट्ठिता ।

४. बहुकारसुत्तवण्णना

२४. चतुत्थे अवस्सयं गतोति वट्टदुक्खपरिमुत्तिया अवस्सयो मय्हन्ति सरणगमनक्कमेन उपगतो होति । सतन्तिकन्ति सपरियत्तिधम्मं । अग्गहितसरणपुब्बस्साति अग्गहितपुब्बसरणस्स । अकताभिनिवेसस्स वसेन वुत्तन्ति तस्मिं अत्तभावे न कतो सरणगमनाभिनिवेसो येनाति अकताभिनिवेसो, तस्स वसेन वुत्तं । कामं पुब्बेपि सरणदायको

आचरियो वुत्तो, पब्बज्जादायकोपि सरणदायकोव । पुब्बे पन उपासकभावापादकवसेन सरणदायको अधिप्पेतो । इदं पन गहितपब्बज्जस्स सरणगमनं । पब्बजा हि सविसेसं सरणगमनन्ति पब्बज्जादायको पुन वुत्तो । एतेति पब्बज्जादायकादयो । **दुविधेन परिच्छिन्ना**ति लोकियधम्मसम्पापको लोकुत्तरधम्मसम्पापकोति द्विप्पकारेन परिच्छिन्ना, कताभिनिवेसकताभिनिवेसवसेन वा । **उपरीति** पठममगतो उपरि । **नेव सक्कोतीति** आचरियेन कतस्स उपकारस्स महानुभावत्ता तस्स पतिकारं नाम कातुं न सक्कोति ।

बहुकारसुत्तवण्णना निड्ढिता ।

५. वजिरूपमसुत्तवण्णना

२५. पञ्चमे अरुइति पुराणं दुट्ठवणं वुच्चति । क-कारो पदसन्धिकरोति अरुकूपमं चित्तं एतस्साति **अरुकूपमचित्तो** अप्पमत्तकस्सपि दुक्खस्स असहनतो । सेसपदद्वयेपि एसेव नयो । **इत्तरकालोभासेना**ति परित्तमेव कालो जाणोभासविरहेन । **लगतीति** कोधासङ्गवसेन कुप्पन्तो पुगगलो सम्मुखा, “किं वदसी”ति आदिना परम्मुखा च उपनयहनवसेन लगति, न तण्हासङ्गवसेन । **कुप्पतीति** कुञ्जति । **व्यापज्जतीति** विपन्नचित्तो होति । **थद्धभावं आपज्जति** ईसकम्पि मुदुत्ताभावतो । **दुट्ठारुकोति** मंसलोहितानं दुट्ठभावेन पकतिभावं जहित्वा ठितो दुट्ठवणो । “दुट्ठारुता”तिपि पठन्ति, तत्थापि ताकारो पदसन्धिकरो ।

तस्साति दुट्ठारुकस्स । **सवनन्ति** असुचिविसन्दनं । **उद्धुमातस्स** वियाति कोधेन उद्धं उद्धं धुमातकस्स विय कोधूपायासस्स अविस्सज्जनतो । **चण्डिकतस्साति** कुपितस्स । एत्थ च किञ्चापि हेट्ठिममगगवज्झापि किलेसा तेहि अनुप्पत्तिधम्मत्तं आपादितत्ता समुच्छिन्ना, तथापि तस्मिं सन्ताने अगगमगस्स अनुप्पन्नत्ता तत्थ अप्पहीनापि किलेसा अत्थेवाति कत्वा तेसं जाणानं विज्जूपमता वुत्ता, न तेहि मग्गेहि पहीनानं किलेसानं अत्थिभावतोति दट्ठब्बं ।

वजिरूपमसुत्तवण्णना निड्ढिता ।

६. सेवितब्बसुत्तवण्णना

२६. छट्ठे **उपसङ्कमितब्बो**ति कालेन कालं उपसङ्कमितब्बो । **अल्लीयितब्बो**ति छायाय विय विना भावनाय निल्लीयितब्बो । **पुनप्पुनं उपासितब्बो**ति अभिण्हसो उपनिसीदितब्बो । **अनुदयाति** मेत्तापुब्बभागो । **उपसङ्कमितुं वट्ठतीति** “एतस्स सीलेन अभिवुद्धि भविस्सती”ति उपकारत्थं उपसेवनादि वट्ठति ।

न पटिहज्जिस्सतीति “अपेहि, किं एतेना”ति पटिक्खेपाभावतो पियसीलत्ता न पटिहज्जिस्सति । **फासु भविस्सतीति** द्वीसु हि सीलवन्तेसु एकेन सीलस्स वण्णे कथिते इतरो अनुमोदति । तेन तेसं कथा फासु चेव होति पवत्तिनी च । एकस्मिं पन दुस्सीले सति दुस्सीलस्स सीलकथा दुक्कथा, नेव सीलकथा होति, न फासु होति, न पवत्तिनी । दुस्सीलस्स हि सीलकथा अफासु भविस्सति । सीलकथाय वुत्तमत्थं समाधिपज्जाकथासुपि अतिदिसति “**समाधिपज्जाकथासुपि एसेव नयो**”ति । द्वे हि समाधिलाभिनो समाधिकथं सप्पज्जा च पज्जाकथं कथेन्ता रत्तिं वा दिवसं वा अतिक्कमन्तम्पि न जानन्ति ।

तत्थ तत्थ पज्जाय अनुगगहेस्सामीति तस्मिं तस्मिं अनुगगहेतब्बे पज्जाय सोधेतब्बे वट्ठेतब्बे च अधिकसीलं

निस्साय उप्पन्नपज्जाय अनुग्गहेस्सामीति अत्थो । तच्च अनुग्गण्हनं सीलस्स असप्पायानुपकारधम्मो वज्जेत्वा तप्पटिपक्खसेवनेन होतीति आह “**सीलस्स असप्पाये**”तिआदि । सीलस्स असप्पायानुपकारधम्मा नाम अनाचारागोचरादयो, तप्पटिपक्खतो उपकारधम्मा वेदितव्वा । **तस्मिं तस्मिं ठाने**ति तंतंसिक्खाकोट्टासपदद्वाने । **अनुग्गण्हाति नामा**ति अभिन्नं असंकिलिद्धं कत्वा अनुग्गण्हाति नाम । **खारपरिस्सावने**ति रजकानं ऊसखारादिखारपरिस्सावनपटे । **हायती**ति सीलादिना परिहायति । **सेट्ठं पुग्गलन्ति** सीलादिगुणेहि सेट्ठं उत्तरितरं उत्तमं पुग्गलं ।

सेवितव्वसुत्तवण्णना निट्ठिता ।

७. जिगुच्छितव्वसुत्तवण्णना

२७. सत्तमे **अब्भुग्गच्छती**ति एत्थ अभि-सद्वापेक्खाय “न”न्ति सामिअत्थे उपयोगवचनन्ति आह “**अस्सा**”ति “तं खो पन भवन्त”न्तिआदीसु विय । **पापको कित्तिसद्दो**ति लामकभावेन कथेतव्वसद्दो । **गूथकूपो विय दुस्सील्यन्ति** एतेन दुस्सीलस्स गूथसदिसत्तमेव दस्सेति । **वचनन्ति** अनिट्ठवचनं । **पुरिमनयेनेवा**ति “गूथकूपो विय दुस्सील्य”न्तिआदिना पुब्बे वुत्तनयेन । **सुचिमित्तो**ति सीलाचारसुद्धिया सुचिमित्तो । सह अयन्ति पवत्तन्तीति **सहाया**ति आह “**सहगामिनो**”ति ।

जिगुच्छितव्वसुत्तवण्णना निट्ठिता ।

८. गूथभाणीसुत्तवण्णना

२८. अट्ठमे **गूथभाणी**ति गूथसदिसवचनत्ता गूथभाणी । यथा हि गूथं नाम महाजनस्स अनिट्ठं होति, एवमेव इमस्स पुग्गलस्स वचनं देवमनुस्सानं अनिट्ठं होति । **दुग्गन्धकथन्ति** किलेसासुचिसंकिलिद्धताय गूथं विय दुग्गन्धवायनकथं । **पुप्फभाणी**ति सुपुप्फसदिसवचनत्ता पुप्फभाणी । यथा हि फुल्लानि वस्सिकानि वा अधिमुत्तिकानि वा महाजनस्स इट्ठानि कन्तानि होन्ति, एवमेव इमस्स पुग्गलस्स वचनं देवमनुस्सानं इट्ठं होति कन्तं । **पुप्फानि विया**ति चम्पकसुमनादिसुगन्धपुप्फानि विय । **सुगन्धकथन्ति** सुचिगन्धवायनकथं किलेसदुग्गन्धाभावतो । **मधुभाणी**ति एत्थ “मुदुभाणी”तिपि पठन्ति । उभयत्थापि हि मधुरवचनोति अत्थो । यथा हि चतुमधुरं नाम मधुरं पणीतं, एवमेव इमस्स पुग्गलस्स वचनं देवमनुस्सानं मधुरं होति । **मधुरकथन्ति** कण्णसुखताय पेमनीयताय च सद्गतो अत्थतो च मधुरसभावकथं । **अत्तहेतु वा**ति अत्तनो वा हत्थपादादिच्छेदनहरणहेतु । **परहेतु वा**ति एत्थापि एसेव नयो । तेनाह “**अत्तनो वा**”तिआदि ।

“नेलङ्गोति खो, भन्ते, सीलानमेतं अधिवचन”न्ति **सुत्ते** (सं० नि० ४.३४७) आगतत्ता वुत्तं “**एत्थ वुत्तसीलं विया**”ति । पूरेति गुणानं पारिपूरियं । **सुकुमारा**ति अफरुसताय मुदुका कोमला । **पुरस्सा**ति एत्थ पुर-सद्दो तन्निवासिवाचको दट्ठव्वो “गामो आगतो”तिआदीसु विय । तेनाह “**नगरवासीन**”न्ति । मनं अप्पायति वट्ठेतीति **मनापा** । तेनाह “**चित्तवुद्धिकरा**”ति ।

गूथभाणीसुत्तवण्णना निट्ठिता ।

९. अन्धसुत्तवण्णना

२९. नवमे अन्धोति आदीसु पाळिपदेसु पठमो दिट्ठधम्मिकभोगसंहरणपञ्जाचक्खुनो च सम्परायिकत्थसाधनपञ्जाचक्खुनो च अभावा “अन्धो”ति वुच्चति दुतियोपि, ततियो पन द्विन्नम्पि भावा “द्विचक्खू”ति वुच्चति । पञ्जाचक्खूति आयकोसल्लभूता पञ्जाचक्खु । तेनाह “फातिं करेय्या”ति । अधमुत्तमेति अधमे चेव उत्तमे च । पटिपक्खवसेनाति पटिपक्खस्स अत्थितावसेन । सुक्कसप्पटिभागाति सुक्कधम्महि पहायकेहि सप्पटिभागाति जानेय्य । कण्हसप्पटिभागाति कण्हधम्महि पहातब्बेहि सप्पटिभागाति जानेय्य ।

तथाजातिकाति यादिसेहि सपुत्तदारपरिजनसजातिमित्तबन्धवग्गं अत्तानं सुखेति पीणेति, तादिसा भोगापि न सन्ति । पुञ्जानि च न करोतीति समणब्राह्मणकपणद्धिकयाचकानं सन्तप्पनवसेन पुञ्जानि न करोति । उभयत्थाति उभयस्मिं लोके, उभयस्मिं वा अत्थेति विग्गहोति दस्सेन्तो “इधलोके”ति आदिमाह । उभयेनाति वुत्तमत्थं योजेत्वा दस्सेतुं “कथ”न्ति आदि वुत्तं । यस्मिं ठानेति यस्मिंयेव ठाने । न सोचतीति सोकहेतूनं तत्थ अभावतो न सोचति ।

अन्धसुत्तवण्णना निट्ठिता ।

१०. अवकुज्जसुत्तवण्णना

३०. दसमे अवकुज्जपञ्जोति निक्कुज्जपञ्जो । तेनाह “अधोमुखपञ्जो”ति । पुब्बपट्टपनाति पठमारम्भो । सन्निट्ठानन्ति कथापरियोसानं । अप्पनाति देसनाय निट्ठापनं । अनेके वा अनुसन्धियोति योजेतब्बं । समाधि वाति आदीसु लोकुत्तरधम्मा परमत्थतो सासनन्ति तदत्थोपादकसमाधि तस्स आदीति वुत्तो, तदासन्नत्ता विपस्सना, तस्स मूलभावेन एकदेसत्ता मग्गो ।

सासनस्स पारिपूरिसुद्धियो नाम सत्थारा देसितनियामेनेव सिद्धा, ता पनेत्थ कथेन्तस्स वसेन गहेतब्बाति दस्सेतुं “अनूनं कत्वा देसेन्ती”ति, “निग्गण्ठि कत्वा देसेन्ती”ति च वुत्तं । तत्थ निज्जटन्ति निग्गुम्बं अनाकुलं । निग्गण्ठिन्ति गण्ठिट्ठानरहितं सुविज्जेय्यं कत्वा ।

आकिण्णानीति आकिरित्वा संकिरित्वा ठपितानीति अत्थो । तेनाह “पक्खित्तानी”ति । उच्छङ्गो विय उच्छङ्गपञ्जो पुग्गलो दट्ठब्बोति उच्छङ्गसदिसपञ्जताय उच्छङ्गपञ्जो । एवं पञ्जा विय पुग्गलोपि उच्छङ्गो विय होति, तस्मिं धम्मानं अचिरट्ठानतोति अधिप्पायेन वुत्तं । यथा च उच्छङ्गसदिसा पञ्जा, एवं निक्कुज्जकुम्भसदिसा पञ्जा एवाति दट्ठब्बा ।

संविदहनपञ्जायाति “एवं कते इदं नाम भविस्सती”ति एवं तंतं अत्थकिच्चं संविधातुं समत्थताय विचारणपञ्जाय रहितो । सेय्योति सेट्ठो पासंसो । पुब्बभागपटिपदन्ति चित्तविसुद्धिआदिकं अरियमग्गस्स अधिगमाय पुब्बभागपटिपत्तिं ।

अवकुज्जसुत्तवण्णना निट्ठिता ।

पुग्गलवग्गवण्णना निट्ठिता ।

४. देवदूतवग्गो

१. सब्रह्मकसुत्तवण्णना

३१. चतुत्थस्स पठमे सब्रह्मकानीति ससेट्टकानि । येसन्ति येसं कुलानं । पुत्तानन्ति पुत्तेहि । पूजितसदयोगेन हि इदं करणत्थे सामिवचनं । तेनाति आहारादिना । पटिजग्गिता गोपिताति यथाकालं तस्स तस्स दातब्बस्स दानेन वेय्यावच्चस्स च करणेन पटिजग्गिता चेव उप्पन्नानत्थप्पहरणेन गोपिता च होन्ति । तेसन्ति मातापितूनं । ब्रह्मादिभावसाधनत्थन्ति तेसं गुणानं अत्थिताय लोके ब्रह्मा नाम वुच्चति, आचरियो नाम वुच्चति, आहुनेय्यो नाम वुच्चति, ते मातापितूनं पुत्तकं पटिलभन्तीति दस्सनवसेन नेसं ब्रह्मादिभावसाधनत्थं “बहुकारा”ति, वत्वा तं तेसं बहुकारतं नानाकारतो दस्सेतुं “आपादका”तिआदि वुत्तं । मातापितरो हि पुत्तानं जीवितस्स आपादका, सरीरस्स पोसका, आचारसमाचारानं सिक्खापका सकलस्सपि इमस्स लोकस्स दस्सेतारो । तेनाह “पुत्तानं ही”तिआदि । इट्ठारम्मणं ताव ते दस्सेन्तु, अनिट्ठारम्मणं कथन्ति? तम्मि दस्सेतब्बमेव वज्जनीयभावजानापनत्थं ।

अविजहिता होन्तीति तासं भावनाय ब्रह्मानं ब्रह्मलोके उप्पन्नत्ता अविजहिता होन्ति भावना । लोभनीयवयस्सिं पठमयोब्बने अतिविय मुदुभावप्पत्तदस्सनत्थं सतविहतग्गहणं । पाटियेक्कन्ति विसुं । इमिना कारणेनाति इमिना यथावुत्तेन पुत्तेसु पवत्तितेहि अतिक्कमेन मेत्तादिसमुप्पत्तिसङ्घातेन कारणेन ।

थरुसिप्पन्ति असिसत्तिकुन्तकलापादिआयुधसिप्पं । मुद्दागणनाति अङ्गुलिसंकोचनादिना हत्थमुद्दाय गणना । आदिसद्देन पाणादीनं सङ्गहो । पच्छाचरिया नाम मातापितूनं सन्तिके उग्गहितगहट्टवत्तस्सेव पुग्गलस्स यथासकं हत्थाचरियादीनं सिप्पग्गाहापनन्ति कत्वा सब्बपठमं आचरिया नामाति योजेतब्बं । आनीय हुतं आहुतं । पकारेहि हुतं पाहुतं । अभिसङ्घत्तन्ति तस्सेव वेवचनं ।

नमो करेय्याति सायं पातं उपट्ठानं गन्त्वा “इदं मय्हं उत्तमपुज्जक्खेत्त”न्ति नमक्कारं करेय्य । ताय नं पारिचरियायाति एत्थ नन्ति निपातमत्तं, यथावुत्तपरिचरणेनाति अत्थो । अथ वा पारिचरियायाति भरणकिच्चकरणकुलवंसप्पत्तिट्ठानापनादिना पज्जविधउपट्ठानेन । वुत्तज्हेतं —

“पज्जहि खो, गहपतिपुत्त, ठानेहि पुत्तेन पुरत्थिमा दिसा मातापितरो पच्चुपट्ठातब्बा — “भतो नेसं भरिस्सामि, किच्चं नेसं करिस्सामि, कुलवंसं ठपेस्सामि, दायज्जं पटिपज्जामि, अथ वा पन पेतानं कालकतानं दक्खिणं अनुप्पदस्सामी”ति । इमेहि खो, गहपतिपुत्त, पज्जहि ठानेहि पुत्तेन पुरत्थिमा दिसा मातापितरो पच्चुपट्ठिता पज्जहि ठानेहि पुत्तं अनुकम्पन्ति, पापा निवारन्ति, कल्याणे निवेसेन्ति, सिप्पं सिक्खापेन्ति, पतिरूपेन दारेन संयोजेन्ति, समये दायज्जं निव्यादेन्ती”ति (दी० नि० ३.२६७) ।

अपिच यो मातापितरो तीसु वत्थूसु अभिप्पसन्ने कत्वा सीलेसु वा पतिट्ठापेत्वा पब्बज्जाय वा नियोजेत्वा उपट्ठहति, अयं मातापितूपट्ठाकानं अग्गोति वेदितब्बो । सा पनायं पारिचरिया पुत्तस्स उभयलोकहितसुखावहाति तं दस्सेतुं “इधेव नं पसंसन्ति, पेच्च सग्गे पमोदती”ति वुत्तं । पसंसन्तीति “अयं पुग्गलो मत्तेय्यो पेत्यो सग्गसंवत्तनियं पटिपदं पूरेती”ति इधेव नं पसंसन्ति । आमोदति आदितो पट्ठाय मोदप्पत्तिया । पमोदति नानप्पकारमोदसम्पत्तिया ।

सब्रह्मकसुत्तवण्णना निट्ठिता ।

२. आनन्दसुत्तवण्णना

३२. दुतिये तथाजातिकोति तथासभावो । चित्तेकग्गतालाभोति चित्तेकग्गताय अधिगमो । रूपमेव किलेसुप्पत्तिया कारणभावतो रूपनिमित्तं । एस नयो सेसेसुपि । सस्सतादिनिमित्तन्ति सस्सतुच्छेदभावनिमित्तं । पुग्गलनिमित्तन्ति पुग्गलाभनिवेसननिमित्तं । धम्मनिमित्तन्ति धम्मरम्मणसङ्घातं निमित्तं । “सिया नु खो, भन्ते”ति थेरेन पुट्ठो भगवा “सिया”ति अवोच लोकुत्तरसमाधिप्पटिलाभं सन्धाय । सो हि निब्बानं सन्तं पणीतन्ति च पस्सति । तेनाह “इधानन्दा”तिआदि ।

निब्बानं सन्तन्ति समापत्तिं अप्पेत्वाति निब्बानं सन्तन्ति आभुजित्वा फलसमापत्तिं अप्पेत्वा । दिवसम्पीतिआदिना असङ्खताय धातुया अच्चन्तसन्तपणीतादिभावं दस्सेति । अट्ठविधेति “सन्तं पणीतं सब्बसङ्खारसमथो सब्बूपधिपटिनिस्सग्गो तण्हाक्खयो विरागो निरोधो निब्बान”न्ति एवं अट्ठविधे आभोगसञ्जिते समन्नाहारे । निद्धारणे चेतं भुम्मं । इमस्मिं ठाने... पे०... लब्धन्तेवाति “इधानन्द, भिक्खुनो एवं होती”ति आगते इमस्मिं सुत्तप्पदेसे एकोपि आभोगसमन्नाहारो चेपि सब्बे अट्ठपि आभोगसमन्नाहारा लब्धन्तेव समन्नाहरतं अत्थावहत्ता ।

जाणेन जानित्वाति विपस्सनाजाणसहितेन मग्गजाणेन जानित्वा । परानि च ओपरानि च चक्खादीनि आयतनानि । सन्ततायाति पटिप्पस्सद्धिताय । कायदुच्चरितादिधूमविरहितोति कायदुच्चरितादि एव सन्तापनट्टेन धूमो, तेन विरहितो । अनीघोति अपापो । जातिजरागहणेनेव ब्याधिमरणम्पि गहितमेवाति तब्भावभावतोति वुत्तं ।

आनन्दसुत्तवण्णना निट्ठिता ।

३. सारिपुत्तसुत्तवण्णना

३३. ततिये, “सारिपुत्त, मया संखित्तेन देसितं धम्मं तादिसेनपि न सुकरं विज्जातु”न्ति इमिना अधिप्पायेनेव वदन्तो थेरस्स जाणं सब्बमतिक्कमं । अज्जातारो च दुल्लभाति हि इमिना सामज्जवचनेन सारिपुत्तत्थेरम्पि अन्तो गधं कत्वा दस्सेन्तो तेनपि अत्तनो देसनाय दुप्पटिविद्धभावं दस्सेति ।

सम्माति हेतुना कारणेन । तेनाह “उपायेना”तिआदि । मानाभिसमयाति मानस्स दस्सनाभिसमया । पहानाभिसमयोति च दस्सनाभिसमयोति च परिज्जाभिसमयो वुत्तो । अरहत्तमग्गो हि परिज्जाकिच्चसिद्धिया किच्चवसेन मानं पस्सति, असम्मोहप्पटिवेधवसेनाति वुत्तं होति, अयमस्स दस्सनाभिसमयो । तेन दिट्ठो पन पहानाभिसमयो च । दस्सनाभिसमयेन हि परिज्जाभिसमयमेव पहीयति । दिट्ठविसेन दिट्ठसत्तानं जीवितं विय अयमस्स पहानाभिसमयो । अट्ठकथायं पन पहानाभिसमयस्स दस्सनाभिसमयनानन्तरियकत्ता “पहानाभिसमयेन”इच्चेव वुत्तं । पहानाभिसमये हि गहिते दस्सनाभिसमयो गहितोव होति ।

अन्तमकासि दुक्खस्साति अरहत्तमग्गेन मानस्स पहीनत्ता ये इमे “कायबन्धनस्स अन्तो जीरति (चूळव० २७८), हरितन्तं वा”ति (म० नि० १.३०४) एवं वुत्तअन्तिममरियादन्तो च “अन्तमिदं, भिक्खवे, जीविकान”न्ति (सं० नि० ३.८०; इतिवु० ९१) एवं वुत्तलामकन्तो च “सक्कायो एको अन्तो”ति (सं० नि० ३.१०३) एवं वुत्तकोट्टासन्तो च “एसेवन्तो दुक्खस्स सपच्चयसङ्ख्या”ति एवं वुत्तकोट्टासन्तो चाति चत्तारो अन्ता, तेसु सब्बस्सेव वट्टदुक्खस्स अदुं चतुत्थकोटिसङ्घातं अन्तमकासि, परिच्छेदं परिवट्ठमं अकासि, अन्तिमसमुदयमत्तावसेसं दुक्खमकासीति वुत्तं होति । तेनाह “वट्टदुक्खस्स अन्तमकासी”ति ।

ननु च “पहान”न्ति इमस्स निद्देसे निब्बानं आगतं? इध पटिप्पस्सद्धिप्पहानसङ्घातं अरहत्तफलं वुत्तं, तस्मा निद्देसेनायं वण्णना विरुज्झतीति आह “निद्देसे पना”तिआदि। तत्थ तानि पदानि आगतानीति तस्मिं निद्देसे “पहानं वूपसमं पटिनिस्सगं”न्तिआदीनि (चूळनि० ७५ उदयमाणवपुच्छानिद्देसो) पदानि आगतानि।

धम्मतक्कपुरेजवन्ति इमिना तस्मिं चतुत्थज्झानविमोक्खे ठत्वा ज्ञानङ्गानि विपस्सित्वा अधिगतं अरहत्तविमोक्खं वदति। अरहत्तविमोक्खस्स हि मग्गसम्पयुत्तसम्मासङ्कप्पसङ्घातो धम्मतक्को पुरेजवो होति।

सारिपुत्तसुत्तवण्णना निट्ठिता।

४. निदानसुत्तवण्णना

३४. चतुत्थे पिण्डकरणत्थायाति आयूहनवसेन रासिकरणत्थाय। अभिन्नानीति एकदेसेनपि अखण्डितानि। भिन्नकालतो पट्टाय हि बीजं बीजकिच्चाय न उपकप्पति। अपूतीनीति उदकतेमनेन पूतिभावं न उपगतानि। पूतिबीजज्झि बीजत्थाय न उपकप्पति। तेनाह “पूतिभावेन अबीजत्तं अप्पत्तानी”ति। न वातेन न च आतपेन हतानीति वातेन च आतपेन च न हतानि, निरोजत्तं न पापितानि। निरोजज्झि कसटबीजं बीजत्थाय न उपकप्पति। सारादानीति तण्डुलसारस्स आदानतो सारादानि। निस्सारज्झि बीजं बीजत्थाय न उपकप्पति। तेनाह “गहितसारानी”ति, पतिट्ठितसारानीति अत्थो। सन्निचयभावेन सुखं सयितानीति चत्तारो मासे कोट्टपक्खित्तनियामेनेव सुखसयितानि।

कम्मविभत्तीति कम्मविभागो। दिट्ठधम्मो वुच्चति पच्चक्खभूतो पच्चुप्पन्नो अत्तभावो, तत्थ वेदितब्बफलं कम्मं दिट्ठधम्मवेदनीयं। पच्चुप्पन्नभवतो अनन्तरं वेदितब्बफलं कम्मं उपपज्जवेदनीयं। अपरपरियायवेदनीयन्ति दिट्ठधम्मानन्तरभवतो अज्जस्मिं अत्तभावपरियाये अत्तभावपरिवत्ते वेदितब्बफलं कम्मं। पटिपक्खेहि अनभिभूतताय पच्चयविसेसेन पटिलद्धविसेसताय च बलवभावप्पत्ता तादिसस्स पुब्बाभिसङ्खारस्स वसेन सातिसया हुत्वा पवत्ता पठमजवनचेतना तस्मिंयेव अत्तभावे फलदायिनी दिट्ठधम्मवेदनीयकम्मं नाम। सा हि वुत्ताकारेण बलवती जवनसन्ताने गुणविसेसयुत्तेसु उपकारानुपकारवसप्पवत्तिया आसेवनालाभेन अप्पविपाकताय च पठमजवनचेतना इतरद्वयं विय पवत्तसन्तानुपरमापेक्खं ओकासलाभापेक्खज्ज कम्मं न होतीति इधेव पुप्फमत्तं विय पवत्तिविपाकमत्तं फलं देति। तथा असक्कोन्तन्ति कम्मस्स विपाकदानं नाम उपधिप्पयोगादिपच्चयन्तरसमवायेनेव होतीति तदभावतो तस्मिंयेव अत्तभावे विपाकं दातुं असक्कोन्तं। अहोसिकम्मन्ति अहोसि एव कम्मं, न तस्स विपाको अहोसि अत्थि भविस्सति चाति एवं वेदितब्बं कम्मं।

अत्थसाधिकाति दानादिपाणातिपातादिअत्थस्स निष्पादिका। का पन साति आह “सत्तमजवनचेतना”ति। सा हि सन्निट्ठापकचेतना वुत्तनयेन पटिलद्धविसेसा पुरिमजवनचेतनाहि लद्धासेवना च समाना अनन्तरत्तभावे विपाकदायिनी उपपज्जवेदनीयकम्मं नाम। पुरिमउपमाययेवाति मिगलुद्धकोपमाययेव।

सति संसारप्पवत्तियाति इमिना असति संसारप्पवत्तियं अहोसिकम्मपक्खे तिट्ठति विपच्चनोकासस्स अभावतोति दीपेति। यं गरुक्कन्ति यं अकुसलं महासावज्जं, कुसलज्ज महानुभावं कम्मं। कुसलं वा हि होतु अकुसलं वा, यं गरुक्कं मातुघातादिकम्मं वा महग्गतकम्मं वा, तदेव पठमं विपच्चति। तेनाह “कुसलाकुसलेसु पना”तिआदि। यं बहुलन्ति यं बहुलं अभिण्हसो कत्तं समासेवितं। तेनाह “कुसलाकुसलेसु पन यं बहुलं होती”तिआदि। यदासन्नं नाम मरणकाले

अनुस्सरितं कम्मं, आसन्नकाले कते पन वत्तब्बमेव नत्थीति आह “**यं पन कुसलाकुसलेसु आसन्नमरणे**”तिआदि। अनुस्सरितुन्ति परिव्यत्तभावेन अनुस्सरितुं।

तेसं अभावेति तेसं यंगरुकादीनं तिण्णं कम्मानं अभावे। यत्थ कत्थचि विपाकं देतीति पटिसन्धिजनकवसेन विपाकं देति। पटिसन्धिजनकवसेन हि गरुकादिकम्मचतुक्कं वुत्तं। तत्थ गरुकं सब्बपठमं विपच्चति, गरुके असति बहुलीकतं, तस्मिं असति यदासन्नं, तस्मिं असति “कटत्ता वा पना”ति वुत्तं पुरिमजातीसु कतकम्मं विपच्चति। बहुलासन्नपुब्बकतेसु च बलाबलं जानितब्बं। पापतो पापन्तरं कल्याणञ्च, कल्याणतो कल्याणन्तरं पापञ्च बहुलीकतं। ततो महतोव पुब्बकतादि अप्पञ्च बहुलानुस्सरणेन विप्पटिसारादिजननतो, पटिपक्खस्स अपरिपुण्णताय आरद्धविपाकस्स कम्मस्स कम्मसेसस्स वा अपरपरियायवेदनीयस्स अपरिक्खीणताय सन्ततिया परिणामविसेसतोति तेहि तेहि कारणेहि आयूहितफलं पठमं विपच्चति। **महानारदकस्सपजातके** (जा० २.२२.११५३ आदयो) विदेहरज्जो सेनापति अलातो, बीजको दासो, राजकज्जा रुचा च एत्थ निदस्सनं। तथा हि वुत्तं भगवता —

“तत्रानन्द, ख्वायं पुग्गलो इध पाणातिपाती...पे०... मिच्छादिट्ठि। कायस्स भेदा परं मरणा अपायं दुग्गतिं विनिपातं निरयं उपपज्जति, पुब्बे वास्स तं कतं होति पापकम्मं दुक्खवेदनीयं, पच्छा वास्स तं कतं होति पापकम्मं दुक्खवेदनीयं, मरणकाले वास्स होति मिच्छादिट्ठि समत्ता समादिन्ना, तेन सो कायस्स भेदा परं मरणा अपायं दुग्गतिं विनिपातं निरयं उपपज्जती”ति —

आदि। सब्बं **महाकम्मविभङ्गसुत्तं** (म० नि० ३.३०३) वित्थारेतब्बं। किं बहुना। यं तं तथागतस्स महाकम्मविभङ्गजाणं, तस्सेवायं विसयो, यदिदं तस्स तस्स कम्मस्स तेन तेन कारणेन पुब्बापरविपाकता समत्थीयति।

इदानीं जनकादिकम्मचतुक्कं विभजन्तो “**जनकं नामा**”तिआदिमाह। **पवत्तिं न जनेतीति** पवत्तिविपाकं न जनेति। पठमनये जनककम्मस्स पटिसन्धिविपाकमत्तस्सेव वुत्तत्ता तस्स पवत्तिविपाकदायकत्तम्पि अनुजानन्तो “**अपरो नयो**”तिआदिमाह। तत्थ पटिसन्धिदानादिवसेन विपाकसन्तानस्स निब्बत्तकं **जनकं**। सुखदुक्खसन्तानस्स नामरूपप्पबन्धस्स वा चिरतरं पवत्तिहेतुभूतं **उपत्थम्भकं**। तेनाह “**सुखदुक्खं उपत्थम्भेति, अद्धानं पवत्तेती**”ति। **उपपीळकं** सुखदुक्खप्पबन्धे पवत्तमाने सणिकं सणिकं हापेति। तेनाह “**सुखदुक्खं पीळेति बाधेति, अद्धानं पवत्तितुं न देती**”ति।

वातकाळको महल्लको चोरे घातेतुं न सक्कोतीति सो किर महल्लककाले एकप्पहारेन सीसं छिन्दितुं न सक्कोति, द्वे तयो वारे पहरन्तो मनुस्से किलमेति, तस्मा ते एवमाहंसु। **अनुलोमिकं खन्ति पटिलभित्वा**ति सोतापत्तिमग्गस्स ओरतो अनुलोमिकं खन्ति लभित्वा। **तरुणवच्छाय गाविया मदित्वा जीवितक्खयं पापितोति** एका किर यक्खिनी धेनुवेसेन आगन्त्वा उरे पहरित्वा मारेसि, तं सन्थायेतं वुत्तं। नगरे भवो **नागरियो**।

घातेत्वाति उपच्छिन्दित्वा। कम्मस्स उपच्छिन्दनं नाम तस्स विपाकप्पटिबाहनमेवाति आह “**तस्स विपाकं पटिबाहित्वा**”ति। तज्ज अत्तनो विपाकुप्पत्तिया ओकासकरणन्ति वुत्तं “**अत्तनो विपाकस्स ओकासं करोती**”ति। विपच्चनाय कतोकासं कम्मं विपक्कम्मेव नाम होतीति आह “**एवं पन कम्मेन कते ओकासे तं विपाकं उप्पन्नं नाम वुच्चती**”ति। उपपीळकं अज्जस्स विपाकं उपच्छिन्दति, न सयं अत्तनो विपाकं देति। उपघातकं पन दुब्बलकम्मं उपच्छिन्दित्वा अत्तनो विपाकं उप्पादेतीति अयमेतेसं विसेसो। किञ्चि बह्वाबाधतादिपच्चयूपसन्निपातेन विपाकस्स

विबाधकं उपपीळकं, तथा विपाकस्सेव उपच्छेदकं । उपघातककम्मं पन उपघातेत्वा अत्तनो विपाकस्स ओकासकरणेन विपच्चने सति जनकमेव सिया । जनकादिभावो नाम विपाकं पति इच्छितब्बो, न कम्मं पतीति विपाकस्सेव उपघातकता युत्ता विय दिस्सति, वीमंसितब्बं ।

अपरो नयो — यस्मिं कम्मे कते पटिसन्धियं पवत्ते च विपाककटत्तारूपानं उप्पत्ति होति, तं **जनकं** । यस्मिं पन कते अज्जेन जनितास्स इट्ठस्स वा अनिट्ठस्स वा फलस्स विबाधकविच्छेदकपच्चयानुप्पत्तिया उपब्रूहनपच्चयुप्पत्तिया जनकसामत्थियानुरूपं परिसुद्धिचिरतरप्पबन्धा होति, तं **उपत्थम्भकं** । जनकेन निब्बत्तितं कुसलफलं वा अकुसलफलं वा येन पच्चनीकभूतेन रोगधातुविसमतादिनिमित्तताय विबाधयति, तं **उपपीळकं** । येन पन कम्मुना जनकसामत्थियवसेन चिरतरप्पबन्धारहम्पि समानं फलं विच्छेदकपच्चयुप्पत्तिया उपहज्जति विच्छिज्जति, तं **उपघातकन्ति** अयमेत्थ सारो ।

तत्थ केचि दुतियस्स कुसलभावं इत्थत्तमागतस्स अप्पाबाधदीघायुकतासंवत्तनवसेन, पच्छिमानं द्विन्नं अकुसलभावं बह्वाबाधअप्पायुकतासंवत्तनवसेन वण्णेन्ति । तथा च वुत्तं मज्झिमनिकाये **चूलकम्मविभङ्गसुत्तवण्णनायं** (म० नि० अट्ठ० ३.२९०) —

“चत्तारि हि कम्मानि — उपपीळकं, उपच्छेदकं, जनकं, उपत्थम्भकन्ति । बलवकम्मेन हि निब्बत्तं पवत्ते उपपीळकं आगन्त्वा अत्थतो एवं वदति नाम ‘सचाहं पठमतं जानेय्यं, न ते इध निब्बत्तितुं ददेय्यं, चतूसुयेव तं अपायेसु निब्बत्तापेय्यं । होतु, त्वं यत्थ कत्थचि निब्बत्त, अहं उपपीळककम्मं नाम तं पीळेत्वा निरोजं नियूसं कसटं करिस्सामी’ति । ततो पट्टाय तं तादिसं करोति । किं करोति? परिस्सयं उपनेति, भोगे विनासेति ।

“तत्थ दारकस्स मातुकुच्छियं निब्बत्तकालतो पट्टाय मातु अस्सादो वा सुखं वा न होति, मातापितूनं पीळाव उप्पज्जति । एवं परिस्सयं उपनेति । दारकस्स पन मातुकुच्छिम्हि निब्बत्तकालतो पट्टाय गेहे भोगा उदकं पत्वा लोणं विय राजादीनं वसेन नस्सन्ति, कुम्भदोहनधेनुयो खीरं न देन्ति, सूरता गोणा चण्डा होन्ति, काणा होन्ति, खज्जा होन्ति, गोमण्डले रोगो पतति, दासादयो वचनं न करोन्ति, वापितं सस्सं न जायति, गेहगतं गेहे, अरज्जगतं अरज्जे नस्सति, अनुपुब्बेन घासच्छादनमत्तं दुल्लभं होति, गब्भपरिहारो न होति, विजातकाले मातु थज्जं छिज्जति, दारको परिहारं अलभन्तो पीळितो निरोजो नियूसो कसटो होति । इदं उपपीळककम्मं नाम ।

“दीघायुककम्मेन पन निब्बत्तस्स उपच्छेदककम्मं आगन्त्वा आयुं छिन्दति । यथा हि पुरिसो अट्ठसभगमनं कत्वा सरं खिपेय्य, तमज्जो धनुतो मुत्तमत्तं मुग्गरेन पहरित्वा तत्थेव पातेय्य, एवं दीघायुककम्मेन निब्बत्तस्स उपच्छेदककम्मं आयुं छिन्दति । किं करोति? चोरानं अटविं पवेसेति, वाळमच्छेदकं ओतारेति, अज्जतरं वा पन सपरिस्सयठानं उपनेति । इदं उपच्छेदककम्मं नाम । ‘उपघातक’न्तिपि एतस्सेव नामं । पटिसन्धिनिब्बत्तकं पन कम्मं जनककम्मं नाम । अप्पभोगकुलादीसु निब्बत्तस्स भोगसम्पदादिकरणेन उपत्थम्भककम्मं उपत्थम्भककम्मं नाम ।

“परित्तकम्मेनपि निब्बत्तं एतं पवत्ते पाणातिपातादिविरतिकम्मं आगन्त्वा अत्थतो एवं वदति नाम ‘सचाहं पठमतं जानेय्यं, न ते इध निब्बत्तितुं ददेय्यं, देवलोकेयेव तं निब्बत्तापेय्यं, होतु, त्वं यत्थ कत्थचि निब्बत्त, अहं उपत्थम्भककम्मं नाम उपत्थम्भं ते करिस्सामी’ति उपत्थम्भं करोति । किं करोति? परिस्सयं नासेति, भोगे उप्पादेति ।

“तत्थ दारकस्स मातुकुच्छियं निब्बत्तकालतो पट्टाय मातापितूनं सुखमेव सातमेव होति । येपि पकतिया मनुस्सामनुस्सपरिस्सया होन्ति, ते सब्बे अपगच्छन्ति । एवं परिस्सयं नासेति । दारकस्स पन मातुकुच्छिम्हि निब्बत्तकालतो पट्टाय गेहे भोगानं पमाणं न होति, निधिकुम्भियो पुरतोपि पच्छतोपि गेहं परिवट्टमाना पविसन्ति । मातापितरो परेहि ठपितधनस्सपि सम्मुखीभावं गच्छन्ति, धेनुयो बहुखीरा होन्ति, गोणा सुखसीला होन्ति, वप्पट्टाने सस्सानि सम्पज्जन्ति, वट्ठिया वा सम्पयुत्तं, तावकालिकं वा दिन्नं धनं अचोदिता सयमेव आहरित्वा देन्ति, दासादयो सुब्बचा होन्ति, कम्मन्ता न परिहायन्ति, दारको गम्भतो पट्टाय परिहारं लभति, कोमारिकवेज्जा सन्निहिताव होन्ति । गहपतिकुले जातो सेट्ठिद्वानं, अमच्चकुलादीसु जातो सेनापतिद्वानादीनि लभति । एवं भोगे उप्पादेति । सो अपरिस्सयो सभोगो चिरं जीवति । इदं उपत्थम्भककम्मं नाम । इमेसु चतूसु पुरिमानि द्वे अकुसलानेव, जनकं कुसलम्पि अकुसलम्पि, उपत्थम्भकं कुसलमेवा”ति ।

एत्थ विबाधूपघाता नाम कुसलविपाकम्हि न युत्ताति अधिप्पायेन “द्वे अकुसलानेवा”ति वुत्तं । देवदत्तादीनं पन नागादीनं इतो अनुप्पदिन्नयापनकपेतानञ्च नरकादीसु अकुसलविपाकूपत्थम्भनूपपीळनूपघातकानि सन्तीति चतुन्नम्पि कुसलाकुसलभावो न विरुज्झति । एवञ्च कत्वा या बहूसु आनन्तरियेसु कतेसु एकेन गहितप्पटिसन्धिकस्स इतरेसं तस्स अनुबलप्पदायिता वुत्ता, सापि समत्थिता होति ।

सुत्तन्तपरियायेन एकादस कम्मनि विभजित्वा इदानि अभिधम्मपरियापन्नं दस्सेन्तो “अत्थेकच्चाणि पापकानि कम्मसमादानानी”तिआदिना विभङ्गपाळिं (विभ० ८१०) दस्सेति । तत्थ गतिसम्पत्तिपटिबाळहानीति गतिसम्पत्तिया पटिबाहितानि निवारितानि पटिसेधितानि । सेसपदेसुपि एसेव नयो । तत्थ च गतिसम्पत्तीति सम्पन्नगति देवलोको च मनुस्सलोको च । गतिविपत्तीति विपन्नगति चत्तारो अपाया । उपधिसम्पत्तीति अत्तभावसमिद्धि । उपधिविपत्तीति हीनअत्तभावता । कालसम्पत्तीति सुराजसुमनुस्सकालसङ्घातो सम्पन्नकालो । कालविपत्तीति दुराजदुम्भनुस्सकालसङ्घातो विपन्नकालो । पयोगसम्पत्तीति सम्पापयोगो । पयोगविपत्तीति मिच्छापयोगो ।

इदानि यथावुत्तपाळिया अत्थं दस्सेन्तो “तत्था”तिआदिमाह । तत्थ अनिद्वारम्मणानुभवनारहे कम्मे विज्जमानेयेवाति इमिना अनिद्वारम्मणानुभवननिमित्तकस्स पापकम्मस्स सत्त्भावं दस्सेति । तं कम्मन्ति तं पापकं कम्मं । एकच्चस्स हि अनिद्वारम्मणानुभवननिमित्तं बहुपापकम्मं विज्जमानम्पि गतिविपत्तियं ठितस्सेव विपच्चति । यदि पन सो एकेन कल्याणकम्मेन गतिसम्पत्तियं देवेसु वा मनुस्सेसु वा निब्बत्तेय्य, तादिसे ठाने अकुसलस्स वारो नत्थि, एकन्तं कुसलस्सेवाति तं कम्मं गतिसम्पत्तिपटिबाळहं न विपच्चति । पतिबाहितं हुत्वाति बाधितं हुत्वा । अत्तभावसमिद्धियन्ति सरीरसम्पत्तियं । किलिडुकम्मस्साति हत्थिमेण्डअस्सबन्धकगोपालकादिकम्मस्स । पलायितब्बयुत्तकालेति हत्थिआदिपच्चत्थिकसमागमकाले । लज्जं देतीति एवं मे बाधितं परेसं वसे न होतीति देति । चोरिकयुत्तकालेति पक्खबलादीनं लब्भमानकाले । अन्तरकप्पेति परियोसानप्पत्ते अन्तरकप्पे ।

अभिधम्मनयेन सोळस कम्मनि विभजित्वा पटिसम्भिदामगपरियायेन (पटि० म० १.२३४-२३५) द्वादस कम्मनि विभजित्वा दस्सेतुं “अपरानिपी”तिआदिमाह । तत्थ अतीतभवेसु कतस्स कम्मस्स अतीतभवेसुयेव विपक्कविपाकं गहेत्वा “अहोसि कम्मं अहोसि कम्मविपाको”ति वुत्तन्ति आह “यं कम्मं अतीते आयूहित”न्तिआदि । विपाकवारन्ति विपच्चनावसरं विपाकवारं । “विपाकवारं लभती”ति इमिना वुत्तमेवत्थं “पटिसन्धिं जनेसी”तिआदिना विभावेति । तत्थ पटिसन्धिं जनेसीति इमिना च पटिसन्धिदायकस्स कम्मस्स पवत्तिविपाकदायितापि वुत्ता होति । पवत्तिविपाकस्सेव पन

दायकं रूपजनकसीसेन वदति । तस्सेव अतीतस्स कम्मस्स दिट्ठधम्मवेदनीयस्स उपपज्जवेदनीयस्स च पच्चयवेकल्लेन अतीतभवेसुयेव अविपक्कविपाकञ्च, अतीतेयेव परिनिब्बुतस्स दिट्ठधम्मवेदनीयउपपज्जवेदनीयअपरपरियायवेदनीयस्स कम्मस्स अविपक्कविपाकञ्च गहेत्वा “अहोसि कम्मं नाहोसि कम्मविपाको”तिपि वुत्तन्ति आह “**यं पन विपाकवारं न लभी**”तिआदि ।

अतीतस्सेव कम्मस्स अविपक्कविपाकस्स पच्चुप्पन्नभवे पच्चयसम्पत्तिया विपच्चमानं विपाकं गहेत्वा “अहोसि कम्मं अत्थि कम्मविपाको”ति वुत्तन्ति आह “**यं पन अतीते आयूहित**”न्तिआदिमाह । अतीतस्सेव कम्मस्स अतिक्कन्तविपाककालस्स च पच्चुप्पन्नभवे परिनिब्बायन्तस्स च अविपच्चमानविपाकं गहेत्वा “अहोसि कम्मं नत्थि कम्मविपाको”ति वुत्तन्ति आह “**अलब्धविपाकवारं**”न्तिआदि । अतीतस्सेव कम्मस्स विपाकारहस्स अविपक्कविपाकस्स अनागतभवे पच्चयसम्पत्तिया विपच्चितब्बं विपाकं गहेत्वा “अहोसि कम्मं भविस्सति कम्मविपाको”ति वुत्तन्ति दस्सेन्तो “**यं पन अतीते आयूहित**”न्तिआदिमाह । अतीतस्सेव कम्मस्स अतिक्कन्तविपाककालस्स च अनागतभवे परिनिब्बायितब्बस्स अविपच्चितब्बविपाकञ्च गहेत्वा “अहोसि कम्मं न भविस्सति कम्मविपाको”ति वुत्तन्ति आह “**यं अनागते विपाकवारं न लभिस्सती**”तिआदि । एवं ताव अतीतकम्मं अतीतपच्चुप्पन्नानागतविपाकाविपाकवसेन छधा दस्सितं ।

इदानी पच्चुप्पन्नभवे कतस्स दिट्ठधम्मवेदनीयस्स इधेव विपच्चमानं विपाकं गहेत्वा “अत्थि कम्मं अत्थि कम्मविपाको”ति वुत्तन्ति दस्सेन्तो “**यं पन एतरहि आयूहित**”न्तिआदिमाह । **यं पन एतरहि विपाकवारं न लभती**तिआदिना तस्सेव पच्चुप्पन्नस्स कम्मस्स पच्चयवेकल्लेन इध अविपच्चमानञ्च दिट्ठेव धम्मे परिनिब्बायन्तस्स इध अविपच्चमानञ्च विपाकं गहेत्वा “अत्थि कम्मं नत्थि कम्मविपाको”ति वुत्तन्ति दस्सेति । पच्चुप्पन्नस्सेव कम्मस्स उपपज्जवेदनीयस्स अपरपरियायवेदनीयस्स च अनागतभवे विपच्चितब्बविपाकं गहेत्वा “अत्थि कम्मं भविस्सति कम्मविपाको”ति वुत्तन्ति आह “**यं पन एतरहि आयूहितं अनागते विपाकवारं लभिस्सती**”तिआदि । पच्चुप्पन्नस्सेव कम्मस्स उपपज्जवेदनीयस्स पच्चयवेकल्लेन अनागतभवे अविपच्चितब्बञ्च अनागतभवे परिनिब्बायितब्बस्स अपरपरियायवेदनीयस्स अविपच्चितब्बञ्च विपाकं गहेत्वा “अत्थि कम्मं न भविस्सति कम्मविपाको”ति वुत्तन्ति आह “**यं पन विपाकवारं न लभिस्सती**”तिआदि ।

एवञ्च पच्चुप्पन्नकम्मं पच्चुप्पन्नानागतविपाकाविपाकवसेन चतुधा दस्सेत्वा इदानी अनागतभवे कतस्स कम्मस्स अनागते विपच्चितब्बविपाकं गहेत्वा “भविस्सति कम्मं भविस्सति कम्मविपाको”ति वुत्तन्ति दस्सेन्तो “**यं पनानागते आयूहिस्सती**”तिआदिमाह । तस्सेव अनागतस्स कम्मस्स पच्चयवेकल्लेन अविपच्चितब्बञ्च अनागतभवे परिनिब्बायितब्बस्स अविपच्चितब्बञ्च विपाकं गहेत्वा “भविस्सति कम्मं न भविस्सति कम्मविपाको”ति वुत्तन्ति आह “**यं पन विपाकवारं न लभिस्सती**”तिआदि । एवं अनागतकम्मं अनागतविपाकाविपाकवसेन द्विधा दस्सितं । एवन्तिआदिना यथावुत्तद्वादसकम्मानी निगमेति ।

इदानी सब्बेसु यथावुत्तप्पभेदेसु कम्मेसु यानि अभिधम्मनयेन विभत्तानि सोळस कम्मानी, यानि च पटिसम्भिदामग्गपरियायेन विभत्तानि द्वादस कम्मानी, तानि सब्बानि सुत्तन्तिकपरियायेन विभत्तेसु एकादसविधेसुयेव कम्मेसु अन्तोगधानि, तानि च दिट्ठधम्मवेदनीयउपपज्जवेदनीयअपरपरियायवेदनीयेसु तीसुयेव अन्तोगधानीति दस्सेन्तो “**इति इमानि चेवा**”तिआदिमाह । तत्थ अत्तनो ठाना ओसक्कित्वाति अत्तनो यथावुत्तद्वादससोळसप्पभेदसङ्घातद्धानतो

परिहापेत्वा, तं तं पभेदं हित्वाति वुत्तं होति । **एकादस कम्मनियेव भवन्तीति** तंसभावानंयेव कम्मनं द्वादसधा सोळसधा च विभजित्वा वुत्तत्ता एवमाह । यस्मा एकादसधा वुत्तकम्मनि दिट्ठधम्मवेदनीयानि वा सियुं उपपज्जवेदनीयानि वा अपरपरियायवेदनीयानि वा, तस्मा वुत्तं **“तीणियेव कम्मनि होन्ती”**ति ।

तेसं सङ्कमनं नत्थीति तेसं दिट्ठधम्मवेदनीयादीनं सङ्कमनं नत्थि, सङ्कमनं उपपज्जवेदनीयादिभावापत्ति । तेनाह **“यथाठानेयेव तिट्ठन्ती”**ति, अत्तनो दिट्ठधम्मवेदनीयादिट्ठानेयेव तिट्ठन्तीति अत्थो । दिट्ठधम्मवेदनीयमेव हि पठमजवनचेतना, उपपज्जवेदनीयमेव सत्तमजवनचेतना, मज्जे पञ्च अपरपरियायवेदनीयमेवाति नत्थि तेसं अज्जमज्जं सङ्गहो, तस्मा अत्तनो अत्तनो दिट्ठधम्मवेदनीयादिसभावेयेव तिट्ठन्ति । तेनेव भगवता — **“दिट्ठे वा धम्मे, उपपज्ज वा, अपरे वा परियाये”**ति तयो विकप्पा दस्सिता । तेनेवाह **“दिट्ठधम्मवेदनीयं कम्म”**न्तिआदि । तत्थ **“दिट्ठे वा धम्मे”**ति सत्था न वदेय्याति असति नियामे न वदेय्य । यस्मा पन तेसं सङ्कमनं नत्थि, नियतसभावा हि तानि, तस्मा सत्था **“दिट्ठे वा धम्मे”**तिआदिमवोच ।

सुक्कपक्खेति **“अलोभो निदानं कम्मनं समुदयाया”**तिआदिना आगते कुसलपक्खे । निरुद्धेति अरियमग्गाधिगमेन अनुप्पादनरोधेन निरुद्धे । **तालवत्थु विय कतन्ति** यथा ताले छिन्ने ठितट्ठाने किञ्चि न होति, एवं कम्मे पहीने किञ्चि न होतीति अत्थो । **तालवत्थू**ति वा मत्थकच्छिन्नो तालो वुत्तो पत्तफलमकुलसूचिआदीनं अभावतो । ततो एव सो **अविरुद्धिहधम्मो** । एवं पहीनकम्पो सत्तसन्तानो । तेनाह **“मत्थकच्छिन्नतालो विया”**ति । **अनुअभावं कतं** पच्छतो धम्मप्पवत्तिया अभावतो । तेनाह **“यथा”**तिआदि । **अप्पवत्तिकतकालो विया**ति बीजानं सब्बसो अप्पवत्तिया कतकालो विय । **छिन्नमूलकानन्ति** किलेसमूलस्स सब्बसो छिन्नत्ता छिन्नमूलकानं । किलेसा हि खन्धानं मूलानि ।

वेदनीयन्ति वेदितब्बं । **अज्जं वत्थु नत्थीति** अज्जं अधिट्ठानं नत्थि । सुगतिसज्जितापि हेट्ठिमन्तेन सङ्खारदुक्खतो अनपगतत्ता दुग्गतियो एवाति वुत्तं **“सब्बा दुग्गतियो”**ति, एवं वा एत्थ अत्थो दट्ठब्बो । लोभो एतस्स कारणभूतो अत्थीति लोभं, लोभनिमित्तं कम्मं । तथा दोसन्ति एत्थापि । तेनाह **“लोभदोससीसेन लोभजज्ज दोसजज्ज कम्ममेव निहिट्ठ”**न्ति । **वट्ठिविवट्ठन्ति** वट्ठज्ज विवट्ठज्ज ।

निदानसुत्तवण्णना निट्ठिता ।

५. हत्थकसुत्तवण्णना

३५. पञ्चमे आळवियन्ति आळविरट्ठे, न आळविनगरे । तेनाह **“आळवियन्ति आळविरट्ठे”**ति । अथाति अविच्छेदत्थे निपातो । तत्थ भगवतो निसज्जाय अविच्छिन्नाय एवाति अत्थो । तेनाह **“एव”**न्तिआदि । **हत्थतो हत्थं गतत्ताति** आळवकस्स यक्खस्स हत्थतो सम्मासम्बुद्धस्स हत्थं, ततो राजपुरिसानं हत्थं गतत्ता ।

माघस्साति माघमासस्स । एवं **फग्गुनस्साति** एत्थापि । **खुरन्तरेहि कदमो उगगन्त्वा तिट्ठतीति** कदमो खुरन्तरेहि उगगन्त्वा तिट्ठति । **चतूहि दिसाहि वायन्तो वातो वेरम्भोति वुच्चति** वेरम्भवातसदिसत्ता ।

पञ्चद्वारकायन्ति पञ्चद्वारानुसारेण पवत्तं विज्जाणकायं । **खोभयमानाति** किलेसखोभवसेन खोभयमाना चित्तं सङ्खोभं करोन्ता । **चेतसिकाति** मनोद्वारिकचित्तसन्निस्सिता । तेनाह **“मनोद्वारं खोभयमाना”**ति । **सो रागोति** तंसदिसो रागो । भवति हि तंसदिसे तब्बोहारो यथा **“सा एव तित्तिरिका, तानि एव ओसधानी”**ति । यादिसो हि एकस्स पुग्गलस्स

उष्पज्जनकरागो, तादिसो एव ततो अज्जस्स रागभावसामज्जतो। तेन वुत्तं “**तथारूपो रागो**”तिआदि।
इच्छितालाभेन रजनीयेसु वा निरुद्धेसु वत्थूसु दोमनस्सुप्पत्तिया दोसपरिळाहानं सम्भवो वेदितब्बो।

न लिम्पति अनुपलित्तचित्तता। **सीतिभूतो** निब्बुतसब्बपरिळाहत्ता। **आसत्तियो वुच्चन्ति तण्हायो** तत्थ तत्थ
आसज्जनट्टेन। **दरथन्ति** परिळाहजातं। **चेतसोति** सामिवचनं।

हत्थकसुत्तवण्णना निट्ठिता।

६. देवदूतसुत्तवण्णना

३६. छट्ठे देवदूतानीति लिङ्गविपल्लासं कत्वा वुत्तन्ति आह “**देवदूता**”ति, उभयलिङ्गं वा एतं पदं, तस्मा
नपुंसकलिङ्गवसेन पाळियं वुत्तस्स पुल्लिङ्गवसेन अत्थदस्सनं कतं। **देवोति मच्चूति** अभिभवनट्टेन सत्तानं अत्तनो वसे
वत्तापनतो मच्चुराजा “**देवो**”ति वुच्चति। यथा हि देवो पकतिसत्ते अभिभवति, एवं मच्चु सब्बसत्ते अभिभवति, तस्मा देवो
वियाति देवो। “**तस्स दूता**”ति वत्वा इदानिस्स दूते तेसं दूतभावञ्च विभावेतुं “**जिण्णब्याधिमता ही**”तिआदि वुत्तं। तेन
चोदनत्थेन देवस्स दूता वियाति देवदूताति दस्सेति। “अहं असुकं पमदितुं आगमिस्सामि, तुवं तस्स केसे गहेत्वा मा
विस्सज्जेही”ति मच्चुदेवस्स आणाकरा दूता वियाति हि दूताति वुच्चन्ति।

इदानि सद्धातब्बट्टेन देवा विय दूताति देवदूताति दस्सेन्तो “**देवा विय दूता**”तिआदिमाह। तत्थ
अलङ्कतप्पटियत्तायाति इदं अत्तनो दिब्बानुभावं आविकत्वा ठितायाति दस्सनत्थं वुत्तं। **देवताय ब्याकरणसदिसमेव**
होति न चिरस्सेव जराब्याधिमरणस्स सम्भवतो। **विसुद्धिदेवानन्ति** खीणासवब्रह्मानं। ते हि चरिमभवे बोधिसत्तानं
जिण्णादिभेदं दस्सेन्ति, तस्मा अन्तिमभविकबोधिसत्तानं विसुद्धिदेवेहि उपट्ठापितभावं उपादाय तदज्जेसम्पि तेहि
अनुपट्ठापितानम्पि तथा वोहरितब्बता परियायसिद्धाति वेदितब्बा। **दिस्वावाति** विसुद्धिदेवेहि दस्सिते दिस्वाव। ततोयेव हि
ते विसुद्धिदेवानं दूता वुत्ता।

कस्मा आरद्धन्ति केवलं देवदूते एव सरूपतो अदस्सेत्वाति अधिप्पायो। देवानं दूतानं दस्सनूपायत्ता तथा वुत्तन्ति
दस्सेन्तो “**देवदूता...पे०... समनुयुज्जती**”ति आह। तत्थ **देवदूता...पे०... दस्सनत्थन्ति** देवदूतानं अनुयुज्जनट्टानूपगस्स
कम्मस्स दस्सनत्थं।

एकच्चे थेराति अन्धकादिके विज्जाणवादिनो च सन्धाय वदति। नेरयिके निरये पालेन्ति ततो निगन्तुं
अप्पदानवसेन रक्खन्तीति **निरयपाला**। अथ वा निरयपालताय नेरयिकानं निरयदुक्खेन परियोनद्धाय अलं समत्थाति
निरयपाला। तन्ति “नत्थि निरयपाला”ति वचनं। **पटिसेधितमेवाति** “अत्थि निरयेसु निरयपाला अत्थि च
कारणिका”तिआदिना नयेन **अभिधम्मे** (कथा० ८६६) पटिसेधितमेव। यदि निरयपाला नाम न सियुं, कम्मकारणापि न
भवेय्य। सति हि कारणिके कम्मकारणाय भवितब्बन्ति अधिप्पायो। तेनाह “**यथा ही**”तिआदि। एत्थाह — “किं पनेते
निरयपाला नेरयिका, उदाहु अनेरयिका”ति। किञ्चेत्थ — यदि ताव नेरयिका निरयसंवत्तनियेन कम्मेन निब्बत्ता, सयम्पि
निरयदुक्खं पच्चनुभवेय्युं, तथा सति अज्जेसं नेरयिकानं घातनाय असमत्था सियुं, “इमे नेरयिका इमे निरयपाला”ति
ववत्थानञ्च न सिया। ये च ये घातेन्ति, तेहि समानरूपबलप्पमाणेहि इतरेसं भयसन्तासा न सियुं। अथ अनेरयिका, नेसं
तत्थ कथं सम्भवोति? वुच्चते — अनेरयिका निरयपाला अनिरयगतिसंवत्तनियकम्मनिब्बत्तितो।

निरयूपपत्तिसंवत्तनियकम्मतो हि अज्जेनेव कम्मना ते निब्बत्तन्ति रक्खसजातिकत्ता । तथा हि वदन्ति सब्बत्थिवादिनो

“कोधा कुरूरकम्मन्ता, पापाभिरुचिनो तथा ।
दुक्खितेसु च नन्दन्ति, जायन्ति यमरक्खसा”ति ॥

तत्थ यदेके वदन्ति “यातनादुक्खं पटिसंवेदेय्युं, अथ वा अज्जमज्जं घातेय्युं”न्तिआदि, तयिदं असारं निरयपालानं नेरयिकभावस्सेव अभावतो । यदिपि अनेरयिका निरयपाला, अयोमयाय पन आदिताय सम्पज्जलिताय सजोतिभूताय निरयभूमिया परिकममाना कथं दाहदुक्खं नानुभवन्तीति? कम्मानुभावतो । यथा हि इद्धिमन्तो चेतोवसिप्पत्ता महामोगल्लानादयो नेरयिके अनुकम्पन्ता इद्धिबलेन निरयभूमिं उपगता दाहदुक्खेन न बाधीयन्ति, एवं सम्पदमिदं ददुब्बं ।

इद्धिविसयस्स अचिन्तेय्यभावतोति चे? इदम्पि तंसमानं कम्मविपाकस्स अचिन्तेय्यभावतो । तथारूपेण हि कम्मना ते निब्बत्ता यथा निरयदुक्खेन अबाधिता एव हुत्वा नेरयिके घातेन्ति, न चेत्तकेन बाहिरविसयाभावो युज्जति इड्डानिड्डुताय पच्चेकं द्वारपुरिसेसुपि विभत्तसभावत्ता । तथा हि एकच्चस्स द्वारस्स पुरिस्स च इड्डं एकच्चस्स अनिड्डं, एकच्चस्स च अनिड्डं एकच्चस्स इड्डं होति । एवञ्च कत्वा यदेके वदन्ति “नत्थि कम्मवसेन तेजसा परूपतापन”न्तिआदि, तदपाहतं होति । यं पन वदन्ति “अनेरयिकानं तेसं कथं तत्थ सम्भवो”ति निरये नेरयिकानं यातनासम्भावभावतो । नेरयिकसत्तायातनायोगगहि अत्तभावं निब्बत्तेन्तं कम्मं तादिसनिकन्ति विनामितं निरयद्वाने एव निब्बत्तेति । ते हि नेरयिकेहि अधिकतरबलारोहपरिणाहा अतिविय भयानकदस्सना कुरूरतरपयोगा च होन्ति । एतेनेव तत्थ नेरयिकानं विबाधककाकसुनखादीनम्पि निब्बत्तिया अत्थिभावो संवण्णितोति ददुब्बो ।

कथमज्जगतिकेहि अज्जगतिकबाधनन्ति च न वत्तब्बं अज्जत्थापि तथा दस्सनतो । यं पनेके वदन्ति “असत्तसभावा एव निरये निरयपाला निरये सुनखादयो चा”ति, तम्पेतेसं मतिमत्तं अज्जत्थ तथा अदस्सनतो । न हि काचि अत्थि तादिसी धम्मप्पवत्ति, या असत्तसभावा, सम्पत्तिसत्तेहि अप्पयोजिता च अत्थकिच्चं साधेन्ती दिट्ठपुब्बा । पेतानं पानीयनिवारकानं दण्डादिहत्थानञ्च पुरिसानं सम्भावे असत्तभावे च विसेसकारणं नत्थीति तादिसानं सम्भावे किं पापकानं वत्तब्बं । सुपिनोपघातोपि अत्थकिच्चसमत्थताय अप्पमाणं दस्सनादिमत्तेनपि तदत्थसिद्धितो । तथा हि सुपिने आहाररूपभोगादिना न अत्थसिद्धि, इद्धिनिम्मानरूपं पनेत्थ लद्धपरिहारं इद्धिविसयस्स अचिन्तेय्यभावतो । इधापि कम्मविपाकस्स अचिन्तेय्यभावतोति चे? तं न, असिद्धत्ता । नेरयिकानं कम्मविपाको निरयपालाति सिद्धमेत्तं, वुत्तनयेन पाळितो च तेसं सत्तभावो एव सिद्धो । सक्का हि वत्तुं सत्तसङ्घाता निरयपालसज्जिता धम्मप्पवत्ति साभिसन्धिकपरूपघाति अत्थकिच्चसम्भावतो ओजाहारादि रक्खससन्तति विय । अभिसन्धिपुब्बकता चेत्थ न सक्का पटिक्खिपितुं तथा तथा अभिसन्धिया घातनतो । ततो एव न सङ्घातपब्बतेहि अनेकन्तिकता । ये पन वदन्ति “भूतविसेसा एव ते वण्णसण्ठानादिविसेसवन्तो भेरवाकारा नरकपालाति समज्जं लभन्ती”ति, तदसिद्धं उजुकमेव पाळियं “अत्थि निरये निरयपाला”ति वादस्स पतिट्ठापितत्ता ।

अपिच यथा अरियविनये नरकपालानं भूतमत्तता असिद्धा, तथा पज्जत्तिमत्तवादिनोपि भूतमत्तता असिद्धा सब्बसो रूपधम्मानं अत्थिभावस्सेव अप्पटिजाननतो । न हि तस्स भूतानि नाम परमत्थतो सन्ति । यदि परमत्थं गहेत्वा वोहरति, अथ कस्मा चक्खुरूपादीनि पटिक्खिपतीति? तिड्डुतेसा अनवड्डिततक्कानं अप्पहीनविपल्लासानं वादवीमंसा । एवं अत्थेव निरये निरयपालाति निड्डुमेत्थ गन्तब्बं । सति च नेसं सम्भावे असतिपि बाहिरे विसये नरके विय देसादिनियमो होतीति वादो

न सिज्जति, सति एव पन बाहिरे विसये देसादिनियमोति दट्ठब्बं ।

देवदूतसरापनवसेन सत्ते यथूपचिते पुज्जकम्मे यमेति नियमेतीति यमो । तस्स यमस्स वेमानिकपेतानं राजभावतो रज्जो । तेनाह “**यमराजा नाम वेमानिकपेतराजा**”ति । **कम्मविपाकन्ति** अकुसलकम्मविपाकं । वेमानिकपेता हि कण्हसुक्कवसेन मिस्सकं कम्मं कत्वा विनिपातिकदेवता विय सुक्केन कम्मुना पटिसन्धिं गणहन्ति । तथा हि मग्गफलभागिनोपि होन्ति, पवत्तियं पन कम्मानुरूपं कदाचि पुज्जफलं, कदाचि अपुज्जफलं पच्चनुभवन्ति । येसं पन अरियमग्गो उप्पज्जति, तेसं मग्गाधिगमतो पट्टाय पुज्जफलमेव उप्पज्जतीति दट्ठब्बं । अपुज्जफलं पुब्बे विय कटुकं न होति, मनुस्सत्तभावे ठितानं विय मुदुकमेव होतीति अपरे । **धम्मिको राजा**ति एत्थ तस्स धम्मिकभावो धम्मदेवपुत्तस्स विय उप्पत्तिनियतो धम्मतावसेन वेदितब्बो । **द्वारेसूति** अवीचिमहानरकस्स चतूसु द्वारेसु । **खीणासवा ब्राह्मणा नाम** उक्कट्टनिद्देसेन ।

अनुयोगवत्तन्ति अनुयोगे कते वत्तितब्बवत्तं । **आरोपेन्तो**ति कारापेन्तो, अत्तनो पुच्छं उद्दिस्स पटिवचनं दापेन्तो पुच्छति । परस्स हि अधिप्पायं जातुं इच्छन्तो तदुपगं पयोगं करोन्तो पुच्छति नाम । **लद्धिन्ति** गाहं । **पतिट्ठापेन्तो**ति तत्थ निच्चकालं कारापेन्तो । **कारणं पुच्छन्तो**ति युत्तिं पुच्छन्तो । **समनुभासतीति** यथानुयुत्तमत्थं विभूतं कत्वा कथेति ।

जिण्णन्ति जरापत्तिया जिण्णं । एकच्चो दहरकालतो पट्टाय पण्डुरोगादिना अभिभूतकायताय जिण्णसदिसो होति, अयं न तथा जरापत्तिया जिण्णोति दस्सेति । **गोपानसी विय वड्ढन्ति** वड्ढगोपानसी विय वड्ढं । न हि वड्ढभावस्स निदस्सनत्थं अवड्ढगोपानसी गय्हति । **भग्गन्ति** भग्गसरीरं कटियं भग्गकायत्ता । तेनाह “**इमिनापिस्स वड्ढभावमेव दीपेती**”ति । **दण्डपटिसरणन्ति** ठानगमनेसु दण्डो पटिसरणं एतस्साति दण्डपटिसरणं तेन विना वत्तितुं असमत्थत्ता । तेनाह “**दण्डदुतिय**”न्ति । **जरातुरन्ति** जराय पत्थतसंकिलन्तकायं । सब्बसो किमिहतं विय महाखल्लाटं सीसमस्साति **महाखल्लाटसीसं** । **सज्जातवलन्ति** समन्ततो जातवलिकं । **जराधम्मो**ति जरापकतिको । तेनाह “**जरासभावो**”ति । सभावो च नाम तेजोधातुया उण्हता विय न कदाचि विगच्छतीति आह “**अपरिमुत्तो जराया**”तिआदि ।

अत्थतो एवं वदति नाम, वाचाय अवदन्तोपि अत्थापत्तितो एवं वदन्तो विय होति विज्जूनन्ति अत्थो । **तरुणो अहोसिं** योब्बनेन समन्नागतो । ऊरूनं बलं एतस्स अत्थीति **ऊरुबली** । तेन दूरेपि गमनागमनलङ्घनादिसमत्थतं दस्सेति, **बाहुबली**ति पन इमिना हत्थेहि कातब्बकिच्चसमत्थतं, **जवग्गहणेन** वेगसा पवत्तिसमत्थतं । **अन्तरहिता**ति नट्टा । एत्थ च **न खो पनाहन्ति**आदि जराय देवदूतभावदस्सनं । तेनाह “**तेनेस देवदूतो नाम जातो**”ति । आबाधस्स अत्थिताय **आबाधिकं** । विविधं दुक्खं आदहतीति ब्याधि, विसेसेन वा आधियाति एतेनाति ब्याधि, ब्याधि संजातो एतस्साति **ब्याधितं** । एस नयो **दुक्खितन्ति** एत्थापि ।

दुतियं देवदूतन्ति एत्थापि वुत्तनयेनेव अत्थो वेदितब्बो । **ब्याधिना अभिहतो**ति ब्याधिना बाधितो, उपहुतोति अत्थो ।

विपरिभिन्नवण्णोति विपरिभिन्ननीलवण्णो । तज्झि यत्थ यत्थ गहितपुब्बकं, तत्थ तत्थ पण्डुवण्णं, मंसुस्सदट्टाने रत्तवण्णं, येभ्युयेन च नीलसाटकपारुतं विय होति । तेन वुत्तं “**विपरिभिन्ननीलवण्णो**”ति ।

“**को लभति, को न लभती**”ति निरयुपगस्सेव वसेनायं विचारणाति “**येन ताव बहु पापं कत**”न्तिआदि आरब्धं । **बहु पापं कतन्ति** बहुसो पापं कतं । तेन पापस्स बहुलीकरणमाह । **बहूति** वा महन्तं । महत्थोपि हि बहुसद्दो दिस्सति “**बहु**

वत कतं अस्सा”तिआदीसु, गरुकन्ति वुत्तं होति । सो गरुकं बहुलं वा पापं कत्वा ठितो निरये निब्बत्ततियेव, न यमपुरिसेहि यमस्स सन्निकं नीयतीति । **परित्तन्ति** पमाणपरित्तताय कालपरित्तताय च परित्तं । पुरिमस्मिं अत्थे अगरूति अत्थो, दुतियस्मिं अबहुलन्ति । यथावुत्तमत्थं उपमाय विभावेतुं “**यथा ही**”तिआदि वुत्तं । **कत्तब्बमेव करोन्तीति** दण्डमेव करोन्ति । **अनुविज्जित्वा**ति वीमंसित्वा । **विनिच्छयट्ठानन्ति** अट्टकरणट्ठानं । **परित्तपापकम्मा**ति दुब्बलपापकम्मा । **अत्तनो धम्मताया**ति परेहि असारियमानेपि अत्तनो धम्मताय सरन्ति । ते हि पापकम्मस्स दुब्बलभावतो कतूपचितस्स च ओकासारहकुसलकम्मस्स बलवभावतो अत्तनो धम्मतायपि सरन्ति । **सारियमानापीति** “इदं नाम तथा कतं पुज्जकम्म”न्ति परेहि सारियमानापि ।

आकासचेतियन्ति गिरिसिखरे अब्भोकासे विवटङ्गणे कतचेतियं । **रत्तपटेना**ति रत्तवण्णेन पटेन **पूजेसि** पटाकं कत्वा । **अग्गिजालसद्वन्ति** पटपटायन्तं नरके अग्गिजालसद्वं सुत्वाव । **अत्तना पूजितपटं अनुस्सरीति** तदा पटाकाय वातप्पहारसदे निमित्तस्स गहितत्ता “मया तदा आकासचेतिये पूजितरत्तपटसद्वो विया”ति अत्तना पूजितपटं अनुस्सरि ।

सुमनपुष्पकुम्भेनाति कुम्भपरिमाणेन सुमनपुष्परासिना । “दसाधिकं नाळिसहस्सकुम्भ”न्ति केचि, “पञ्चअम्बण”न्ति अपरे । **तीहिपि न सरति** बलवतो पापकम्मेन ब्यामोहितो । **तुण्ही अहोसीति** “कम्मरहो अय”न्ति तत्थ पटिकारं अपस्सन्तो तुण्ही अहोसि ।

एकपक्खच्छदनमत्ताहीति मज्झिमप्पमाणस्स गेहस्स एकच्छदनप्पमाणेहि । **सुत्ताहतं करित्वा**ति काळसुत्तं पातेत्वा । यथा रथो सब्बसो पज्जलितो होति अयोमयो, एवं युगादयोपिस्स पज्जलिता सजोतिभूता एव होन्तीति आह “**सद्धिं... पे०... रथे योजेत्वा**”ति । **महाकूटागारप्पमाणन्ति** सत्तभूमकमहाकूटागारप्पमाणं ।

विभत्तोति सत्तानं साधारणेन पापकम्मुना विभत्तो । **हीनं कायन्ति** हीनं सत्तनिकायं, हीनं वा अत्तभावं । **उपादानेति** चतुब्बिधे उपादाने । अत्थतो पन तण्हादिट्ठिग्गाहोति आह “**तण्हादिट्ठिग्गाहणे**”ति । सम्भवति जरामरणं एतेनाति **सम्भवो**, उपादानन्ति आह “**जातिया च मरणस्स छ कारणभूते**”ति । **अनुपादाति** अनुपादाय । तेनाह “**अनुपादियित्वा**”ति । **सकलवट्टदुक्खं अतिक्कन्ताति** चरिमचित्तिनिरोधेन वट्टदुक्खस्स किलेसानप्पि असम्भवतो सब्बं वट्टदुक्खं अतिक्कन्ता ।

देवदूतसुत्तवण्णना निट्ठिता ।

७. चतुमहाराजसुत्तवण्णना

३७. सत्तमे अमा सह वत्तन्ति तस्मिं तस्मिं किच्चेति **अमच्चा**, सहिता । परिसति भवाति **पारिसज्जा**, परिवारट्ठानिया परिसापरियापन्ना । तेनाह “**परिचारिकदेवता**”ति । **ताताति** आलपनं । **एवन्ति** “कच्चि बहू मनुस्सा”तिआदिना वुत्ताकारेन । **अट्ट वारेति** एकस्मिं अट्टमासे चतुक्खत्तुं तथा इतरस्मिन्ति एवं अट्ट वारे । **अधिट्टहन्तीति** अधितिट्टन्ति । **पटिजागरोन्तीति** पटि पटि जागरोन्ति । पुज्जं करोन्ता हि सत्ता जागरोन्ति नाम कातब्बकिच्चप्पसुत्तत्ता, इतरे पन सुपन्ति नाम सहितपरहितविमुत्तत्ता । चातुदसिउपोसथस्स अनुगमनं विय पन्नरसिउपोसथस्स पच्चुगमनं न लब्धति दिवसाभावतो ।

ततोति ततो ततो । **तं उपनिस्सायाति** ता ता गामनिगमराजधानियो उपनिस्साय । **अधिवत्थाति** आरामवनरुक्खादीसु अधिवत्था देवता । तेति ते देवा । **सन्धाय कथेतीति** भगवा कथेति । **वुत्तन्ति** अट्टकथायं वुत्तं ।

निच्चं निबद्धं उपोसथो संवच्छरे संवच्छरे पटि पटि हरितब्बतो पवत्तेतब्बतो पाटिहारियपक्खो नाम । गुणङ्गेहीति उपोसथङ्गेहि ।

वुत्थवासोति वुसितब्रह्मचरियवासो । कत्तब्बकिच्चन्ति दुक्खादीसु परिज्जातादिकिच्चं । ओतारेत्वाति छट्टेत्वा । परिकखीणभवसंयोजनोति सब्बसो खीणभवबन्धनो । कारणेन जानित्वाति विपस्सनापज्जासहिताय मग्गपज्जाय चत्तारि अरियसच्चानि जानित्वा ।

जानन्तोति “अरहन्तानं अनुकरणप्पटिपत्ति एसा, यदिदं सम्मदेव उपोसथानुद्धानं”न्ति एवं उपोसथकम्मस्स गुणं जानन्तो । एवरूपेनाति यादिसो भगवतो उपोसथभावो विहितो, एवरूपेन अरहन्तानुकरणेन उपोसथकम्मेन । सक्का पहितत्तो विपस्सनं उस्सुक्कापेत्वा खीणासवसम्पत्तिं पापुणितुं । अट्टमं उत्तानत्थमेव सत्तमे वुत्तनयत्ता ।

चतुमहाराजसुत्तवण्णना निट्ठिता ।

९. सुखुमालसुत्तवण्णना

३९. नवमे निहुक्खोति कायिकचेतसिकदुक्खविरहितो । सदुक्खे हि सविघाते सुखुमालत्ता अनवसरा, तस्मा सुखितो निहुक्खताय सुखुमालो नाम । यावस्स सुखुमालत्ता परमुक्कंसगताति आह “परमसुखुमालो”ति । अतिविय सुखुमालोति अत्थो । अन्तमतीतं अच्चन्तं । सब्बदा सुखुमालोति आह “सततनिहुक्खो”ति । चरियकालेति बोधिचरियाय चरणकाले । तेनाति बोधिसत्तेन । अज्जत्थ पन पदुमन्ति रत्तं कमलं । पुण्डरीकन्ति सेतं वुच्चति । इतराति इतरपोक्खरणिyo । “बोधिसत्तस्स किरा”तिआदिकं पोक्खरणीनं उप्पत्तिदस्सनं । कुद्दालकम्मकारेति खणके । पोक्खरणिट्ठानानीति पोक्खरणिखणनयोग्गट्ठानानि । गण्हापेसीति खणापेसि । पोक्खरणिसद्दो चेत्थ तादिसे जलासये निरुळ्हो दट्ठब्बो पङ्कजादिसद्दा विय । सोपानबाहुकानं मत्थकट्ठानं उण्हीसन्ति अधिप्पेतं । उदकसेचननाळिकाति उदकच्छटाविस्सज्जननाळियन्तानि । पञ्चविधाति वण्णवसेन जातिवसेन च ।

खो पनस्साति निपातमत्तं । कासिक-सद्दो अतिविय सण्हे सुखुमे महग्घवत्थे निरुळ्हो, अज्जस्मिम्पि तथाजातिके रुळ्हवसेन पवत्ततीति दट्ठब्बं । तेनाह “अकासिकं चन्दन”न्ति । हेमन्ते वासो हेमन्तं, हेमन्तं अरहतीति हेमन्तिको, पासादो । “इतरेसुपि एसेव नयो”ति वत्त्वा तदेव नेसं अरहतं दस्सेतुं “तत्थ हेमन्तिको”तिआदि वुत्तं । सजालानीति सजालवातपानानि, उदकयन्तानीति उदकधाराविस्सन्दनकयन्तानि । पासादमत्थकेति पासादस्स उपरिआकासतले । बन्धित्वाति पयोजितयन्ते सुक्खमहिंसचम्मं बन्धित्वा । यन्तं परिवत्तेत्वाति यथापयोजितं यन्तं पासाणारोपनत्थज्जेव पुन तेसं विस्सज्जनत्थज्ज परिवत्तेत्वा । तस्मिं विस्सज्जेन्तीति छदनपिट्ठे बद्धसुक्खमहिंसचम्मे विस्सज्जेन्ति ।

सहस्सथामन्ति पुरिससहस्सबलं, पुरिससहस्सेन वहितब्बभारवहं । पल्लङ्के निसिन्नोवाति रतनमयपल्लङ्के यथानिसिन्नो एव । उप्पतनाकारपत्तन्ति उप्पतित्वा ठितं विय । जियं पोथेन्तस्साति जियाघातं करोन्तस्स । जियप्पहारसद्दोति जियाघातसद्दो । यन्ते बद्धन्ति यन्तबद्धं कत्त्वा ठपितं । सद्दन्तरेति थाममज्झिमस्स पुरिसस्स सदसवनट्ठाने । गावुतस्स चतुत्थो भागो कोसोतिपि वुच्चति द्विसहस्सदण्डप्पमाणट्ठानं ।

सब्बट्ठानानीति महापुरिसस्स तानि तानि सब्बानि वसनट्ठानानि । सिखाबद्धोति पुरिससभावस्सेव विसेसतो दस्सनमेतं । न उप्पिलावितभावत्थन्ति उप्पिलावितभावसङ्घातं अत्थं न कथेसीति अत्थो । तस्स हि बोधिमूलेयेव

सेतुघातो । तेनेवाति अप्पमादलक्खणस्स दीपनतो एव । अत्तानं अतिक्कमित्वाति अत्तनो जरापत्तिं अचिन्तेत्वा अट्ठीयति । न पनेस मग्गेन पहीनो तदा मग्गस्स अनधिगतत्ता । सिक्खं पटिक्खित्वाति यथासमादिन्नसिक्खं पहाय ।

अविपरीतव्याधिआदिसभावावाति एकन्तेन व्याधिआदिसभावा एव । एवं जिगुच्छाविहारेनाति एवं सकलस्सेव वट्टदुक्खस्स जिगुच्छनविहारेन विहरन्तस्स । एवं जिगुच्छन्ति एवं परस्स जिगुच्छनं । परं अजिगुच्छमानोति करुणायनेन एवं परं अजिगुच्छन्तो । अभिभोस्मीति अभिभविता अस्मि । उस्साहो अहूति चतुरङ्गसमन्नागतं वीरियमेव चतुब्बिधसम्मप्यधानवीरियञ्च अहोसि, येन मग्गब्रह्मचरियपरायणो जातो ।

सुखुमालसुत्तवण्णना निट्ठिता ।

१०. आधिपतेय्यसुत्तवण्णना

४०. दसमे अभिभवित्वा पवत्तनट्ठेन अधिपतिं यं किञ्चि जेट्ठकं न कारकं अत्तानं अधिपतीति कत्वा अत्ता एव अधिपति, ततो आगतं अत्ताधिपतेय्यं । तेनाह “अत्तानं”न्तिआदि । लोकन्ति सत्तलोकं । सो च खो इद्धिविधादिगुणविसेसयुत्तो अधिपेतो अधिपतिभावस्स अधिपेतत्ता । नवविधं लोकुत्तरधम्मन्ति उक्कट्टनिद्देसेन वुत्तं । इति भवोति एवं सम्पत्तिभवो, तत्थ एवं अभिवुद्धीति । सम्पत्तिभवस्स हेतूति तंतंसम्पत्तिभवस्स तत्थ च अभिवुद्धिया हेतु । जातिनिमित्तस्स कम्मभवस्स कतूपचितत्ता जाति अन्तोपविट्ठा । जरादीसुपि एसेव नयो हेतुसिद्धिया फलसिद्धितो ।

असल्लीनन्ति न सङ्कोचप्पत्तं । उपट्ठिताति कायादिसभावसल्लक्खणवसेन उपट्ठिता । असम्मुट्ठा सम्मोसाभावतो । असारद्धोति सारम्भस्स सारम्भहेतूनञ्च विक्खम्भनेन असारद्धो । एकगं अनेकगभावस्स दूरसमुस्सापितत्ता । निम्मलं कत्वाति रागादिमलानं अपनयनेन मलरहितं कत्वा । गोपायतीति संकिलेसानत्थतो रक्खति । अयन्ति एवंपटिपन्नो भिक्खु । सुद्धमत्तानं परिहरति असुद्धभावस्स किलेसस्सपि अभावतो ।

अतिक्कमित्वा मज्जसीति असक्खिं कत्वा मज्जसि । ताय तण्हाय निब्बत्तोति तम्मयो, तण्हावसिको । तस्स भावो तम्मयता, तस्सा तम्मयताय अभावेन । न हायति पज्जादिगुणवेपुल्लप्पत्तिया ।

आधिपतेय्यसुत्तवण्णना निट्ठिता ।

देवदूतवग्गवण्णना निट्ठिता ।

५. चूळवग्गो

१. सम्मुखीभावसुत्तवण्णना

४१. पञ्चमस्स पठमे सम्मुखो भवति येन सो सम्मुखीभावो, पुरतो विज्जमानता, तस्मा सम्मुखीभावा । पुज्जकम्मन्ति दानसङ्घातं पुज्जकम्मं । द्वे धम्मा सुलभा बाहिरत्ता यथासकं पच्चयसमवायेन लब्धनतो । सद्धा पन दुल्लभा पचुरजनस्स अनवट्ठितकिच्चत्ता । तेनेवाह “पुथुज्जनस्सा”तिआदि ।

सम्मुखीभावसुत्तवण्णना निड्ढिता ।

२. तिठानसुत्तवण्णना

४२. दुतिये मच्छरियमेव मलं मच्छरियमलं, चित्तस्स मलीनसभावापादनतो विगतं मच्छरियमलं एत्थाति विगतमच्छरियमलं । गोधाभावेन कोचि किञ्चि देन्तोपि तत्थ आसत्तिं न विस्सज्जेति, अयं पन न तादिसोति आह “विस्सट्ठचागो”ति । मलीनहत्थोव चित्तविसुद्धिया अभावतो । धोतहत्थोव धोतहत्थेन कातब्बकिच्चसाधनतो । तेन वुत्तं — “चित्ते सुद्धे विसुज्झन्ति, इति वुत्तं महेसिना”ति । याचितुं युत्तो याचकानं मनोरथपूरणतो । याचयोगो पयोगासहेहि याचकेहि सुद्धु युत्तभावतो । तंसमङ्गी एव तत्थ रतो नाम, न चित्तमत्तेनेवाति आह “दानं...पे०... रतो नाम होती”ति ।

“उच्चा, भन्ते”ति वत्वा अयं मं उच्चतो वदतीति चिन्तेय्याति पुन “नातिउच्चा तुम्हे”ति आह, सरीरेनाति अधिप्पायो । मेचकवण्णस्साति नीलोभासस्स । पुच्छीति भिक्खू पुच्छि । भूमियं लेखं लिखन्तो अच्छीति पठमं मज्जे निपज्जित्वा उट्ठाय भूमियं लेखं लिखन्तो अच्छि “अखीणासवोति मज्जना होतू”ति । तथा हि राजा खीणासवस्स नाम... पे०... निवत्ति । धजपग्गहितावाति पग्गहितधजाव । सिलाचेतियट्ठानन्ति थूपारामस्स च महाचेतियस्स च अन्तरे सिलाय कतचेतियट्ठानं । चेतियं...पे०... अट्ठासि सावकस्स तं कूटागारन्ति कत्वा ।

पच्छाभागेनाति धम्मकथिकस्स थेरस्स पिड्डिपस्सेन । गोनसोति मण्डलसप्पो । धम्मस्सवनन्तराय बहूनां सग्गमग्गप्पटिलाभन्तरायो भवेय्याति अधिप्पायेन “धम्मस्सवनन्तरायं न करिस्सामी”ति चिन्तोसि । विसं विक्खम्भेत्वाति विपस्सनातेजेन विसवेगं विक्खम्भेत्वा । गाथासहस्सन्ति गाथासहस्सवन्तं । पट्ठानगाथायाति पट्ठापनगाथाय, आदिगाथायाति अत्थो । पट्ठान...पे०... अवसानगाथं एव ववत्थपेसि, न द्विन्नं अन्तरे वुत्तं किलन्तकायत्ता । सरभाणं सायन्हधम्मकथा । पग्गणहातीति पच्चक्खं करोन्ती गणहाति, सक्कच्चं सुणातीति अत्थो । धम्मकथनदिवसे धम्मकथिकानं अकिलमनत्थं सद्धा उपासका सिनिद्धभोजनं मधुपानकज्ज देन्ति सरस्स मधुरभावाय सप्पिमधुकतेलादिज्ज भेसज्जं । तेनाह “अरियवंसं कथेस्सामी”तिआदि । चतूहि दाठाहि डंसित्वाति दळ्हदट्ठभावदस्सनं । चरिस्सामीति सम्मानेस्सामि, सक्कच्चं सुणिस्सामीति अत्थो । निम्मथेत्वाति निम्मदित्वा, अपनेत्वाति अत्थो ।

तिठानसुत्तवण्णना निड्ढिता ।

३. अत्थवससुत्तवण्णना

४३. ततिये अत्थो नाम फलं, तं एतस्स वसोति अत्थवसो । हेतु, अत्थो एतस्स अत्थीति अत्थो, सो एवाति आह “तयो अत्थे तीणि कारणानी”ति । धम्मदेसना नाम उक्कट्टुनिद्देसेन चतुन्नं अरियसच्चानं पकासनाति आह “चतुसच्चधम्मं पकासेती”ति । अट्ठकथं जाणेन पटिसंवेदीति पाळिपदानं अत्थं विवरणजाणेन पटि पटि संवेदनसीलो “अयं इमस्स भासितस्स अत्थो”ति । एतेन अत्थपटिसम्भिदाब्यापारमाह । पाळिधम्मं पटिसंवेदीति पाळिगतिं पाळि पदविवरणं पटि पटि संवेदनसीलो । एतेन धम्मपटिसम्भिदाब्यापारमाह ।

अत्थवससुत्तवण्णना निड्ढिता ।

४. कथापवत्तिसुत्तवण्णना

४४. चतुत्थे पवत्तिनीति याव अधिप्पेतत्थनिगमना अविच्छेदेन पवत्तिनी । पटिघाताभावेन अप्पटिहता ।
निय्यानिका सप्पाटिहीरका ।

कथापवत्तिसुत्तवण्णना निट्ठिता ।

५. पण्डितसुत्तवण्णना

४५. पञ्चमे पण्डितपञ्चत्तानीति पण्डितेहि पठमं पञ्चत्तानि । कथितानीति सेय्यसो कथितानि । महापुरिसेहीति बुद्धबोधिसत्तेहि । करुणाति करुणाचेतोविमुत्ति वुत्ता । पुब्बभागोति तस्स उपचारो । दमोति इन्द्रियसंवरो “मनच्छट्ठानं इन्द्रियानं दमन”न्ति कत्वा । अत्तदमनन्ति चित्तदमनं । पुण्णोवादे (म० नि० ३.३९६) “सक्खिस्ससि खो, त्वं पुण्ण, इमिना दमूपसमेना”ति आगतत्ता दमोति वुत्ता खन्तिपि । आळवके आळवकसुत्ते (सं० नि० १.२४६; सु० नि० १९०) “सच्चा दमा चागा”ति एवं वुत्ता पञ्जापि इमस्मिं सुत्ते “दमो”ति वत्तुं वट्ठति । रक्खनं गोपनं पटिजग्गन्ति मातापितूनं मनुस्सामनुस्सकतूपद्ववतो रक्खनं, ब्याधिआदिअनत्थतो गोपनं, घासच्छादनादीहि वेय्यावच्चकरणेन पटिजग्गनं । सन्तो नाम सब्बकिलेसदरथपरिळाहूपसमेन उपसन्तकायवचीसमाचारताय च । उत्तमट्ठेन सन्तानन्ति मत्तेय्यतादीहि सेट्ठेन सन्तानं ।

इध इमेसंयेव तिण्णं ठानानं करणेनाति इमस्मिं सुत्ते आगतानं तिण्णं ठानानं करणेन निब्बत्तनेन । एतानि...पे०... कारणानीति मातुपट्ठानं पितुपट्ठानन्ति एतानि द्वे उत्तमपुरिसानं कारणानि । उत्तमकिच्चकरणेन हि मातापितुपट्ठका “उत्तमपुरिसा”ति वुत्ता । तेनाह “मातापितु...पे०... वुत्तो”ति । अनुपद्ववभावेन खेमं ।

पण्डितसुत्तवण्णना निट्ठिता ।

६. सीलवन्तसुत्तवण्णना

४६. छट्ठे लोकियलोकुत्तरमिस्सकन्ति एत्थ “मनुस्सा पुज्जं पसवन्ती”ति अविसेसेन वुत्तत्ता भावनामयस्सपि पुज्जस्स सङ्गण्हनतो लोकुत्तरस्सपि सम्भवो दट्ठब्बो ।

सीलवन्तसुत्तवण्णना निट्ठिता ।

७. सङ्घतलक्खणसुत्तवण्णना

४७. सत्तमे समेच्च सम्भूय पच्चयेहि कतं सङ्घतं । निमित्तानीति सज्जाननस्स निमित्तानि । हेतुपच्चयसमवाये उप्पज्जनं उप्पादो, अत्तलाभो । वयोति भङ्गो । ठितस्साति उप्पादक्खणतो उद्धं ठितिक्खणपत्तस्स । सा पनस्स अवत्था उप्पादावत्थाय भिन्नाति कत्वा अज्जथत्तं जराति च वुत्ता । यस्मा धम्मो उप्पज्जमानो एव भिज्जति, तथा सति उप्पादभङ्गा समानक्खणा सियुं, न च तं युज्जति, तस्मा उप्पादावत्थाय भिन्ना भङ्गाभिमुखावत्था जराति वेदितब्बा । ये पन “सङ्घारानं ठिति नत्थी”ति वदन्ति, तेसं तं मिच्छा । यथा हि तस्सेव धम्मस्स उप्पादावत्थाय भिन्ना भङ्गावत्था इच्छिता, अज्जथा “अज्जं उप्पज्जति, अज्जं निरुज्झती”ति आपज्जति, एवं उप्पज्जमानस्स भङ्गाभिमुखा धम्मा इच्छितब्बा । सा च

ठितिकखणो । न हि उप्पज्जमानो भिज्जतीति सक्का विज्जातुन्ति ।

सङ्घतन्ति तेभूमका धम्मा पच्चयसमुप्पन्नता । यदि एवं मग्गफलधम्मा कथन्ति आह “**मग्गफलानि पना**”तिआदि । लक्खणकथा हि यावदेव सम्मसनत्था । **उप्पादक्खणे उप्पादो**, न ठानभङ्गक्खणेसु । कस्मा? उप्पादउप्पादक्खणानं अज्जमज्जं परिच्छिन्नता । यथा हि उप्पादसङ्घातेन विकारेण उप्पादक्खणो परिच्छिन्नो, एवं उप्पादक्खणेनपि उप्पादो परिच्छिन्नो । सेसद्वयेपि एसेव नयो । धम्मप्पवत्तिमत्ततायपि कालस्स लोकसमज्जावसेनेव वुत्तं । **लक्खणं न सङ्घतं, सङ्घतं न लक्खणन्ति** नेसं भेददस्सनं । अवत्थावतो हि अवत्था भिन्नावति । **परिच्छिन्नन्ति** एत्थ उप्पादवयेहि ताव सङ्घतं परिच्छिन्नं होतु, जराय पन तं कथं परिच्छिन्नन्ति वुच्चति? न वुच्चति परिच्छेदो पुब्बन्तापरन्तमत्तेन, अथ खो सभावभेदेनाति नायं दोसो । **सङ्घतं** धम्मजातं **परिच्छिन्नं** तब्बन्तं धम्मजातं सङ्घतन्ति पज्जायति एवं तेसं अभावेन निब्बानमेतन्ति लक्खितब्बतो सज्जानितब्बतो । इदानी “**यथा ही**”तिआदिना यथावुत्तमत्तं उपमाहि विभावेति ।

सङ्घतलक्खणसुत्तवण्णना निट्ठिता ।

८. असङ्घतलक्खणसुत्तवण्णना

४८. अट्टमे **असङ्घतस्सा**ति वुत्तनयेन न सङ्घतस्स । तेनाह “**पच्चयेही**”तिआदि । यथा उप्पादादीनं भावेन सङ्घतधम्मजातं सङ्घतन्ति पज्जायति, एवं तेसं अभावेन निब्बानं असङ्घतन्ति पज्जायति ।

असङ्घतलक्खणसुत्तवण्णना निट्ठिता ।

९. पब्बतराजसुत्तवण्णना

४९. नवमे इध **साल-**सद्धो रुक्खसामज्जपरियायो, न रुक्खविसेसपरियायोति आह “**महासालाति महारुक्खा**”ति । **कुलजेडुकन्ति** तस्मिं कुले जेडुभूतं सामिभूतं । **सिलामयो** न पंसुमयो मिस्सको च । गामं गामूपचारज्ज ठपेत्वा सब्बं अरज्जन्ति आह “**अरज्जस्मिन्ति अगामकट्टाने**”ति । महन्तो पब्बतो सेलोति योजना ।

पब्बतराजसुत्तवण्णना निट्ठिता ।

१०. आतप्पकरणीयसुत्तवण्णना

५०. दसमे **सरीरसम्भवानन्ति** सरीरे सम्भूतानं । **दुक्खानन्ति** अनिट्ठानं । **बहलानन्ति** निरन्तरप्पवत्तिया अविरळानं । **तापनवसेनाति** दुक्खापनवसेन । **तिब्बानन्ति** कुरूरानं । तासं यथावुत्तानं अधिवासनाय पहातब्बदुक्खवेदनानं पजहनं नाम खमनमेवाति आह “**खमनत्थाया**”ति । **आणापेत्वाति** “आतप्पं करणीय”न्ति बुद्धाणं विधाय । **लोकियलोकुत्तरमिस्सका कथिता** ससम्भारानं मग्गधम्मनं कथितत्ता ।

आतप्पकरणीयसुत्तवण्णना निट्ठिता ।

११. महाचोरसुत्तवण्णना

५१. एकादसमे महाबलवचरो महाचरोति आह “महन्तो बलवचरो”ति । बलवचरोति च महाथामताय महापरिवारताय महाचोरियकम्मसमत्थताय च वेदितब्बो । महत्तं गामनिगमानं विलुप्पनं महाविलोपो । तं तं कारणं पक्खिपित्वाति तं तं अकरणमेव कारणं कत्वा तप्पटिबद्धाय कथाय पक्खिपित्वा । अत्थं कथयिस्सन्तीति तस्स तस्स अत्थञ्च कथयिस्सन्ति । हरन्ताति अपनेन्ता परिहरन्ता । दसवत्थुकायाति “सस्सतो लोको”ति (म० नि० १.२६९) आदिदसवत्थुसन्निस्सिताय । अन्तं गहेत्वा ठितदिट्ठियाति तमेव सस्सतादिअन्तं गहेत्वा अविस्सज्जेत्वा ठितदिट्ठिया ।

महाचोरसुत्तवण्णना निट्ठिता ।

चूळवग्गवण्णना निट्ठिता ।

पठमपण्णासकं निट्ठितं ।

२. दुतियपण्णासकं

(६) १. ब्राह्मणवग्गो

१. पठमद्वेब्राह्मणसुत्तवण्णना

५२. ब्राह्मणवग्गस्स पठमे जराजिण्णाति जरावसेन जिण्णा, न ब्याधिआदीनं वसेन जिण्णसदिसत्ता जिण्णा । वयोवुद्धाति वयसो बुद्धिप्पत्तिया बुद्धा, न सीलादिवुद्धिया । जातिमहल्लकाति जातिया महन्तताय चिररत्तञ्जुताय जातिमहल्लका । तयो अद्धे अतिक्कन्ताति पठमो, मज्झिमो, पच्छिमोति तयो अद्धे अतीता । ततियं वयं अनुप्पत्ताति ततो एव पच्छिमं वयं अनुप्पत्ता । अकतभयपरित्ताणाति एत्थ भयपरित्ताणन्ति दुग्गतिभयतो परित्तायकं पुञ्जं, तं अकतं एतेहीति अकतभयपरित्ताणा । पतिट्ठाकम्मन्ति सुगतिसङ्घातप्पटिवावहं कम्मं । उपसंहरीयतीति सम्पापीयति । “उपनीयती”ति वुत्तं, किं केन उपनीयतीति आह “अयञ्हि जातिया जरं उपनीयती”तिआदि । अयन्ति लोको । जातो न जातभावेनेव तिट्ठति, अथ खो ततो परं जरं पापीयति, जराय ब्याधिं पापीयति । एवं परतो परं दुक्खमेव उपनीयति ।

तायनट्ठेनाति रक्खनट्ठेन । निलीयनट्ठेनाति निलीनट्ठानभावेन । पतिट्ठानट्ठेनाति पतिट्ठानभावेन । अवस्सयनट्ठेनाति अवस्सयितब्बभावेन । उत्तमगतिवसेनाति परमगतिभावेन ।

पठमद्वेब्राह्मणसुत्तवण्णना निट्ठिता ।

२. दुतियद्वेब्राह्मणसुत्तवण्णना

५३. दुतिये भजितब्बट्ठेन परेसं भाजितब्बट्ठेन भाजनं, भण्डकं ।

दुतियद्वेब्राह्मणसुत्तवण्णना निट्ठिता ।

३-४. अञ्जतरब्राह्मणसुत्तादिवण्णना

५४-५५. ततिये येसं रागादीनं अप्पहानेन पुरिसस्स अत्तब्याबाधादीनं सम्भवो, प्पहानेन असम्भवोति एवं रागादीनं प्पहायको अरियधम्मो महानुभावताय महानिसंसताय च सामं पस्सितब्बोति **सन्दिट्टिको**। इमिना नयेन सेसेसु पदेसुपि यथारहं नीहरित्वा वत्तब्बो। सद्धत्थो पन **विसुद्धिमग्गसंवण्णनासु** (विसुद्धि० महाटी० १.१४७) वुत्तनयेन वेदितब्बो। चतुत्थं उत्तानत्थमेव।

अज्जतरब्राह्मणसुत्तादिवण्णना निट्ठिता।

५. निब्बुतसुत्तवण्णना

५६. पञ्चमे न कालन्तरे पत्तब्बन्ति यदा सच्चप्पटिवेधो, तदा एव लद्धब्बत्ता न कालन्तरे पत्तब्बं। मग्गजाणेन उपनेतब्बत्ता उपनेय्यं। उपनेय्यमेव **ओपनेय्यिकन्ति** आह “**पटिपत्तिया उपगन्तब्ब**”न्ति।

निब्बुतसुत्तवण्णना निट्ठिता।

६. पलोकसुत्तवण्णना

५७. छट्ठे **आचरियपाचरियानन्ति** आचरियानम्पि आचरियानं। **निरन्तरफुटो नेरयिकसत्तेहि** निरयगामिकम्मस्स कारकानं बहुभावा। **उभयम्पेतन्ति** यथावुत्तं अत्थद्वयं। **घननिवासतन्ति** गामानं घनसन्निवासतं। **एकन्तेनेव अधम्मोति** अयोनिमनसिकारहेतुकत्ता अनत्थहेतुताय च नियमेनेव अधम्मो। **न अधम्मरागोति अधिप्पेतोति** परपरिक्खारेसु रागो विय न महासावज्जोति कत्वा वुत्तं। तथा हि सकसकपरिक्खारविसयो रागो विसमलोभो विय न एकन्ततो अपायुप्पत्तिजनको। परपरिक्खारेसु उप्पज्जमानस्स महासावज्जताय **अधम्मरागता। लोभस्स समकालो नाम नत्थि** कायदुच्चरितादीनं विय अयोनिमनसिकारसमुद्धानत्ता। **एसाति एसो पापधम्मो। समलोभो** विसमलक्खणाभावतो। तथा हि तंसमुद्धानो पयोगो मिच्छाचारोति न वुच्चति। **अवत्थुपटिसेवनसङ्घातेनाति** यं लोकियसाधुसमनुज्जातं रागस्स वत्थुद्धानं, ततो अज्जस्मिं वत्थुस्मिं पटिसेवनसङ्घातेन।

विविधसस्सानन्ति सालिवीहिआदिनानप्पकारसस्सानं। **दुस्सस्सन्ति** पच्चयदूसेन दूसितं सस्सं। **सम्पज्जमानेति** निष्फज्जनतो पगेव गब्भपरिवुद्धिकाले। **पाणकाति** सलभादिपाणका। **पतन्तीति** सस्सानं मत्थके पतन्ति। **सलाकामत्तमेव सम्पज्जतीति** वड्ढित्वा गब्भं गहेतुं असमत्थं सम्पज्जति। तेति वाळअमनुस्सा। **लद्धोकासाति** यक्खाधिपतीहि अनुज्जातत्ता लद्धोकासा।

पलोकसुत्तवण्णना निट्ठिता।

७. वच्छगोत्तसुत्तवण्णना

५८. सत्तमे **महाविपाकन्ति** उळारफलं बहुविपाकं। **धम्मो नाम** कथितकथा “अत्थं दहति विदहती”ति कत्वा। **अनुधम्मो नाम** पटिकथनं “तं अनुगतो धम्मो”ति कत्वा। सह धम्मेनाति सहधम्मो, सो एव **सहधम्मिको**। धम्मसदो चेत्थ कारणपरियायोति आह “**सकारणो**”ति। **वादस्साति** वचनस्स। **अनुपातो** अनुपच्छा पवत्ति।

परिपन्थे तिष्ठतीति **पारिपन्थिको** । पन्थे ठत्वा परेसं सापतेय्यं छिन्दनतो **पन्थदूहनचोरो** । यदि पच्चवेक्खणजाणं, कथं तं असेक्खन्ति आह “**असेक्खस्स पवत्ता**”ति । **इतरानीति** सीलक्खन्धादीनि । **सयम्पीति पि-**सद्वो “असेक्खस्स पवत्ता चा”ति इममत्थं सम्पिण्डेति ।

निब्बिसेवनोति विसेवनरहितो विगतविलोमभावो । **न उपपरिक्खन्तीति** न विचारेन्ति । जातिं निब्बत्तिं याति उपगच्छतीति **जातियो**, जातोति अत्थो । तेनाह “**यत्थ कत्थचि कुलजाते**”ति ।

केवलीति केवलवा, पारिपूरिमाति अत्थो । तेनाह “**परिपुण्णभावेन युत्तो**”ति । **एतं** केवलीति पदं । **अभिज्जापारन्ति** अभिजानस्स पारं । परियन्तं गतत्ता **पारगू** । एस नयो सेसपदेसुपि । **खेत्तविनिच्छयसवनेनाति** “इमेहि सीलादिगुणसम्पन्ना सदेवके लोके पुज्जस्स खेत्तं, तदज्जो न खेत्तं”न्ति एवं खेत्तविनिच्छयसवनेन रहिता ।

वच्छगोत्तसुत्तवण्णना निड्ढिता ।

८. तिकण्णसुत्तवण्णना

५९. अट्टमे **दुरासदाति** दुरुपसङ्कमना । **गरहा मुच्चिस्सतीति** मयि एवं कथेन्ते समणो गोतमो किञ्चि कथेस्सति, एवं मे वचनमत्तम्पि न लब्धन्ति अयं गरहा मुच्चिस्सतीति । **पण्डिताति** पण्डित्त्वेन समन्नागता । **धीराति** धितिसम्पन्ना । **व्यत्ताति** परवादमदनसमत्थेन वेय्यत्तियेन समन्नागता । **बहुस्सुताति** बाहुसच्चवन्तो । **वादिनोति** वादिमग्गकुसला । **सम्मताति** बहुनो जनस्स साधुसम्मता । **पण्डितादिआकारपरिच्छेदन्ति** तेसं तेविज्जानं पण्डिताकारादिआकारपरिच्छेदं । **आकारसद्वो कारणपरियायो**, परिच्छेदसद्वो परिमाणत्थोति आह “**एत्तकेन कारणेना**”ति ।

यथाति येनाकारेन, येन कारणेनाति अत्थो । तेनाह “**यथाति कारणवचनं**”न्ति । “**द्वीहिपि पक्खेही**”ति वत्वा ते पक्खे सरूपतो दस्सेन्तो “**मातितो च पितितो चा**”ति आह । तेसं पक्खानं वसेनस्स सुजाततं दस्सेतुं “**यस्स माता**”तिआदि वुत्तं । जनकजनिकाभावेन विनापि लोके मातापितुसमज्जा दिस्सति, इध पन सा ओरसपुत्तवसेनेव इच्छिताति दस्सेतुं “**संसुद्धगहणिको**”ति वुत्तं । गब्भं गण्हाति धारेतीति **गहणी**, गब्भासयसज्जितो मातुकुच्छिप्पदेसो । यथाभुत्तस्स आहारस्स विपाचनवसेन गण्हनतो अछडुनतो **गहणी**, कम्मजतेजोधातु ।

पिता च माता च पितरो, पितून् पितरो पितामहा, तेसं युगो **पितामहयुगो**, तस्मा “याव सत्तमा पितामहयुगा पितामहद्वन्दा”ति एवमेत्थ अत्थो दट्ठब्बो । **अट्ठकथायं** पन द्वन्द्वं अगगहेत्वा “युगन्ति आयुप्पमाणं वुच्चती”ति वुत्तं । **युग-**सद्वस्स च अत्थकथा दस्सिता “**पितामहोयेव पितामहयुग**”न्ति । **पुब्बपुरिसाति** पुरिसग्गहणज्चेत्थ उक्कट्टनिद्वेसवसेन कतन्ति दट्ठब्बं । एवञ्चि “मातितो”ति पाळिवचनं समत्थितं होति । **अक्खित्तोति** अक्खेपो । **अनवक्खित्तोति** सद्धथालिपाकादीसु अनवक्खित्तो न छड्ढितो । **जातिवादेनाति** हेतुम्हि करणवचनन्ति दस्सेतुं “**केन कारणेना**”तिआदि वुत्तं । एत्थ च “उभतो...पे०... पितामहयुगा”ति एतेन ब्राह्मणस्स योनिदोसाभावो दस्सितो संसुद्धगहणिकताकित्तनतो । “अक्खित्तो”ति इमिना किरियापराधाभावो । संसुद्धजातिकापि हि सत्ता किरियापराधेन खेपं पापुणन्ति । “अनुपक्कुट्ठो”ति इमिना अयुत्तसंसग्गाभावो । अयुत्तसंसग्गञ्चि पटिच्च सत्ता सुद्धजातिका किरियापराधरहितापि अक्कोसं लभन्ति ।

तन्ति गरहावचनं । **मन्ते परिवत्तेतीति** वेदे सज्झायति, परियापुणातीति अत्थो । **मन्ते धारेतीति** यथाअधीते मन्ते असम्मुट्ठे कत्वा हृदये ठपेति ।

ओट्टपहतकरणवसेनाति अत्थावधारणवसेन । सनिघण्डुकेटुभानन्ति एत्थ वचनीयवाचकभावेन अत्थं सद्वच्च खण्डति भिन्दति विभज्ज दस्सेतीति निखण्डु, सो एव इथ ख-कारस्स घ-कारं कत्वा “निघण्डू”ति वुत्तो । किटति गमेति किरियादिविभागं, तं वा अनवसेसपरियादानतो गमेन्तो पूरेतीति केटुभं । वेवचनप्पकासकन्ति परियायसद्वदीपकं, एकेकस्स अत्थस्स अनेकपरियायवचनविभावकन्ति अत्थो । निदस्सनमत्तज्चेतं अनेकेसम्पि अत्थानं एकसद्वचनीयताविभावनवसेनपि तस्स गन्थस्स पवत्तत्ता । वचीभेदादिलक्खणा किरिया कप्पीयति विकप्पीयति एतेनाति किरियाकप्पो, सो पन वण्णपदसम्बन्धपदत्थादिविभागतो बहुकप्पोति आह “किरियाकप्पविकप्पो”ति । इदच्च मूलकिरियाकप्पगन्थं सन्धाय वुत्तं । सो हि महाविसयो सतसहस्सपरिमाणो नमाचरियादिप्पकरणं । ठानकरणादिविभागतो निब्बचनविभागतो च अक्खरा पभेदीयन्ति एतेहीति अक्खरप्पभेदा, सिक्खानिरुत्तियो । एतेसन्ति चतुन्नं वेदानं ।

पदन्ति चतुब्बिधं, पञ्चविधं वा पदं, तं पदं कायतीति पदको, तेयेव वा वेदे पदसो कायतीति पदको । तदवसेसन्ति वुत्तावसेसं वाक्यं । एत्तावता सद्व्याकरणं वत्वा पुन “व्याकरण”न्ति अत्थव्याकरणमाह । तं तं सद्वं तदत्थज्ज व्याकरोति व्याकिक्खति एतेनाति व्याकरणं, सद्वसत्थं । आयतिं हितं तेन लोको न यतति न ईहतीति लोकायतं । तज्जि गन्थं निस्साय सत्ता पुज्जकिरियाय चित्तम्पि न उप्पादेन्ति ।

असीति महासावकाति अज्जासिकोण्डज्जो, वप्पो, भद्दियो, महानामो, अस्सजि, नाळको, यसो, विमलो, सुबाहु, पुण्णजि, गवम्पति, उरुवेलकस्सपो, नदीकस्सपो, गयाकस्सपो, सारिपुत्तो, महामोग्गल्लानो, महाकस्सपो, महाकच्चानो, महाकोट्टिको, महाकप्पिनो, महाचुन्दो, अनुरुद्धो, कङ्गारेवतो, आनन्दो, नन्दको, भगु, नन्दियो, किमिलो, भद्दियो, राहुलो, सीवलि, उपालि, दब्बो, उपसेनो, खदिरवनियरेवतो, पुण्णो मन्तानिपुत्तो, पुण्णो सुनापरन्तको, सोणो कुटिकण्णो, सोणो कोळिविसो, राधो, सुभूति, अङ्गुलिमालो, वक्कलि, काळुदायी, महाउदायी, पिलिन्दवच्छो, सोभितो, कुमारकस्सपो, रट्टपालो, वङ्गीसो, सभियो, सेलो, उपवाणो, मेघियो, सागतो, नागितो, लकुण्डकभद्दियो, पिण्डोलो भारद्वाजो, महापन्थको, चूळपन्थको, बाकुलो, कुण्डधानो, दारुचीरियो, यसोजो, अजितो, तिस्समेत्तेय्यो, पुण्णको, मेत्तगु, धोतको, उपसीवो, नन्दो, हेमको, तोदेय्यो, कप्पो, जतुकण्णी, भद्रावुधो, उदयो, पोसलो, मोघराजा, पिङ्गियोति एते असीति महासावका नाम ।

कस्मा पनेते एव थेरा “महासावका”ति वुच्चन्तीति? अभिनीहारस्स महन्तभावतो । तथा हि द्वे अगगसावकापि महासावकेसु अन्तोगथा । ते हि सावकपारमिजाणस्स मत्थकप्पत्तिया सावकेसु अगगधम्माधिगमेन अगगद्वाने ठितापि अभिनीहारमहन्ततासामज्जेन “महासावका”तिपि वुच्चन्ति, इतरे पन पकतिसावकेहि सातिसयं महाभिनीहारा । तथा हि ते पदुमुत्तरस्स भगवतो काले कतपणिधाना, ततो एव सातिसयं अभिज्जासमापत्तीसु वसिनो पभिन्नप्पटिसम्भिदा च । कामं सब्बेपि अरहन्तो सीलविसुद्धिआदिके सम्पादेत्वा चतूसु सतिपट्टानेसु सुप्पतिट्ठितचित्ता सत्त बोज्झङ्गे यथाभूतं भावेत्वा मग्गप्पटिपाटिया अनवसेसतो किलेसे खेपेत्वा अगगफले पतिट्ठहन्ति, तथापि यथा सद्भाविमुत्ततो दिट्ठिप्पत्तस्स, पज्जाविमुत्ततो च उभतोभागविमुत्तस्स पुब्बभागभावनाविसेससिद्धो मग्गभावनाविसेसो, एवं अभिनीहारमहन्तत्तपुब्बयोगमहन्तत्ता हि ससन्ताने सातिसयस्स गुणविसेसस्स निष्फादितत्ता सीलादीहि गुणेहि महन्ता सावकाति महासावका । तेसुयेव पन ये बोधिपक्खियधम्मेसु पामोक्खभावेन धुरभूतानं सम्मादिट्ठिसङ्कप्पादीनं सातिसयं किच्चानुभावनिष्फत्तिया कारणभूताय तज्जाभिनीहाराभिनीहटाय सक्कच्चं निरन्तरं चिरकालसम्भाविताय सम्मापटिपत्तिया यथाक्कमं पज्जाय समाधिस्मिज्ज उक्कट्टपारमिप्पत्तिया सविसेसं सब्बगुणेहि अगगभावे ठिता, ते सारिपुत्तमोग्गल्लाना । इतरे अट्टसत्तति थेरा सावकपारमिया मत्थके सब्बसावकानं अगगभावेन अट्ठितत्ता “महासावका”इच्चेव वुच्चन्ति । पकतिसावका पन अभिनीहारमहन्तत्ताभावतो पुब्बयोगमहन्तत्ताभावतो च “सत्थुसावका”इच्चेव वुच्चन्ति । ते पन

अगसावका विय महासावका विय च न परिमिता, अथ खो अनेकसता अनेकसहस्सा ।

वयतीति वयो, आदिमज्झपरियोसानेसु कथंचि अपरिकिलमन्तो अवित्थायन्तो ते गन्थे सन्तानेति पणेतीति अत्थो । द्वे पटिसेधा पकतिं गमेन्तीति दस्सेतुं “अवयो न होती”ति वत्वा तत्थ अवयं दस्सेतुं “अवयो नाम...पे... न सक्कोती”ति वुत्तं ।

इधाति इमस्मिं सुत्ते । एतन्ति “विविच्चेव कामेही”ति आदिवचनं । ततियविज्जाधिगमाय पटिपत्तिक्कमो विसुद्धिमग्गे (विसुद्धिं १.७०) सातिसयं वित्थारितो, तथा इध अवत्तुकामताय भयभेरवसुत्तादीसु (मं निं १.३४ आदयो) विय सङ्खेपतो च वत्तुकामताय “द्विन्नं विज्जान”मिच्चेव वुत्तं ।

विज्जाति पुब्बेनिवासप्पटिच्छादकस्स मोहक्खन्धस्स विज्जनट्टेनपि विज्जा । मोहो पटिच्छादकट्टेन तमोति वुच्चति तमो वियाति कत्वा । कातब्बतो करणं, ओभासोव करणं ओभासकरणं, अत्तनो पच्चयेहि ओभासभावेन निब्बत्तेतब्बट्टेनाति अत्थो । अयं अत्थोति अयमेव अधिप्पेतत्थो । पसंसावचनन्ति तस्सेव अत्थस्स थोमनावचनं पटिपक्खविधमनपवत्तिविसेसानं बोधनतो । योजनाति पसंसावसेन वुत्तपदानं अत्थदस्सनवसेन वुत्तपदस्स च योजना । अविज्जा विहताति एतेन विज्जनट्टेन विज्जाति अयम्पि अत्थो दीपितोति दट्टब्बं । यस्मा विज्जा उप्पन्नाति एतेन विज्जापटिपक्खा अविज्जा, पटिपक्खता चस्सा पहातब्बभावेन विज्जाय च पहायकभावेनाति दस्सेति । इतरस्मिम्पि पदद्वयेति “तमो विहतो, आलोको उप्पन्नो”ति पदद्वयेपि । एसेव नयोति यथावुत्तयोजनं अतिदिसति । तत्थायं योजना — एवं अधिगतविज्जस्स तमो विहतो विद्धस्तो । कस्मा? यस्मा आलोको उप्पन्नो जाणालोको पातुभूतोति । पेसितत्तस्साति यथाधिप्पेतत्थसिद्धिप्पत्तिं विस्सट्टचित्तस्स, पठमविज्जाधिगमाय पेसितचित्तस्साति वुत्तं होति ।

विपस्सनापादकन्ति इमिना तस्स ज्ञानचित्तस्स निब्बेधभागियतमाह । विपस्सना तिविधा विपस्सकपुग्गलभेदेन । महाबोधिसत्तानज्हि पच्चेकबोधिसत्तानञ्च विपस्सना चिन्तामयजाणसंवट्ठितत्ता सयम्भुजाणभूता, इतरेसं सुतमयजाणसंवट्ठितत्ता परोपदेससम्भूता । सा “ठपेत्वा नेवसज्जानासज्जायतनं अवसेसरूपारूपज्ज्ञानानं अज्जतरतो वुट्ठाया”ति आदिना अनेकधा अरूपमुखवसेन चतुधातुवत्थाने वुत्तानं तेसं तेसं धातुपरिग्गहमुखानं अज्जतरमुखवसेन च अनेकधाव विसुद्धिमग्गे (विसुद्धिं १.३०६) नानानयतो विभाविता । महाबोधिसत्तानं पन चतुवीसतिकोटिसतसहस्समुखेन पभेदगमनतो नानानयं सब्बज्जुतज्जाणसन्निस्सयस्स अरियमग्गजाणस्स अधिद्वानभूतं पुब्बभागजाणगब्भं गण्हापेत्तं परिपाकं गच्छन्तं परमगम्भीरं सण्हसुखुमतं अनज्जसाधारणं विपस्सनाजाणं होति, यं अट्ठकथासु “महावजिरजाण”न्ति वुच्चति । यस्स च पवत्तिविभागेन चतुवीसतिकोटिसतसहस्सपभेदस्स पादकभावेन समापज्जियमाना चतुवीसतिकोटिसतसहस्ससङ्का देवसिकं सत्थु वळज्जनकसमापत्तियो वुच्चन्ति, स्वायं बुद्धानं विपस्सनाचारो परमत्थमज्जूसायं विसुद्धिमग्गसंवण्णनायं (विसुद्धिं महाटी १.१४४) दस्सितो, अत्थिकेहि ततो गहेतब्बोति । इध पन सावकानं विपस्सनाचारं सन्धाय “विपस्सनापादक”न्ति वुत्तं ।

कामं हेट्ठिमग्गजाणानिपि आसवानं खेपनजाणानि एव, अनवसेसतो पन तेसं खेपनं अग्गमग्गजाणेनेवाति आह “अरहत्तमग्गजाणत्थाया”ति । आसवविनासनतोति आसवानं निस्सेसं समुच्छिन्दनतो । आसवानं खये जाणं आसवक्खयजाणन्ति दस्सेन्तो “तत्र चेतं जाण”न्ति वत्वा “खये”ति आधारे भुम्मं, न विसयेति दस्सेन्तो “तत्थ परियापन्नत्ता”ति आह । अभिनीहरतीति अभिमुखं नीहरति, यथा मग्गाभिसमयो होति, सवनं तदभिमुखं पवत्तेति । इदं दुक्खन्ति दुक्खस्स अरियसच्चस्स तदा भिक्खुना पच्चक्खतो गहितभावदस्सनं । एत्तकं दुक्खन्ति तस्स परिच्छिज्ज

गहितभावदस्सनं । न इतो भिय्योति तस्स अनवसेसतो गहितभावदस्सनं । तेनाह “सब्बम्पि दुक्खसच्च”न्तिआदि । सरसलक्खणपटिवेधेनाति सभावसङ्घातस्स लक्खणस्स असम्मोहतो पटिविज्झनेन । असम्मोहपटिवेधोति च यथा तस्मिं जाणे पवत्ते पच्छा दुक्खसच्चस्स सरूपादिपरिच्छेदे सम्मोहो न होति, तथा पवत्ति । तेनेवाह “यथाभूतं पजानाती”ति । दुक्खं समुदेति एतस्माति दुक्खसमुदयो । यं ठानं पत्वाति यं निब्बानं मग्गस्स आरम्मणपच्चयट्ठेन कारणभूतं आगम्म । पत्वाति च तदुभयवतो पुग्गलस्स पवत्तियाति कत्वा वुत्तं । पत्वाति वा पापुणनहेतु । अप्पवत्तिन्ति अप्पवत्तिनिमित्तं । ते वा न पवत्तन्ति एत्थाति अप्पवत्ति, निब्बानं । तस्साति दुक्खनिरोधस्स । सम्पापकन्ति सच्छिकिरियावसेन सम्मदेव पापकं ।

किलेसवसेनाति आसवसङ्घातकिलेसवसेन । यस्मा आसवानं दुक्खसच्चपरियायो तप्परियापन्नत्ता सेससच्चानञ्च तंसमुदयादिपरियायो अत्थि, तस्मा वुत्तं “परियायतो”ति । दस्सेन्तो सच्चानीति योजना । आसवानञ्चेत्थ गहणं “आसवानं खयजाणाया”ति आरद्धत्ता । तथा हि “कामासवापि चित्तं विमुच्चती”तिआदिना आसवविमुत्तिसीसेनेव सब्बकिलेसविमुत्ति वुत्ता । “इदं दुक्खन्ति यथाभूतं पजानाती”तिआदिना मिस्सकमग्गो इध कथितोति “सह विपस्सनाय कोटिप्पत्तं मग्गं कथेसी”ति वुत्तं । जानतो पस्सतोति इमिना परिज्जासच्छिकिरियाभावनाभिसमया वुत्ता । विमुच्चतीति इमिना पहानाभिसमयो वुत्तोति आह “इमिना मग्गक्खणं दस्सेती”ति । जानतो पस्सतोति वा हेतुनिद्वेसो । यं जाननहेतु कामासवापि चित्तं विमुच्चतीति योजना । धम्मानञ्चि समानकालिकानम्पि पच्चयपच्चयुप्पन्नता सहजातकोटिया लब्भति । भवासवग्गहणेनेव एत्थ भवरागस्स विय भवदिट्ठियापि समवरोधोति दिट्ठासवस्सपि सङ्गहो दट्ठब्बो ।

खीणा जातीतिआदीहि पदेहि । तस्साति पच्चवेक्खणजाणस्स । भूमिन्ति पवत्तिट्ठानं । येनाधिप्पायेन “कतमा पनस्सा”तिआदिना चोदना कता, तं विवरन्तो “न तावस्सा”तिआदिमाह । तत्थ न तावस्स अतीता जाति खीणा मग्गभावनायाति अधिप्पायो । तत्थ कारणमाह “पुब्बेव खीणत्ता”ति । न अनागता अस्स जाति खीणाति योजना । न अनागताति च अनागतभावसामञ्जं गहेत्वा लेसेन चोदेति । तेनाह “अनागते वायामाभावतो”ति । अनागतविसेसो पनेत्थ अधिप्पेतो, तस्स खेपने वायामो लब्भतेव । तेनाह “या पन मग्गस्सा”तिआदि । एकचतुपञ्चवोकारभवेसूति भवत्तयग्गहणं वुत्तनयेन अनवसेसतो जातिया खीणभावदस्सनत्थं । तन्ति यथावुत्तं जातिं । सोति खीणासवो भिक्खु ।

ब्रह्मचरियवासो नाम इध मग्गब्रह्मचरियस्स निब्बत्तनमेवाति आह “परिवुत्थ”न्ति । सम्मादिट्ठिया चतूसु सच्चेसु परिज्जादिकिच्चसाधनवसेन पवत्तमानाय सम्मासङ्कप्पादीनम्पि दुक्खसच्चे परिज्जाभिसमयानुगुणा पवत्ति, इतरेसु च सच्चेसु नेसं पहानाभिसमयादिवसेन पवत्ति पाकटा एव । तेन वुत्तं “चतूसु सच्चेसु चतूहि मग्गेहि परिज्जापहानसच्छिकिरियाभावनाभिसमयवसेना”ति । पुथुज्जनकल्याणकादयोति आदि-सद्धेन सत्तसेखं सङ्गण्हाति ।

इत्थत्तायाति इमे पकारा इत्थं, तब्भावो इत्थत्तं, तदत्थन्ति वुत्तं होति । ते पन पकारा अरियमग्गब्यापारभूता परिज्जादयो इधाधिप्पेताति आह “एवंसोळसविधकिच्चभावाया”ति । ते हि मग्गं पच्चवेक्खतो मग्गानुभावेन पाकटा हुत्वा उपट्ठहन्ति, परिज्जादीसु च पहानमेव पधानं तदत्थत्ता इतरेसन्ति आह “किलेसक्खयाय वा”ति । पहीनकिलेसपच्चवेक्खणवसेन वा एतं वुत्तं । दुतियविकप्पे इत्थत्तायाति निस्सक्के सम्पदानवचनन्ति आह “इत्थभावतो”ति । अपरन्ति अनागतं । इमे पन चरिमकत्तभावसङ्घाता पञ्चक्खन्धा । परिज्जाता तिट्ठन्तीति एतेन तेसं अप्पतिट्ठत्तं दस्सेति । अपरिज्जामूलका हि पतिट्ठा । यथाह “कबळीकारे चे, भिक्खवे, आहारे अत्थि रागो, अत्थि नन्दी, अत्थि तण्हा, पतिट्ठितं तत्थ विज्जाणं विरुळ्ह”न्तिआदि (सं० नि० २.६४; कथा० २९६; महानि० ७) । तेनेवाह —

“छिन्नमूलका रुक्खा विया”तिआदि ।

यस्साति पुथुज्जनस्स । तस्स हि सीलं कदाचि वड्ढति, कदाचि हायति । सेक्खापि पन सीलेसु परिपूरकारिनोव, असेक्खेसु वत्तब्बमेव नत्थि । तेनाह “**खीणासवस्सा**”तिआदि । वसिप्पत्तन्ति वसीभावप्पत्तं । सुट्ठु समाहितन्ति अग्गफलसमाधिना सम्मदेव समाहितं । धितिसम्पन्नन्ति अग्गफलधितिया समन्नागतं । मच्चुं जहित्वा ठितन्ति आयतिं पुनब्भवाभावतो वुत्तं । कथं पुनब्भवाभावोति आह “**सब्बे पापधम्मे पजहित्वा ठित**”न्ति । सब्बस्सपि जेय्यधम्मस्स चतुसच्चन्तो गधत्ता वुत्तं “**बुद्धन्ति चतुसच्चबुद्ध**”न्ति । बुद्धसावकाति सावकबुद्धा नमस्सन्ति, पगेव इतरा पजा । इतरा हि पजा सावकेपि नमस्सन्ति । इति एत्तकेन ठानेन सम्मासम्बुद्धस्स वसेन गाथानं अत्थं वत्वा इदानि सावकस्सपि वसेन अत्थं योजेत्वा दस्सेतुं “**अथ वा**”तिआदि वुत्तं । सावकोपि गोतमो मुखनिब्बत्तेन सम्पत्तेन सम्बन्धेन, यतो सब्बेपि अरियसावका भगवतो ओरसपुत्ताति वुच्चन्तीति ।

निवुस्सतीति निवासो, निवुत्थो खन्धसन्तानोति आह “**निवुत्थक्खन्धपरम्पर**”न्ति । अवेति, अवेदीति पाठद्वयेनपि पुब्बेनिवासजाणस्स किच्चसिद्धियेव दस्सेति । एकत्तकाय एकत्तसज्जिभावसामज्जतो वेहप्फलापि एत्थेव सङ्गहं गच्छन्तीति “**छ कामावचरे, नव ब्रह्मलोके**”इच्चेव वुत्तं । इतरे पन अपचुरभावतो न वुत्ता । एकच्चानं अविसयभावतो च अवचनं दट्ठब्बं । जाति खीयति एतेनाति जातिक्खयो, अरहत्तन्ति आह “**अरहत्तं पत्तो**”ति । “अभिज्जाया”ति वत्तब्बे यकारलोपेन “अभिज्जा”ति निद्देसो कतोति आह “**जानित्वा**”ति । किच्चवोसानेनाति चतूहि मग्गेहि कत्तब्बस्स सोळसविधस्स किच्चस्स परियोसानेन । वोसितोति परियोसितो, निड्डितोति अत्थो । मोनेय्येन समन्नागतोति कायमोनेय्यादीहि समन्नागतो । लपितं लपतीति लपितलापनो । अत्तपच्चक्खतो जत्वाति इमिना तेसं विज्जानं पटिलद्धभावं दीपेति ।

तिकण्णसुत्तवण्णना निड्डिता ।

९. जाणुस्सोणिसुत्तवण्णना

६०. नवमे देय्यधम्मस्सेतं नामन्ति यागं करोन्तेन दातब्बदेय्यधम्मं सन्धाय वदति तदज्जस्स पाळियं देय्यधम्मग्गहणेनेव गहितत्ता । मतकभत्तन्ति मतके उद्दिस्स दातब्बभत्तं, पितुपिण्डन्ति वुत्तं होति । वरपुरिसानन्ति विसिद्धपुरिसानं, उत्तमपुरिसानन्ति अत्थो । सब्बमेतं दानन्ति यथावुत्तभेदं यज्जसद्धादिदानं ।

जाणुस्सोणिसुत्तवण्णना निड्डिता ।

१०. सङ्गारवसुत्तवण्णना

६१. दसमे जिण्णानं हत्थिसालादीनं पटिसङ्खरणं पुन पाकतिककरणं जिण्णपटिसङ्खरणं, तस्स कारको जिण्णपटिसङ्खरणकारको । बाहिरसमयेति सत्थुसासनतो बाहिरे अज्जतित्थियसमये । सब्बचतुक्केनातिआदीसु सब्बेसु द्विपदचतुप्पदादिभेदेसु पाणेसु एकेकस्मिं चत्तारो चत्तारो पाणे वधित्वा यजितब्बं यज्जं सब्बचतुक्कं नाम । सेसेसुपि इमिना नयेन अत्थो वेदितब्बो । यस्स वा तस्स वाति निस्सक्के सामिवचनन्ति आह “**यस्मा वा तस्मा वा**”ति । एवमस्सायन्ति एत्थ अस्सूति निपातमत्तन्ति आह “**एवं सन्तेपि अय**”न्ति ।

वड्ढेन्तोति पट्टपेन्तो । मग्गब्रह्मचरियस्स ओगधं मूलं पटिड्ढाभूतं ब्रह्मचरियोगधं । तेनाह

“अरहत्तमगगसङ्घातस्सा”तिआदि । उक्कट्टुनिद्वेसेन चेत्य अरहत्तमगगस्सेव गहणं कतन्ति दट्ठब्बं । उत्तमं पतिट्ठाभूतं आरम्मणूपनिस्सयभावेन ।

अप्पेहि वेय्यावच्चकरादीहि अत्थो एतिस्साति **अप्पट्ठा** त्थ-कारस्स ट्ठ-कारं कत्वा । तेनाह “यत्थ बहू”तिआदि । यत्थाति यस्सं पटिपदायं । अप्पो समारम्भो एतस्साति **अप्पसमारम्भो** । पासंसाति पसंसारहा । एतं येव कथापेस्सामीति एतेनेव ब्राह्मणेन कथापेस्सामि ।

सोप्पेनाति निद्वाय । **पमादेनाति** जागरियादीसु अननुयुज्जनतो सतिविप्पवासलक्खणेन पमादेन । **पच्चनीकपटिहरणवसेनाति** पटिपक्खापनयनवसेन । तथा हि भगवतो च सासनस्स च पटिपक्खा तिथिया, तेसं हरणतो पटिहारियं । ते हि दिट्ठिहरणवसेन दिट्ठिप्पकासने असमत्थभावेन च इद्धिआदेसनानुसासनीहि हरिता अपनीता होन्तीति । “पटी”ति वा अयं सद्दो “पच्छा”ति एतस्स अत्थं बोधेति “तस्मिं पटिपविट्ठस्मिं, अज्जो आगज्झि ब्राह्मणो”तिआदीसु (सु० नि० ९८५; चूळनि० वत्थुगाथा ४) विय, तस्मा समाहिते चित्ते विगतूपक्विकलेसे कतकिच्चेन पच्छा हरितब्बं पवत्तेतब्बन्ति पटिहारियं, अत्तनो वा उपक्विकलेसेसु चतुत्थज्झानमग्गेहि हरितेसु पच्छाहरणं पटिहारियं, इद्धिआदेसनानुसासनियो च विगतूपक्विकलेसेन कतकिच्चेन च सत्तहितत्थं पुन पवत्तेतब्बा, हरितेसु च अत्तनो उपक्विकलेसेसु परसत्तानं उपक्विकलेसहरणानि होन्तीति पटिहारियानि भवन्ति, पटिहारियमेव **पाटिहारियं** । पटिहारिये वा इद्धिआदेसनानुसासनिसमुदाये भवं एकेकं **पाटिहारियन्ति** वुच्चति । पटिहारियं वा चतुत्थज्झानं मग्गो च पटिपक्खहरणतो, तत्थ जातं निमित्तभूते, ततो वा आगतन्ति **पाटिहारियं** ।

आगतनिमित्तेनाति आगताकारसल्लक्खणवसेन । एस नयो सेसेसुपि । **एको राजाति** दक्खिणमधुराधिपति एको पण्डुराजा । **एवम्पि ते मनोति** इमिना आकारेन तव मनो पवत्तोति अत्थो । तेन पकारेन पवत्तोति आह “**सोमनस्सितो वा**”तिआदि । सामज्जजोतना विसेसे अवतिट्ठतीति अधिप्पायेनेवं वुत्तं । “एवं तव मनो”ति इदञ्च मनसो सोमनस्सिततादिमत्तदस्सनं, न पन येन सो सोमनस्सितो वा दोमनस्सितो वा, तंदस्सनं । सोमनस्सगहणेन चेत्य तदेकट्ठा रागादयो सद्भादयो च दस्सिता होन्ति, दोमनस्सगहणेन दोसादयो । **दुत्तियन्ति** “इत्थम्पि ते मनो”ति पदं । **इतिपीति** एत्थ **इति**-सद्दो निदस्सनत्थो “अत्थीति खो, कच्चान, अयमेको अन्तो”तिआदीसु (सं० नि० २.१५; ३.९०) विय । तेनाह “**इमञ्च इमञ्च अत्थं चिन्तयमान**”न्ति । **पि**-सद्दो वुत्तत्थसम्पिण्डनत्थो ।

कथेन्तानं सुत्वाति कथेन्तानं सद्दं सुत्वा । **तस्स वसेनाति** तस्स वितक्विकतस्स वसेन । **अट्टकारकेनाति** विनिच्छयकारकेन ।

न अरियानन्ति अरियानं मग्गफलचित्तं न जानातीति अत्थो । तज्झि तेन अनधिगतत्ता चेतोपरियजाणेनपि न सक्का विज्जातुं, अज्जं पन चित्तं जानातियेव । **हेट्ठिमो उपरिमस्स चित्तं न जानातीति**आदीनिपि मग्गफलचित्तमेव सन्धाय वुत्तानीति वेदितब्बानि । सोतापन्नादयोपि हि अत्तना अधिगतमेव मग्गफलं परेहि उप्पादितं सम्मा चेतोपरियजाणेन जानितुं सक्कोन्ति, न अत्तना अनधिगतं । सब्बेपि अरिया अत्तनो फलं समापज्जन्ति अधिगतत्ताति दस्सेन्तो “**एतेसु चा**”तिआदिमाह । यदि अरिया अत्तना अधिगतफलं समापज्जन्ति, उपरिमापि हेट्ठिमं फलं समापज्जन्ति अधिगतत्ता लोकियसमापत्तियो वियाति कस्सचि आसङ्का सिया, तन्निवत्तनत्थमाह “**उपरिमो हेट्ठिमं न समापज्जती**”ति ।

उपरिमोति सकदागामिआदिअरियपुग्गलो । **हेट्ठिमन्ति** सोतापत्तिफलादिं । **न समापज्जतीति** सतिपि अधिगतत्ते न

समापज्जति । कस्माति चे? कारणमाह “**तेसज्ही**”तिआदि, तेसं सकदागामिआदीनं हेड्डिमा हेड्डिमा फलसमापत्ति तेसु तेसुयेव हेड्डिमेसु अरियपुग्गलेसु पवत्तति, न उपरिमेसूति अत्थो । इमिना हेड्डिमं फलचित्तं उपरिमस्स न उप्पज्जतीति दस्सेति । कस्माति चे? पुग्गलन्तरभावूपगमनेन पटिप्पस्सद्धत्ता । एतेन उपरिमो अरियो हेड्डिमं फलसमापत्तिं समापज्जति अत्तना अधिगतत्ता यथा तं लोकियसमापत्तिन्ति एवं पवत्तो हेतु ब्यभिचारितोति दट्ठब्बं । न हि लोकियज्झानेसु पुग्गलन्तरभावूपगमनं नाम अत्थि विसेसाभावतो, इध पन असमुग्घाटितकम्मकिलेसनिरोधनेन पुथुज्जनेहि विय सोतापन्नस्स सोतापन्नादीहि सकदागामिआदीनं पुग्गलन्तरभावूपगमनं अत्थि । यतो हेड्डिमा हेड्डिमा फलधम्मा उपरूपपरिमग्गधम्मेहि निवत्तिता पटिपक्खेहि विय अभिभूता अप्पवत्तिधम्मतंयेव आपन्ना । तेनेव वुत्तं “**पटिप्पस्सद्धत्ता**”ति ।

अपिच कुसलकिरियप्पवत्ति नाम अज्जा, विपाकप्पवत्ति च अज्जाति अनन्तरफलत्ता च लोकुत्तरकुसलानं हेड्डिमतो उपरिमो भवन्तरगतो विय होति । तंतंफलवसेनेव हि अरियानं सोतापन्नादिनामलाभो । ते सचे अज्जफलसमङ्गिनोपि होन्ति, सोतापन्नादिनामपि तेसं अववत्थितं सिया । तस्स तस्स वा अरियस्स तं तं फलं सदिसन्ति कत्वा न उपरिमस्स हेड्डिमफलसमङ्गिताय लेसोपि सम्भवति, कुतो तस्सा समापज्जनन्ति दट्ठब्बं । हेड्डिमा च सोतापन्नादयो उपरिमं सकदागामिफलादिं न समापज्जन्ति अनधिगतत्ता । न हि अनधिगतं समापत्तिं समापज्जितुं सक्का, तस्मा सब्बेपि अरिया अत्तनोयेव फलं समापज्जन्तीति निट्ठमेत्थ गन्तब्बं ।

पवत्तेन्ताति पवत्तका हुत्वा, पवत्तनवसेनाति अत्थो । **एवन्ति** यथानुसिद्धाय अनुसासनिया विधिवसेन पटिसेधवसेन च पवत्तिताकारपरामसनं । सा च सम्मावितक्का नाम मिच्छावितक्कानञ्च पवत्तिआकारदस्सनवसेन पवत्तति । तत्थ आनिसंसस्स आदीनवस्स च विभावनत्थं **अनिच्चसज्जमेव**, न निच्चसज्जन्ति अत्थो । पटियोगिनिवत्तनत्थज्हि **एव-**कारगहणं । इधापि एवसद्गगहणस्स अत्थो पयोजनञ्च वुत्तनयेनेव वेदितब्बं । **इदं-**गहणेपि एसेव नयो । **पञ्चकामगुणरागन्ति** निदस्सनमत्तं दट्ठब्बं तदज्जरागस्स दोसादीनञ्च पहानस्स इच्छितत्ता तप्पहानस्स च तदज्जरागादिखेपस्स उपायभावतो । तथा वुत्तं दुड्डलोहितविमोचनस्स पुब्बदुड्डमंसखेपनूपायता विय । **लोकुत्तरधम्ममेवाति** अवधारणं पटिपक्खेपभावतो सावज्जधम्मनिवत्तनपरं दट्ठब्बं, तस्स अधिगमूपायानिसंसभूतानं तदज्जेसं अनवज्जधम्मानं नानन्तरियभावतो ।

चिन्तामणिकविज्जासरिक्खकतन्ति इमिना “चिन्तामणी”ति एवं लद्धनामा लोके एका विज्जा अत्थि, याय परेसं चित्तं विजानन्तीति दीपेति । “तस्सा किर विज्जाय साधको पुग्गलो तादिसे देसकाले मन्तं परिजप्पित्वा यस्स चित्तं जानितुकामो, तस्स दिट्ठहत्थादिविसेससज्जाननमुखेन चित्ताचारं अनुमिनन्तो कथेती”ति केचि । अपरे “वाचं निच्छरापेत्वा तत्थ अक्खरसल्लक्खणवसेना”ति वदन्ति ।

इदञ्च पन सब्बन्ति “भवं गोतमो अनेकविहितं इद्धिविधं पच्चनुभोती”तिआदिनयप्पवत्तं सब्बम्पि ।

सङ्गारवसुत्तवण्णना निट्ठिता ।

ब्राह्मणवग्गवण्णना निट्ठिता ।

(७) २. महावग्गो

१. तित्थायतनसुत्तवण्णना

६२. दुतियस्स पठमे तित्थं नाम द्वासट्ठि दिट्ठियो तब्बिनिमुत्तस्स कस्सचि दिट्ठिविप्फन्दितस्स अभावतो । एत्थ हि सत्ता तरन्ति उप्पिलवन्ति उम्मुज्जनिमुज्जं करोन्ति, तस्मा “तित्थ”न्ति वुच्चति । पारगमनसङ्घातज्झि तरणं दिट्ठिगतिकानं नत्थि, तत्थेव अपरापरं निमुज्जनुम्मुज्जनवसेन पिलवनमेव तेसं तरणं नाम । उप्पादकाति पूरणकस्सपादयो । तित्थे जाता तित्थिया, यथावुत्तं वा दिट्ठिगतसङ्घातं तित्थं एतेसं अत्थीति तित्थिका, तित्थिका एव तित्थिया । मनोरमेति सादुफलभरितताय अभयदिसताय च मनोरमे । इमेसुयेव तीसु ठानेसूति यथावुत्तेसु तित्थायतनेसु ।

यो यथा जानाति, तस्स तथा वुच्चतीति इमिना पुगलज्झासयवसेन तथा वुत्तन्ति दस्सेति । पुगल-सद्वो च तिस्सन्नम्पि पकतीनं साधारणो, तस्मा पुरिसगगहणेन ततो विसेसनं यथा “अट्ठ पुरिसपुगला”ति । पटिसंविदितं करोतीति केवलं जाननवसेन विदितं करोति । अनुभवति वाति विपाकलक्खणप्पत्तं अनुभवति । पुब्बेकतहेतूति अन्तो गधावधारणं पदन्ति आह “पुब्बेकतकम्मपच्चयेनेवा”ति । इमिनाति “सब्बं तं पुब्बेकतहेतू”ति इमिना वचनेन । कम्मवेदनन्ति कुसलाकुसलकम्मसहजं वेदनं । किरियवेदनन्ति “नेव कुसलाकुसला न च कम्मविपाका”ति एवं वुत्तं किरियचित्तसहजं वेदनं । न केवलञ्च ते कम्मकिरियवेदना एव पटिक्खपन्ति, अथ खो सासने लोके च पाकटे वाताबाधादिरोगे च पटिक्खपन्ति एवाति दस्सेतुं “ये वा इमे”ति आदिमाह । तत्थ पित्तसमुद्धानाति पित्तविकाराधिकसम्भूता । अनन्तरद्वयेपि एसेव नयो । सन्निपातिकाति पित्तादीनं तिण्णम्पि विकारानं सन्निपाततो जाता । उत्तुपरिणामजाति सीतादिउत्तुनो विपरिणामतो विसमपरिवुत्तितो जाता । विसमपरिहारजाति असप्पायाहारयोगपटिसेवनवसेन कायस्स विसमं परिहरणतो जाता । ओपक्कमिकाति उपक्कमतो निब्बत्ता । कम्मविपाकजाति कम्मस्स विपाकभूतक्खन्धतो जाता । विरोधिपच्चयसमुद्धाना धातूनं विकारावत्था, तप्पच्चया वा दुक्खा वेदना आबाधनट्ठेन आबाधो, सो एव रुज्जनट्ठेन रोगो । तत्थ “यो याप्यलक्खणो, सो रोगो, इतरो आबाधो”ति वदन्ति । सब्बेसञ्च नेसं तंतं धातूनं विसमं आसन्नकारणं, न तथा इतरानि । तत्थापि च पकोपावत्था धातुयो आसन्नकारणं, न तथा परपच्चयावत्थाति दट्ठब्बं । अट्ठमंयेव कम्मविपाकजं आबाधं सम्पटिच्छन्ति “सब्बं तं पुब्बेकतहेतू”ति विपल्लासग्गाहेन । “पुब्बे”ति पुरातनस्सेव कम्मस्स गहितत्ता उपपज्जवेदनीयम्पि ते पटिक्खपन्तीति वुत्तं “द्वे पटिबाहित्वा”ति । सम्पटिच्छन्तीति अनुजानन्ति ।

अत्तना कतमूलकेनाति साहित्यिककम्महेतु । आणत्तिमूलकेनाति परस्स आणापनवसेन कतकम्महेतु । इमाति तिस्सो वेदना । सब्बे पटिबाहन्तीति सब्बे रोगे पटिसेधेन्ति सब्बेसम्पि तेसं एकेन इस्सरेनेव निमित्तत्ता तब्भावीभावासम्भवतो । एस नयो सेसेसुपि । सब्बं पटिबाहन्तीति हेतुपच्चयपटिसेधनतो सब्बं निसेधेन्ति ।

मातिकं निक्खिपित्वाति तिण्णम्पि वेदानं असारभावदस्सनत्थं उद्देसं कत्वा । तन्ति तं मातिकं । विभजित्वा दस्सेतुन्ति दोसदस्सनवसेनेव विभागतो दस्सेतुं । लद्धिपटिगुपनत्थन्ति अत्तनो लद्धिया पटिजानापनत्थं । लद्धितो लद्धिं सङ्गमन्तीति मूललद्धितो अज्जलद्धिं उपगच्छन्ति पटिजानन्ति । पुब्बेकतहेतुयेव पटिसंवेदेतीति कम्मवेदनम्पि विपाकवेदनं कत्वा वदन्ति । दिट्ठिगतिका हि ब्यामूळहचित्ता कम्मन्तरविपाकन्तरादीनि आलोळेन्ति, असङ्करो सज्जापेतुं न सक्कोन्ति । यथा च अकुसलकम्मे, एवं कुसलकम्मेपीति दस्सेतुं “एवं पाणातिपाता”ति आदि वुत्तं । तत्थ एवन्ति यथा पुब्बेकतहेतु एव पाणातिपातनो नाम होन्ति, न इदानीं सयंकतकारणा, एवं पाणातिपाता विरमणम्पि पुब्बेकतहेतु एवाति विचारियमानो पुब्बेकतवादो अकिरियवादो एव सम्पज्जति ।

कत्तुकम्यताछन्दो न तण्हाछन्दो । कत्तुकम्यताति कातुमिच्छा । पच्चत्तपुरिसकारोति तेन तेन पुरिसेन कत्तब्बकिच्चं

न होति पुब्बेकतहेतु एव सिञ्जनतो । उभयम्पि तं एस न लब्भतीति कत्तब्बकरणं सुचरितपूरणं, अकत्तब्बअकरणं दुच्चरितविरतीति इदं उभयम्पि एस न लभति । समणापि हि पुब्बेकतकारणायेव होन्तीति पुब्बेकतकारणायेव समणापि होन्ति, न इदानीं संवरसमादानादिना । अस्समणापि पुब्बेकतकारणायेवाति पुब्बेकतकारणायेव अस्समणापि होन्ति, न संवरभेदेन ।

यथा पुब्बेकतवादे छन्दवायामानं असम्भवतो पच्चत्तपुरिसकारानं अभावो, एवं इस्सरनिम्मानवादेपि इस्सरेनेव सब्बस्स निम्मितभावानुजाननतोति वुत्तं “पुब्बेकतवादे वुत्तनयेनेव वेदितब्बो”ति । एस नयो अहेतुकवादेपीति आह “तथा अहेतुकवादेपी”ति ।

इमेसन्तिआदिना इमेसं तित्थायतनानं तुच्छासारताय थुसकोट्टेनेन कुण्डकमत्तस्सपि अलाभो विय परमत्थलेसस्सपि अभावो, तथा खज्जोपनकोभासतो तेजसो फुलिङ्गमत्तस्सपि अभावो विय अन्धवेणिकस्सपि मग्गस्स अप्पटिलाभो विय सद्धमत्तं निस्साय मिच्छाभागेन विपल्लत्थताय ददरजातके (जा० १.२.४३-४३) ससकसदिसता च विभाविता होति । सारभावन्ति सीलसारादिसम्पत्तिया सारसम्भावं । निव्यानिकभावन्ति एकन्तेनेव वट्टतो निव्यानावहभावं । अनिग्गहितोति न निग्गहेतब्बो । तेनाह “निग्गहेतुं असक्कुणेय्यो”ति । असंकिलिद्धोति संकिलेसविरहितो । तेनाह “निक्किलेसो”तिआदि । अनुपवज्जोति धम्मतो न उपवदितब्बो । अप्पटिकुट्टो नाम अप्पटिसेधनं वा सिया अनक्कोसनं वाति तदुभयं दस्सेन्तो “अप्पटिबाहितो अनुपक्कुट्टो”ति आह ।

तस्स धम्मस्साति “अयं खो पन, भिक्खवे”तिआदिना उद्धटस्स धम्मस्स । पज्जं पुच्छित्वाति कथेतुकम्यतावसेन पज्जं पुच्छित्वा । यथापटिपाटियाति मातिकाय यथानिक्खित्तप्पटिपाटिया । धातुयोति सभावधारणट्टेन धातुयो । ता पन यस्मा तण्हादिट्टिकप्पनापरिकप्पितअत्तसुभसुखसस्सतादिपकतिआदिधुवादिकीवादिकायादिका विय न इच्छासभावा दिट्ठिआदिरहितेहि विमुच्चमानउदुम्बरपुष्पादिलोकवोहारवत्थूनि विय च वाचावत्थुमत्ता, अथ खो सच्चपरमत्थभूताति आह “सभावा”ति, सच्चसभावाति अत्थो । अत्तनो सभावं धारेन्तीति हि धातुयो । निज्जीवनिस्सत्तभावप्पकासकोति बाहिरपरिकप्पितजीवाभावप्पकासको लोकियमहाजनसंकप्पितसत्ताभावप्पकासको च । आकरट्टेनाति उप्पज्जनट्टानभावेन । उप्पत्तिट्टानम्पि हि आकरो आयतनन्ति वुच्चति यथा “कम्बोजो अस्सानं आयतन”न्ति । मनोपविचाराति तं तं आरम्भणं उपेच्च मनसो विविधचरणाकारो । केहि कत्थाति आह “वितक्कविचारपादेही”तिआदि । अट्टारससु ठानेसूति छ सोमनस्सट्टानियानि, छ दोमनस्सट्टानियानि, छ उपेक्खाट्टानियानीति एवं अट्टारससु ठानेसु ।

पतिट्टाधातूति सेसभूतत्तयस्स चेव सब्बूपादारूपानञ्च पतिट्टासभावा धातु । इमिना नयेन आबन्धनधातूतिआदीसुपि अत्थो वेदितब्बो । अपिच कक्खळभावसिद्धो सहजातधम्मानं आधारभावो पतिट्टाभावो । द्रवभावसिद्धं सम्पिण्डनं आबन्धनं । उण्हभावसिद्धं मुदुतापक्कतावहं परिपाचनं । थद्धभाववहं उद्धुमातनं वित्थम्भनं । रूपविवित्तो रूपपरियन्तो आकासोति येसं सो परिच्छेदो, तेहि सो असम्फुट्टोवाति वुत्तं “आकासधातूति असम्फुट्टधातू”ति । सज्जाननविधुरा आरम्भणूपलद्धि विजाननधातु । वित्थारतोपि कथेतुं वट्टति सद्धेपन्तो गधत्ता वित्थारस्स । सद्धेपतो कथेतुं न वट्टति कथेतब्बस्स अत्थस्स अनवसेसपरियादानाभावतो । तेनाह “वित्थारतोव वट्टती”ति । उभयथाति सद्धेपतो वित्थारतो च ।

अनिप्फन्नापि आकासधातु भूतानि उपादाय गहेतब्बतामत्तेन “उपादारूप”न्तेव वुच्चति । दिट्टानेवाति सल्लक्खेतब्बानि उपादारूपभावसामञ्जतो । तेन सहजाता वेदना वेदनाक्खन्थो समुदाये पवत्तवोहारस्स अवयवेपि

दिस्सनतो यथा “वत्थेकदेसे दट्टे वत्थं दट्टु”न्ति । “**फस्सो च चेतना च सङ्खारक्खन्धो**”ति वुत्तं महाभूमकत्ता तेसं तप्पधानत्ता च सङ्खारक्खन्धस्स । **अरूपक्खन्धा नामं** आरम्मणाभिमुखं नमनतो नामाधीनगहणतो च । **रूपक्खन्धो रूपं** परिब्यत्तं रूपनट्ठेन । **पच्चयन्ति** निस्सयभूतं पच्चयं । विभागेन **द्वाचत्तालीस** । **एकासीति चित्तानि** “सम्मसनचारोय”न्ति कत्वा । **अनुक्कमेन पटिपज्जमानोति** एवं कङ्खावितरणविसुद्धियं ठितो उपरिमेन तिस्सन्नं विसुद्धीनं सम्पादनवसेन विसुद्धिभावनं उस्सुक्कापेन्तो ।

फस्सायतनन्ति फस्सस्स उप्पत्तिट्ठानं । **सुवण्णादीनन्ति** सुवण्णमणिवजिरादीनं । आकिण्णं विय हुत्वा उप्पज्जन्ति एत्थाति **आकरो** । यथा चक्खु विपाकफस्सस्स विसेसपच्चयो, न तथा इतरेसन्ति कत्वा वुत्तं “**द्वे चक्खुविज्जाणानी**”तिआदि । एस नयो सेसवारेसुपि । द्वत्तिंसाय विपाकफस्सेसु द्विपच्चविज्जाणसहगतफस्से ठपेत्वा सेसा **द्वावीसति विपाकफस्सा** वेदितब्बा । **दिट्ठमेव होति** तेन समानयोगक्खमत्ता । “**सङ्खेपतो तावा**”ति सङ्खेपकथं आरभित्वापि वित्थारकथापेत्थ वुत्तनयत्ता सुविज्जेय्यावाति वुत्तं “**हेट्ठा...पे०... वेदितब्ब**”न्ति ।

सोमनस्सस्स उप्पत्तिट्ठानभूतं **सोमनस्सट्ठानियं** । तेनाह “**सोमनस्सस्स कारणभूत**”न्ति । **उपविचरतीति** उपेच्च पवत्तति । सभावतो सङ्कप्पतो च सोमनस्सादिउप्पत्तिहेतुका सोमनस्सट्ठानियादिताति आह “**इट्ठं वा होतू**”तिआदि । **चतुत्थं दिट्ठमेव होति** तदविनाभावतो ।

अरियसच्चानीति पुरिमपदे उत्तरपदलोपेनायं निद्देशोति आह “**अरियभावकरानी**”तिआदि । **विसुद्धिमग्गे** (विसुद्धि० २.५३१) **पकासितं**, तस्मा न इध पकासेतब्बन्ति अधिप्पायो । **सुखावबोधनत्थन्ति** देसियमानाय वट्टकथाय सुखेन अवबोधनत्थं । तेनाह “**यस्स ही**”तिआदि । **द्वादसपदन्ति** अविज्जादीहि पदेहि द्वादसपदं । **पच्चयवट्टन्ति** पच्चयप्पबन्धं । **कथेतुकामो होति** पच्चयाकारमुखेन सच्चानि दस्सेतुकामताय । **गल्भावक्कन्तिवट्टन्ति** गल्भोक्कन्तिमुखेन विपाकवट्टं दस्सेति “**गल्भस्सावक्कन्ति होती**”तिआदिना । तस्मा पनेत्थ गल्भावक्कन्तिवसेनेव वट्टं दस्सितन्ति आह “**गल्भावक्कन्तिवट्टस्मिं ही**”तिआदि । **गल्भावक्कन्तिवट्टस्मिन्ति** मातुकुच्छिम्हि निब्बत्तनवसेन पवत्तधम्मप्पबन्धे । **दस्सितेति** देसनावसेन दस्सिते । पुरिमा द्वे योनियो इतराहि ओळारिकताय परिब्यत्ततराति वुत्तं “**गल्भावक्कन्ति...पे०... अवबोधेतुम्पी**”ति ।

पच्चयमत्तन्ति छन्नं धातूनं साधारणं पच्चयभावमत्तं, न तेहि भागसो निष्फादियमानं पच्चयविसेसं “**कुतो पनेतं छन्नं धातून**”न्ति अविभागेन वुत्तत्ता । तेनाह “**इदं वुत्तं होती**”तिआदि । **न मातु न पितु** तासं धातूनं इमस्स सत्तस्स बाहिरभावतो । **गल्भस्साति** एत्थ गल्भति अत्तभावभावेन वत्ततीति गल्भो, कललादिअवत्थो धम्मप्पबन्धो । तन्निस्सितत्ता पन सत्तसन्तानो गल्भोति वुत्तो यथा मज्जनिस्सिता “**मज्जा उक्कुट्ठिं करोन्ती**”ति । तन्निस्सयभावतो मातुकुच्छि गल्भोति वुच्चति “**गल्भे वसति माणवो**”तिआदीसु (जा० १.१५.३६३) । गल्भो वियाति वा गल्भो । यथा हि निवासट्ठानताय सत्तानं ओवरको “**गल्भो**”ति वुच्चति, एवं गल्भसेय्यकानं सत्तानं याव अभिजाति निवासट्ठानताय मातुकुच्छि “**गल्भो**”ति वुच्चति । इध पन पठमं वुत्तअत्थेनेव गल्भोति वेदितब्बो । तेनाह “**गल्भो च नामा**”तिआदि ।

निरतिअत्थेन निरयो च सो यथावुत्तेन अत्थेन गल्भो चाति **निरयगल्भो** । एस नयो सेसपदेसुपि । अयं पन विसेसो — देवमनुजादयो विय उद्धं दीघा अहुत्वा तिरियं अज्जिता दीघाति तिरच्छाना । ते एव खन्धकोट्टासभावेन योनि च सो वुत्तनयेन गल्भो चाति **तिरच्छानयोनिगल्भो** । पकट्ठतो सुखतो अपेतं अपगमो पेतभावो, तं पत्तानं विसयोति **पेत्तिविसयो**, पेतयोनि । मनस्स उस्सन्नताय सूरभावादिगुणेहि उपचितमानसताय उक्कट्टगुणचित्ताय **मनुस्सा** । दिब्बन्ति कामगुणादीहि कीळन्ति

लळन्ति जोतन्तीति देवा । गब्भसद्दो वुत्तनयो एव । नानप्पकारोति यथावुत्तेन तदनन्तरभेदेन च नानप्पकारको । मनुस्सगब्भो अधिप्पेतो सुपाकटताय पच्चक्खभावतो । ओक्कन्ति मातुकुच्छिं ओक्कमित्वा विय उप्पतित्वाति कत्वा । निब्बत्तनं निब्बत्ति । पातुभावो उप्पत्तिप्पकासको च ।

सन्निपातो नाम अवेकल्लजातिहीनवेकल्लेति दस्सेतुं “इध मातापितरो”ति आदि वुत्तं । इधाति इमस्मिं सत्तलोके । सन्निपतिताति समोधानभावतो सन्निपतिता समागता संसिलिद्धा । उतुनीति उतुमती सज्जातपुप्फा । इदञ्च उतुसमयं सन्धाय वुत्तं, न लोकसमज्जाकरजस्स लग्गनदिवसमत्तं । मातुगामस्स हि यस्मिं गब्भासहसज्जिते ओकासे दारको निब्बत्तति, तत्थ महती लोहितपीळका सण्ठहित्वा अग्गहितपुप्फा एव भिज्जित्वा पग्घरति, वत्थु सुद्धं होति पग्घरितलोहितत्ता अनामयत्ता च । विसुद्धे वत्थुमि मातापितूसु एकवारं सन्निपतितेसु याव सत्त दिवसानि खेत्तमेव होति । सुद्धं वत्थु नहानतो परम्पि कतिपयानि दिवसानि गब्भसण्ठहनताय खेत्तमेव होति परित्तस्स लोहितलेसस्स विज्जमानत्ता । तस्मिं समये हत्थग्गाहवेणिग्गाहादिना अङ्गपरामसनेनपि दारको निब्बत्ततियेव । इत्थिसन्तानेपि हि सत्तपि धातू लब्धन्तेव । तथा हि पारिकाय नाभिपरामसनेन सामस्स बोधिसत्तस्स, दिट्ठमङ्गलिकाय नाभिपरामसनेन (जा० अट्ठ० ४.१५.मातङ्गजातकवण्णना; म० नि० अट्ठ० २.६५) मण्डव्यस्स निब्बत्ति अहोसि । गन्धनतो उप्पन्नगतिया निमित्तूपट्टानेन सूचनतो दीपनतो गन्धोति लब्धनामेन भवगामिकम्मुना अब्बति पवत्ततीति गन्धब्बो, तत्थ उप्पज्जमानकसत्तो । पच्चुपट्टितो होतीति न मातापितूनं सन्निपातं ओलोकयमानो समीपे ठितो पच्चुपट्टितो नाम होति, कम्मयन्तयन्तितो पन एको सत्तो तस्मिं ओकासे निब्बत्तनको होतीति अयमेत्थ अधिप्पायो । तदा हि ततूपगसत्तो ततूपपत्तिआवहन्तकम्मसङ्घातेन पेल्लकयन्तेन तथत्थाय पेल्लितो उपनीतो विय होति ।

विज्जाणपच्चया नामरूपन्ति एत्थ विज्जाणस्स पच्चयभावेन गहितत्ता “तयो अरूपिनो खन्धा”ति वुत्तं । इध पन विज्जाणं पच्चयभावेन अग्गहेत्वा गब्भोक्कन्तिया एव पच्चयभावेन गहितत्ता “विज्जाणक्खन्धमि पक्खित्वा”ति वुत्तं । इध पन मनुस्सगब्भस्स ओक्कन्तिया अधिप्पेतत्ता “गब्भसेय्यकानं पटिसन्धिकखणे”ति वुत्तं ।

तण्हाय समुदयसच्चभावेन गहितत्ता “ठपेत्वा तण्ह”न्ति वुत्तं । तस्सेव पभाविकाति तस्सेव यथावुत्तस्स दुक्खसच्चस्स उप्पादिका । दुक्खनिरोधोति एत्थ दुक्खग्गहणेन तण्हापि गहिताति आह “तेसं द्विन्नमि...पे०... दुक्खनिरोधो”ति । अविसेसेन हि तेभूमकवट्ठं इध दुक्खन्ति अधिप्पेतं । अथ वा दुक्खस्स अनुप्पत्तिनिरोधो तब्भाविकाय तण्हाय अनुप्पत्तिनिरोधेन विना न होतीति वुत्तं “तेसं द्विन्नमि...पे०... दुक्खनिरोधो”ति । अनुप्पत्तिनिरोधोति च अनुप्पत्तिनिरोधनिमित्तं निब्बानं दस्सेति ।

“तत्थ वुत्तनयेनेव वेदितब्ब”न्ति वत्वा उभयत्थ पाळिया पवत्तिआकारभेदं दस्सेतुं “अयं पन विसेसो”ति आह । तत्थाति विसद्धिमग्गे । इधाति इमस्मिं सुत्ते । अविज्जाय त्वेवाति अविज्जाय तु एव । असेसविरागनिरोधाति एत्थ अच्चन्तमेव सङ्घारे विरज्जति एतेनाति विरागो, मग्गो, तस्मा विरागसङ्घातेन मग्गेन असेसनिरोधा असेसेत्वा निरोधा समुच्छिन्दनाति एवमेत्थ अत्थो दट्ठब्बो ।

सकलस्साति अनवसेसस्स । केवलस्साति वा सुद्धस्स, परपरिकप्पितसत्तजीवादिविरहितस्साति अत्थो । खीणाकारोपि वुच्चति “निरुज्जनं निरोधो”ति इमिना अत्थेन । अरहत्तमि निरोधोति वुच्चति निरोधन्ते उप्पन्नत्ता । निब्बानमि निरोधोति वुच्चति अविज्जादीनं निरोधस्स निमित्तभावतो अविज्जादयो निरुज्जन्ति एत्थाति निरोधोति कत्वा । खीणाकारदस्सनवसेनाति अविज्जादीनं अनुप्पत्तिनिरोधेन निरुज्जनाकारदस्सनवसेन । निब्बानमेव सन्धाय, न

पन अरहत्तन्ति अधिष्पायो । सभावधम्मनं निग्गहो नाम यथावुत्तधम्मपरिच्छेदतो ऊनाधिकभावप्पकासनेन अत्तसभावविभावनेनेव होतीति आह “निग्गहन्तो ही”तिआदि ।

तित्थायतनसुत्तवण्णना निड्डिता ।

२. भयसुत्तवण्णना

६३. दुतिये परित्तातुं समत्थभावेनाति उप्पन्नभयतो रक्खितुं समत्थभावेन । नत्थि एत्थ मातापुत्तं अज्जमज्जं तायितुं समत्थन्ति अमातापुत्तानि, तानियेव अमातापुत्तिकानि । तेनाह “नत्थि एत्था”तिआदि । यन्ति भुम्मत्थे उपयोगवचनन्ति आह “यस्मिं समये”ति । मातापि पुत्तं पस्सितुं न लभति, परित्तातुं न समत्थन्ति अधिष्पायो । पुत्तोपि मातरन्ति एत्थापि एसेव नयो । चित्तुत्रासोयेव भयं चित्तुत्रासभयं । इमिना ओत्तप्पभयादिं निवत्तेति । अटविग्गहणेन अटविवासिनो वुत्ता “सब्बो गामो आगतो”तिआदीसु वियाति आह “अटवीति चेत्थ अटविवासिनो चोरा वेदितब्बा”ति । एतेति अटविवासिनो चोरा । एतं वुत्तन्ति “अटविसङ्कोपो”ति इदं वुत्तं । ठानगमनादिइरियापथचक्कसमङ्गिनो इरियापथचक्कसमारुह्हा नाम होन्तीति आह “इरियापथचक्कम्पि वट्टती”ति । इरियापथोयेव पवत्तनट्टेन चक्कन्ति इरियापथचक्कं ।

परियायन्तीति परितो तेन तेन दिसाभागेन गच्छन्ति । तेनाह “इतो चितो च गच्छन्ती”ति । मातुपेमेन गन्तुं अविसहित्वा अत्तनो सन्तिकं आगच्छन्तं । अत्तसिनेहस्स बलवभावतो मातरम्पि अनपेक्खित्वा “अत्तानंयेव रक्खिस्सामी”ति गच्छन्तं । एकस्मिं ठाने निलीनन्ति वुत्तनयेनेव गन्त्वा एकस्मिं खेमे पदेसे निसिन्नं । कुल्ले वातिआदीसु कूलं परतीरं वहति पापेतीहि कुल्लो, तरणत्थाय वेळुनळादीहि कलापं कत्वा बद्धो । पत्थरित्वा बद्धो पन उळुम्पो, चाटिआदि मत्तिकाभाजनं । वुद्दमानन्ति उदकोधेन अधोसोतं नीयमानं ।

यथावुत्तानि तीणि भयानि समातापुत्तिकानियेव अस्सुतवतो पुथुज्जनस्स वसेन अमातापुत्तिकानि दस्सितानीति आह “एवं परियायतो अमातापुत्तिकानि भयानि दस्सेत्वा”ति ।

भयसुत्तवण्णना निड्डिता ।

३. वेनागपुरसुत्तवण्णना

६४. ततिये एवंनामके जनपदेति यत्थ नामगहणेन कोसलसदस्स रुह्हीसद्वतं दस्सेति । तथा हि कोसला नाम जानपदिनो राजकुमारा, तेसं निवासो एकोपि जनपदो रुह्हीसद्वेन “कोसला”ति वुच्चति । अक्खरचिन्तका हि ईदिसेसु ठानेसु युत्ते विय सलिङ्गवचनानि (पाणिनि १.२.५१) इच्छन्ति । अयमेत्थ रुह्ही यथा अज्जत्थापि “कुरूसु विहरति, अङ्गेसु विहरती”ति च । तब्बिसेसने पन जनपदसद्वे जातिसद्वे एकवचनमेव यथा “कोसलेसु जनपदे”ति । चारिकन्ति चरणं । चरणं वा चारो, सो एव चारिका । तयिदं मग्गगमनं इधाधिप्पेतं, न चुण्णिकगमनमत्तन्ति आह “अब्धानगमनं गच्छन्तो”ति । तं विभागेन दस्सेतुं “चारिका च नामेसा”तिआदि वुत्तं । तत्थ दूरेपीति दूरेपि नातिदूरेपि । सहसा गमनन्ति सीघगमनं । महाकस्सपपच्चुगमनादीसूति आदि-सद्वेन आळवकादीनं अत्थाय गमनं सङ्गण्हाति । भगवा हि महाकस्सपत्थेरं पच्चुगगच्छन्तो मुहुत्तेन तिगावुत्तमग्गममासि । आळवकस्सत्थाय तिसयोजनं, तथा अङ्गुलिमालस्स, पुक्कुसातिस्स पन पज्जचत्तालीसयोजनं, महाकप्पिनस्स वीसयोजनसत्तं, धनियस्सत्थाय सत्त योजनसतानि, धम्मसेनापतिनो

सद्धिविहारिकस्स वनवासिस्स तिस्ससामणेरस्स तिगावुताधिकं वीसयोजनसतं अगमासि । इमं सन्धायाति इमं अतुरितचारिकं सन्धाय ।

उपलभिसूति एत्थ सवनवसेन उपलभिसूति इममत्थं दस्सेन्तो “सोतद्वार...पे०... जानिसू”ति आह । सब्बम्पि वाक्यं अवधारणफलत्ता अन्तोगधावधारणन्ति आह “पदपूरणमत्ते वा निपातो”ति । अवधारणत्थेनाति पन इमिना इट्ठत्थतोवधारणत्थं खो-सद्दग्गहणन्ति दस्सेति । अस्सोसीति पदं खो-सद्दे गहिते तेन फुल्लितमण्डितविभूसितं विय होन्तं पूरितं नाम होति, तेन च पुरिमपच्छिमपदानि संसिलिड्डानि नाम होन्ति, न तस्मिं अगगहितेति आह “पदपूरणेन व्यञ्जनसिलिड्डतामत्तमेवा”ति । मत्तसद्दो विसेसनिवत्तिअत्थो । तेनस्स अनत्थन्तरदीपनता दस्सिता होति, एवसद्देन पन व्यञ्जनसिलिड्डताय एकन्तिकता ।

समितपापत्ताति अच्चन्तं अनवसेसतो सवासनं समितपापत्ता । एवज्झि बाहिरकवीतरागसेक्खासेक्खपापसमनतो भगवतो पापसमनं विसेसितं होति । तेनस्स यथाभूतगुणाधिगतमेतं नामं यदिदं समणोति दीपेति । अनेकत्थत्ता निपातानं इध अनुस्सवत्थो अधिप्पेतोति आह “खलूति अनुस्सवत्थे निपातो”ति । आलपनमत्तन्ति पियालापवचनमत्तं । पियसमुदाहारा हेते “भो”ति वा “आवुसो”ति वा “देवानं पिया”ति वा । गोत्तवसेनाति एत्थ गं तायतीति गोत्तं । गोतमोति हि पवत्तमानं वचनं बुद्धिञ्च तायति एकंसिकविसयताय रक्खतीति गोत्तं । यथा हि बुद्धि आरम्भणभूतेन अत्थेन विना न वत्तति, तथा अभिधानं अभिधेय्यभूतेन, तस्मा सो गोत्तसङ्घातो अत्थो तानि तायति रक्खतीति वुच्चति । को पन सोति? अञ्जकुलपरम्परासाधारणं तस्स कुलस्स आदिपुरिससमुदागतं तंकुलपरियापन्नसाधारणं सामञ्जरूपन्ति दट्ठब्बं । एत्थ च समणोति इमिना परिरक्खकजनेहि भगवतो बहुमतभावो दस्सितो समितपापताकित्तनतो । गोतमोति इमिना लोकियजनेहि उच्चाकुलसम्भूतता दीपिता तेन उदितोदितविपुलखत्तियकुलविभावनतो । सब्बखत्तियानज्झि आदिभूतमहासम्मत्तमहाराजतो पट्ठाय असम्भिन्नं उळारतमं सक्कराजकुलं ।

केनच पारिजुञ्जेनाति जातिपारिजुञ्जभोगपारिजुञ्जादिना केनचिपि पारिजुञ्जेन परिहानिया अनभिभूतो अनज्झोत्थटो । तथा हि तस्स कुलस्स न किञ्चि पारिजुञ्जं लोकनाथस्स अभिजातियं, अथ खो वड्डियेव । अभिनिक्खमने च ततोपि समिद्धतमभावो लोके पाकटो पञ्जातोति । सक्ककुला पब्बजितोति इदं वचनं भगवतो सद्दुपपब्बजितभावदीपनं वुत्तं महन्तं जातिपरिवट्टं महन्तञ्च भोगक्खन्धं पहाय पब्बजितभावसिद्धितो ।

इत्थम्भूताख्यानत्थेति इत्थं एवंपकारो भूतो जातोति एवं कथनत्थे । उपयोगवचनन्ति “अब्भुगतो”ति एत्थ अभि-सद्दो इत्थम्भूताख्यानत्थजोतको, तेन योगतो “तं खो पन भवन्त”न्ति इदं सामिअत्थे उपयोगवचनं । तेनाह “तस्स खो पन भोतो गोतमस्साति अत्थो”ति । कल्याणगुणसमन्नागतोति कल्याणेहि गुणेहि युत्तो, तन्निस्सितो तब्बिसयतायाति अधिप्पायो । सेट्ठोति एत्थापि एसेव नयो । किच्चेतब्बतो कित्ति, सा एव सद्दनीयतो सद्दोति आह “कित्तिसद्दोति कित्तियेवा”ति । अभित्थवनवसेन पवत्तो सद्दो थुतिघोसो । सदेवकं लोकं अज्झोत्थरित्वा उगगतोति अनञ्जसाधारणे गुणे आरब्ध पवत्तत्ता सदेवकं लोकं अज्झोत्थरित्वा अभिभवित्वा उगगतो ।

सो भगवाति यो सो समतिस पारमियो पूरेत्वा सब्बकिलेसे भज्जित्वा अनुत्तरं सम्मासम्बोधिं अभिसम्बुद्धो देवानं अतिदेवो सक्कानं अतिसक्को ब्रह्मानं अतिब्रह्मा लोकनाथो भाग्यवन्ततादीहि कारणेहि सदेवके लोके “भगवा”ति पत्थट्ठकित्तिसद्दो, सो भगवा । “भगवा”ति च इदं सत्थु नामकित्तनं । तेनाह आयस्मा धम्मसेनापति “भगवाति नेतं नामं मातरा कत”न्तिआदि (महानि० ८४) । परतो पन भगवाति गुणकित्तनं । यथा कम्मट्ठानिकेन “अरह”न्तिआदीसु नवसु

ठानेसु पच्चेकं इति-सदं योजेत्वा बुद्धगुणा अनुस्सरियन्ति, एवं बुद्धगुणसंकित्तेनेनपीति दस्सेन्तो “इतिपि अरहं इतिपि सम्मासम्बुद्धो...पे०... इतिपि भगवा”ति आह । “इतिपेतं भूतं इतिपेतं तच्छ”न्तिआदीसु (दी० नि० १.६) विय इध इतिसदो आसन्नपच्चक्खकरणत्थो, पि-सदो सम्पिण्डनत्थो, तेन च तेसं गुणानं बहुभावो दीपितो, तानि च संकित्तेन्तेन विज्जुना चित्तस्स सम्मुखीभूतानेव कत्वा संकित्तेतब्बानीति दस्सेन्तो “इमिना च इमिना च कारणेनाति वुत्तं होती”ति आह । एवं निरूपेत्वा कित्तेन्तो यो कित्तेति, तस्स भगवति अतिविय अभिप्पसादो होति ।

आरकत्ताति सुविदूरत्ता । अरीनन्ति किलेसारीनं । अरानन्ति संसारचक्कस्स अरानं । हतत्ताति विद्धंसितत्ता । पच्चयादीनन्ति चीवरादिपच्चयानञ्चेव पूजाविसेसानञ्च । ततोति विसुद्धिमग्गतो (विसुद्धि० १.१२५-१२७) । यथा च विसुद्धिमग्गतो, एवं तंसंवण्णनातोपि नेसं वित्थारो गहेतब्बो ।

इमं लोकन्ति नयिदं महाजनस्स सम्मुखमत्तं सन्धाय वुत्तं, अथ खो अनवसेसं परियादायाति दस्सेतुं “सदेवक”न्तिआदि वुत्तं । तेनाह “इदानी वत्तब्बं निदस्सेती”ति । पजातत्ताति यथासकं कम्मकिलेसेहि निब्बत्तत्ता । पच्चकामावचरदेवग्गहणं पारिसेसनयेन इतरेसं पदन्तरेन गहितत्ता । सदेवकन्ति च अवयवेन विग्गहो समुदायो समासत्थो । छट्टुकामावचरदेवग्गहणं पच्चासत्तिनयेन । तत्थ हि सो जातो तन्निवासी च । सब्रह्मकवचनेन ब्रह्मकायिकादिब्रह्मग्गहणन्ति एत्थापि एसेव नयो । पच्चत्थिकसमणब्राह्मणग्गहणन्ति निदस्सनमत्तमेतं अपच्चत्थिकानं समितबाहितपापानञ्च समणब्राह्मणानं समणब्राह्मणवचनेन गहितत्ता । कामं “सदेवक”न्तिआदिविसेसनानं वसेन सत्तविसयो लोकसदोति विज्जायति तुल्ययोगविसयत्ता तेसं, “सलोमको सपक्खको”तिआदीसु पन अतुल्ययोगेपि अयं समासो लब्धतीति ब्यभिचारदस्सनतो पजागहणन्ति आह “पजावचनेन सत्तलोकग्गहण”न्ति ।

अरूपिनो सत्ता अत्तनो आनेज्जविहारेन विहरन्ता दिब्बन्तीति देवाति इमं निब्बचनं लभन्तीति आह “सदेवकग्गहणेन अरूपावचरलोको गहितो”ति । तेनाह “आकासानञ्चायतनूपगानं देवानं सहब्यत”न्ति (अ० नि० ३.११७) । समारकग्गहणेन छकामावचरदेवलोको गहितो तस्स सविसेसं मारस्स वसे वत्तनतो । सब्रह्मकग्गहणेन रूपीब्रह्मलोको गहितो अरूपीब्रह्मलोकस्स गहितत्ता । चतुपरिसवसेनाति खत्तियादिचतुपरिसवसेन । इतरा पन चतस्सो परिसा समारकादिग्गहणेन गहिता एवाति । अवसेससत्तलोको नागगरुळादिभेदो । तीहाकारेहीति देवमारब्रह्मसहिततासङ्घातेहि तीहि पकारेहि । तीसु पदेसूति “सदेवक”न्तिआदीसु तीसु पदेसु । तेन तेनाकारेनाति सदेवकत्तादिना तेन तेन पकारेन । तेधातुकमेव परियादिन्नन्ति पोराणा आहूति योजना ।

अभिज्जाति यकारलोपेनायं निद्देसो, अभिजानित्वाति अयमेत्थ अत्थोति आह “अभिज्जाय अधिकेन जाणेन जत्वा”ति । अनुमानादिपटिक्खेपोति अनुमानअत्थापत्तिआदिप्पटिक्खेपो एकप्पमाणत्ता । सब्बत्थ अप्पटिहतजाणचारताय हि सब्बपच्चक्खा बुद्धा भगवन्तो ।

अनुत्तरं विवेकसुखन्ति फलसमापत्तिसुखं । तेन विमिस्सापि कदाचि भगवतो धम्मदेसना होतीति “हित्वापी”ति पि-सद्दग्गहणं । भगवा हि धम्मं देसेन्तो यस्मिं खणे परिसा साधुकारं वा देति, यथासुतं वा धम्मं पच्चवेक्खति, तं खणं पुब्बभागेन परिच्छिन्दित्वा फलसमापत्तिं समापज्जति, यथापरिच्छेदञ्च समापत्तितो वुट्ठाय ठितट्ठानतो पट्ठाय धम्मं देसेति । अप्पं वा बहुं वा देसेन्तोति उग्घटितज्जुस्स वसेन अप्पं वा, विपज्जितज्जुस्स नेय्यस्स वा वसेन बहुं वा देसेन्तो । धम्मस्स कल्याणता च निय्यानिकता च सब्बसो अनवज्जभावेनेवाति आह “अनवज्जमेव कत्वा”ति ।

देसकायत्तेन आणादिविधिना अतिसज्जनं पबोधनं देसनाति सा परियत्तिधम्मवसेन वेदितब्बाति आह “**देसनाय ताव चातुप्पदिकगाथायपी**”तिआदि । निदाननिगमानिपि सत्थु देसनाय अनुविधानतो तदन्तोगधानि एवाति आह “**निदानं आदि, इदमवोचाति परियोसानं**”न्ति ।

सासितब्बपुगलगतनेन यथापराधादिसासितब्बभावेन अनुसासनं तदङ्गविनयादिवसेन विनयनं सासनन्ति तं पटिपत्तिधम्मवसेन वेदितब्बन्ति आह “**सीलसमाधिविपस्सना**”तिआदि । **कुसलानन्ति** अनवज्जधम्मानं सीलसमथविपस्सनानं सीलदिट्ठीनञ्च आदिभावो तंमूलिकत्ता उत्तरिमनुस्सधम्मानं । अरियमग्गस्स अन्तद्वयविगमेन मज्झिमापटिपदाभावो विय सम्मापटिपत्तिया आरब्ध निब्बत्तीनं वेमज्झतापि मज्झभावोति वुत्तं “**अत्थि, भिक्खवे...पे०... मज्झिमं नामा**”ति । **फलं परियोसानं नाम** सउपादिसेसतावसेन । **निब्बानं परियोसानं नाम** अनुपादिसेसतावसेन । इदानीं तेसं द्विन्नम्पि सासनस्स परियोसानतं आगमेन दस्सेतुं “**तस्मातिह त्वं**”न्तिआदि वुत्तं । “सात्थं सब्यञ्जनं”न्तिआदिवचनतो धम्मदेसनाय आदिमज्झपरियोसानं अधिप्पेतन्ति आह “**इध...पे०... अधिप्पेत**”न्ति । तस्मिं तस्मिं अत्थे कथावधिसहप्पबन्धो गाथावसेन सुत्तवसेन च ववत्थितो परियत्तिधम्मो, सो इध देसनाति वुत्तो, तस्स पन अत्थो विसेसतो सीलादि एवाति आह “**भगवा हि धम्मं देसेन्तो...पे०... दस्सेती**”ति । तत्थ **सीलं दस्सेत्वा**ति सीलग्गहणेन ससम्भारं सीलं गहितं, तथा मग्गगहणेन ससम्भारो मग्गोति तदुभयवसेन अनवसेसतो परियत्तिअत्थं परियादाय तिट्ठति । **तेनाति** सीलादिदस्सनेन । अत्थवसेन हि इध देसनाय आदिकल्याणादिभावो अधिप्पेतो । **कथिकसण्ठितीति** कथिकस्स सण्ठानं कथनवसेन समवट्ठानं ।

न सो सात्थं देसेति निव्यानत्थविरहतो तस्सा देसनाय । **एकव्यञ्जनादियुत्ता वा**ति सिथिलादिभेदेसु व्यञ्जनेसु एकप्पकारेनेव द्विप्पकारेनेव वा व्यञ्जनेन युत्ता दमिळभासा विय । विवटकरणताय ओट्टे अफुसापेत्वा उच्चारेतब्बतो **सब्बनिरोट्टव्यञ्जना वा** किरातभासा विय । सब्बस्सेव विस्सज्जनीययुत्ताय **सब्बविस्सट्टव्यञ्जना वा** यवनभासा विय । सब्बस्सेव सानुसारताय **सब्बनिग्गहितव्यञ्जना वा** पारसिकादिमिलक्खभासा विय । सब्बापेसा व्यञ्जनेकदेसवसेनेव पवत्तिया अपरिपुण्णव्यञ्जनाति कत्वा “**अव्यञ्जना**”ति वुत्ता ।

ठानकरणानि सिथिलानि कत्वा उच्चारेतब्बं अक्खरं पञ्चसु वग्गेसु पठमततियन्ति एवमादि **सिथिलं** । तानि असिथिलानि कत्वा उच्चारेतब्बं अक्खरं वग्गेसु दुतियचतुत्थन्ति एवमादि **धनितं** । द्विमत्तकालं **दीघं** । एकमत्तकालं **रस्सं** । तदेव लहुकं **लहुकमेव** । संयोगपरं दीघञ्च **गरुक्कं** । ठानकरणानि निग्गहेत्वा उच्चारेतब्बं **निग्गहितं** । परेन सम्बन्धं कत्वा उच्चारेतब्बं **सम्बन्धं** । तथा न सम्बन्धं **ववत्थितं** । ठानकरणानि विस्सट्ठानि कत्वा उच्चारेतब्बं **विमुत्तं** । **दसथा व्यञ्जनबुद्धिया पभेदोति** एवं सिथिलादिवसेन व्यञ्जनबुद्धिया अक्खरुप्पादकचित्तस्स दसप्पकारेन पभेदो । सब्बानि हि अक्खरानि चित्तसमुट्ठानानि यथाधिप्पेतत्थव्यञ्जनतो व्यञ्जनानि च ।

अमक्खेत्वाति अमिलेच्छेत्वा, अविनासेत्वा, अहापेत्वाति अत्थो । भगवा यमत्थं जापेतुं एकगाथं एकवाक्यम्पि देसेति, तमत्थं तां देसनाय परिमण्डलपदव्यञ्जनाय एव देसेतीति आह “**परिपुण्णव्यञ्जनमेव कत्वा धम्मं देसेती**”ति । इध **केवलसद्दो** अनवसेसवाचको, न अवोमिस्सतादिवाचकोति आह “**सकलाधिवचनं**”न्ति । **परिपुण्णन्ति** सब्बसो पुण्णं । तं पन किञ्चि ऊनं वा अधिकं वा न होतीति “**अनूनाधिकवचनं**”न्ति वुत्तं । तत्थ यदत्थं देसितं, तस्स साधकत्ता अनूनता वेदितब्बा, तब्बिधुरस्स पन असाधकत्ता अनधिकता । **सकलन्ति** सब्बभागवन्तं । **परिपुण्णमेवाति** सब्बसो परिपुण्णमेव । तेनाह “**एकदेसनापि अपरिपुण्णा नत्थी**”ति । **अपरिसुद्धा देसना नाम** होति तण्हासंकिलेसत्ता ।

लोकामिसं चीवरादयो पच्चया, तत्थ अगधितचित्ताय लोकामिसनिरपेक्खो। हितफरणेनाति हितूपसंहरणेन।
मेत्ताभावनाय मुदुहदयोति मेत्ताभावनाय करुणाय वा मुदुहदयो। उल्लुम्पनसभावसण्ठितेनाति सकलसंकिलेसतो
वट्टदुक्खतो च उद्धरणाकारावट्टितेन चित्तेन, करुणाधिप्पायेनाति अत्थो। तस्माति यस्मा सिक्खत्तयसङ्गहं सकलं सासनं
इध ब्रह्मचरियन्ति अधिप्पेतं, तस्मा। ब्रह्मचरियन्ति इमिना समानाधिकरणानि सब्बपदानि योजेत्वा अत्थं दस्सेन्तो “सो
धम्मं देसेति...पे०... पकासेतीति एवमेत्थ अत्थो दट्ठब्बो”ति आह।

सुन्दरन्ति भद्वकं। भद्वकता च पस्सन्तस्स हितसुखावहभावेन वेदितब्बाति आह “अत्थावहं सुखावह”न्ति। तत्थ
अत्थावहन्ति दिट्ठधम्मिकसम्परायिकपरमत्थसंहितहितावहं। सुखावहन्ति यथावुत्ततिविधसुखावहं। तथानुरूपानन्ति
तादिसानं। यादिसेहि पन गुणेहि भगवा समन्नागतो, तेहि चतुप्पमाणिकस्स लोकस्स सब्बथापि अच्चन्तप्पसादनीयो तेसं
यथाभूतसभावत्ताति दस्सेन्तो “यथारूपो”तिआदिमाह। तत्थ यथाभूत...पे०... अरहतन्ति इमिना
धम्मप्पमाणलूखप्पमाणानं सत्तानं भगवतो पसादावहता दस्सिता, इतरेन इतरेसं। दस्सनमत्तप्पि साधु होतीति एत्थ
कोसियवत्थु कथेतब्बं। उभतोपक्खिकाति मिच्छादिट्ठिसम्मादिट्ठिवसेन उभयपक्खिका। केराटिकाति सठा।

अनेकत्थत्ता निपातानं यावज्जिदन्ति निपातसमुदायो अधिमत्तप्पमाणपरिच्छेदं दीपेतीति आह
“अधिमत्तप्पमाणपरिच्छेदवचनमेत”न्ति। अधिमत्तविप्पसन्नानीति अधिकप्पमाणेन विप्पसन्नानि। विप्पसन्नानीति च
पकतिआकारं अतिक्कमित्वा विप्पसन्नानीति अत्थो। ननु च चक्खादीनं इन्द्रियानं मनोविज्जेय्यत्ता कथं तेन तेसं
विप्पसन्नता विज्जायतीति आह “तस्स ही”तिआदि। तस्साति ब्राह्मणस्स। तेसन्ति चक्खादीनं पज्चन्नं इन्द्रियानं। एवम्पि
मनिन्द्रियेन पतिट्ठितोकासस्स अदिट्ठत्ता कथं मनिन्द्रियस्स विप्पसन्नता तेन विज्जायतीति आह “यस्मा पना”तिआदि।
नयग्गाहपज्जा हेसा तस्स ब्राह्मणस्स। मने विप्पसन्नेयेव होति पसन्नचित्तसमुद्धितरूपसम्पदाहि एव चक्खादीनं
पतिट्ठितोकासस्स पसन्नतासम्भवतो।

जम्बोनदसुवण्णं रत्तवण्णमेव होतीति आह “सुरत्तवण्णस्सा”ति। जम्बोनदसुवण्णस्स घटिकाति
जम्बोनदसुवण्णपिण्डं। इमिना नेक्खन्ति नेक्खप्पमाणजम्बोनदसुवण्णेन कतं अकतभण्डं वुत्तन्ति दस्सेति। नेक्खन्ति वा
अतिरेकपज्चसुवण्णेन कतपिलन्धनं कतभण्डं वुत्तं। तज्झि घट्टनमज्जनक्खमं होतीति। सुवण्णन्ति च पज्चधरणस्स
समज्जा, तस्मा पज्चवीसतिधरणहिरज्जविचितं आभरणं इध नेक्खन्ति अधिप्पेतं। जम्बोनदन्ति महाजम्बुसाखाय
पवत्तनदियं निब्बत्तं। तं किर रतनं रत्तं। सुवण्णाकारे महाजम्बुफलरसे वा पथवियं पविट्ठे सुवण्णङ्कुरा उट्ठहन्ति, तेन
सुवण्णेन कतपिलन्धनन्तिपि अत्थो। सुपरिकम्मकतन्ति सुट्ठु कतपरिकम्मं। सम्पहट्ठन्ति सम्मा पहट्ठं घट्टनादिवसेन
सुकतपरिकम्मं। तेनाह “सुवण्णकार...पे०... सुपरिमज्जितन्ति अत्थो”ति।

वाळरूपानीति आहरिमानि वाळरूपानि। “अकप्पियरूपाकुलो अकप्पियमज्जो पल्लङ्कोति सारसमासे।
रतनचित्रन्ति भित्तिच्छेदादिवसेन रतनचित्रं। रुक्खतूललतातूलपोटकिंतूलानं वसेन तिण्णं तूलानं। उदलोमियं केचीति
सारसमासाचरिया उत्तरविहारिनो च। तथा एकन्तलोमियं। कोसेय्यकट्टिस्समयन्ति कोसेय्यकसटमयं। अजिनचम्मेहीति
अजिनमिगचम्मेहि। तानि किर चम्मानि सुखुमतारानि। तस्मा दुपट्ठतिपट्टानि कत्वा सिब्बन्ति। तेन वुत्तं
“अजिनप्पवेणी”तिआदि।

निकामलाभीति यथिच्छितलाभी। तेनाह “इच्छितिच्छितलाभी”ति। विपुललाभीति उळारलाभी। कसिरन्ति हि
परित्तं वुच्चति, तप्पटिक्खेपेन अकसिरं उळारं। तेनाह “महन्तलाभी”तिआदि।

लद्धा च न कप्पन्तीति सामञ्जेन पटिसिद्धत्ता सब्बथा न कप्पतीति कस्सचि आसङ्का सिया, तन्निवत्तनत्थं “किञ्चि किञ्चि कप्पती”तिआदिमाह । तत्थ सुद्धकोसेय्यन्ति रतनपरिसिब्बनरहितं । एत्थ च “सुद्धकोसेय्यं पन वट्ठती”ति विनये (महाव० अट्ठ० २५४) वुत्तत्ता इधापि एत्तकमेव वुत्तं । दीघनिकायट्ठकथायं (दी० नि० अट्ठ० १.१५) पन “ठपेत्वा तूलिकं सब्बानेव गोनकादीनि रतनपरिसिब्बितानि न वट्ठन्ती”ति वुत्तं । तत्थ “ठपेत्वा तूलिकं”न्ति एतेन रतनसिब्बनरहितापी तूलिका न वट्ठतीति दीपेति । वचनतोति एतेन विनये (चूळव० २९७) वुत्तभावं दस्सेति । एकेन विधानेनाति यथावुत्तमेव विधानं सन्धाय वदति । यदि एवं कस्मा भगवता “लद्धा च न कप्पन्ती”ति सामञ्जेन पटिसेधो कतोति आह “अकप्पियं पन उपादाया”तिआदि ।

पल्लङ्कन्ति एत्थ परि-सद्धो समन्ततोति एतस्मिं अत्थे वत्तति, तस्मा वामूरुं दक्खिणूरुञ्च समं ठपेत्वा उभो पादे अञ्जमञ्जसम्बन्धे कत्वा निसज्जा पल्लङ्कन्ति आह “समन्ततो ऊरुबद्धासन”न्ति । ऊरूनं बन्धनवसेन निसज्जा । पल्लङ्कं आभुजित्वाति च यथा पल्लङ्कवसेन निसज्जा होति, एवं उभो पादे आभुजे समिज्जिते कत्वाति अत्थो । तं पन उभिन्नं पादानं तथा सम्बन्धताकरणन्ति आह “बन्धित्वा”ति । उजुं कायं पणिधायति उपरिमं सरीरं उजुकं ठपेत्वा अट्टारस पिट्टिकण्टके कोटिया कोटिं पटिपादेत्वा । एवहि निसिन्नस्स चम्ममंसन्हारूनि न पणमन्ति । अथस्स या तेसं पणमनपच्चया खणे खणे वेदना उप्पज्जेयुं, ता न उप्पज्जन्ति । तासु अनुप्पज्जमानासु चित्तं एकगं होति, कम्मट्ठानं न परिपतति, वुद्धिं फातिं गच्छति । तेनाह “अट्टारस पिट्टिकण्टके”तिआदि । उजुं कायं ठपेत्वाति उपरिमं कायं उजुकं ठपेत्वा, अयमेव वा पाठो । हेट्ठिमकायस्स हि अनुजुकट्ठपनं निसज्जावचनेनेव बोधितन्ति । उजुं कायन्ति एत्थ काय-सद्धो उपरिमकायविसयो ।

परिमुखन्ति एत्थ परि-सद्धो अभिसद्धेन समानत्थोति आह “कम्मट्ठानाभिमुख”न्ति, बहिद्धा पुथुत्तारम्मणतो निवारेत्वा कम्मट्ठानयेव पुरक्खत्वाति अत्थो । एत्थ यथा “वनन्तञ्जेव पविसामी”तिआदिना भावनानुरूपं सेनासनं दस्सितं, एवं “निसीदामी”ति इमिना अलीनानुद्धच्चपक्खियो सन्तो इरियापथो दस्सितो, “पल्लङ्कं आभुजित्वा”ति इमिना निसज्जाय दळ्ढभावो, “परिमुखं सतिं उपट्ठपेत्वा”ति इमिना आरम्मणपरिगहूपायो । परिगहितनिय्यानन्ति सब्बथा गहितासम्मोसं परिच्चत्तसम्मोसं सतिं कत्वा, परमसतिनेपक्कं उपट्ठपेत्वाति अत्थो । परीति परिगहट्ठो “परिणायिका”तिआदीसु (ध० स० १६.२०) विय । मुखन्ति निय्यानट्ठो “सुज्जतविमोक्ख”न्तिआदीसु (पटि० म० १.२०९-२१०) विय । पटिपक्खतो निग्गमनट्ठो हि निय्यानट्ठो ।

चत्तारि रूपावचरज्झानानि दिब्बभावावहत्ता दिब्बविहारा नाम होन्तीति तदासन्नप्पवत्तचङ्कमोपि तदुपचारतो दिब्बो नाम होतीति आह “चत्तारि हि रूपज्झानानी”तिआदि । समापज्जित्वा चङ्कमन्तस्साति इदञ्च चङ्कमन्तस्स अन्तरन्तरा समापत्तिं समापज्जित्वा उट्ठायुट्ठाय चङ्कमनं सन्धाय वुत्तं । न हि समापत्तिं समापज्जित्वा अवुट्ठितेन सक्का चङ्कमितुं । समापत्तितो वुट्ठाय चङ्कमन्तस्सपि चङ्कमोति इदं पन समापत्तितो वुट्ठित्वा अन्तरन्तरा समापज्जित्वा चङ्कमन्तस्स वसेन वुत्तं । द्वीसु विहारेसूति ब्रह्मविहारे, अरियविहारे च । मेत्ताझानादयो हितूपसंहारादिवसेन पवत्तिया ब्रह्मभूता सेट्ठभूता विहाराति ब्रह्मविहारा । अनञ्जसाधारणत्ता पन अरियानं विहाराति अरियविहारा, चतस्सोपि फलसमापत्तियो । इध पन अरहत्तफलसमापत्तियेव आगता ।

पच्चवेक्खणाय फलसमापत्तिं कथिता समापत्तिं समापज्जित्वा वुट्ठितस्स पच्चवेक्खणासम्भवतो । चङ्कमादयोति फलसमापत्तिं समापन्नस्सपि समापत्तितो वुट्ठितस्सपि चङ्कमट्ठाननिसज्जादयो । अरियचङ्कमादयो होन्ति न पन

पच्चवेकखन्तस्साति अधिप्पायो ।

वेनागपुरसुत्तवण्णना निड्ढिता ।

४. सरभसुत्तवण्णना

६५. चतुत्थे गिज्झा एत्थ सन्तीति गिज्झं, कूटं । तं एतस्साति गिज्झकूटो । गिज्झो वियाति वा गिज्झं, कूटं । तं एतस्साति गिज्झकूटो, पब्बतो । तस्मिं गिज्झकूटे । तेनाह “गिज्झा वा”तिआदि । अचिरपक्कन्तोति एत्थ न देसन्तरपक्कमनं अधिप्पेतं, अथ खो सासनपक्कमनन्ति दस्सेन्तो “इमस्मिं सासने पब्बजित्वा”तिआदिमाह, तेनेव हि “इमस्सा धम्मविनया”ति वुत्तं । लब्भतीति लाभो, चतुन्नं पच्चयानमेतं अधिवचनं । सक्कच्चं कातब्बो दातब्बोति सक्कारो । पच्चया एव हि पणीतपणीता सुन्दरसुन्दरा अभिसङ्खरित्वा कता सक्काराति वुच्चन्ति । सक्कारोति वा सुन्दरकारो, परेहि अत्तनो गारवकिरिया पुप्फादीहि वा पूजा । लाभो च सक्कारो च लाभसक्कारा, ते नट्टा पहीना एतेसन्ति नट्टलाभसक्कारा ।

महालाभसक्कारो उप्पज्जीति तदा किर भगवतो महालाभसक्कारो उप्पज्जि यथा तं चत्तारो असङ्ख्ये पुरितदानपारमिसञ्चयस्स । सब्बदिसासु हि यमकमहामेघो वुड्ढित्वा महोघो विय सब्बपारमियो “एकस्मिं अत्तभावे विपाकं दस्सामा”ति सम्पिण्डिता विय लाभसक्कारमहोघं निब्बत्तयिंसु । ततो ततो अन्नपानयानवत्थमालागन्धविलेपनादिहत्था खत्तियब्राह्मणादयो आगन्त्वा “कहं बुद्धो, कहं भगवा, कहं देवदेवो नरासभो पुरिससीहो”ति भगवन्तं परियेसन्ति, सकटसतेहिपि पच्चये आहरित्वा ओकासं अलभमाना समन्ता गावुत्तप्पमाणम्पि सकटधुरेन सकटधुरं आहच्च तिड्ढन्ति चेव अनुबन्धन्ति च अन्धकविन्दब्राह्मणो विय । यथा च भगवतो, एवं भिक्खुसङ्घस्सपि । वुत्तम्पि चेतं —

“तेन खो पन समयेन भगवा सक्कतो होति गरुकतो मानितो पूजितो अपचितो लाभो चीवरपिण्डपातसेनासनगिलानपच्चयभेसज्जपरिक्खारानं, भिक्खुसङ्घोपि सक्कतो होति... पे०... परिक्खारानं”न्ति (उदा० ३८) ।

तथा —

“यावता खो पन, चुन्द, एतरहि सङ्घो वा गणो वा लोके उप्पन्नो, नाहं, चुन्द, अञ्जं एकं सङ्घम्पि समनुपस्सामि एवंलाभगयसगण्णत्तं यथरिवायं, चुन्द, भिक्खुसङ्घो”ति (दी० नि० ३.१७६) ।

स्वायं भगवतो च सङ्घस्स च उप्पन्नो लाभसक्कारो एकतो हुत्वा द्विन्नं महानदीनं उदकं विय अप्पमेय्यो अहोसि, भगवतो पन भिक्खुसङ्घस्स च उप्पन्नो लाभसक्कारो धम्मस्सपि उप्पन्नोयेव । धम्मधरानज्झि कतो सक्कारो धम्मस्स कतो नाम होति । तेन वुत्तं “तिण्णं रतनानं महालाभसक्कारो उप्पज्जी”ति ।

वुत्तमत्थं पाळिया निदस्सेन्तो “यथाहा”तिआदिमाह । तत्थ सक्कतोति सक्कारप्पत्तो । यस्स हि चत्तारो पच्चये सक्कत्वा सुअभिसङ्खते पणीतपणीते उपनेति, सो सक्कतो । गरुकतोति गरुभावहेतूनं उत्तमगुणानं मत्थकप्पत्तिया अनञ्जसाधारणेन गरुकारेन सब्बदेवमनुस्सेहि पासाणच्छत्तं विय गरुकतो । यस्मिज्झि गरुभावं पच्चुपट्टपेत्वा पच्चये देन्ति, सो गरुकतो । मानितोति सम्पापटिपत्तिया मानितो मनेन पियायितो । ताय हि विञ्जूनं मनापता । पूजितोति माननादिपूजाय

चेव चतुपच्चयपूजाय च पूजितो । यस्स हि सब्बमेतं पूजनञ्च करोन्ति, सो पूजितो । **अपचितो**ति नीचवृत्तिकरणेन अपचितो । सत्थारज्जि दिस्वा मनुस्सा हत्थिक्खन्धादीहि ओतरन्ति, मग्गं देन्ति, अंसकूटतो साटकं अपनेन्ति । आसनतो वुट्ठहन्ति, वन्दन्तीति एवं सो तेहि अपचितो नाम होति ।

अवण्णं पत्थरित्वाति अवण्णं तत्थ तत्थ संकित्तनवसेन पत्थरित्वा । **आवट्टनिमायन्ति** आवट्टेत्वा गहणमायं । आवट्टेति पुरिमाकारतो निवत्तेति अत्तनो वसे वत्तेति एतायाति आवट्टनी, माया, तं आवट्टनिमायं **ओसारेत्वा** परिजप्पेत्वाति अत्थो । **कोटितो पट्टायाति** अन्तिमकोटितो पट्टाय । थद्धकायेन फरुसवाचाय तिण्णं रतनानं अवण्णकथनं अनत्थावहत्ता विससिञ्चनसदिसा होतीति आह “**विसं सिञ्चित्वा**”ति । **अज्जातो**ति आजातो । तेनाह “**जातो**”तिआदि ।

कायङ्गन्ति कायमेव अङ्गं, कायस्स वा अङ्गं, सीसादि । **वाचङ्गन्ति** “होतु, साधू”ति एवमादिवाचाय अवयवं । **एककेनाति** असहायेन । **इमस्स पनत्थस्साति** “चरियं चरणकाले”तिआदिना वुत्तस्स । **यतो यतो गरु धुरन्ति** यस्मिं यस्मिं ठाने धुरं गरु भारिकं होति, अज्जे बलिबद्धा उक्खिपितुं न सक्कोन्ति । **यतो गम्भीरवत्तनीति** वत्तन्ति एत्थाति वत्तनी, दुम्मग्गस्सेतं नामं, यस्मिं ठाने उदकचिक्खल्लमहन्तताय वा विसमच्छिन्नतटभावेन वा मग्गो गम्भीरो होतीति अत्थो । **तदास्सु कण्हं युज्जेन्तीति** अस्सूति निपातमत्तं, तदा कण्हं युज्जेन्तीति अत्थो । यदा धुरञ्च गरु होति मग्गो च गम्भीरो, तदा अज्जे बलिबद्धे अपनेत्वा कण्हमेव युज्जेन्तीति वुत्तं होति । **स्वास्सु तं वहते** धुरन्ति एत्थपि अस्सूति निपातमत्तमेव, सो तं धुरं वहतीति अत्थो ।

गेहवेतनन्ति गेहे निवुट्ठभावहेतु दातब्बं । **काळको नाम नामेनाति** अज्जनवण्णो किरेस, तेनस्स “काळको”ति नामं अकंसु । **काळकं उपसङ्गमित्वा** आहाति काळको किर एकदिवसं चिन्तेसि “महं माता दुग्गता मं पुत्तट्टाने ठपेत्वा दुक्खेन पोसेति, यंनूनाहं भतिं कत्वा इमं दुग्गतभावतो मोचेय्य”न्ति । सो ततो पट्टाय भतिं उपधारेन्तो विचरति । अथ तस्मिं दिवसे गामगोरूपेहि सद्धिं तत्थ समीपे चरति । सत्थवाहपुत्तोपि गोसुत्तवित्तको, सो “अत्थि नु खो एतेसं गुन्नं अन्तरे सकटानि उत्तारेतुं समत्थो उसभाजानीयो”ति उपधारयमानो बोधिसत्तं दिस्वा “अयं आजानीयो सक्खिस्सति महं सकटानि उत्तारेतु”न्ति अज्जासि । तेन तं उपसङ्गमित्वा एवमाह । **सो अज्जेसं...पे०... गेहमेव अगमासीति** तदा किर गामदारका “किं नामेतं काळकस्स गले”ति तस्स सन्तिकं आगच्छन्ति । सो ते अनुबन्धित्वा दूरतोव पलापेन्तो मातु सन्तिकं गतो । तं सन्धायेतं वुत्तं ।

सायन्हसमयन्ति सायन्हकाले । भुम्मत्थे एतं उपयोगवचनं । न हेत्थ अच्चन्तसंयोगो सम्भवति । **पटिसल्लाना वुट्ठितोति** एत्थ तेहि तेहि सद्धिविहारिकअन्तेवासिकउपासकउपासिकादिसत्तेहि चेव रूपारम्मणादिसङ्घारेहि च पटिनिवत्तेत्वा अपसक्कित्वा निलीयनं विवेचनं कायचित्तेहि ततो विवित्तताय पटिसल्लानं कायविवेको, चित्तविवेको च । यो ततो दुविधविवेकतो वुट्ठितो भवङ्गप्पत्तिया सन्नहचारीहि समागमेन च अपेतो । सो पटिसल्लाना वुट्ठितो नाम होति । अयं पन यस्मा पटिसल्लानानं उत्तमतो फलसमापत्तितो वुट्ठासि, तस्मा “**फलसमापत्तितो**”ति वुत्तं । **कायसक्खिनो भविस्सामाति** नामकायेन देसनासम्पटिच्छनवसेन सक्खिभूता भविस्साम । ननु च “पज्जत्ते आसने निसीदी”ति इदं कस्मा वुत्तं । तित्थिया हि भगवतो पटिपक्खा, ते कस्मा तस्स आसनं पज्जापेन्तीति आह “**तथागतो ही**”तिआदि ।

विग्गाहिककथन्ति विग्गाहसंवत्तनिकं सारम्भकथं । **आयाचेय्यासीति** वचीभेदं कत्वा याचेय्यासि । **पत्थेय्यासीति** मनसा आसीसेय्यासि । **पिहेय्यासीति** तस्सेव वेवचनं । **नित्तेजतं आपन्नोति** तेजहानिया नित्तेजभावं आपन्नो, नित्तेजभूतोति अत्थो । ततो एव भिक्खुआदयोपि सम्मुखा ओलोकेतुं असमत्थताय **पत्तक्खन्धो**, पतितक्खन्धोति अत्थो ।

तेनाह “ओनतगीवो”ति । दस्सितधम्मोसूति वुत्तधम्मोसु । वचनमत्तमेव हि तेसं, न पन दस्सनं तादिसस्सेव धम्मस्स अभावतो । भगवतो एव वा “इमे धम्मा अनभिसम्बुद्धा”ति परस्स वचनवसेन दस्सितधम्मोसु । पटिचरिस्सतीति पटिच्छादनवसे चरिस्सति पवत्तिस्सति, पटिच्छादनत्थो एव वा चरति-सद्दो अनेकत्थत्ता धातूनन्ति आह “पटिच्छादेस्सती”ति । अज्जेन वा अज्जन्ति पन पटिच्छादनाकारदस्सनन्ति आह “अज्जेन वा वचनेना”तिआदि ।

तत्थ अज्जं वचनन्ति यं समनुयुज्जन्तेन भगवता परस्स दोसविभावनं वचनं वुत्तं, तं ततो अज्जेनेव वचनेन पटिच्छादेति । “आपत्तिं आपन्नोसी”ति चोदकेन वुत्तवचनं विय “को आपन्नो, किं आपन्नो, किस्मिं आपन्नो, कं भणथ, किं भणथा”तिआदिवचनेन अज्जं आगन्तुककथं आहरन्तो “त्वं इत्थन्नामं आपत्तिं आपन्नोसी”ति पुट्ठो “पाटलिपुत्तं गतोम्ही”ति वत्त्वा पुन “न तव पाटलिपुत्तगमनं पुच्छाम, आपत्तिं पुच्छाम”ति वुत्ते ततो राजगहं गतोम्हि । राजगहं वा याहि ब्राह्मणगेहं वा, आपत्तिं आपन्नोसीति । “तत्थ मे सूकरमंसं लद्ध”न्तिआदीनि वदन्तो विय समनुयुज्जकेन वुत्तवचनतो अज्जं आगन्तुककथं आहरन्तो अपनामेस्सति, विक्खेपं गमयिस्सति । अप्पतीता होन्ति तेन अतुट्ठा असोमनस्सिकाति अपच्चयो, दोमनस्सेतं अधिवचनं । नेव अत्तनो, न परेसं हितं अभिराधयतीति अनभिरद्धि, दोमनस्समेव । तेनेवाह “अपच्चयेन दोमनस्सं वुत्त”न्ति ।

यस्स खो पन ते अत्थाय धम्मो देसितोति एत्थ धम्म-सद्देन चतुसच्चधम्मो वुत्तोति आह “यस्स मग्गस्स वा फलस्स वा अत्थाया”ति । चतुसच्चधम्मो हि मग्गफलाधिगमत्थाय देसीयति । न निग्गच्छतीति न पवत्तेति । नन्ति नं धम्मं । इदानी “यस्स खो पन ते अत्थाय धम्मो देसितो”ति एत्थ धम्म-सद्देन पटिपत्तिधम्मो दस्सितो, न पन चतुसच्चधम्मोति अधिप्पायेन अत्थविकर्षं दस्सेन्तो “अथ वा”तिआदिमाह । पज्ज धम्माति गम्भीरजाणचरियभूतानं खन्धादीनं उग्गहसवनधारणपरिचययोनिमोमनसिकारे सन्धायाह । तक्करस्स सम्मा दुक्खक्खयायाति एत्थ सम्मासद्दो उभयत्थापि योजेतब्बो “सम्मा तक्करस्स सम्मा दुक्खक्खयाया”ति । यो हि सम्मा धम्मं पटिपज्जति, तस्सेव सम्मा दुक्खक्खयो होतीति । यो पन वुत्तनयेन तक्करो, तस्स निव्यानं अत्थतो धम्मस्सेव निव्यानन्ति तप्पटिक्खेपेन “सो धम्मो...पे०... न निव्याति न निग्गच्छती”ति आह ।

यदि तिरच्छानसीहस्स नादो सब्बतिरच्छानएकच्चमनुस्सामनुस्सनादतो सेट्ठत्ता सेट्ठनादो, किमङ्गं पन तथागतसीहस्स नादोति आह “सीहनादन्ति सेट्ठनाद”न्ति । यदि वा तिरच्छानसीहनादस्स सेट्ठनादता निब्भयताय अप्पटिसत्तुताय इच्छिता, तथागतसीहनादस्सेव अयमत्थो सातिसयोति आह “अभीतनादं अप्पटिनाद”न्ति । “अट्ठानमेतं अनवकासो”तिआदिना (म० नि० ३.१२९; अ० नि० १.२६८-२७१) हि यो अत्थो वुत्तो, तस्स भूतताय अयं नादो सेट्ठनादो नाम होति उत्तमनादो । भूतत्थो हि उत्तमत्थोति । इममत्थं पन वदन्तस्स भगवतो अज्जतो भयं वा आसङ्का वा नत्थीति अभीतनादो नाम होति । अभूतज्झि वदतो कुतोचि भयं वा आसङ्का वा सिया, एवं पन वदन्तं भगवन्तं कोचि उट्ठहित्वा पटिबाहितुं समत्थो नाम नत्थीति अयं नादो अप्पटिनादो नाम होति ।

समन्ततो निग्गणहनवसेन तोदनं विज्झनं सन्नितोदकं, सम्मा वा नितुदन्ति पीळेन्ति एतेनाति सन्नितोदकं । वाचायाति च पच्चत्ते करणवचनं । तेनाह “वचनपतोदेना”ति । सज्जम्भरिमकंसूति समन्ततो सम्भरितं अकंसु, सब्बे परिब्बाजका वाचातोदनेहि तुदिंसूति अत्थो । तेनाह “सम्भरितं...पे०... विज्झिंसू”ति । सिङ्गालकंयेवाति सिङ्गालमेव, “सेगालकंयेवा”तिपि पाठो । तस्सेवाति सिङ्गालरवस्सेव । अथ वा भेरण्डकंयेवाति भेदण्डसकुणिसदिसंयेवाति अत्थो । भेदण्डं नाम एको पक्खी द्विमुखो, तस्स किर सद्दो अतिविय विरूपो अमनापो । तेनाह “अपिच भिन्नस्सरं अमनापसदं

नदती”ति । सेसमेत्थ उत्तानमेव ।

सरभसुत्तवण्णना निड्ढिता ।

५. केसमुत्तिसुत्तवण्णना

६६. पञ्चमे केसमुत्तं निवासो एतेसन्ति केसमुत्तियाति आह “केसमुत्तनिगमवासिनो”ति । अट्ठविधपानकानीति अम्बपानादिअट्ठविधानि पानानि ।

“मा अनुस्सवेना”ति आदीसु पन एको दहरकालतो पट्टाय एवं अनुस्सवो अत्थि, एवं चिरकालकताय अनुस्सुतिया लब्धमानं कथमिदं अज्जथा सिया, तस्मा भूतमेतन्ति अनुस्सवेन गण्हाति, तथा गहणं पटिक्खिपन्तो “मा अनुस्सवेना”ति आह । अनु अनु सवनं अनुस्सवो । अपरो “अम्हाकं पितुपितामहादिवुद्धानं उपदेसपरम्पराय इदमाभतं, एवं परम्पराभतकथं नाम न अज्जथा सिया, तस्मा भूतमेत”न्ति गण्हाति, तं पटिक्खिपन्तो “मा परम्पराया”ति आह । एको केनचि किस्मिज्जि वुत्तमत्ते “एवं किर एत”न्ति गण्हाति, तं निसेधेन्तो “मा इतिकिराया”ति आह । पिटकं गन्थो सम्पदीयति एतस्साति पिटकसम्पदानं, गन्थस्स उग्गणहनको । तेन पिटकउग्गणहनकभावेन एकच्चो तादिसं गन्थं पगुणं कत्वा तेन तं समेत्तं समेति, तस्मा “भूतमेत”न्ति गण्हाति, तं सन्धायेस पटिक्खेपो “मा पिटकसम्पदानेना”ति, अत्तनो उग्गहगन्थसम्पत्तिया मा गण्हित्थाति वुत्तं होति । समेतन्ति संगतं ।

कोचि कज्जि वितक्केन्तो “एवमेव तेन भवितब्ब”न्ति केवलं अत्तनो सङ्कप्पवसेन “भूतमिद”न्ति गण्हाति, तं सन्धायेतं वुत्तं “मा तक्कहेतू”ति । अज्जो “इमाय युत्तिया भूतमिद”न्ति केवलं अनुमानतो नयग्गाहेन गण्हाति, तं पटिक्खिपन्तो “मा नयहेतू”ति आह । कस्सचि “एवमेतं सिया”ति परिकप्पेन्तस्स एकं कारणं उपट्ठाति, सो “अत्थेत”न्ति अत्तनो परिकप्पिताकारेण गण्हाति, तं पटिसेधेन्तो “मा आकारपरिवितक्केना”ति आह । अपरस्स चिन्तयतो यथापरिकप्पितं कज्जि अत्थं “एवमेतं न अज्जथा”ति अभिनिविसन्तस्स एका दिट्ठि उप्पज्जति । या यस्स तं कारणं निज्झायन्तस्स पच्चक्खं विय निरूपेत्वा चिन्तेन्तस्स खमति । सो “अत्थेत”न्ति दिट्ठिनिज्झानक्खन्तिया गण्हाति, तं सन्धायाह “मा दिट्ठिनिज्झानक्खन्तिया”ति ।

अकुसलवेरस्साति पाणातिपातादिपञ्चविधं वेरं सन्धाय वदति । कोधो नाम चेतसो दुक्खन्ति आह “कोधचित्तस्स अभावेना”ति । किलेसस्साति चित्तं विबाधेन्तस्स उपतापेन्तस्स उद्धच्चकुक्कुच्चादिकिलेसस्स । सेसमेत्थ उत्तानमेव ।

केसमुत्तिसुत्तवण्णना निड्ढिता ।

६. साळहसुत्तवण्णना

६७. छट्ठे पातो असितब्बभोजनं पातरासं, भुत्तं पातरासं एतेसन्ति भुत्तपातरासा । दासा नाम अन्तोजाता वा धनक्कीता वा करमरानीता वा सयं वा दासब्बं उपगता । भत्तवेतनभता कम्मकारा नाम ।

निच्छातोति एत्थ छातं वुच्चति तण्हा जिघच्छाहेतुताय, सा अस्स नत्थीति निच्छातो । तेनाह “नित्तण्हो”ति । अब्भन्तरे सन्तापकरानं किलेसानन्ति अत्तनो सन्ताने दरथपरिळाहजननेन सन्तापनकिलेसानं । अन्तोतापनकिलेसानं

अभावा सीतो सीतलो भूतो जातोति सीतिभूतो । तेनाह “सीतलीभूतो”ति । मग्गफलनिब्बानसुखानि वा पटिसंवेदेतीति सुखप्पटिसंवेदी । सेसं सुविज्जेय्यमेव ।

साळ्हसुत्तवण्णना निड्ढिता ।

७. कथावत्थुसुत्तवण्णना

६८. सत्तमे कथावत्थूनीति कथाय पवत्तिट्ठानानि । यस्मा तेहि विना कथा न पवत्तति, तस्मा “कथाकारणानी”ति वुत्तं । अतति सतति सततं गच्छति पवत्ततीति अद्धा, कालोति आह “अतीतमद्धानं नाम कालोपि वत्तती”ति । धम्मपवत्तिमत्तताय हि परमत्थतो अविज्जमानोपि कालो तस्सेव धम्मस्स पवत्तिअवत्थाविसेसं उपादाय तेनेव वोहारेन अतीतोतिआदिना वोहरीयति, अतीतादिभेदो च नामायं निप्परियायतो धम्मनंयेव होति, न कालस्साति आह “खन्धापि वत्तन्ती”ति । यथावुत्तमत्थं इतरेसु द्वीसु अतिदिसति “अनागतपच्चुप्पन्नेसुपि एसेव नयो”ति । अतीतमद्धानन्तिआदीसु च द्वे परियाया सुत्तन्तपरियायो, अभिधम्मपरियायो च । सुत्तन्तपरियायेन पटिसन्धितो पुब्बे अतीतो अद्धा नाम, चुतितो पच्छा अनागतो अद्धा नाम, सह चुतिपटिसन्धीति तदन्तरं पच्चुप्पन्नो अद्धा नाम । अभिधम्मपरियायेन तीसु खणेषु उप्पादतो पुब्बे अतीतो अद्धा नाम, उप्पादतो उद्धं अनागतो अद्धा नाम, खणत्तयं पच्चुप्पन्नो अद्धा नाम । तत्थायं सुत्तन्तदेसनाति सुत्तन्तपरियायेनेव अतीतादिविसयं कथं दस्सेन्तो “अतीते कस्सपो नामा”तिआदिमाह ।

एकंसेनेव ब्याकातब्बो विस्सज्जेतब्बोति एकंसव्याकरणीयो । “चक्खु अनिच्च”न्ति पज्हे उत्तरपदावधारणं सन्धाय “एकंसेनेव ब्याकातब्ब”न्ति वुत्तं निच्चताय लेसस्सपि तत्थ अभावतो, पुरिमपदावधारणे पन विभज्जव्याकरणीयताय । तेनाह “अनिच्चं नाम चक्खूति पुट्टेन पना”तिआदि । चक्खुसोते विसेसत्थसामज्जत्थानं असाधारणभावतो द्विन्नं तेसं सदिसचोदना पटिच्छन्नमुखेनेव व्याकरणीया पटिक्खेपवसेन अनुज्जातवसेन च विस्सज्जितब्बतोति आह “यथा चक्खु, तथा सोतं...पे०... अयं पटिपुच्छाव्याकरणीयो पज्हो”ति । तं जीवं तं सरीरन्ति जीवसरीरानं अनज्जतापज्हे यस्स येन अनज्जता चोदिता, सो एव परमत्थतो नुपलब्धतीति च ज्ञानत्तयस्स मेत्तेय्यताकित्तनसदिसोति अब्याकातब्बताय ठपनीयो वुत्तो । एवरूपो हि पज्हो तिधा अविस्सज्जनीयत्ता व्याकरणं अक्त्वा ठपेतब्बो ।

तिट्ठति एत्थ फलं तदायत्तवुत्तितायाति ठानं, कारणन्ति आह “कारणाकारणे”ति । युत्तेन कारणेनाति अनुरूपेन कारणेन । पहातीति निग्गण्हितुं समत्थो होति । सस्सतवादिभावमेव दीपेतीति अत्तना गहिते उच्छेदवादे दोसं दिस्वा अत्तनोपि सस्सतवादिभावमेव दीपेति । पुग्गलवादिम्हीति इमिना वच्छकुत्तियवादिं दस्सेति । पज्हं पुच्छन्तेहि पटिपज्जितब्बा पटिपदा पज्हपुच्छनकानं वत्तं ।

पटिचरतीति पटिच्छादनवसेन चरति पवत्तति । पटिच्छादनत्थो एव वा चरतिसद्दो अनेकत्थत्ता धातूनन्ति आह “पटिच्छादेती”ति । अज्जेनज्जन्ति पन पटिच्छादनाकारदस्सनन्ति आह “अज्जेन वचनेना”तिआदि । तत्थ अज्जेन वचनेनाति यं चोदकेन चुदितकस्स दोसविभावनं वचनं वुत्तं, तं ततो अज्जेन वचनेन पटिच्छादेति । यो हि “आपत्ति आपन्नोसी”ति वुत्ते “को आपन्नो, किं आपन्नो, किस्मिं आपन्नो, कं भणथ, किं भणथा”ति वदति । “एवरूपं किञ्चि तथा दिट्ठ”न्ति वुत्ते “न सुणामी”ति सोतं वा उपनेति, अयं अज्जेनज्जं पटिचरति नाम । “को आपन्नो”तिआदिना हि चोदनं अविस्सज्जेत्वाव विक्खेपापज्जनं अज्जेनज्जं पटिचरणं, बहिद्धा कथापनामनं विस्सज्जेत्वाति अयमेतेसं विसेसो । तेनेवाह “आगन्तुककथं ओतारेन्तो”तिआदि । तत्थ अपनामेतीति विक्खेपेति । तत्राति तस्मिं बहिद्धाकथाय अपनामने ।

उपनिशीदति फलं एत्थाति कारणं उपनिसा, उपेच्च निस्सयतीति वा उपनिसा, सह उपनिसायाति सउपनिसोति आह “सउपनिस्सयो सपच्चयो”ति ।

ओहितसोतीति अनञ्जविहितत्ता धम्मस्सवनाय अपनामितसोतो । ततो एव तदत्थं ठपितसोतो । कुसलधम्मन्ति अरियमग्गो अधिप्पेतोति आह “अरियमग्ग”न्ति ।

कथावत्थुसुत्तवण्णना निड्ढिता ।

८. अञ्जतित्थियसुत्तवण्णना

६९. अट्टमे भगवा मूलं कारणं एतेसं याथावतो अधिगमायाति **भगवंमूलका** । तेनाह “भगवन्तज्झि निस्साय मयं इमे धम्मे आजानाम पटिविज्झामा”ति । **अम्हाकं धम्मा**ति तेहि अत्तना अधिगन्तब्बताय वुत्तं । सेवितब्बासेवितब्बानज्झि याथावतो अधिगमज्जाणानि अधिगच्छनकसम्बन्धीनि, तानि च सम्मासम्बुद्धमूलकानि अनञ्जविसयत्ता । तेनाह “**पुब्बे कस्सपसम्मासम्बुद्धेना**”तिआदि । **इमे धम्मा**ति इमे जाणधम्मा । **आजानामा**ति अभिमुखं पच्चक्खतो जानाम । **पटिविज्झामा**ति तस्सेव वेवचनं, अधिगच्छामाति अत्थो । भगवा नेता एतेसन्ति **भगवंनेत्तिका** । **नेता**ति सेवितब्बधम्मे वेनेय्यसन्तानं पापेता । **विनेता**ति असेवितब्बधम्मे वेनेय्यसन्तानतो अपनेता । तदङ्गविनयादिवसेन वा **विनेता** । अथ वा यथा अलमरियजाणदस्सनविसेसो होति, एवं विसेसतो **नेता** । **अनुनेता**ति “इमे धम्मा सेवितब्बा, इमे न सेवितब्बा”ति उभयसम्पापनापनयनत्थं पज्जापेता । तेनाह “**यथासभावतो**”तिआदि ।

पटिसरन्ति एत्थाति पटिसरणं, भगवा पटिसरणं एतेसन्ति **भगवंपटिसरणा** । आपाथं उपगच्छन्ता हि भगवा पटिसरणं समोसरणट्ठानं । तेनाह “**चतुभूमकधम्मा**”तिआदि । पटिसरति सभावसम्पटिवेधवसेन पच्चकं उपगच्छतीति वा पटिसरणं, भगवा पटिसरणं एतेसन्ति **भगवंपटिसरणा** । पटिसरति पटिविज्झतीति वा पटिसरणं, तस्मा पटिविज्जनवसेन भगवा पटिसरणं एतेसन्ति **भगवंपटिसरणा** । तेनाह “**अपिचा**”तिआदि । **पटिवेधवसेना**ति पटिविज्झितब्बतावसेन । असतिपि मुखे अत्थतो एवं वदन्तो विय होतीति आह “**फस्सो आगच्छति अहं भगवा किन्नामो**”ति । फस्सो जाणस्स आपाथं आगच्छन्तोयेव हि अत्तनो “अहं किन्नामो”ति नामं पुच्छन्तो विय, भगवा चस्स नामं करोन्तो विय होतीति ।

पटिभातूति एत्थ पटिसद्दापेक्खाय “भगवन्त”न्ति उपयोगवचनं, अत्थो पन सामिवचनवसेनेव वेदितब्बोति दस्सेन्तो आह “**भगवतो**”ति । **पटिभातू**ति च भागो होतु । भगवतो हि एस भागो, यदिदं धम्मस्स देसना, अम्हाकं पन भागो सवनन्ति अधिप्पायो । एवज्झि सदलक्खणेन समेति । केचि पन **पटिभातू**ति पदस्स दिस्सतूति अत्थं वदन्ति, जाणेन दिस्सतु, देसीयतूति वा अत्थो । **उपट्टातू**ति जाणस्स पच्चुपतिट्ठतु । पाळियं **को अधिप्पयासो**ति एत्थ को अधिकप्पयोगोति अत्थो ।

लोकवज्जवसेनाति लोकियजनेहि पकतिया गरहितब्बवज्जवसेन । **विपाकवज्जवसेना**ति विपाकस्स अपायसंवत्तनिकवज्जवसेन । **कथन्ति**आदिना उभयवज्जवसेनपि अप्पसावज्जताय विसयं दस्सेति । सेसमेत्थ सुविज्जेय्यमेव ।

अञ्जतित्थियसुत्तवण्णना निड्ढिता ।

९. अकुसलमूलसुत्तवण्णना

७०. नवमे लुब्धतीति लोभो । दुस्सतीति दोसो । मुहतीति मोहो । लोभादीनि पनेतानि असहजातानं पाणातिपातादीनं केसज्जि अकुसलानं उपनिस्सयपच्चयट्ठेन, सहजातानं अदिन्नादानादीनं केसज्जि सम्पयुत्ता हुत्वा उप्पादकट्ठेन, सयज्ज अकुसलानीति सावज्जदुक्खविपाकट्ठेनाति आह “अकुसलानं मूलानि, अकुसलानि च तानि मूलानी”ति । वुत्तम्पि चेत्तं “रत्तो खो, आवुसो, रागेन अभिभूतो परियादिन्नचित्तो पाणम्पि हनती”तिआदि । यदपीति लिङ्गविपल्लासेन वुत्तन्ति आह “योपि, भिक्खवे, लोभो”ति । तदपीति एत्थापि एसेव नयोति आह “सोपि अकुसलमूल”न्ति । विनापि लिङ्गविपल्लासेन अत्थयोजनं दस्सेन्तो “अकुसलमूलं वा”तिआदिमाह । सब्बत्थाति “यदपि, भिक्खवे, दोसो, तदपि अकुसलमूल”न्तिआदीसु । अभिसङ्खरोतीति एत्थ आयूहतीति अत्थं वत्वा तज्ज आयूहनं पच्चयसमवायसिद्धितो सम्पिण्डनं रासिकरणं विय होतीति आह “सम्पिण्डेति रासिं करोती”ति ।

पाळियं “वधेना”तिआदीसु वधेनाति मारणेन वा पोथनेन वा । वधसद्दो हि हिंसनत्थो विहेठनत्थो च होति । बन्धनेनाति अहुबन्धनादिना । जानियाति धनजानिया, “सतं गण्हथ, सहस्सं गण्हथा”ति एवं पवत्तितदण्डेनाति अत्थो । गरहायाति पज्जसिखमुण्डककरणं, गोमयसिञ्चनं, गीवाय कुरण्डकबन्धनन्ति एवमादीनि कत्वा गरहपापनेन । तत्थ पज्जसिखमुण्डककरणं नाम काकपक्खकरणं । गोमयसिञ्चनं सीसेन कणोदकावसेचनं । कुरण्डकबन्धनं गहुलबन्धनं ।

कालस्मिं न वदतीति युत्तकाले न वदति, वत्तब्बकालस्स पुब्बे वा पच्छा वा अयुत्तकाले वत्ता होति । अभूतवादीति यं नत्थि, तस्स वत्ता । तेनाह “भूतं न वदती”ति । अत्थं न वदतीति कारणं न वदति, अकारणनिस्सितं निप्पलं वत्ता होति । धम्मं न वदतीति सभावं न वदति, असभावं वत्ता अयथावादीति अत्थो । विनयं न वदतीति संवरविनयं न वदति, न संवरविनयप्पटिसंयुत्तस्स वत्ता होति, अत्तनो सुणन्तस्स च न संवरविनयावहस्स वत्ताति अत्थो ।

अतच्छन्ति अभूतत्थं । तेनाह “इतरं तस्सेव वेवचन”न्ति । अथ वा अभूतन्ति असन्तं अविज्जमानं । अतच्छन्ति अतथाकारं ।

पुज्जकम्मतो एति उप्पज्जतीति अयो, वट्ठि । तप्पटिक्खेपेन अनयो, अवट्ठीति आह “अनयं आपज्जतीति अवट्ठि आपज्जती”ति । मालुवासिपाटिका नाम दीघसण्ठानं मालुवापक्कं, मालुवाफलपोट्टलिकाति अत्थो । फलितायाति आतपेन सुस्सित्वा भिन्नाय । वटरुक्खादीनं मूलेति वटरुक्खादीनं समीपे । सकभावेन सण्ठातुं न सक्कोन्तीति कस्मा न सक्कोन्ति? भवनविनासभया । रुक्खमूले पतितमालुवाबीजतो हि लता उप्पज्जित्वा रुक्खं अभिरुहति । सा महापत्ता चेव बहुपत्ता च महाकोलिरपत्तसण्ठानेहि ततो च महन्ततरेहि साखाविटपन्तरेहि पत्तेहि समन्नागता । अथ नं रुक्खं मूलतो पट्टाय विनन्धमाना सब्बविटपानि सञ्छादेत्वा महन्तं भारं जनेत्वा तिट्ठति, सा वाते वायन्ते देवे वा वस्सन्ते ओघनहेट्ठागता ओलम्बनहेतुभूतं घनभावं जनेत्वा तस्स रुक्खस्स सब्बसाखं भिज्जति, भूमियं निपातेति । ततो तस्मिं रुक्खे पतिट्ठितविमानं भिज्जति विनस्सति । इति ता देवतायो भवनविनासभया सकभावेन सण्ठातुं न सक्कोन्ति । एत्थ च यं साखट्टकविमानं होति, तं साखासु भिज्जमानासु तत्थ तत्थेव भिज्जित्वा सब्बसाखासु भिन्नासु सब्बं भिज्जति, रुक्खट्टकविमानं पन याव रुक्खस्स मूलमत्तम्पि तिट्ठति, ताव न नस्सतीति वेदितब्बं । तत्थ तत्थ पलुज्जित्वाति तत्थ तत्थ भिज्जित्वा । सेसमेत्थ सुविज्जेय्यमेव ।

अकुसलमूलसुत्तवण्णना निट्ठिता ।

१०. उपोसथसुत्तवण्णना

७१. दसमे तदहूति एत्थ तस्मिं अहनीति अत्थोति आह “तस्मिं अह उपोसथे”ति । उपवसन्ति एत्थाति उपोसथो, उपोसथदिवसो । उपवसन्तीति च सीलेन वा अनसनेन वा खीरसायनादिविधिना वा उपेता हुत्वा वसन्तीति अत्थो । उपोसथदिवसे हि सासनिका सीलेन, बाहिरका सब्बसो आहारस्स अभुञ्जनेन खीरसायनमधुसायनादिविधिना वा उपेता हुत्वा विहरन्ति । सो पनेस उपोसथदिवसो अट्टमिचातुदसिपन्नरसिभेदेन तिविधो, तस्मा सेसद्वयनिवारणत्थं “पन्नरसिकउपोसथदिवसे”ति वुत्तं । ववस्सग्गत्येति वचसायत्ये । दिवसद्वो दिवासद्वो विय दिवसपरियायो, तस्स विसेसनभावेन वुच्चमानो दिवासद्वो सविसेसेन दीपेतीति आह “दिवसस्स दिवा, मज्झन्हिके कालेति अत्थो”ति । पटिच्छापेत्वाति सम्पटिच्छनं कारेत्वा । विपाकफलेनाति सदिसफलेन । न महप्फलो होति मनोदुच्चरितदुस्सील्येन उपक्विकलिट्ठभावतो । विपाकानिसंसेनाति उद्रयफलेन । विपाकोभासेनाति पटिपक्खविगमजनितेन सभावसङ्घातेन विपाकोभासेन । न महाओभासो अपरिसुद्धभावतो । विपाकविष्कारस्साति विपाकवेपुल्लस्स ।

नाहं क्वचनीति आदिवचनस्स मिच्छाभिनिवेसवसेन पवत्तत्ता “इदं तस्स मुसावादस्मिं वदामी”ति पाळियं वुत्तं, चतुकोटिकसुज्जतादस्सनवसेन पवत्तं पन अरियदस्सनमेवाति न तत्थ मुसावादो । वुत्तज्हेतं —

“पुन चपरं, भिक्खवे, अरियसावको इति पटिसज्जिक्खति ‘नाहं क्वचनि, कस्सचि किञ्चनतस्मिं, न च मम क्वचनि, किस्मिञ्चि किञ्चनतत्थी’”ति आदि (म० नि० ३.७०) ।

एत्थ हि चतुकोटिकसुज्जता कथिता । कथं? अरियो (विसुद्धि० २.७६०; म० नि० अट्ठ० ३.७०) हि नाहं क्वचनीति क्वचि अत्तानं न पस्सति, कस्सचि किञ्चनतस्मिन्ति अत्तनो अत्तानं कस्सचि परस्स किञ्चनभावे उपनेतब्बं न पस्सति, भातिकट्टाने भातरं, सहायट्टाने सहायं, परिकखारट्टाने परिकखारं मज्जित्वा उपनेतब्बं न पस्सतीति अत्थो । न च मम क्वचनीति एत्थ मम-सद्वं ताव ठपेत्वा क्वचनि परस्स च अत्तानं क्वचि न पस्सतीति अयमत्थो । इदानीं मम-सद्वं आहरित्वा “मम किस्मिञ्चि किञ्चनतत्थी”ति सो परस्स अत्तानं “मम किस्मिञ्चि किञ्चनभावेन अत्थी”ति न पस्सति, अत्तनो भातिकट्टाने भातरं, सहायट्टाने सहायं, परिकखारट्टाने परिकखारन्ति किस्मिञ्चि ठाने परस्स अत्तानं इमिना किञ्चनभावेन उपनेतब्बं न पस्सतीति अत्थो । एवमयं यस्मा नेव कत्थचि अत्तानं पस्सति, न तं परस्स किञ्चनभावे उपनेतब्बं पस्सति । न कत्थचि परस्स अत्तानं पस्सति, न परस्स अत्तानं अत्तनो किञ्चनभावे उपनेतब्बं पस्सति, तस्मा अयं सुज्जता चतुकोटिकाति वेदितब्बा ।

यस्मा पन मिच्छादिट्ठिकानं याथावदस्सनस्स असम्भवतो यथावुत्तचतुकोटिकसुज्जतादस्सनं न सम्भवति, तस्मा “नत्थि माता, नत्थि पिता”ति आदिवचनं (दी० नि० १.१७१) विय मिच्छागाहवसेन “नाहं क्वचनी”ति आदि वुत्तन्ति युत्तो चेत्थ मुसावादसम्भवो । कत्थचीति ठाने, काले वा । अथ “निप्फलो”ति कस्मा वुत्तं । “न महप्फलो”ति सदेन हि महप्फलाभावोव जोतितो, न पन सब्बथा फलाभावोति आह “व्यञ्जनमेव हि एत्थ सावसेस”न्ति आदि । सेसपदेसुपीति “न महानिसंसो”ति आदीसुपि ।

अट्ठहि कारणेहीति —

“अथ खो, भन्ते, सक्को देवानमिन्दो देवानं तावतिसानं भगवतो अट्ठ यथाभुच्चे वण्णे पयिरुदाहासि — तं

किं मञ्जन्ति, भोन्तो देवा तावतिसा, यावच्च सो भगवा बहुजनहिताय पटिपन्नो बहुजनसुखाय लोकानुकम्पाय अत्थाय हिताय सुखाय देवमनुस्सानं, एवं बहुजनहिताय पटिपन्नं बहुजनसुखाय लोकानुकम्पाय अत्थाय हिताय सुखाय देवमनुस्सानं इमिनापङ्गेन समन्नागतं सत्थारं नेव अतीतसे समनुपस्सामि, न पनेतरहि अञ्जत्र तेन भगवता”ति —

आदिना महागोविन्दसुत्ते (दी० नि० २.२९६) वित्थारितेहि बहुजनहिताय पटिपन्नादीहि बुद्धानुभावदीपकेहि अट्टहि कारणेहि । अथ “नवहि कारणेही”ति अवत्वा “अट्टहि कारणेही”ति कस्मा वुत्तन्ति आह “एत्थ हि...पे०... सब्बे लोकियलोकुत्तरा बुद्धगुणा सङ्गहिता”ति । इदं वुत्तं होति — इमस्मिं सुत्ते “इतिपि सो भगवा”ति इमिना वचनेन अविसेसतो सब्बेपि लोकियलोकुत्तरा बुद्धगुणा दीपिता, तस्मा तेन दीपितगुणे सन्धाय “अट्टहि कारणेही”ति वुत्तन्ति । अरहन्तिआदीहि पाटियेक्कगुणाव निद्विद्धाति अरहन्तिआदीहि एकेकेहि पदेहि एकेके गुणाव निद्विद्धाति अत्थो ।

सहत्तन्तिकन्ति पाळिधम्मसहितं । पुरिमनयेनेव योजना कातब्बाति “किलिडुस्मिज्जि काये पसाधनं पसाधेत्वा नक्खत्तं कीळमाना न सोभन्ती”तिआदिना नयेन योजना कातब्बाति अत्थो ।

सङ्घस्स अनुस्सरणं नाम तस्स गुणानुस्सरणमेवाति आह “अट्टन्नं अरियपुग्गलानं गुणे अनुस्सरती”ति । द्वे तयो वारे गाहापितं उसुमन्ति द्वे तयो वारे उद्धनं आरोपेत्वा सेदनवसेन गाहापितं उसुमं । पुरिमनयेनेव योजना कातब्बाति “किलिडुस्मिज्जि वत्थे पसाधनं पसाधेत्वा नक्खत्तं कीळमाना न सोभन्ती”तिआदिना नयेन योजना कातब्बा ।

पहीनकालतो पट्टाय...पे०... विरतावाति एतेन पहानहेतुका इधाधिप्पेता विरतीति दस्सेति । कम्मक्खयकरजाणेन हि पाणातिपातदुस्सील्यस्स पहीनत्ता अरहन्तो अच्चन्तमेव ततो पटिविरताति वुच्चति समुच्छेदवसेन पहानविरतीनं अधिप्पेतत्ता । किञ्चापि पहानविरमणानं पुरिमपच्छिमकालता नत्थि, मग्गधम्मानं पन सम्मादिट्ठिआदीनं सम्मावाचादीनञ्च पच्चयपच्चयुप्पन्नभावे अपेक्खिते सहजातानम्पि पच्चयपच्चयुप्पन्नभावेन गहणं पुरिमपच्छिमभावेनेव होतीति, गहणप्पवत्तिआकारवसेन पच्चयभूतेसु सम्मादिट्ठिआदीसु पहायकधम्मेसु पहानकिरियाय पुरिमकालवोहारो, पच्चयुप्पन्नासु च विरतीसु विरमणकिरियाय अपरकालवोहारो च होतीति पहानं वा समुच्छेदवसेन, विरति पटिप्पस्सद्विवसेन योजेतब्बा ।

अथ वा पाणो अतिपातीयति एतेनाति पाणातिपातो, पाणघातहेतुभूतो धम्मसमूहो । को पन सो? अहिरिकानोत्तप्पदोसमोहविहिंसादयो किलेसा । ते हि अरहन्तो अरियमग्गेन पहाय समुग्घातेत्वा पाणातिपातदुस्सील्यतो अच्चन्तमेव पटिविरताति वुच्चन्ति, किलेसेसु पहीनेसु किलेसनिमित्तस्स कम्मस्स अनुप्पज्जनतो । अदिन्नादानं पहायातिआदीसुपि एसेव नयो । विरतावाति अवधारणेन तस्सा विरतिया कालादिवसेन अपरियन्ततं दस्सेति । यथा हि अञ्जे समादिन्नविरतिकापि अनवट्ठितचित्तताय लाभजीवितादिहेतु समादानं भिन्दन्ति, न एवं अरहन्तो, अरहन्तो पन सब्बसो पहीनपाणातिपातत्ता अच्चन्तविरता एवाति ।

दण्डनसङ्घातस्स परविहेठनस्स च परिवज्जनभावदीपनत्थं दण्डसत्थानं निक्खेपवचनन्ति आह “परूपघातत्थाया”तिआदि । लज्जीति एत्थ वुत्तलज्जाय ओत्तप्पम्पि वुत्तमेवाति दट्ठब्बं । न हि पापजिगुच्छनपापुत्तासरहितं, पापभयं वा अलज्जनं अत्थीति । धम्मगरुताय वा अरहन्तानं धम्मस्स च अत्ता धीनत्ता अत्ताधिपतिभूता लज्जाव वुत्ता, न पन लोकाधिपति ओत्तप्पं । “दयं मेत्तचित्ततं आपन्ना”ति कस्मा वुत्तं, ननु दया-सहो

“अदयापन्नो”ति आदीसु करुणाय पवत्ततीति? सच्चमेतं, अयं पन दया-सद्दो अनुरक्खणत्थं अन्तोनीतं कत्वा पवत्तमानो मेत्ताय करुणाय च पवत्ततीति इध मेत्ताय पवत्तमानो वुत्तो । मिज्जति सिनिह्मतीति मेत्ता, मेत्ता एतस्स अत्थीति मेत्तं, मेत्तं चित्तं एतस्साति मेत्तचित्तो, तस्स भावो **मेत्तचित्तता**, मेत्ताइच्चेव अत्थो ।

सब्बपाणभूतहितानुकम्पीति एतेन तस्सा विरतिया पवत्तवसेन अपरियन्ततं दस्सेति । **पाणभूते**ति पाणजाते । **अनुकम्पका**ति करुणायनका, यस्मा पन मेत्ता करुणाय विसेसपच्चयो होति, तस्मा वुत्तं “**ताय एव दयापन्नताया**”ति । एवं येहि धम्मोहि पाणातिपाता विरति सम्पज्जति, तेहि लज्जामेत्ताकरुणाधम्मोहि समङ्गिभावो दस्सितो ।

परपरिगहितस्स आदानन्ति परसन्तकस्स आदानं । थेनो वुच्चति चोरो, तस्स भावो **थेय्यं**, कामञ्चेत्थ “लज्जी दयापन्नो”ति न वुत्तं, अधिकारवसेन पन अत्थतो वुत्तमेवाति दट्ठब्बं । यथा हि लज्जादयो पाणातिपातप्पहानस्स विसेसपच्चया, एवं अदिन्नादानप्पहानस्सपीति, तस्मा सापि पाळि आनेत्वा वत्तब्बा । एस नयो इतो परेसुपि । अथ वा **सुचिभूतेना**ति एतेन हिरोत्तप्पादीहि समन्नागमो, अहिरिकादीनञ्च पहानं वुत्तमेवाति “लज्जी”ति आदि न वुत्तन्ति दट्ठब्बं ।

असेट्टचरियन्ति असेट्टानं हीनानं, असेट्टं वा लामकं चरियं, निहीनवुत्तिं मेथुनन्ति अत्थो । **ब्रह्मं सेट्टं आचारन्ति** मेथुनविरतिमाह । **आराचारी मेथुना**ति एतेन — “इधेकच्चो न हेव खो मातुगामेन सद्धिं द्वयंद्वयसमापत्तिं समापज्जति, अपिच खो मातुगामस्स उच्छादनपरिमदनन्हापनसम्बाहनं सादियति, सो तं अस्सादेति, तं निकामेति, तेन च वित्तिं आपज्जती”ति आदिना (अ० नि० ७.५०) वुत्ता सत्तविधमेथुनसंयोगापि पटिविरति दस्सिताति दट्ठब्बं ।

“सच्चतो थेततो”ति आदीसु (म० नि० १.१९) विय **थेत**-सद्दो थिरपरियायो, थिरभावो च सच्चवादिताय ठितकथत्ता कथावसेन वेदितब्बोति आह “**ठितकथाति अत्थो**”ति । न **ठितकथो**ति यथा हलिदिरागादयो अनवट्टितसभावताय न ठिता, एवं न ठिता कथा यस्स सो न ठितकथोति हलिदिरागादयो यथा कथाय उपमा होन्ति, एवं योजेतब्बं । एस नयो “**पासाणलेखा विया**”ति आदीसुपि । सद्दा अयति पवत्तति एत्थाति सद्दाया, सद्दाया **एव सद्दायिका** यथा वेनयिका । सद्दाय वा अयितब्बा **सद्दायिका**, सद्देय्याति अत्थो । **वत्तब्बतं आपज्जति** विसंवादनतोति अधिप्पायो ।

एकं भत्तं एकभत्तं, तं एतेसमत्थीति **एकभत्तिका**, एकस्मिं दिवसे एकवारमेव भुज्जनका । तयिदं रत्तिभोजनेनपि सियाति आह “**रत्तूपरता**”ति । एवम्पि सायन्हभोजनेनपि सियुं एकभत्तिकाति तदासङ्कानिवत्तनत्थं “**विरता विकालभोजना**”ति वुत्तं । अरुणुगमनतो पट्टाय याव मज्झन्हिका अयं बुद्धानं अरियानं आचिण्णसमाचिण्णो भोजनस्स कालो नाम, तदञ्जो विकालो । अट्ठकथायं पन दुतियपदेन रत्तिभोजनस्स पटिक्खित्तत्ता अपरण्हो “विकालो”ति वुत्तो ।

सङ्खेपतो “सब्बपापस्स अकरण”न्ति आदिनयप्पवत्तं (दी० नि० २.९०; ध० प० १८३) भगवतो सासनं सच्छन्दरागप्पवत्तितो नच्चादीनं दस्सनं न अनुलोमेतीति आह “**सासनस्स अननुलोमत्ता**”ति । अत्तना पयोजियमानं परेहि पयोजापीयमानञ्च नच्चं नच्चभावसामञ्जतो पाळियं एकेनेव नच्चसद्देन गहितं, तथा गीतवादितसद्दा चाति आह “**नच्चननच्चापनादिवसेना**”ति । **आदि**-सद्देन गायनगायापनवादनवादापनानि सङ्गण्हाति । दस्सनेन चेत्थ सवनम्पि सङ्गहितं विरूपेकसेसनयेन । आलोचनसभावताय वा पञ्चन्नं विज्जाणानं सवनकिरियायपि दस्सनसङ्खेपसम्भावतो **दस्सना**इच्चेव वुत्तं । अविसूकभूतस्स गीतस्स सवनं कदाचि वट्ठतीति आह “**विसूकभूतं दस्सन**”न्ति । तथा हि वुत्तं परमत्थजोतिकाय **खुद्वकपाठद्वकथाय** “धम्मूपसंहितं गीतं वट्ठति, गीतूपसंहितो धम्मो न वट्ठती”ति ।

यं किञ्चीति गन्धितं वा अगन्धितं वा यं किञ्चि पुष्कं। गन्धजातन्ति गन्धजातियं। तस्सापि “यं किञ्ची”ति वचनतो धूपितस्सपि अधूपितस्सपि यस्स कस्सचि विलेपनादि न वट्ठीति दस्सेति। उच्चाति उच्चसद्देन समानत्थं एकं सद्दन्तरं। सेति एत्थाति सयनं। उच्चासयनं महासयनञ्च समणसारुप्परहितं अधिप्पेतन्ति आह “पमाणातिक्कन्तं अकप्पियत्थरण”न्ति, आसन्दादिआसनञ्चेत्थ सयनेन सङ्गहितन्ति दट्ठब्बं। यस्मा पन आधारे पटिक्खित्ते तदाधारकिरिया पटिक्खित्ताव होति, तस्मा “उच्चासयनमहासयना”इच्चेव वुत्तं। अत्थतो पन तदुपभोगभूतनिसज्जानिपज्जनेहि विरति दस्सिताति दट्ठब्बा। अथ वा “उच्चासयनासनमहासयनासना”ति, एतस्मिं अत्थे एकसेसनयेन अयं निद्देशो कतो यथा “नामरूपपच्चया सळायतन”न्ति। (म० नि० ३.१२६; सं० नि० २.१) आसनकिरियापुब्बकत्ता वा सयनकिरियाय सयनगहणेनेव आसनम्पि सङ्गहितन्ति वेदितब्बं।

“कीवा”ति अयं निपातो। “कित्तक”न्ति इमस्स अत्थं बोधेतीति आह “कीवमहप्फलोति कित्तकं महप्फलो”ति। सेसपदेसूति “कीवमहानिसंसो”तिआदीसु। रत्त-सद्दो रतनपरियायोति आह “पहूतरत्तरतनानन्ति पहूतेन रत्तसद्द्वतेन रतनेन समन्नागतान”न्ति। पाळियं पन “पहूतसत्तरतनान”न्तिपि पाठो दिस्सति। भेरितलसदिसं कत्वाति भेरितलं विय समं कत्वा। ततो एकं भागं न अग्घतीति यथावुत्तं चक्कवत्तिरज्जं ततो सोळसभागतो एकं भागं न अग्घति। ततो बहुतरं होतीति चक्कवत्तिरज्जसिरितो बहुतरं होति।

चातुमहाराजीकानन्तिआदीसु चातुमहाराजिका नाम सिनेरुपब्बतस्स वेमज्झे होन्ति, तेसु बहू पब्बतट्ठापि आकासट्ठापि, तेसं परम्परा चक्कवाळपब्बतं पत्ता, खिड्डापदोसिका, मनोपदोसिका, सीतवलाहका, उण्हवलाहका, चन्दिमा, देवपुत्तो, सूरियो, देवपुत्तोति एते सब्बे चातुमहाराजिकदेवलोकट्टका एव। तेंत्तिस जना तत्थ उप्पन्नाति तावत्तिसा। अपिच तावत्तिसाति तेसं देवानं नाममेवाति वुत्तं। तेपि अत्थि पब्बतट्टका, अत्थि आकासट्टका, तेसं परम्परा चक्कवाळपब्बतं पत्ता, तथा यामादीनं। एकदेवलोकपि हि देवानं परम्परा चक्कवाळपब्बतं अप्पत्ता नाम नत्थि। तत्थ दिब्बसुखं याता पयाता सम्पत्ताति यामा। तुट्ठा पहट्ठाति तुसिता। पकतिपटियत्तारम्मणतो अतिरेकेन रमितुकामकाले यथारुचिते भोगे निम्मिनित्वा निम्मिनित्वा रमन्तीति निम्मानरति। चित्ताचारं जत्वा परेहि निम्मितेसु भोगेसु वसं वत्तेन्तीति परनिम्मितवसवत्ती।

तत्थ चातुमहाराजिकानं देवानं मनुस्सगणनाय नवुतिवस्ससतसहस्सानि आयुष्पमाणं। तावत्तिसानं देवानं तिस्सो च वस्सकोटियो सट्ठि च वस्ससतसहस्सानि। यामानं देवानं चुट्ठस च वस्सकोटियो चत्तारि च वस्ससतसहस्सानि। तुसितानं देवानं सत्तपज्जास च वस्सकोटियो सट्ठि च वस्ससतसहस्सानि। निम्मानरतीनं देवानं द्वे च वस्सकोटिसतानि तिस्सो च वस्सकोटियो चत्तारि च वस्ससतसहस्सानि। परनिम्मितवसवत्तीनं देवानं नव च वस्सकोटिसतानि एकवीस कोटियो च सट्ठि च वस्ससतसहस्सानि।

मुट्ठिहत्थपादकेति पादतलतो याव अट्टिनिया हेट्ठिमन्तो, ताव मुट्ठिरतनप्पमाणपादके। तज्ज खो मज्झिमस्स पुरिसस्स हत्थेन, यस्सिदानि वट्ठकीहत्थोति समज्जा। सीलसमादानतो पट्ठाया अज्जं किञ्चि अकत्वा धम्मस्सवनेन वा कम्मट्ठानमनसिकारेन वा वीतिनामेतब्बन्ति आह “तं पन उपवसन्तेन...पे०... विचारेतब्ब”न्ति।

वाचं भिन्दित्वा उपोसथङ्गानि समादातब्बानीति “इमज्ज रत्तिं इमज्ज दिवस”न्ति कालपरिच्छेदं कत्वा “उपोसथङ्गवसेन अट्ठ सिक्खापदानि समादियामी”ति एकतो कत्वा पुन पच्चेकं “पाणातिपाता वेरमणिसिक्खापदं समादियामि...पे०... उच्चासयनमहासयना वेरमणिसिक्खापदं समादियामी”ति एवं वचीभेदं कत्वा यथापाळि समादातब्बानि। पाळिं अजानन्तेन पन अत्तनो भासाय पच्चेकं वा “बुद्धपज्जत्तं उपोसथं अधिट्टामी”ति एकतो

अधिद्वानवसेन वा समादातब्बानि, अज्झं अलभन्तेन अधिद्वानवसेन । उपासकसीलज्झि अत्तना समादियन्तेनपि समादिन्नं परसन्तिके समादियन्तेनपि, एकज्झं समादिन्नम्पि समादिन्नमेव होति पच्चेकं समादिन्नम्पि । तं पन एकज्झं समादियतो एकायेव विरति एका चेतना होति । सा पन सब्बविरतिचेतनानं किच्चकारीति तेनपि सब्बसिक्खापदानि समादिन्नानेव । पच्चेकं समादियतो पन नानाविरतिचेतनायो यथासकं किच्चवसेन उप्पज्जन्ति, सब्बसमादाने पन वचीभेदो कातब्बोयेव । **परूपरोधपटिसंयुत्ता** परविहिंसासंयुत्ता ।

ननु च “मणि”न्ति वुत्ते वेळुरियम्पि सङ्गहितमेव, किमत्थं पन वेळुरियन्ति आह “वेळुरियन्ति...पे०... दस्सेती”ति । “मणि”न्ति वत्त्वाव “वेळुरिय”न्ति इमिना जातिमणिभावं दस्सेतीति योजेतब्बं । **एकवस्सिकवेळुवण्णन्ति** जातितो एकवस्सातिक्कन्तवेळुवण्णं । **लद्धकन्ति** सुन्दरं । **चन्दप्पभा तारागणाव सब्बेति** यथा चन्दप्पभाय कलं सब्बे तारागणा नानुभवन्तीति अयमेत्थ अत्थोति आह “**चन्दप्पभाति सामिअत्थे पच्चत्त**”न्ति ।

उपोसथसुत्तवण्णना निट्ठिता ।

महावग्गवण्णना निट्ठिता ।

(८) ३. आनन्दवग्गो

१. छन्नसुत्तवण्णना

७२. ततियस्स पठमे **छन्नपरिब्बाजको**ति न नग्गपरिब्बाजको । **बाहिरकसमयं लुञ्चित्वा हरन्तो**ति बाहिरकानं समयं निसेधेत्वा आपन्नो ।

पज्जाचक्खुस्स विबन्धनतो अन्धं करोतीति **अन्धकरणो**ति आह “यस्स रागो उप्पज्जती”तिआदि । **अचक्खुकरणो**ति असमत्थसमासोयं “असूरियपस्सानि मुखानी”तिआदीसु वियाति आह “**पज्जाचक्खुं न करोतीति अचक्खुकरणो**”ति । **पज्जानिरोधिको**ति अनुप्पन्नाय लोकियलोकुत्तराय पज्जाय उप्पज्जितुं न देति, लोकियपज्जं पन अट्टसमापत्तिपज्जाभिज्जावसेन उप्पन्नम्पि समुच्छिन्दित्वा खिपतीति पज्जानिरोधिकोति एवम्पेत्य अत्थो दट्ठब्बो । अनुप्पन्नानुप्पादउप्पन्नपरिहानिनिमित्तताय हि पज्जं निरोधेतीति पज्जानिरोधिको । विहनति विबाधतीति **विघातो**, दुक्खन्ति आह “**दुक्खसङ्घातस्स विघातस्सा**”ति । **किलेसनिब्बानन्ति** इमिना असङ्खतनिब्बानमेव वदति । असङ्खतज्झि निब्बानं नाम, तं पच्चक्खं कातुं न देतीति **अनिब्बानसंवत्तनिको** । **लोकुत्तरमिस्सको कथितो** पुब्बभागियस्सपि अरियमग्गस्स कथितत्ता ।

छन्नसुत्तवण्णना निट्ठिता ।

२. आजीवकसुत्तवण्णना

७३. दुतिये न **अज्जातुकामो**ति न आजानितुकामोयेवाति अत्थो । तेनाह “**परिग्गणहनत्थं पन आगतो**”ति, पज्जाय परिच्छिन्दित्वा उपपरिक्खित्वा गणहनत्थन्ति अत्थो । **कारणापदेसो**ति कारणनिद्देशो । सेसमेत्थ उत्तानमेव ।

आजीवकसुत्तवण्णना निट्ठिता ।

३. महानामसक्कसुत्तवण्णना

७४. ततिये गिलानस्स भावो गेलञ्जन्ति आह “गिलानभावतो”ति । दीपेतीति देसनावकमेनेव पञ्जापेति । पठमज्झि सेखसीलसमाधिपञ्जायो वत्वा पच्छा असेखसीलादीनि वदन्तो इममत्थं दीपेति ।

महानामसक्कसुत्तवण्णना निट्ठिता ।

४. निगण्ठसुत्तवण्णना

७५. चतुत्थे हंसवट्ठकच्छन्नेनाति हंसवट्ठकपरिच्छन्नेन, हंसमण्डलाकारेनाति अत्थो । नत्थि एतस्स परिसेसन्ति अपरिसेसं । तेनाह “अप्पमत्तकम्पि असेसेत्वा”ति । अपरिसेसधम्मजाननतो वा अपरिसेससङ्घातं जाणदस्सनं पटिजानातीति एवम्पेत्य अत्थो दट्ठब्बो । सततन्ति निच्चं । समितन्ति तस्सेव वेवचनन्ति आह “सततं समितन्ति सब्बकालं निरन्तर”न्ति । अथ वा निच्चट्ठेन सतत-सट्ठेन अभिण्हप्पवत्ति जोतिता सियाति “समित”न्ति वुत्तं । तेन निरन्तरप्पवत्ति दस्सेतीति आह “सब्बकालं निरन्तर”न्ति ।

विसुद्धिसम्पापनत्थायाति रागादीहि मलेहि अभिज्झाविसमलोभादीहि च उपक्किलिङ्गचित्तानं सत्तानं विसुद्धिपापनत्थाय । समतिक्कमनत्थायाति सोकस्स च परिदेवस्स च पहानत्थाय । अत्थं गमनत्थायाति कायिकदुक्खस्स च चेतसिकदोमनस्सस्स चाति इमेसं द्विन्नं अत्थङ्गमनाय, निरोधायाति अत्थो । जायति निच्छयेन कमति निब्बानं । तं वा जायति पटिविज्झति एतेनाति जायो, अरियमग्गोति आह “मग्गस्स अधिगमनत्थाया”ति । अपच्चयनिब्बानस्स सच्छिकरणत्थायाति पच्चयरहितत्ता अपच्चयस्स असङ्खतस्स तण्हावानविरहितत्ता निब्बानन्ति लद्धनामस्स अमतस्स सच्छिकरियाय, अत्तपच्चक्खतायाति वुत्तं होति । फुसित्वा फुसित्वाति पत्वा पत्वा । सेसमेत्थ सुविज्जेय्यमेव ।

निगण्ठसुत्तवण्णना निट्ठिता ।

५. निवेसकसुत्तवण्णना

७६. पञ्चमे किच्चकरणीयेसु सहभावट्ठेन अमा होन्तीति अमच्चा । “अयं अज्झत्तिको”ति एवं जानन्ति, जायन्ति वाति जाती । सस्सुससुरपक्खिकाति सस्सुससुरा च तप्पक्खिको च सस्सुससुरपक्खिका । लोहितेन सम्बद्धाति सालोहिता । पितुपक्खिका वा जाती, मातुपक्खिका सालोहिता । मातुपितुपक्खिका वा जाती, सस्सुससुरपक्खिका सालोहिता । अवेच्च रतनस्स गुणे याथावतो जत्वा पसादो अवेच्चप्पसादो । सो पन यस्मा मग्गेनागतत्ता केनचि अकम्पनीयो च अप्पधंसियो च होति, तस्मा एवं वुत्तं “अचलप्पसादो”ति । भावज्जथत्तन्ति सभावस्स अज्जथत्तं ।

वीसतिया कोट्ठासेसूति केसादिमत्थलुङ्गपरियन्तेसु । द्वादससु कोट्ठासेसूति पित्तादिमुत्तपरियन्तेसु । चतूसु कोट्ठासेसूति “येन च सन्तप्पति, येन च जीरीयति, येन च परिदहति, येन च असितपीतखायितसायितं सम्मा परिणामं गच्छती”ति (म० नि० १.३०४) एवं वुत्तेसु चतूसु कोट्ठासेसु । छसु कोट्ठासेसूति “उद्धङ्गमा वाता, अधोगमा वाता, कुच्छिसया वाता, कोट्ठासया वाता, अङ्गमङ्गानुसारिनो वाता, अस्सासो पस्सासो”ति (म० नि० २.३०५) एवं वुत्तेसु छसु

कोट्टासेसु । वित्थम्भनं सेसभूतत्तयसन्थम्भिततापादनं, “उपकीळन”न्ति एके । सेसं सुविज्जेय्यमेव ।

निवेसकसुत्तवण्णना निड्डिता ।

६-७. पठमभवसुत्तादिवण्णना

७७-७८. छट्ठे अभिसङ्खारविज्जाणन्ति कम्मसहजातं विज्जाणं । सेसमेत्थ सुविज्जेय्यमेव । सत्तमे नत्थि वत्तब्बं ।

पठमभवसुत्तादिवण्णना निड्डिता ।

८. सीलब्बतसुत्तवण्णना

७९. अट्ठमे दुक्करकारिकानुयोगोति दुक्करकरियाय अनुयोगो । उपट्टानेन सारन्ति उपट्टानाकारेण सारं । “इदं वर”न्ति आदिना उपट्टानाकारं विभावेति । एत्थाति एतस्मिं सत्थारा पुच्छिते पज्जे ।

सीलब्बतसुत्तवण्णना निड्डिता ।

९. गन्धजातसुत्तवण्णना

८०. नवमे मूले, मूलस्स वा गन्धो मूलगन्धोति आह “मूलवत्थुको गन्धो”ति । मूलं वत्थु एतस्साति मूलवत्थुको । इदानीं मूलं गन्धयोगतो गन्धोति इममत्थं दस्सेन्तो “गन्धसम्पन्नं वा मूलमेव मूलगन्धो”ति आह । पच्छिमोयेवेत्थ अत्थविकप्पो युत्ततरोति दस्सेतुं “तस्स हि गन्धो”ति आदिमाह । वस्सिकपुप्फादीनन्ति सुमनपुप्फादीनं ।

गन्धजातसुत्तवण्णना निड्डिता ।

१०. चूळनिकासुत्तवण्णना

८१. दसमे अरुणवतिसुत्तन्तअट्ठप्पत्तियन्ति “भूतपुब्बं, भिक्खवे, राजा अहोसि अरुणवा नाम । रज्जो खो पन, भिक्खवे, अरुणवतो अरुणवती नाम राजधानी अहोसि । अरुणवतिं खो पन, भिक्खवे, राजधानिं सिखी भगवा अरहं सम्मासम्बुद्धो उपनिस्साय विहासि । सिखिस्स खो पन, भिक्खवे, भगवतो अरहतो सम्मासम्बुद्धस्स अभिभूसम्भवं नाम सावकयुगं अहोसि अगं भद्दयुगं । अथ खो, भिक्खवे, सिखी भगवा अरहं सम्मासम्बुद्धो अभिभुं भिक्खुं आमन्तेसी”ति आदिना ब्रह्मसंयुत्ते (सं० नि० १.१८५) आगतस्स अरुणवतिसुत्तन्तस्स अट्ठप्पत्तियं । अतिप्पगोति अतिविय पगो, अतिविय पातोति अत्थो, न ताव कुलेसु भत्तं निड्डातीति वुत्तं होति ।

उज्झायन्तीति अवझायन्ति, हेट्ठा कत्वा चिन्तेन्ति, लामकतो चिन्तेन्ति । अनेकविहितं इद्धिविकुब्बनं कत्वाति “पकतिवण्णं विजहित्वा नागवण्णं वा दस्सेति, सुपण्णवण्णं वा दस्सेती”ति आदिना (पटि० म० ३.१३) नयेन आगतं अनेकप्पकारं इद्धिविकुब्बनं कत्वा । सहस्सिलोकधातुन्ति चक्कवाळसहस्सं । गाथाद्वयं अभासीति थेरो किर “कथं देसिता खो धम्मदेसना सब्बेसं पिया मनापा”ति चिन्तेत्वा “सब्बेपि पासण्डा सब्बे देवमनुस्सा अत्तनो अत्तनो समये पुरिसकारं वण्णयन्ति, वीरियस्स अवण्णवादी नाम नत्थि, वीरियप्पटिसंयुत्तं कत्वा देसेस्सामि । एवमस्स धम्मदेसना सब्बेसं

पिया भविस्सति मनापा”ति जत्वा तीसु पिटकेसु विचिनिन्त्वा “आरम्भथ निक्कमथा”ति (सं० नि० १.१८६) इदं गाथाद्वयं अभासि ।

किं आलोको अयन्ति कस्स नु खो अयं आलोकोति । विचिनन्तानन्ति चिन्तेन्तानं । सब्बेति लोकधातुयं सब्बे देवा च मनुस्सा च । ओसटाय परिसायाति धम्मस्सवनत्थं समोसटाय परिमितपरिच्छिन्नाय परिसाय । अत्थोपि नेसं पाकटो अहोसीति न केवलं ते सदमेव अस्सोसुं, अथ खो अत्थोपि तेसं पकतिसवनूपचारे विय पाकटो अहोसि । तेन सहस्सं लोकधातुं विज्जापेतीति अधिप्पायो ।

परिहरन्तीति सिनेरुं दक्खिणतो कत्वा परिवत्तेन्ति । विरोचमानाति अत्तनो जुतिया दिब्बमाना, सोभमाना वा । ताव सहस्सधा लोकोति यत्तको चन्दिमसूरियेहि ओभासियमानो लोकधातुसङ्घातो एकेको लोको, तत्तकेन पमाणेन सहस्सधा लोको, इमिना चक्कवाळेन सद्धिं चक्कवाळसहस्सन्ति अत्थो । कस्मा पनेसा आनीताति एसा चूळनिका लोकधातु कस्मा भगवता आनीता, देसिताति अत्थो । मज्झिमिकाय लोकधातुया परिच्छेददस्सनत्थन्ति द्विसहस्सिलोकधातुया परिमाणदस्सनत्थं ।

सहस्सिलोकधातुया सहस्सी द्विसहस्सिलोकधातु, सा चक्कवाळगणनाय दससतसहस्सचक्कवाळपरिमाणा । तेनाह “सहस्सचक्कवाळानि सहस्सभागेन गणेत्वा”तिआदि । कम्पनदेवतूपसङ्कमनादिना जातचक्कवाळेन सह योगक्खेमं ठानं जातिक्खेत्तं । तत्तकाय एव जातिक्खेत्तभावो धम्मतावसेनेव वेदितब्बो, “परिग्गहवसेना”ति केचि । सब्बेसम्पि बुद्धानं एवं जातिक्खेत्तं तन्निवासीनंयेव च देवतानं धम्माभिसमयोति वदन्ति । पटिसन्धिग्गहणादीनं सत्तन्नंयेव गहणं निदस्सनमत्तं महाभिनीहारादिकालेपि तस्स पकम्पनस्स लब्धनतो ।

सहस्सं सहस्सधा कत्वा गणितं मज्झिमिकन्तिआदिना मज्झिमिकाय लोकधातुया सहस्सं तिसहस्सिलोकधातु, सायेव च महासहस्सिलोकधातूति दस्सेति । सरसेनेव आणापवत्तनं आणाक्खेत्तं, यं एकज्झं संवट्ठति विवट्ठति च । आणा फरतीति तन्निवासिदेवतानं सिरसा सम्पटिच्छनेन वत्तति, तज्ज खो केवलं बुद्धानुभावेनेव, अधिप्पायवसेन च पन “यावता पन आकङ्खेय्या”ति (अ० नि० ३.८१) वचनतो बुद्धानं अविसयो नाम नत्थि, विसयक्खेत्तस्स पमाणपरिच्छेदो नाम नत्थि । विसमोति सूरियुग्गमनादीनं विसमभावतो विसमो । तेनेवाह “एकस्मिं ठाने सूरियो उग्गतो होती”तिआदि । सेसमेत्थ सुविज्जेय्यमेव ।

चूळनिकासुत्तवण्णना निट्ठिता ।

आनन्दवग्गवण्णना निट्ठिता ।

(१) ४. समणवग्गो

१-५. समणसुत्तादिवण्णना

८२-८६. चतुत्थस्स पठमे सम्मा आदानं गहणं समादानन्ति आह “समादानं वुच्चति गहणं”न्ति । अधिकं विसिट्ठं सीलन्ति अधिसीलं । लोकियसीलस्स अधिसीलभावो परियायेनाति निप्परियायमेव तं दस्सेतुं “अपिच सब्बम्पि

लोकियसील”न्तिआदि वुत्तं । सिक्खितब्बतोति आसेवितब्बतो । पञ्चपि दसपि वा सीलानि सीलं नाम, पातिमोक्खसंवरो अधिसीलं नाम अनवसेसकायिकचेतसिकसंवरभावतो मग्गसीलस्स पदट्टानभावतो च । अट्ठ समापत्तियो चित्तं, विपस्सनापादकज्झानं अधिचित्तं मग्गसमाधिस्स अधिट्टानभावतो । कम्मस्सकतज्जाणं पज्जा, विपस्सना अधिपज्जा मग्गपज्जाय अधिट्टानभावतो । अपिच निब्बानं पत्थयन्तेन समादिन्नं पञ्चसीलं दससीलम्पि अधिसीलमेव निब्बानाधिगमस्स पच्चयभावतो । निब्बानं पत्थयन्तेन समापन्ना अट्ठ समापत्तियोपि अधिचित्तमेव ।

“कल्याणकारी कल्याणं, पापकारी च पापकं ।
अनुभोति द्वयमेतं, अनुबन्धहि कारण”न्ति ॥ —

एवं अतीते अनागते च वट्टमूलकदुक्खसल्लक्खणवसेन संवेगवत्थुताय विमुत्तिआकङ्खाय पच्चयभूता कम्मस्सकतपज्जापि अधिपज्जाति वदन्ति । दुतियततियचतुत्थपञ्चमानि उत्तानत्थानेव ।

समणसुत्तादिवण्णना निट्ठिता ।

६. पठमसिक्खासुत्तवण्णना

८७. छट्ठे समत्तकारीति अनूनेन परिपूरेन आकारेण समन्नागतो । सिक्खापदानं खुद्धानुखुद्दकत्तं अपेक्खासिद्धान्ति आह “तत्रापि सङ्गादिसेसं खुद्दक”न्तिआदि । अङ्गुत्तरमहानिकायवळ्ळजनकआचरियाति अङ्गुत्तरनिकायं परिहरन्ता आचरिया, अङ्गुत्तरभाणकाति वुत्तं होति । लोकवज्जं नापज्जति लोकवज्जसिक्खापदानं वीतिक्कमसाधकस्स किलेसगहनस्स सब्बसो पहीनत्ता । पण्णत्तिवज्जमेव आपज्जति पण्णत्तिवीतिक्कमं वा अजानतोपि आपत्तिसम्भवतो । चित्तेन आपज्जन्तो रूपियप्पटिग्गहणं आपज्जतीति उपनिक्खित्तसादियेन आपज्जति ।

ब्रह्मचरियस्स आदिभूतानि आदिब्रह्मचरियानि, तानि एव आदिब्रह्मचरियकानि यथा “विनयो एव वेनयिको”ति आह “मग्गब्रह्मचरियस्सा”तिआदि । चत्तारि महासीलसिक्खापदानीति चत्तारि पाराजिकानि सन्धाय वदति । पटिपक्खधम्मानं अनवसेसतो सवनतो पग्घरणतो सोतो, अरियमग्गोति आह “सोतसङ्घातेन मग्गेना”ति । विनिपातेति विरूपं सदुक्खं सउपायासं निपातेतीति विनिपातो, अपायदुक्खे खिपनको । धम्मोति सभावो । नास्स विनिपातो धम्मोति अविनिपातधम्मो, न अत्तानं अपायेसु विनिपातनसभावोति वुत्तं होति । कस्मा? ये धम्मा अपायगमनीया, तेसं पहीनत्ता । तेनाह “अविनिपातधम्मोति चतूसु अपायेसु अपतनसभावो”ति । तत्थ अपतनसभावोति अनुप्पज्जनसभावो । सोतापत्तिमग्गनियामेन नियतोति उपरिमग्गाधिगमस्स अवस्संभावीभावतो नियतो । तेनेवाह “सम्बोधिपरायणो”ति । हेट्ठिमन्ततो सत्तमभवतो उपरि अनुप्पज्जनधम्मताय वा नियतो । सम्बुज्झतीति सम्बोधि, अरियमग्गो । सो पन पठममग्गस्स अधिगतत्ता अवसिद्धो च अधिगन्तब्बभावेन इच्छितब्बोति उपरिमग्गतयसङ्घाता सम्बोधि परं अयनं परा गति अस्साति सम्बोधिपरायणो । तेनाह “उपरिमग्गतयसम्बोधिपरायणो”ति ।

तनुभावाति परियुट्टानमन्दताय च कदाचि करहचि उप्पत्तिया च तनुभावेन । तनुत्तज्झि द्वीहि कारणेहि वेदितब्बं अधिच्चुप्पत्तिया च परियुट्टानमन्दताय च । सकदागामिस्स हि वट्टानुसारिमहाजनस्स विय किलेसा अभिण्हं न उप्पज्जन्ति, कदाचि करहचि उप्पज्जन्ति विरळाकारा हुत्वा विरळवापिते खेत्ते अङ्कुरा विय । उप्पज्जमानापि च वट्टानुसारिमहाजनस्सेव मद्दन्ता फरन्ता छादेन्ता अन्धकारं करोन्ता न उप्पज्जन्ति, मन्दमन्दा उप्पज्जन्ति तनुकाकारा हुत्वा अब्भपटलमिव

मक्खिकापत्तमिव च । तत्थ केचि थेरा भणन्ति “सकदागामिस्स किलेसा किञ्चापि चिरेन उप्पज्जन्ति, बहलाव उप्पज्जन्ति । तथा हिस्स पुत्ता च धीतरो च दिस्सन्ती”ति । एतं पन अप्पमाणं । पुत्तधीतरो हि अङ्गपच्चङ्गपरामसनमत्तेनपि होन्तीति । द्वीहियेव कारणेहिस्स किलेसानं तनुत्तं वेदितब्बं अधिच्चुप्पत्तिया च परियुट्ठानमन्दताय चाति ।

हेट्ठाभागियानन्ति एत्थ हेट्ठाति महगगतभूमितो हेट्ठा, कामभूमियन्ति अत्थो । तेसं पच्चयभावेन हेट्ठाभागस्स हिताति हेट्ठाभागिया, तेसं हेट्ठाभागियानं, हेट्ठाभागस्स कामभवस्स पच्चयभावेन गहितानन्ति अत्थो । संयोजेन्ति बन्धन्ति खन्धगतिभवादीहि खन्धगतिभवादयो, कम्मं वा फलेनाति **संयोजनानीति** आह “**संयोजनानन्ति बन्धनान**”न्ति । असमुच्छिन्नरागादिकस्स हि एतरहि खन्धादीनं आयतिं खन्धादीहि सम्बन्धो, समुच्छिन्नरागादिकस्स पन तं नत्थि, कतानम्पि कम्मानं असमत्थभावापत्तितो रागादीनं अन्वयतो ब्यतिरेकतो च संयोजनट्ठो सिद्धो । **परिक्खयेनाति** समुच्छेदेन ।

ओपपातिकोति उपपातिकयोनिको उपपत्तने साधुकारी । सेसयोनिपटिक्खेपवचनमेतं । तेन गब्भवासदुक्खाभावमाह । तत्थ **परिनिब्बायीति** इमिना सेसदुक्खाभावं । तत्थ परिनिब्बायिता चस्स कामलोके खन्धबीजस्स अपुनागमनवसेनेवाति दस्सेतुं “**अनावत्तिधम्मो**”ति वुत्तं । **उपरियेवाति** ब्रह्मलोकेयेव । **अनावत्तिधम्मोति** ततो ब्रह्मलोका पुनप्पुनं पटिसन्धिवसेन न आवत्तनधम्मो । तेनाह “**योनिगतिवसेन अनागमनधम्मो**”ति ।

पदेसं पदेसकारी आराधेतीति सीलक्खन्धादीनं पारिपूरिया एकदेसभूतं हेट्ठिममगगतयं पदेसो, तं करोन्तो पदेसं एकदेसभूतं हेट्ठिमं फलत्तयमेव आराधेति, निष्फादेतीति अत्थो । तेनाह “**पदेसकारी पुगलो नाम सोतापन्नो**”तिआदि । **परिपूरं परिपूरकारीति** सीलक्खन्धादीहि सद्भिन्द्रियादीहि च परितो पूरणेन परिपूरसङ्घातं अरहत्तमगं करोन्तो निब्बत्तेन्तो परिपूरं अरहत्तफलं आराधेति, निष्फादेतीति अत्थो । तेनाह “**परिपूरकारी नाम अरहा**”तिआदि ।

पठमसिक्खासुत्तवण्णना निट्ठिता ।

७-१०. दुतियसिक्खासुत्तादिवण्णना

८८-९१. सत्तमे **कुला कुलं गमनकोति** कुलतो कुलं गच्छन्तो । **द्वे वा तयो वा भवेति** देवमनुस्सवसेन द्वे वा तयो वा भवे । मिस्सकभववसेन हेतं वुत्तं । देसनामत्तमेव चेतं “**द्वे वा तीणि वा**”ति । याव छट्ठभवा संसरन्तोपि कोलंकोलोव होति । तेनेवाह “**अयहि द्वे वा भवे...पे०... एवमेत्थ विकप्पो दट्ठब्बो**”ति । उळारकुलवचनो वा एत्थ कुलसट्ठो, कुलतो कुलं गच्छतीति **कोलंकोलो** । सोतापत्तिफलसच्छिकिरियतो पट्टाय हि नीचकुले उप्पत्ति नाम नत्थि, महाभोगकुलेसु एव निब्बत्ततीति अत्थो । केवलो हि कुलसट्ठो महाकुलमेव वदति “**कुलपुत्तो**”तिआदीसु विय । **एकबीजीति** एत्थ खन्धबीजं नाम कथितं, **खन्धबीजन्ति** च पटिसन्धिविज्जाणं वुच्चति । यस्स हि सोतापन्नस्स एकं खन्धबीजं अत्थि, एकं भवगगहणं, सो एकबीजी नाम । तेनाह “**एकस्सेव भवस्स बीजं एतस्स अत्थीति एकबीजी**”ति । “**मानुसकं भव**”न्ति इदं पनेत्थ देसनामत्तमेव, “**देवभवं निब्बत्तेती**”तिपि पन वत्तुं वट्ठितियेव ।

उळ्ळंवाहिभावेन उळ्ळमस्स तण्हासोतं वट्ठसोतं वाति **उळ्ळंसोतो**, उळ्ळं वा गन्त्वा पटिलभितब्बतो उळ्ळमस्स मगसोतन्ति **उळ्ळंसोतो** । पटिसन्धिवसेन अकनिट्ठभवं गच्छतीति **अकनिट्ठगामी** । **यत्थ कत्थचीति** अविहादीसु यत्थ कत्थचि । **सप्पयोगेनाति** विपस्सनाजाणाभिसङ्खारसङ्घातेन पयोगेन सह, महता विपस्सनापयोगेनाति अत्थो । **उपहच्चाति** एतस्स उपगन्त्वाति अत्थो । तेन वेमज्झातिक्कमो कालकिरियापगमनञ्च सङ्गहितं होति, तस्मा आयुवेमज्झं अतिक्कमित्वा

परिनिब्बायन्तो उपहच्चपरिनिब्बायी नाम होतीति आह “यो पन कप्पसहस्सायुकेसु अविहेसू”तिआदि । सो तिविधो होतीति जाणस्स तिक्खमज्झमुदुभावेन तिविधो होति । तेनाह “कप्पसहस्सायुकेसू”तिआदि ।

सद्धाधुरेन अभिनिविसित्वाति “सचे सद्धाय सक्का निब्बत्तेतुं, निब्बत्तेस्सामि लोकुत्तरमग्ग”न्ति एवं सद्धाधुरवसेन अभिनिविसित्वा विपस्सनं पटुपेत्वा । पज्जाधुरेन अभिनिविट्ठोति “सचे पज्जाय सक्का, निब्बत्तेस्सामि लोकुत्तरमग्ग”न्ति एवं पज्जाधुरं कत्वा अभिनिविट्ठो । यथावुत्तमेव अट्ठविधत्तं कोलंकोलसत्तक्खत्तुपरमेसु अतिदिसन्तो “तथा कोलंकोला सत्तक्खत्तुपरमा चा”ति आह । वुत्तनयेनेव अट्ठ कोलंकोला, अट्ठ सत्तक्खत्तुपरमाति वुत्तं होति ।

तत्थ सत्तक्खत्तुं परमा भवूपपत्ति अत्तभावग्गहणं अस्स, ततो परं अट्ठमं भवं नादियतीति सत्तक्खत्तुपरमो । भगवता गहितनामवसेनेव चेतानि अरियाय जातिया जातानं तेसं नामानि जातानि कुमारानं मातापितूहि गहितनामानि विय । एत्तकज्झि ठानं गतो एकबीजी नाम होति, एत्तकं कोलंकोलो, एत्तकं सत्तक्खत्तुपरमोति भगवता एतेसं नामं गहितं । नियमतो पन अयं एकबीजी, अयं कोलंकोलो, अयं सत्तक्खत्तुपरमोति नत्थि । को पन नेसं एतं पभेदं नियमेतीति? केचि ताव थेरा “पुब्बहेतु नियमेती”ति वदन्ति, केचि पठममग्गो, केचि उपरि तयो मग्गा, केचि तिण्णं मग्गानं विपस्सनाति ।

तत्थ “पुब्बहेतु नियमेती”ति वादे पठममग्गस्स उपनिस्सयो कतो नाम होति, “उपरि तयो मग्गा निरुपनिस्सया उप्पन्ना”ति वचनं आपज्जति । “पठममग्गो नियमेही”ति वादे उपरि तिण्णं मग्गानं निरत्थकता आपज्जति । “उपरि तयो मग्गा नियमेन्ती”ति वादे पठममग्गे अनुप्पन्नेयेव उपरि तयो मग्गा उप्पन्नाति आपज्जतीति । “तिण्णं मग्गानं विपस्सना नियमेती”ति वादो पन युज्जति । सचे हि उपरि तिण्णं मग्गानं विपस्सना बलवती होति, एकबीजी नाम होति, ततो मन्दतराय कोलंकोलो, ततो मन्दतराय सत्तक्खत्तुपरमोति ।

एकच्चो हि सोतापन्नो वट्टज्झासयो होति वट्टाभिरतो, पुनप्पुनं वट्टस्मियेव चरति सन्दिस्सति । अनाथपिण्डिको सेट्ठि, विसाखा उपासिका, चूळरथमहारथा देवपुत्ता, अनेकवण्णो देवपुत्तो, सक्को देवराजा, नागदत्तो देवपुत्तोति इमे हि एत्तका जना वट्टज्झासया वट्टाभिरता आदितो पट्टाय छ देवलोके सोधेत्वा अकनिट्ठे ठत्वा परिनिब्बायिस्सन्ति, इमे इध न गहिता । न केवलज्जिमेव, योपि मनुस्सेसुयेव सत्तक्खत्तुं संसरित्वा अरहत्तं पापुणाति, योपि देवलोके निब्बत्तो देवेसुयेव सत्तक्खत्तुं अपरापरं संसरित्वा अरहत्तं पापुणाति । इमेपि इध न गहिता, कालेन देवे, कालेन मनुस्से संसरित्वा पन अरहत्तं पापुणन्तोव इध गहितो, तस्मा “सत्तक्खत्तुपरमो”ति इदं इधट्ठकवोकिण्णभवूपपत्तिकसुक्खविपस्सकस्स नामं कथितन्ति वेदितब्बं ।

“सकिदेव इमं लोकं आगन्त्वा”ति (पु० प० ३४) वचनतो पज्चसु सकदागामीसु चत्तारो वज्जेत्वा एकोव गहितो । एकच्चो हि इध सकदागामिफलं पत्वा इधेव परिनिब्बायति, एकच्चो इध पत्वा देवलोके परिनिब्बायति, एकच्चो देवलोके पत्वा तत्थेव परिनिब्बायति, एकच्चो देवलोके पत्वा इधूपपज्जित्वा परिनिब्बायति । इमे चत्तारोपि इध न गहिता । यो पन इध पत्वा देवलोके यावतायुकं वसित्वा पुन इधूपपज्जित्वा परिनिब्बायिस्सति, अयं एकोव इध गहितोति वेदितब्बो ।

इदानी तस्स पभेदं दस्सेन्तो “तीसु पन विमोक्खेसू”तिआदिमाह । इमस्स पन सकदागामिनो एकबीजिना सद्धिं किं नानाकरणन्ति? एकबीजिस्स एकाव पटिसन्धि, सकदागामिस्स द्वे पटिसन्धियो, इदं तेसं नानाकरणं । सुज्जतविमोक्खेन विमुत्तखीणासवो पटिपदावसेन चतुब्बिधो होति, तथा अनिमित्तअप्पणिहितविमोक्खेहीति एवं द्वादस अरहन्ता होन्तीति आह “यथा पन सकदागामिनो, तथेव अरहन्तो द्वादस वेदितब्बा”ति । अट्ठमनवमदसमानि उत्तानत्थानेव ।

दुतियसिक्खासुत्तादिवण्णना निड्ढिता ।

११. सङ्कवासुत्तवण्णना

१२. एकादसमे विहारपटिबद्धनवकम्मादिभारं हरति पवत्तेतीति **भारहारो** । तेनेवाह “**नवे आवासे समुट्ठापेति, पुराणे पटिजग्गती**”ति । सिक्खितब्बतो सिक्खा, पज्जितब्बतो, पज्जन्ति एतेहीति वा पदानि, सिक्खायेव पदानि **सिक्खापदानी**ति आह “**सिक्खासङ्घातेहि पदेही**”ति । **दस्सेतीति** पच्चक्खतो दस्सेति, हत्थामलकं विय पाकटे विभूते कत्वा विभावेति । **गण्हापेतीति** ते धम्मे मनसा अनुपक्खिते दिट्ठिया सुप्पटिविद्धे कारेन्तो उग्गण्हापेति । **समुस्साहेतीति** समाधिम्हि उस्साहं जनेति । **पटिलद्धगुणेहीति** ताय देसनाय तन्निस्सयपच्चत्तपुरिसकारेन च तेसं पटिविद्धगुणेहि । **वोदापेतीति** तेसं चित्तसन्तानं अस्सद्धियादिकिलेसमलापगमनेन पभस्सरं करोति । **सण्हं सण्हं कथेतीति** अतिविय सुखुमं कत्वा कथेति ।

अच्चयनं साधुमरियादं मदित्वा वीतिक्कमनं **अच्चयो**ति आह “**अपराधो**”ति । अच्चेति अतिक्कमति एतेनाति वा **अच्चयो**, वीतिक्कमस्स पवत्तनको अकुसलधम्मो । सो एव अपरज्झति एतेनाति **अपराधो** । सो हि अपरज्झन्तं पुरिसं अधिभवित्वा पवत्तति । तेनाह “**अतिक्कम्म अधिभवित्वा पवत्तो**”ति । **पटिग्गण्हातूति** अधिवासनवसेन सम्पटिच्छतूति अत्थोति आह “**खमतू**”ति । सदेवकेन लोकेन निस्सरणन्ति अरणीयतो **अरियो**, तथागतोति आह “**अरियस्स विनयेति बुद्धस्स भगवतो सासने**”ति । **पुग्गलाधिट्ठानं करोन्तो**ति कामं “**वुद्धि हेसा**”ति धम्माधिट्ठानवसेन वाक्यं आरब्धं, तथापि देसनं पन पुग्गलाधिट्ठानं करोन्तो “**संवरं आपज्जती**”ति आहाति योजना ।

सङ्कवासुत्तवण्णना निड्ढिता ।

समणवग्गवण्णना निड्ढिता ।

(१०) ५. लोणकपल्लवग्गो

१. अच्चायिकसुत्तवण्णना

१३. पञ्चमस्स पठमे **अतिपातिकानीति** सीघं पवत्तेतब्बानि । **करणीयानीति** एत्थ अवस्सके अनीयसदो दट्ठब्बोति आह “**अवस्सकिच्चानी**”ति । **निक्खन्तसेतङ्कुरानीति** बीजतो निक्खन्तसेतङ्कुरानि । सेसमेत्थ उत्तानमेव ।

अच्चायिकसुत्तवण्णना निड्ढिता ।

२. पविवेकसुत्तवण्णना

१४. दुतिये साणेहि वाकेहि निब्बत्तितानि **साणानि** । मिस्ससाणानि **मसाणानि** न भङ्गानि । **एरकतिणादीनीति** आदि-सद्देन अक्कमकचिकदलिवाकादीनं सङ्गहो । एरकादीहि कतानि हि छवानि लामकानि दुस्सानीति “**छवदुस्सानी**”ति वत्तब्बतं लभन्ति । **कुण्डकन्ति** तनुतरं तण्डुलप्पकरणं । **पञ्च दुस्सील्यानीति** पाणातिपातादीनि पञ्च । **चत्तारो आसवाति** कामासवादयो चत्तारो आसवा । **सीलग्गप्पत्तोति** सीलेन, सीलस्स वा अग्गप्पत्तो ।

पविवेकसुत्तवण्णना निट्ठिता ।

३. सरदसुत्तवण्णना

१५. ततिये विद्धेति दूरीभूते । दूरभावो च आकासस्स वलाहकविगमेन होतीति आह “**वलाहकविगमेन दूरीभूते**”ति । तेनेव हि “विद्धे विगतवलाहके”ति वुत्तं । **नभं अब्भुस्सक्कमानो**ति आकासं अभिलङ्घन्तो । इमिना तरुणसूरियभावो दस्सितो । नातिदूरोदिते हि आदिच्चे तरुणसूरियसमज्जा । **दुविधमेवस्स संयोजनं नत्थीति** ओरम्भागियउद्धम्भागियवसेन दुविधम्पि संयोजनं अस्स पठमज्झानलाभिनो अरियसावकस्स नत्थि । कस्मा पनस्स उद्धम्भागियसंयोजनम्पि नत्थीति वुत्तं । ओरम्भागियसंयोजनानमेव हेत्थ पहांनं वुत्तन्ति आह “**इतरम्पी**”तिआदि, इतरं उद्धम्भागियसंयोजनं पुन इमं लोकं पटिसन्धिवसेन आनेतुं असमत्थताय नत्थीति वुत्तन्ति अत्थो । ज्ञानलाभिनो हि सब्बेपि अरिया ब्रह्मलोकूपपन्ना हेट्ठा न उप्पज्जन्ति, उद्धं उद्धं उप्पज्जन्तापि वेहप्फलं अकनिट्ठं भवग्गच्च पत्वा न पुनज्जत्थ जायन्ति, तत्थ तत्थेव अरहत्तं पत्वा परिनिब्बायन्ति । तेनेवाह “**इमस्मिं सुत्ते ज्ञानानागामी नाम कथितो**”ति । ज्ञानवसेन हि हेट्ठा न आगच्छतीति ज्ञानानागामी ।

सरदसुत्तवण्णना निट्ठिता ।

४. परिसासुत्तवण्णना

१६. चतुत्थे पच्चयबाहुल्लिकाति चीवरादिबाहुल्लाय पटिपन्ना । अवीततण्हाय हि तं तं परिक्रवारजातं बहुं लन्ति आदियन्तीति बहुला, ते एव बाहुल्लिका यथा “वेनयिको”ति (म० नि० १.२४६; अ० नि० ८.११; पारा० ८) । ते पच्चयबाहुल्लाय युत्तप्पयुत्ता होन्तीति चीवरादिबाहुल्लाय पटिपन्ना नाम होन्ति । सिक्खाय अगारवभावतो सिथिलं अगाळ्हं गणहन्तीति **साथलिका** । **सिथिलन्ति** च भावनपुंसकनिद्वेसो । सिथिलसद्देन समानत्थस्स सथलसद्दस्स वसेन साथलिकाति पदसिद्धि वेदितब्बा । **अवगमनट्टेनाति** अधोगमनट्टेन, ओरम्भागियभावेनाति अत्थो । **निक्खित्तधुराति** ओरोपितधुरा उज्जितुस्साहा । **उपधिविवेको** निब्बानं । **दुविधम्पि वीरियन्ति** कायिकं चेतसिकञ्च वीरियं ।

भण्डनं जातं एतेसन्ति **भण्डनजाता** । विसेसनस्स परनिपातवसेन चेतं वुत्तं । अट्ठकथायं पन विसेसनस्स पुब्बनिपातवसेनेव अत्थं दस्सेन्तो “**जातभण्डना**”ति आह । कलहो जातो एतेसन्ति **कलहजाताति** एत्थापि एसेव नयो । **कलहस्स पुब्बभागोति** कलहस्स हेतुभूता पटिभागा तंसदिसी च अनिट्ठिकरिया । **हत्थपरामासादिवसेनाति** कुज्झित्वा अज्जमज्जस्स हत्थे गहेत्वा पलपनअच्छिन्दनादिवसेन । “अयं धम्मो, नायं धम्मो”तिआदिना विरुद्धवादभूतं विवादं आपन्नाति **विवादपन्ना** । तेनाह “**विरुद्धवादं आपन्ना**”ति । मुखसन्निस्सितताय वाचा इध “मुख”न्ति अधिप्पेताति आह “**फरुसा वाचा मुखसत्तियो**”ति ।

सतिपि उभयेसं कलापानं परमत्थतो भेदे पचुरजनेहि पन दुविज्जेय्यनानत्तं खीरोदकसम्मोदितं अच्चन्तमेतं संसट्ठं विय हुत्वा तिट्ठतीति आह “**खीरोदकं विय भूता**”ति । यथा खीरञ्च उदकञ्च अज्जमज्जं संसन्दति, विसुं न होति, एकत्तं विय उपेति, एवं सामग्गिवसेन एकतूपगतचित्तुप्पादाति अत्थो । मेत्तचित्तं पच्चुपट्ठापेत्वा ओलोकनं चक्खूनि विय चक्खूनि नामाति आह “**उपसन्तेहि मेत्तचक्खूही**”ति । पियभावदीपकानि हि चक्खूनि **पियचक्खूनि** । **पमुदितस्स पीति** जायतीति पमोदपच्चयबलवपीतिमाह । **पञ्चवण्णा पीति उप्पज्जतीति** खुद्दिकादिभेदेन पञ्चप्पकारा पीति उप्पज्जति ।

पीतिमनस्साति ताय पीतिया पीणितमनस्स, पस्सद्धिआवहेहि उळारेहि पीतिवेगेहि तित्तचित्तस्साति अत्थो ।
विगतदरथोति किलेसपरिळाहानं दूरीभावेन वूपसन्तदरथो ।

केन उदकेन दारितो पब्बतप्पदेसोति कत्वा आह “कन्दरो नामा”तिआदि । उदकस्स यथानिन्नं पवत्तिया नदिनिब्बत्तनभावेन “नदिकुञ्जो”तिपि वुच्चति । सावट्टा नदियो पदरा । अट्ट मासेति हेमन्तगिम्हउतुवसेन अट्ट मासे । खुद्दका उदकवाहिनियो साखा वियाति साखा । खुद्दकसोब्भा कुसुब्भा ओकारस्स उकारं कत्वा । यत्थ उपरि उन्नतप्पदेसतो उदकं आगन्त्वा तिड्ढति चेव सन्दति च, ते कुसुब्भा खुद्दकआवाटा । खुद्दकनदियोति पब्बतपादादितो निक्खन्ता खुद्दका नदियो ।

परिसासुत्तवण्णना निड्ढिता ।

५-७. पठमआजानीयसुत्तादिवण्णना

१७-१९. पञ्चमे अनुच्छविकोति रज्जो परिभुञ्जनयोगो । हत्थपादादिअङ्गसमतायाति हत्थपादादिअवयवसमताय, रज्जो वा सेनाय अङ्गभूतत्ता रज्जो अङ्गन्ति वुच्चति । आनेत्वा हुनितब्बन्ति आहुनं, आहुतीति अत्थतो एकन्ति आह “आहुतिसङ्घातं पिण्डपातं”न्ति । दूरतोपि आनेत्वा सीलवन्तेसु दातब्बस्सेतं अधिवचनं । पिण्डपातन्ति च निदस्सनमत्तं । आनेत्वा हुनितब्बानज्झि चीवरादीनं चतुन्नं पच्चयानमेतं अधिवचनं आहुनन्ति । तं अरहतीति आहुनेय्यो । पटिग्गहेतुं युत्तोति तस्स महप्फलभावकरणतो पटिग्गणितुं अनुच्छविको ।

पाहुनकभत्तस्साति दिसविदिसतो आगतानं पियमनापानं जातिमित्तानं अत्थाय सक्कारे पटियत्तस्स आगन्तुकभत्तस्स । तज्झि ठपेत्वा ते तथारूपे पाहुनके सङ्घस्सेव दातुं युत्तं, सङ्घोव तं पटिग्गहेतुं युत्तो । सङ्घसदिसो हि पाहुनको नत्थि । तथा हेस एकस्मिं बुद्धन्तरे वीतिवत्ते दिस्सति, कदाचि असङ्ख्येय्येपि कप्पे वीतिवत्ते । अब्बोकिण्णञ्च पियमनापतादिकरेहि धम्मेहि समन्नागतो । एवं पाहुनमस्स दातुं युत्तं, पाहुनञ्च पटिग्गहेतुं युत्तोति पाहुनेय्यो । अयज्जेत्थ अधिप्पायो “जातिमित्ता विप्पवुट्ठा न चिरस्सेव समागच्छन्ति, अनवड्ढिता च तेसु पियमनापता, न एवमरियसङ्घो, तस्मा सङ्घोव पाहुनेय्यो”ति ।

दक्खन्ति एताय सत्ता यथाधिप्पेताहि सम्पत्तीहि वड्ढन्तीति दक्खिणा, परलोकं सद्दहित्वा दानं । तं दक्खिणं अरहति, दक्खिणाय वा हितो यस्मा महप्फलकरणताय विसोधेतीति दक्खिणेय्यो ।

पुज्जत्थिकेहि अज्जलि करणीयो एत्थाति अज्जलिकरणीयो । उभो हेत्थ सिरसि पतिट्ठापेत्वा सब्बलोकेन कयिरमानं अज्जलिकम्मं अरहतीति वा अज्जलिकरणीयो । तेनाह “अज्जलिपग्गहणस्स अनुच्छविको”ति ।

यदिपि पाळियं “अनुत्तरं”न्ति वुत्तं, नत्थि इतो उत्तरं विसिड्ढन्ति हि अनुत्तरं, समप्पिस्स पन नत्थीति दस्सेन्तो “असदिस”न्ति आह । खित्तं वुत्तं बीजं महप्फलभावकरणेन तायति रक्खति, खिपन्ति वपन्ति एत्थ बीजानीति वा खेत्तं, केदारादि, खेत्तं विय खेत्तं, पुज्जानं खेत्तं पुज्जक्खेत्तं । यथा हि रज्जो वा अमच्चस्स वा सालीनं वा यवानं वा विरुहनट्ठानं “रज्जो सालिक्खेत्तं यवक्खेत्तं”न्ति वुच्चति, एवं सङ्घो सब्बलोकस्स पुज्जानं विरुहनट्ठानं । सङ्घं निस्साय हि लोकस्स नानप्पकारहितसुखसंवत्तनिकानि पुज्जानि विरुहन्ति, तस्मा सङ्घो अनुत्तरं पुज्जक्खेत्तं लोकस्स । सेसं सुविज्जेय्यमेव । छट्ठसत्तमानि उत्तानत्थानेव ।

पठमआजानीयसुत्तादिवण्णना निड्ढिता ।

८. पोत्थकसुत्तवण्णना

१००. अट्ठमे नवोति नववायिमो । तेनाह “करणं उपादाय वुच्चती”ति । वाकमयवत्थन्ति साणादिवाकसाटकं । दुब्बण्णोति विवण्णो । दुक्खसम्फस्सोति खरसम्फस्सो । अप्पं अगघतीति अप्पगघो । अतिबहुं अगघन्तो कहापणगघनको होति । परिभोगमज्झिमोति परिभोगकालवसेन मज्झिमो । सो हि नवभावं अतिक्कमित्वा जिण्णभावं अप्पत्तो मज्झे परिभोगकालेपि दुब्बण्णो च दुक्खसम्फस्सो च अप्पगघोयेव होति । अतिबहुं अगघन्तो अट्ठं अगघति, जिण्णकाले पन अट्ठमासकं वा काकणिकं वा अगघति । उक्खलिपरिपुञ्चनन्ति काळुक्खलिपरिपुञ्चनं । नवोतिपि उपसम्पदाय पञ्चवस्सकालतो हेट्ठा जातिया सट्ठिवस्सोपि नवोयेव । दुब्बण्णतायाति सरीरवण्णेनपि गुणवण्णेनपि दुब्बण्णताय । दुस्सीलस्स हि परिसमज्जे नित्तेजताय सरीरवण्णेपि न सम्पज्जति, गुणवण्णेन वत्तब्बमेव नत्थि । अट्ठकथायं पन सरीरवण्णेन दुब्बण्णतापि गुणवण्णस्स अभावेन दुब्बण्णतायाति वुत्तं ।

ये खो पनस्साति ये खो पन तस्स उपट्ठाका वा जातिमित्तादयो वा एतं पुग्गलं सेवन्ति । तेसन्ति तेसं पुग्गलानं छ सत्थारे सेवन्तानं मिच्छादिट्ठिकानं विय । देवदत्ते सेवन्तानं कोकालिकादीनं विय च तं सेवनं दीघरत्तं अहिताय दुक्खाय होति । मज्झिमोति पञ्चवस्सकालतो पट्ठाय याव नववस्सकाला मज्झिमो नाम । थेरोति दसवस्सतो पट्ठाय थेरो नाम । एवमाहंसूति एवं वदन्ति । किं नु खो तुहन्ति तुहं बालस्स भणितेन को अत्थोति वुत्तं होति । तथारूपन्ति तथाजातिकं तथासभावं उक्खेपनीयकम्मस्स कारणभूतं ।

तीहि कप्पासअंसूहि सुत्तं कन्तित्वा कतवत्थन्ति तयो कप्पासअंसू गहेत्वा कन्तितसुत्तेन वायितं सुखुमवत्थं, तं नववायिमं अनगघं होति, परिभोगमज्झिमं वीसम्पि तिसम्पि सहस्सानि अगघति, जिण्णकाले, अट्ठपि दसपि सहस्सानि अगघति ।

तेसं तं होतीति तेसं सम्मासम्बुद्धादयो सेवन्ता विय तं सेवनं दीघरत्तं हिताय सुखाय होति । सम्मासम्बुद्धि एके निस्साय यावज्जकाला मुच्चनकसत्तानं पमाणं नत्थि, तथा सारिपुत्तत्थेरमहामोगल्लानत्थेरे अवसेसे च असीति महासावके निस्साय सगगतसत्तानं पमाणं नत्थि, यावज्जकाला तेसं दिट्ठानुगतिं पटिपन्नसत्तानम्पि पमाणं नत्थियेव । आधेय्यं गच्छतीति तस्स महाथेरस्स तं अत्थनिस्सितं वचनं यथा गन्धकरण्डके कासिकवत्थं आधातब्बतं ठपेतब्बतं गच्छति, एवं उत्तमङ्गे सिरस्मिं हृदये च आधातब्बतं ठपेतब्बतं गच्छति ।

पोत्थकसुत्तवण्णना निड्ढिता ।

९. लोणकपल्लसुत्तवण्णना

१०१. नवमे यथा यथा कम्मं करोतीति येन येन पकारेन पाणघातादिपापकम्मं करोति । विपाकं पटिसंवेदियतेवाति अवधारणेन कम्मसिद्धियं तब्बिपाकस्स अप्पवत्ति नाम नत्थीति दीपेति । तेनेवाह “न हि सक्का”तिआदि । एवं सन्तन्ति भुम्मत्थे उपयोगवचनन्ति आह “एवं सन्ते”ति । अभिसङ्खारविज्जाणनिरोधेनाति कम्मविज्जाणस्स आयति अनुप्पत्तिधम्मतापज्जनेन ।

“अयम्पि खो कायो एवंधम्मो एवंभावी एवंअनतीतो”ति आदिना कायस्स असुभानिच्चादिआकारअनुपस्सना कायभावनाति आह “**कायानुपस्सनासङ्घाताय ताय भावनाया**”ति । रागादीनन्ति आदि-सद्देन दोसमोहानं सङ्गहो दट्ठब्बो । “रागो खो, आवुसो, पमाणकरणो, दोसो पमाणकरणो, मोहो पमाणकरणो, ते खीणासवस्स भिक्खुनो पहीना उच्छिन्नमूला तालावत्थुकता अनभावंकता आयति अनुप्पादधम्मा”ति (म० नि० १.४५९) हि वुत्तं ।

यथा हि पब्बतपादे पूतिपण्णस्स उदकं नाम होति, काळवण्णं ओलोकेन्तानं ब्यामसतं गम्भीरं विय खायति, यट्ठिं वा रज्जुं वा गहेत्वा मिनन्तस्स पिट्ठिपादोद्धरणमत्तम्पि न होति, एवमेव एकच्चस्स याव रागादयो नुप्पज्जन्ति, ताव तं पुगलं सज्जानितुं न सक्का होति, सोतापन्नो विय सकदागामी विय अनागामी विय च खायति । यदा पनस्स रागादयो उप्पज्जन्ति, तदा रत्तो दुट्ठो मूळहोति पज्जायति । इति ते रागादयो “एत्तको अयं”न्ति पुगलस्स पमाणं दस्सेन्ताव उप्पज्जन्तीति पमाणकरणा नाम वुत्ता ।

जापेतुन्ति जिनधनं कातुं । सोति राजा, महामत्तो वा । अस्साति अज्जलिं पग्गहेत्वा याचन्तस्स । सेसमेत्थ उत्तानमेव ।

लोणकपल्लसुत्तवण्णना निट्ठिता ।

१०. पंसुधोवकसुत्तवण्णना

१०२. दसमे अनीहतदोसन्ति अनपनीतथूलकाळकं । अनपनीतकसावन्ति अनपगतसुखुमकाळकं । पढटमत्तन्ति आहटमत्तं ।

दसकुसलकम्मपथवसेन उप्पन्नं चित्तं चित्तमेव, विपस्सनापादकअट्टसमापत्तिचित्तं विपस्सनाचित्तञ्च ततो चित्ततो अधिकं चित्तन्ति अधिचित्तन्ति आह “**अधिचित्तन्ति समथविपस्सनाचित्तं**”न्ति । अनुयुत्तस्साति अनुप्पन्नस्स उप्पादनवसेन उप्पन्नस्स पटिबूहनवसेन अनु अनु युत्तस्स, तत्थ युत्तप्पयुत्तस्साति अत्थो । एत्थ च पुरेभत्तं पिण्डाय चरित्वा पच्छाभत्तं पिण्डपातप्पटिक्कन्तो निसीदनं आदाय “असुकस्मिं रुक्खमूले वा वनसण्डे वा पब्भारे वा समणधम्मं करिस्सामी”ति निक्खमन्तोपि तत्थ गन्त्वा हत्थेहि वा पादेहि वा निसज्जट्टानतो तिणपण्णानि अपनेन्तोपि अधिचित्तं अनुयुत्तोयेव । निसीदित्वा पन हत्थपादे धोवित्वा मूलकम्मट्टानं गहेत्वा भावनं अनुयुज्जन्तो भावनाय अप्पन्नं अप्पत्तायपि अधिचित्तमनुयुत्तोयेव तदत्थेनपि तंसद्वोहारतो । **चित्तसम्पन्नो**ति धम्मचित्तस्स समन्नागतत्ता सम्पन्नचित्तो । **पण्डितजातिको**ति पण्डितसभावो ।

कामे आरब्भाति वत्थुकामे आरब्भ । कामरागसङ्घातेन वा कामेन पटिसंयुत्तो वितक्को **कामवितक्को** । ब्यापज्जति चित्तं एतेनाति **ब्यापादो**, दोसो । विहिंसन्ति एताय सत्ते, विहिंसनं वा तेसं एतन्ति **विहिंसा**, परेसं विहेठनाकारेन पवत्तस्स करुणापटिपक्खस्स पापधम्मस्सेतं अधिवचनं । **जातके आरब्भ उप्पन्नो वितक्को**ति जातके आरब्भ गेहस्सितपेमवसेन उप्पन्नो वितक्को । **जनपदमारब्भ उप्पन्नो वितक्को**ति एत्थापि एसेव नयो । **अहो वत मं...पे०... उप्पन्नो वितक्को**ति “अहो वत मं परे न अवजानेय्युं, न हेट्ठा कत्वा मज्जेय्युं, पासाणच्छत्तं विय गरुं करेय्यु”न्ति एवं उप्पन्नवितक्को । **दसविपस्सनुपक्विकलेसवितक्का**ति ओभासादिदसविपस्सनुपक्विकलेसे आरब्भ उप्पन्नवितक्का ।

अवसिट्ठा धम्मवितक्का एतस्साति **अवसिट्ठधम्मवितक्को**, विपस्सनासमाधि । न **एकगगभावप्पत्तो** न एकगतं पत्तो । एकं उदेतीति हि **एकोदि**, पटिपक्खेहि अनभिभूतत्ता अगं सेट्ठं हुत्वा उदेतीति अत्थो । सेट्ठोपि हि लोके एकोति

वुच्चति, एकस्मिं आरम्भणे समाधानवसेन पवत्तचित्तस्सेतं अधिवचनं। एकोदिस्स भावो एकोदिभावो, एकगतायेतं अधिवचनं।

नियकज्झत्तन्ति अत्तसन्तानस्सेतं अधिवचनं। **गोचरज्झत्तन्ति** इध निब्बानं अधिप्पेतं। तेनाह “**एकस्मिं निब्बानगोचरेयेव तिट्ठती**”ति। **सुट्ठु निसीदतीति** समाधिपटिपक्खे किलेसे सन्निसीदेन्तो सुट्ठु निसीदति। **एकगं होतीति** अब्बगभावप्पत्तिया एकगं होति। **सम्मा आधियतीति** यथा आरम्भणे सुट्ठु अप्पितं होति, एवं सम्मा सम्मदेव आधियति।

अभिज्जा सच्छिकरणीयस्साति एत्थ “अभिज्जाय सच्छिकरणीयस्सा”ति वत्तब्बे “अभिज्जा”ति य-कारलोपेन पन पुन कालकिरियानिद्देसो कतोति आह “**अभिजानित्वा पच्चक्खं कातब्बस्सा**”ति। अभिज्जाय इद्धिविधादिजाणेन सच्छिकरियं इद्धिविधपच्चनुभवनादिकं **अभिज्जासच्छिकरणीयन्ति** एवं वा एत्थ अत्थो दट्ठब्बो। **सक्खिभब्बतं पापुणातीति** एत्थ पन यस्स पच्चक्खं अत्थि, सो सक्खी, सक्खिनो भब्बता सक्खिभब्बता, सक्खिभवनन्ति वुत्तं होति। सक्खी च सो भब्बो चाति सक्खिभब्बो। अयज्हि इद्धिविधादीनं भब्बो तत्थ च सक्खीति सक्खिभब्बो, तस्स भावो सक्खिभब्बता, तं पापुणातीति अत्थो।

अभिज्जापादकज्झानादिभेदेति एत्थ अभिज्जापादा च अभिज्जापादकज्झानञ्च अभिज्जापादकज्झानानि। **आदि-**सद्देन अरहत्तञ्च अरहत्तस्स विपस्सना च सङ्गहिताति दट्ठब्बं। तेनेव **मज्झिमनिकायदुक्कथायं** (म० नि० अट्ठ० २.१९८) —

“सति सतिआयतनेति सति सतिकारणे। किञ्चेत्थ कारणं? अभिज्जा वा अभिज्जापादकज्झानं वा, अवसाने पन अरहत्तं वा कारणं अरहत्तस्स विपस्सना वाति वेदितब्ब”न्ति वुत्तं।

यज्हि तं तत्र तत्र सक्खिभब्बतासङ्घातं इद्धिविधपच्चनुभवनादि, तस्स अभिज्जा कारणं। अथ इद्धिविधपच्चनुभवनादि अभिज्जा, एवं सति अभिज्जापादकज्झानं कारणं। अवसाने छट्ठाभिज्जाय पन अरहत्तं, अरहत्तस्स विपस्सना वा कारणं। अरहत्तज्झि “कुदास्सु नामाहं तदायतनं उपसम्पज्ज विहरिस्सामि, यदरिया एतरहि उपसम्पज्ज विहरन्ती”ति (म० नि० १.४६५; ३.३०७) अनुत्तरेसु विमोक्खेसु पिहं उपट्ठपेत्वा अभिज्जा निब्बत्तेन्तस्स कारणं। इदञ्च साधारणं न होति, साधारणवसेन पन अरहत्तस्स विपस्सना कारणं। इमस्मिज्हि सुत्ते अरहत्तफलवसेन छट्ठाभिज्जा वुत्ता। तेनेवाह “**आसवानं खयातिआदि चेत्थ फलसमापत्तिवसेन वुत्तन्ति वेदितब्ब**”न्ति।

पंसुधोवकसुत्तवण्णना निट्ठिता।

११. निमित्तसुत्तवण्णना

१०३. एकादसमे येहि फलं निमीयति, उप्पज्जनट्ठाने पक्खिपमानं विय होति, तानि **निमित्तानि**। तेनाह “**तीणि कारणानी**”ति। **कालेन कालन्ति** एत्थ **कालेनाति** भुम्मत्थे करणवचनं। **कालन्ति** च उपयोगवचनन्ति आह “**काले काले**”ति। **मनसि कातब्बाति** चित्ते कातब्बा, उप्पादेतब्बाति अत्थो। उपलक्खितसमाधानाकारो समाधियेव इध समाधिनिमित्तन्ति आह “**एकगता हि इध समाधिनिमित्तन्ति वुत्ता**”ति। **ठानं तं चित्तं कोसज्जाय संवत्तेय्याति** एत्थ ठानं अत्थीति वचनसेसो। तं भावनाचित्तं कोसज्जाय संवत्तेय्य, तस्स संवत्तनस्स कारणं अत्थीति अत्थो। तं वा मनसिकरणं **चित्तं कोसज्जाय संवत्तेय्य**, एतस्स ठानं कारणं अत्थीति अत्थो। तेनाह “**कारणं विज्जती**”तिआदि। **जाणजवन्ति** सङ्खारेसु अनिच्चादिवसेन पवत्तमानं पज्जाजवं।

यं किञ्चि सुवण्णतापनयोगगङ्गारभाजनं इह “उक्का”ति अधिप्पेतन्ति आह “अङ्गारकपल्ल”न्ति । सज्जेय्याति यथा तत्थ पक्खित्तं सुवण्णं तप्पति, एवं पटियादियेय्य । आलिम्पेय्याति आदियेय्य, जलेय्याति अत्थो । तेनाह “तत्थ अङ्गारे...पे०... गाहापेय्या”ति । मूसाय वा पक्खिपेय्याति तत्तके वा पक्खिपेय्य । उपधारेतीति सल्लक्खेति ।

निमित्तसुत्तवण्णना निट्ठिता ।

लोणकपल्लवग्गवण्णना निट्ठिता ।

दुतियपण्णासकं निट्ठितं ।

३. ततियपण्णासकं

(११) १. सम्बोधवग्गो

१-३. पुब्बेवसम्बोधसुत्तादिवण्णना

१०४-१०६. ततियस्स पठमे सम्बोधितो पुब्बेवाति सम्बोधो वुच्चति चतूसु मग्गेसु जाणं “सामं सम्मा बुज्झि एतेना”ति कत्वा, ततो पुब्बेयेवाति अत्थो । तेनाह “अरियमग्गप्पत्तितो अपरभागेयेवा”ति । बोधिसत्तस्सेव सत्तोति एत्थ यथा उदकतो उगन्त्वा ठितं परिपाकगतं पदुमं सूरियरस्मिसम्पस्सेन अवस्सं बुज्झिस्सतीति बुज्झनकपदुमन्ति वुच्चति । एवं बुद्धानं सन्तिके व्याकरणस्स लद्धत्ता अवस्सं अनन्तरायेन पारमियो पूरेत्वा बुज्झिस्सतीति बुज्झनकसत्तोति बोधिसत्तो । तेनाह “बुज्झनकसत्तस्सेव...पे०... आरभन्तस्सेव सतो”ति । या वा एसा चतुमग्गजाणसङ्घाता बोधि, “तं बोधिं कुदास्सु नामाहं पापुणिस्सामी”ति पत्थयमानो पटिपज्जतीति बोधियं सत्तो आसत्तोतिपि बोधिसत्तो । तेनाह “सम्बोधिया वा सत्तस्सेव लग्गस्सेव सतो”ति ।

अथ वा बोधीति जाणं “बुज्झति एतेना”ति कत्वा, बोधिमा सत्तो बोधिसत्तो, पुरिमपदे उत्तरपदलोपं कत्वा यथा “जाणसत्तो”ति, जाणवा पञ्चवा पण्डितो सत्तोति अत्थो । बुद्धानज्झि पादमूले अभिनीहारतो पट्टाय पण्डितोव सो सत्तो, न अन्धबालोति बोधिसत्तो । एवं गुणवतो उप्पन्ननामवसेन बोधिसत्तस्सेव सतो । अस्सादीयतीति अस्सादो, सुखं । तज्ज साताकारलक्खणन्ति आह “अस्सादोति मधुराकारो”ति । छन्दरागो विनीयति चेव पहीयति च एत्थाति निब्बानं “छन्दरागविनयो छन्दरागप्पहानज्जा”ति वुच्चति । तेनाह “निब्बान”न्तिआदि । तत्थ आगम्माति इदं यो जनो रागं विनेति पजहति च, तस्स आरम्मणकरणं सन्धाय वुत्तं । दुतियततियानि उत्तानत्थानेव ।

पुब्बेवसम्बोधसुत्तादिवण्णना निट्ठिता ।

४-९. समणब्राह्मणसुत्तादिवण्णना

१०७-११२. चतुत्थे सामज्जन्ति अरियमग्गो, तेन अरणीयतो उपगन्तब्बतो सामज्जत्थं, अरियफलन्ति आह “सामज्जत्थन्ति चतुब्बिधं अरियफल”न्ति । ब्रह्मज्जत्थन्ति एत्थापि एसेव नयो । तेनाह “इतरं तस्सेव वेवचन”न्ति । अरियमग्गसङ्घातं सामज्जमेव वा अरणीयतो सामज्जत्थन्ति आह “सामज्जत्थेन वा चत्तारो मग्गा”ति । पञ्चमादीनि

उत्तानत्थानेव ।

समणब्राह्मणसुत्तादिवण्णना निट्ठिता ।

१०. दुतियनिदानसुत्तवण्णना

११३. दसमे विवट्टगामिकम्मानन्ति विवट्टूपनिस्सयकम्मानं । तदभिनिवत्तेतीति एत्थ तं-सद्देन पच्चामसनस्स विपाकस्स परामासोति आह “तं अभिनिवत्तेती”ति, तं विपाकं अभिभवित्वा निवत्तेतीति अत्थो । इदानीं न केवलं विपाकस्सेव परामासो तं-सद्देन, अथ खो छन्दरागट्टानियानं धम्मानं तब्बिपाकस्स च परामासो दट्टुब्बोति आह “यदा वा तेना”तिआदि । ते चेव धम्मेति ते छन्दरागट्टानिये धम्मे । निब्बिज्झित्वा पस्सतीति किलेसे निब्बिज्झित्वा विभूतं पाकटं कत्वा पस्सतीति ।

दुतियनिदानसुत्तवण्णना निट्ठिता ।

सम्बोधवग्गवण्णना निट्ठिता ।

(१२) २. आपायिकवग्गो

१. आपायिकसुत्तवण्णना

११४. दुतियस्स पठमे अपायेसु निब्बत्तनसीलताय अपायूपगा आपायिकाति आह “अपायं गच्छिस्सन्तीति आपायिका”ति । अज्जे ब्रह्मचारिनो सुनिवत्थे सुपारुते सुम्भकपत्तधरे गामनिगमराजधानीसु पिण्डाय चरित्वा जीविकं कप्पेन्ते दिस्वा सयम्पि तादिसेन आकारेण तथापटिपज्जनतो “अहं ब्रह्मचारी”ति पटिज्जं देन्तो विय होतीति आह “ब्रह्मचारिपटिज्जोति ब्रह्मचारिपटिरूपको”ति । “अहम्पि भिक्खू”ति वत्वा उपोसथङ्गादीनि पविसन्तो पन ब्रह्मचारिपटिज्जो होतियेव, तथा सङ्घिकं लाभं गणहन्तो । तेनाह “तेसं वा...पे०... एवंपटिज्जो”ति । अक्कोसतीति “अस्समणोसि, समणपटिज्जोसी”तिआदिना अक्कोसति । परिभासतीति “सो त्वं ‘होतु, मुण्डकसमणो अहं’न्ति मज्जसि, इदानीं ते अस्समणभावं आरोपेस्सामी”तिआदिना वदन्तो परिभासति ।

किलेसकामोपि अस्सादियमानो वत्थुकामन्तो गधोयेव, किलेसकामवसेन च तेसं अस्सादनं सियाति आह “किलेसकामेन वत्थुकामे सेवन्तस्सा”ति । किलेसकामेनाति करणत्थे करणवचनं । नत्थि दोसोति अस्सादेत्वा विसयपरिभोगे नत्थि आदीनवो, तप्पच्चया न कोचि अन्तरायोति अधिप्पायो । पातब्बतं आपज्जतीति परिभुज्जनकतं उपगच्छति । परिभोगत्थो हि अयं पा-सद्दो, कत्तुसाधनो च तब्ब-सद्दो, यथारुचि परिभुज्जतीति अत्थो । पिवितब्बतं परिभुज्जितब्बतन्ति एत्थापि कत्तुवसेनेव अत्थो वेदितब्बो ।

आपायिकसुत्तवण्णना निट्ठिता ।

२. दुल्लभसुत्तवण्णना

११५. दुतिये परेन कतस्स उपकारस्स अनुरूपप्पवत्ति अत्तनि कतं उपकारं उपकारतो जानन्तो वेदियन्तो कतञ्जू कतवेदीति आह “इमिना मय्हं कत”न्तिआदि ।

दुल्लभसुत्तवण्णना निड्ढिता ।

३. अप्पमेय्यसुत्तवण्णना

११६. ततिये सुखेन मेतब्बोति यथा परित्तस्स उदकस्स सुखेन पमाणं गय्हति, एवमेव “उद्धतो”तिआदिना यथावुत्तेहि अगुणङ्गेहि समन्नागतस्स सुखेन पमाणं गय्हतीति, सुखेन मेतब्बो । दुक्खेन मेतब्बोति यथा महासमुदस्स दुक्खेन पमाणं गय्हति, एवमेव “अनुद्धतो”तिआदिना दस्सितेहि गुणङ्गेहि समन्नागतस्स दुक्खेन पमाणं गय्हति, “अनागामी नु खो खीणासवो नु खो”ति वत्तब्बतं गच्छति, तेनेस दुक्खेन मेतब्बो । पमेतुं न सक्कोतीति यथा आकासस्स न सक्का पमाणं गहेतुं, एवं खीणासवस्स, तेनेस पमेतुं न सक्काति अप्पमेय्यो ।

साराभावेन तुच्छता नळो विय नळो, मानोति आह “उन्नळोति उगगतनळो”ति, उद्धिततुच्छमानोति वुत्तं होति । तेनाह “तुच्छमानं उक्खिपित्वा ठितोति अत्थो”ति । मनो हि सेय्यस्स सेय्योति सदिसोति च पवत्तिया विसेसतो तुच्छो । चापल्लेनाति चपलभावेन, तण्हालोलुप्पेनाति अत्थो । मुखरोति मुखेन फरुसो, फरुसवाचोति अत्थो । विकिण्णवाचोति विसटवचनो सम्फप्पलापिताय अपरियन्तवचनो । तेनाह “असञ्जतवचनो”ति, दिवसम्पि निरत्थकवचनं पलापीति वुत्तं होति । चित्तेकगगतारहितोति उपचारप्पनासमाधिरहितो चण्डसोते बद्धनावा विय अनवद्धितकिरियो । भन्तचित्तोति अनवद्धितचित्तो पण्णारुळ्हालमिगसदिसो । विवटिन्द्रियोति संवराभावेन गिहिकाले विय असंवृतचक्खादिन्द्रियो ।

अप्पमेय्यसुत्तवण्णना निड्ढिता ।

४. आनेज्जसुत्तवण्णना

११७. चतुत्थे सह ब्ययति गच्छतीति सहब्यो, सहपवत्तनको । तस्स भावो सहब्यता, सहपवत्तीति आह “सहभावं उपपज्जती”ति । “यावतकं तेसं देवानं आयुप्पमाणं, तं सब्बं खेपेत्वा निरयम्पि गच्छती”तिआदिवचनतो अरूपभवतो चुतस्स अपायूपपत्ति वुत्ता विय दिस्सतीति तन्निवत्तनत्थं भगवतो अधिप्पायं विवरन्तो “सन्धायभासितमिदं वचन”न्ति दीपेति “निरयादीहि अविप्पमुत्तत्ता”तिआदिना । न हि तस्स उपचारज्झानतो बलवतरं अकुसलं अत्थीति । इमिना ततो चवन्तानं उपचारज्झानमेव पटिसन्धिजनकं कम्मन्ति दीपेति । अधिकं पयसति पयुज्जति एतेनाति अधिप्पयासो, सविसेसं इतिकत्तब्बकिरिया । तेनाह “अधिकप्पयोगो”ति । सेसमेत्थ उत्तानमेव ।

आनेज्जसुत्तवण्णना निड्ढिता ।

५. विपत्तिसम्पदासुत्तवण्णना

११८. पञ्चमे दिन्नन्ति देय्यधम्मसीसेन दानं वुत्तन्ति आह “दिन्नस्स फलाभावं सन्धाय वदती”ति । दिन्नं पन अन्नादिवत्थुं कथं पटिक्खपति । एस नयो “यिट्ठं हुत”न्ति एत्थापि । महायागोति सब्बसाधारणं महादानं । पहेणकसक्कारोति पाहुनकानं कातब्बसक्कारो । फलन्ति आनिसंसफलं निस्सन्दफलञ्च । विपाकोति सदिसफलं ।

परलोके ठितस्स अयं लोको नत्थीति परलोके ठितस्स कम्मुना लद्धब्बो अयं लोको न होति । इधलोके ठितस्सपि परलोको नत्थीति इधलोके ठितस्स कम्मुना लद्धब्बो परलोको न होति । तत्थ कारणमाह “सब्बे तत्थ तत्थेव उच्छिज्जन्ती”ति । इमे सत्ता यत्थ यत्थ भवयोनिगतिआदीसु ठिता, तत्थ तत्थेव उच्छिज्जन्ति, द्वयविनासेन विनस्सन्ति ।

फलाभाववसेनाति मातापितूसु सम्मापटिपत्तिमिच्छापटिपत्तीनं फलस्स अभाववसेन “नत्थि माता, नत्थि पिता”ति वदति, न मातापितूनं, नापि तेसु सम्मापटिपत्तिमिच्छापटिपत्तीनं अभाववसेन तेसं लोकपच्चक्खत्ता । पुब्बुळकस्स विय इमेसं सत्तानं उप्पादो नाम केवलो, न च खनपुब्बकोति दस्सनत्थं “नत्थि सत्ता ओपपातिका”ति वुत्तन्ति आह “चवित्वा उप्पज्जनका सत्ता नाम नत्थीति वदती”ति । सयं अभिज्जा सच्छिकत्वा पवेदेन्तीति ये इमञ्च लोकं परञ्च लोकं अभिविसिद्वाय पज्जाय सयं पच्चक्खं कत्वा पवेदेन्ति, ते नत्थीति सब्बञ्जुबुद्धानं अभावं दीपेति ।

विपत्तिसम्पदासुत्तवण्णना निद्धिता ।

६-७. अपण्णकसुत्तादिवण्णना

११९-१२०. छट्ठे छहि तलेहि समन्नागतो पासकोति चतूसु पस्सेसु चत्तारि तलानि, द्वीसु कोटीसु द्वे तलानीति एवं छहि तलेहि समन्नागतो पासककीळापसुतानं मणिसदिसो पासकविसेसो । सत्तमं उत्तानमेव ।

अपण्णकसुत्तादिवण्णना निद्धिता ।

८. पठमसोचेय्यसुत्तवण्णना

१२१. अट्ठमे सुचिभावोति किलेसासुचिविगमेन सुद्धभावो असंकलिट्ठभावो, अत्थतो कायसुचरितादीनि ।

पठमसोचेय्यसुत्तवण्णना निद्धिता ।

९. दुतियसोचेय्यसुत्तवण्णना

१२२. नवमे समुच्छेदवसेन पहीनसब्बकायदुच्चरितताय काये, कायेन वा सुचि कायसुचि । तेनाह “कायद्वारे”तिआदि । सोचेय्यसम्पन्नन्ति पटिप्पस्सद्धकिलेसत्ता परिसुद्धाय सोचेय्यसम्पत्तिया उपेतं । निन्हाता अगमग्गसलिलेन विक्खालिता पापा एतेनाति निन्हातपापको, खीणासवो । तेनाह “खीणासवोव कथितो”ति ।

दुतियसोचेय्यसुत्तवण्णना निद्धिता ।

१०. मोनेय्यसुत्तवण्णना

१२३. दसमे मुनिनो भावा मोनेय्यानि, येहि धम्मोहि उभयहितमुननतो मुनि नाम होति, ते मुनिभावकरा मोनेय्या पटिपदा धम्मा एव वुत्ता । मुनिनो वा एतानि मोनेय्यानि, यथावुत्तधम्मा एव । तत्थ यस्मा कायेन अकत्तब्बस्स अकरणं, कत्तब्बस्स च करणं, “अत्थि इमस्मिं काये केसा”तिआदिना (दी० नि० २.३७७; म० नि० १.११०; सं० नि० ४.१२७; खु० पा० ३.द्वत्तिसाकार) कायसङ्घातस्स आरम्भणस्स जाननं, कायस्स च समुदयतो अत्थङ्गमतो अस्सादतो आदीनवतो

निस्सरणतो च याथावतो परिजाननता, तथा परिजाननवसेन पन पवत्तो विपस्सनामगो, तेन च काये छन्दरागस्स पजहनं, कायसङ्खारं निरोधेत्वा पत्तब्बसमापत्ति वा, सब्बे एते कायमुखेन पवत्ता मोनेय्यप्पटिपदा धम्मा **कायमोनेय्यं नाम** । तस्मा तमत्थं दस्सेतुं “कतमं कायमोनेय्यं? तिविधकायदुच्चरितस्स पहानं कायमोनेय्यं, तिविधकायसुचरितम्पि कायमोनेय्यं”न्तिआदिना (महानि० १४) पाळि आगता । इधापि तेनेव पाळिनयेन अत्थं दस्सेन्तो “**तिविधकायदुच्चरितप्पहानं कायमोनेय्यं नामा**”तिआदिमाह ।

इदानीं “कतमं वचीमोनेय्यं? चतुब्बिधवचीदुच्चरितस्स पहानं वचीमोनेय्यं, चतुब्बिधं वचीसुचरितं, वाचारम्मणे जाणं, वाचापरिज्जा, परिज्जासहगतो मग्गो, वाचाय छन्दरागस्स पहानं, वचीसङ्खारनिरोधो दुतियज्झानसमापत्ति वचीमोनेय्यं”न्ति इमाय पाळिया वुत्तमत्थं अतिदीपेन्तो “**वचीमोनेय्येपि एसेव नयो**”तिआदिमाह । तत्थ चोपनवाचञ्चेव सद्ववाचञ्च आरब्ध पवत्ता पज्जा **वाचारम्मणे जाणं** । तस्सा वाचाय समुदयादितो परिजाननं **वाचापरिज्जा** ।

“कतमं मनोमोनेय्यं? तिविधमनोदुच्चरितस्स पहानं मनोमोनेय्यं, तिविधं मनोसुच्चरितं, मनारम्मणे जाणं, मनपरिज्जा, परिज्जासहगतो मग्गो, मनस्मिं छन्दरागस्स पहानं, चित्तसङ्खारनिरोधो सज्जावेदयितनिरोधसमापत्ति मनोमोनेय्यं”न्ति इमाय पाळिया आगतनयेन अत्थं विभावेन्तो “**मनोमोनेय्येपि इमिनाव नयेन अत्थं जत्वा**”तिआदिमाह । तत्थ च एकासीतिविधं लोकियचित्तं आरब्ध पवत्तजाणं **मनारम्मणे जाणं** । तस्स समुदयादितो परिजाननं **मनपरिज्जा**ति अयं विसेसो ।

मोनेय्यसुत्तवण्णना निड्डिता ।

आपायिकवग्गवण्णना निड्डिता ।

(१३) ३. कुसिनारवग्गो

१-२. कुसिनारसुत्तादिवण्णना

१२४-१२५. ततियस्स पठमे तण्हागेधेन गथितोति तण्हाबन्धनेन बद्धो । तण्हामुच्छनायाति तण्हाय वसेन मुच्छापत्तिया । **मुच्छितोति** मुच्छं मोहं पमादं आपन्नो । **अज्झोपन्नोति** अधिओपन्नो । तण्हाय अधिभवित्वा अज्झोत्थटो गिलित्वा परिनिट्ठपेत्वा विय ठितो । तेनाह “**अज्झोपन्नोति तण्हाय गिलित्वा परिनिट्ठपेत्वा पवत्तो**”ति । **अनादीनवदस्सावीति** गथितादिभावेन परिभोगे आदीनवमत्तम्पि न पस्सति । **निस्सरणपज्जोति** अयमत्थो आहारपरिभोगेति तत्थ पयोजनपरिच्छेदिका “यावदेव इमस्स कायस्स ठितिया”तिआदिना (म० नि० १.२३; २.२४; ३.७५; सं० नि० ४.१२०; अ० नि० ६.५८; ८.९) पवत्ता आहारपटिबद्धछन्दरागनिस्सरणभूता पज्जा अस्स अत्थीति निस्सरणपज्जो । सेसमेत्थ उत्तानमेव । दुतिये नत्थि वत्तब्बं ।

कुसिनारसुत्तादिवण्णना निड्डिता ।

३. गोतमकचेतियसुत्तवण्णना

१२६. ततिये **सम्बहुलाति** पच्चसतमत्ता । पच्चसता किर ब्राह्मणा तिण्णं वेदानं पारगू अपरभागे भगवतो धम्मदेसनं

सुत्वा कामेसु आदीनवं नेक्खम्मे च आनिसंसं पस्समाना भगवतो सन्निके पब्बजित्वा न चिरस्सेव सब्बं बुद्धवचनं उग्गण्हित्वा परियत्तिं निस्साय मानं उप्पादेसुं — “यं यं भगवा कथेति, तं तं मयं खिप्पमेव जानाम। भगवा हि इत्थिलिङ्गादीनि तीणि लिङ्गानि, नामादीनि चत्तारि पदानि, पठमादयो सत्त विभक्तियो मुञ्चित्वा न किञ्चि कथेति, एवं कथिते च अम्हाकं गण्ठिपदं नाम नत्थी”ति, ते भगवति अगारवा हुत्वा ततो पट्टाय भगवतो उपट्टानम्पि धम्मस्सवनम्पि अभिण्हं न गच्छन्ति। ते सन्धाय वुत्तं “सम्बहुला किर ब्राह्मणपब्बजिता...पे०... धम्मस्सवनं न गच्छन्ती”ति। **मुखपटिज्जं गहेत्वा**ति “सच्चं किर तुम्हे, भिक्खवे”ति आदिना तमत्थं पटिपुच्छित्वा “सच्चं भगवा”ति तेहि भिक्खूहि वुत्तं पटिवचनं गहेत्वा। तज्झि अत्तनो मुखेनेव पटिज्जातत्ता “मुखपटिज्जा”ति वुच्चति।

नेव आगतट्टानं न गतट्टानं अहसंसु। कस्मा? अज्जाणतो। ते किर तस्स सुत्तस्स अत्थं न जानिंसु। तेसज्झि तस्मिं समये विचित्रनयं देसनाविलासयुत्तम्पि तं सुत्तं घनपुथुलेन दुस्सपट्टेन मुखं बद्धं कत्वा पुरतो ठपितमनुज्जभोजनं विय अहोसि। ननु च भगवा अत्तना देसितं धम्मं परे जापेतुं कप्पसतसहस्साधिकानि चत्तारि असङ्खेय्यानि पारमियो पूरेत्वा सब्बजुत्तं पत्तो, सो कस्मा यथा ते न जानन्ति, तथा देसेतीति? तेसं मानभज्जनत्थं। भगवा हि “अभब्बा इमे इमं मानखिलं अनुपहच्च मग्गं वा फलं वा सच्छिकातु”न्ति तेसं सुतपरियत्तिं निस्साय उप्पन्नं अट्टुप्पत्तिं कत्वा देसनाकुसलो मानभज्जनत्थं “सब्बधम्ममूलपरियाय”न्ति आदिना **मूलपरियायसुत्तं** (म० नि० १.१) अभसि।

सम्मासम्बुद्धो “महं कथा निव्याती”ति मुखसम्पत्तमेव कथेतीति चिन्तयिंसूति इदं अङ्गुत्तरभाणकानं वळज्जनकतन्तिनीहारेन वुत्तं। मज्झिमभाणका पन एवं वदन्ति — एवं मानभज्जनत्थं देसितञ्च पन तं सुत्तं सुत्वा ते भिक्खू “तंयेव किर पथविं दिट्ठिगतिको सज्जानाति, सेखोपि अरहापि तथागतोपि अभिजानाति, किं नामिदं कथं नामिदं”न्ति चिन्तेन्ता “पुब्बे मयं भगवता कथितं यंकिञ्चि खिप्पमेव जानाम, इदानि पनिमस्स मूलपरियायस्स अन्तं वा कोटिं वा न जानाम न पस्साम, अहो बुद्धा नाम अप्पमेय्या अतुला”ति उद्धतदाठा विय सप्पा निम्मदा हुत्वा बुद्धपट्टानञ्च धम्मस्सवनञ्च सक्कच्चं अगमंसु। तेन समयेन धम्मसभायं सन्निसिन्ना भिक्खू “अहो बुद्धानं आनुभावो, ते नामब्राह्मणपब्बजिता तथा मानमदमत्ता भगवता मूलपरियायदेसनाय निहतमाना कता”ति कथं समुट्ठापेसुं। तं सुत्वा भगवा “न, भिक्खवे, इदानेव, पुब्बेपि अहं एवं इमे मानपग्गहितसीसे चरन्ते निहतमाने अकासि”न्ति वत्वा अतीतं आहरन्तो “भूतपुब्बं, भिक्खवे, अज्जतरो दिसापामोक्खो ब्राह्मणो बाराणसियं पटिवसति तिण्णं वेदानं पारगू सनिघण्टुकेटुभानं साक्खरप्पभेदानं इतिहासपञ्चमानं पदको वेय्याकरणो लोकायतमहापुरिसलक्खणेसु अनवयो, सो पञ्चमत्तानि माणवकसतानि मन्ते वार्चेति। पण्डितमाणवका बहुञ्च गण्हन्ति लहुञ्च, सुट्ठु च उपधारेन्ती”ति आदिना जातकं कथेसि।

तं सुत्वा ते भिक्खू “पुब्बेपि मयं मानेनेव उपहता”ति भिय्योसोमत्ताय निहतमाना हुत्वा अत्तनो उपकारकम्मट्टानपरायणा अहेसुं। ततो भगवा एकं समयं जनपदचारिकं चरन्तो वेसालिं पत्वा गोतमके चेतिये विहरन्तो इमेसं पञ्चसतानं भिक्खूनां जाणपरिपाकं विदित्वा इदं गोतमकसुत्तं कथेसि। इदञ्च सुत्तं सुत्वा ते पञ्चसता भिक्खू तस्मिंयेव आसने सह पटिसम्भिदाहि अरहत्तं पापुणिसूति।

अभिज्जायाति कुसलादिभेदं खन्धादिभेदञ्च देसेतब्बं धम्मं, वेनेय्यानञ्च आसयानुसयचरियाधिमुत्तिआदिभेदं, तस्स च नेसं देसेतब्बप्पकारं याथावतो अभिजानित्वाति अत्थो। **इमे पञ्चक्खन्धा द्वादसायतनानीति** आदि पनेत्थ निदस्सनमत्तं वुत्तन्ति वेदितब्बं। **सप्पच्चयन्ति** सकारणं, वेनेय्यानं अज्झासयेन वा पुच्छाय वा अट्टुप्पत्तिया वा सनिमित्तं हेतूदाहरणसहितञ्चाति अत्थो। रागादीनं पटिहरणं पटिहारियं, तदेव पाटिहारियं, सह पाटिहारियेनाति **सप्पाटिहारियं**।

रागादिष्पटिसेधनवसेनेव हि सत्था धम्मं देसेति । तेनाह “पच्चनीकपटिहरणेन सप्पाटिहारियमेव कत्वा”ति । अपरे पन “यथारहं इद्धिआदेसनानुसासनिपाटिहारियसहित”न्ति वदन्ति अनुसासनिपाटिहारियरहिता देसना नत्थीति कत्वा । सेसमेत्थ उत्तानमेव ।

गोतमकचेतियसुत्तवण्णना निड्ढिता ।

४. भरण्डुकालामसुत्तवण्णना

१२७. चतुत्थे आळारकालामकालेति आळारकालामानं धरमानकाले । परिज्जन्ति प्हानपरिज्जं । सा हि समतिक्कमो, न इतरा । तेनाह “परिज्जा नाम समतिक्कमो”ति । एत्थ च पठमो सत्था रूपावचरसमापत्तिलाभी दट्ठब्बो, दुतियो अरूपावचरसमापत्तिलाभी, ततियो सम्मासम्बुद्धो दट्ठब्बो । वुत्तज्जेतं पुग्गलपज्जत्तियं (पु० प० १३०) —

“खायं सत्था कामानं परिज्जं पज्जापेति, न रूपानं परिज्जं पज्जापेति, न वेदनानं परिज्जं पज्जापेति, रूपावचरसमापत्तिया लाभी सत्था तेन दट्ठब्बो । खायं सत्था कामानञ्च परिज्जं पज्जापेति, रूपानञ्च परिज्जं पज्जापेति, न वेदनानं परिज्जं पज्जापेति, अरूपावचरसमापत्तिया लाभी सत्था तेन दट्ठब्बो । खायं सत्था कामानञ्च परिज्जं पज्जापेति, रूपानञ्च परिज्जं पज्जापेति, वेदनानञ्च परिज्जं पज्जापेति, सम्मासम्बुद्धो सत्था तेन दट्ठब्बो”ति ।

तत्थ तित्थिया समयं जानन्ता कामानं परिज्जं पज्जापेय्युं पठमज्झानं वदमाना । रूपानं परिज्जं पज्जापेय्युं अरूपरागं वदमाना । वेदनापरिज्जं पज्जापेय्युं असज्जारागं वदमाना । ते पन “इदं नाम पठमज्झानं, अयं रूपभवो, अयं असज्जाभवो”तिपि न जानन्ति । ते पज्जापेतुं असक्कोन्तापि केवलं “पज्जापेमा”ति वदन्ति । तथागतो पन कामानं परिज्जं अनागामिमग्गेन पज्जापेति, रूपवेदनानं अरहत्तमग्गेन । एवमेत्थ द्वे जना बाहिरका, एको सम्मासम्बुद्धोति इमस्मिं लोके तयो सत्थारो नाम ।

भरण्डुकालामसुत्तवण्णना निड्ढिता ।

५. हत्थकसुत्तवण्णना

१२८. पज्जमे अभिक्कन्ताति अतिक्कन्ता, विगताति अत्थोति आह “खये दिस्सती”ति । तेनेव हि “निक्खन्तो पठमो यामो”ति अनन्तरं वुत्तं । अभिक्कन्ततरोति अतिविय कन्ततरो । तादिसो च सुन्दरो भद्दको नाम होतीति आह “सुन्दरे दिस्सती”ति । कोति देवनागयक्खगन्धब्बादीसु को कतमो? मेति मम । पादानीति पादे । इद्धियाति इमाय एवरूपाय देविद्धिया । यससाति इमिना एदिसेन परिवारेन परिच्छेदेन । जलन्ति विज्जोतमानो । अभिक्कन्तेनाति अतिविय कन्तेन कमनीयेन अभिरूपेन । वण्णेनाति छविवण्णेन सरीरवण्णनिभाय । सब्बा ओभासयं दिसाति दस दिसा पभासेन्तो, चन्दो विय सूरियो विय च एकोभासं एकालोकं करोन्तोति गाथाय अत्थो । अभिरूपेति उळाररूपे सम्पन्नरूपे । अब्भनुमोदनेति सम्पहंसने । इध पनाति “अभिक्कन्ताय रत्तिया”ति एतस्मिं पदे । तेनाति सुन्दरपरियायत्ता । खये वा इध अभिक्कन्तसद्दो दट्ठब्बो, तेन “अभिक्कन्ताय परिक्खीणाय रत्तिया”ति वुत्तं होति ।

रूपायतनादीसूति आदिसद्देन अक्खरादीनं सङ्गहो दट्ठब्बो । सुवण्णवण्णोति सुवण्णच्छवीति अयमेत्थ अत्थोति

आह “छविय”न्ति । तथा हि वृत्तं “कञ्चनसन्निभत्तचो”ति (म० नि० २.३९९; सु० नि० ५५६) । सञ्जूळहाति सम्बन्धिता, गन्थिताति अत्थो । वण्णाति गुणवण्णाति आह “थुतिय”न्ति, थोमनायन्ति अत्थो । कुलवग्गेति खत्तियादिकुलकोट्टासे । तत्थ “अच्छो विप्पसन्नो”ति आदिना वण्णितब्बट्टेन वण्णो, छवि । वण्णनट्टेन अभित्थवट्टेन वण्णो, थुति । अञ्जमञ्जं असङ्करतो वण्णेत्तब्बतो ठपेत्तब्बतो वण्णो, खत्तियादिकुलवग्गो । वण्णीयति आपीयति एतेनाति वण्णो, जापककारणं । वण्णनतो थूलरस्सादिभावेन उपट्टानतो वण्णो, सण्ठानं । महन्तं खुद्धकं मज्झिमन्ति वण्णेत्तब्बतो पमितब्बतो वण्णो, पमाणं । वण्णीयति चक्खुना पस्सीयतीति वण्णो, रूपायतनन्ति एवं तस्मिं तस्मिं अत्थे वण्णसदस्स पवत्ति वेदितब्बा । सोति वण्णसदो । छविया दट्टब्बो रूपायतने गय्हमानस्सपि छविमुखेनेव गहेत्तब्बतो । छविगता पन वण्णधातु एव “सुवण्णवण्णो”ति एत्थ वण्णग्गहणेन गहिताति अपरे ।

केवलपरिपुण्णन्ति एकदेसमि असेसेत्वा निरवसेसतोव परिपुण्णन्ति अयमेत्थ अत्थोति आह “अनवसेसता अत्थो”ति । केवलकप्पाति कप्प-सदो निपातो पदपूरणमत्तं, “केवलं”इच्चेव अत्थो । केवलसदो च बहुलवाचीति आह “येभ्य्यता अत्थो”ति । केचि पन “ईसकं असमत्तं केवलं केवलकप्प”न्ति वदन्ति । अनवसेसत्थो एत्थ केवलसदो सिया, अनत्थन्तरेन पन कप्पसद्वेन पदवट्टनं कतं “केवला एव केवलकप्पा”ति । तथा वा कप्पनीयत्ता पञ्जपेत्तब्बत्ता केवलकप्पा । अब्यामिस्सता विजातियेन असङ्करो सुद्धता । अनतिरेकता तंपरमता विसेसाभावो । केवलकप्पन्ति केवलं दळ्हं कत्वाति अत्थो । केवलं वुच्चति निब्बानं सब्बसङ्खतविवित्तत्ता, तं एतस्स अधिगतं अत्थीति केवली, सच्छिकतनिरोधो खीणासवो ।

कप्प-सदो पनायं सउपसग्गो अनुपसग्गो चाति अधिप्पायेन ओकप्पनियपदे लब्भमानं ओकप्पसद्वमत्तं निदस्सेति, अञ्जथा कप्पसद्वस्स अत्थुद्धारे ओकप्पनियपदं अनिदस्सनमेव सिया । समणकप्पेहीति विनयसिद्धेहि समणवोहारेहि । निच्चकप्पन्ति निच्चकालं । पञ्जत्तीति नामं । नामज्हेतं तस्स आयस्मतो, यदिदं कप्पोति । कप्पितकेसमस्सूति कत्तरिया छेदितकेसमस्सु । द्दङ्गुलकप्पोति मज्झन्हिकवेलाय वीतिक्कन्ताय द्दङ्गुलताविकप्पो । लेसोति अपदेसो । अनवसेसं फरितुं समत्थस्स ओभासस्स केनचि कारणेन एकदेसफरणमि सिया, अयं पन सब्बस्सेव फरतीति दस्सेतुं समन्तत्थो कप्पसदो गहितोति आह “अनवसेसं समन्ततो”ति ।

आभाय फरित्वाति वत्थमालालङ्कारसरीरसमुट्ठिताय आभाय फरित्वा । देवतानज्हि सरीरोभासं द्वादसयोजनमत्तं ठानं । ततो भिय्योपि फरित्वा तिट्ठति, तथा वत्थाभरणादिसमुट्ठिता पभा ।

हत्थकसुत्तवण्णना निट्ठिता ।

६. कटुवियसुत्तवण्णना

१२९. छट्ठे गावीनं कयविककयवसेन योगो एत्थाति गोयोगो, कयविककयं करोन्तो गावीहि युज्जन्ति एत्थाति वा गोयोगो, गावीनं विककयट्टानं । तत्थ जातो पिलक्खरुक्खो गोयोगपिलक्खो, तस्मिं । समीपत्थे चेतं भुम्मवचनं । तेनाह “गावीनं विककयट्टाने उट्ठितपिलक्खस्स सन्तिके”ति । रिक्तो अस्सादो एतस्साति रिक्तस्सादो । तेनाह “ज्ञानसुखाभावेन रिक्तस्साद”न्ति । सेसमेत्थ उत्तानमेव ।

कटुवियसुत्तवण्णना निट्ठिता ।

८. दुतियअनुरुद्धसुत्तवण्णना

१३१. अट्टमे इदं ते मानस्मिन्ति एत्थ मानस्मिन्ति पच्चत्ते भुम्मवचनं । इदन्ति च लिङ्गविपल्लासेन नपुंसकनिद्देशो कतोति आह “अयं ते नवविधेन वड्ढितमानो”ति । सेसेसुपि एसेव नयो ।

दुतियअनुरुद्धसुत्तवण्णना निड्ढिता ।

९. पटिच्छन्नसुत्तवण्णना

१३२. नवमे असाधारणसिक्खापदन्ति भिक्खुनीनं असाधारणं भिक्खूनंयेव पञ्जत्तसिक्खापदं साधारणसिक्खापदन्ति भिक्खूनं भिक्खुनीनञ्च साधारणं उभतोपञ्जत्तसिक्खापदं ।

पटिच्छन्नसुत्तवण्णना निड्ढिता ।

१०. लेखसुत्तवण्णना

१३३. दसमे थिरट्ठानतोति थिरट्ठानतोव । पासाणे लेखसदिसा परापराधनिब्बत्ता कोधलेखा यस्स सो पासाणलेखूपमसमन्नागतो पासाणलेखूपमोति वुत्तो । एवं इतरेपि । अनुसेतीति अप्पहीनताय अनुसेति । न खिप्पं लुज्जतीति न अन्तरा नस्सति कम्मट्ठानेनेव नस्सनतो । एवमेवन्ति एवं तस्सपि पुग्गलस्स कोधो न अन्तरा पुनदिवसे वा अपरदिवसे वा निट्ठाति, अद्धनियो पन होति, मरणेनेव निट्ठातीति अत्थो । कक्खळेनाति अतिकक्खळेन धम्मच्छेदकेन थद्धवचनेन । संसन्दतीति एकीभवति । सम्मोदतीति निरन्तरो होतीति एवमेत्थ अत्थो दट्ठब्बो ।

अथ वा सन्धियतीति ठानगमनादीसु कायकिरियासु कायेन समोधानं गच्छति, तिलतण्डुला विय मिस्सीभावं उपेतीति अत्थो । संसन्दतीति चित्तकिरियासु चित्तेन समोधानं गच्छति, खीरोदकं विय एकीभावं उपेतीति अत्थो । सम्मोदतीति उद्देसपरिपुच्छादीसु वचीकिरियासु वाचाय समोधानं गच्छति, विप्पवासागतोपि पियसहायको विय पियतरभावं उपेतीति अत्थो । अपिच किच्चकरणीयेसु तेहि सद्धि आदीतोव एककिरियाभावं उपगच्छन्तो सन्धियति, याव मज्झा पवत्तन्तो संसन्दति, याव परियोसाना अनिवत्तन्तो सम्मोदतीति वेदितब्बो ।

लेखसुत्तवण्णना निड्ढिता ।

कुसिनारवग्गवण्णना निड्ढिता ।

(१४) ४. योधाजीववग्गो

१. योधाजीवसुत्तवण्णना

१३४. चतुत्थस्स पठमे युज्झनं योधो, सो आजीवो एतस्साति योधाजीवो । युद्धमुपजीवतीति वा एतस्मिं अत्थे योधाजीवोति निरुत्तिनयेन पदसिद्धि वेदितब्बा । तेनाह “युद्धं उपजीवतीति योधाजीवो”ति । सह... पे... पस्सतीति पुब्बभागे विपस्सनापञ्जाय सम्मसनवसेन, मग्गक्खणे अभिसमयवसेन अत्तपच्चक्खेन जाणेन पस्सति ।

योधाजीवसुत्तवण्णना निड्ढिता ।

२. परिसासुत्तवण्णना

१३५. दुतिये अप्पटिपुच्छित्वा विनीताति “तं किं मज्जथ, भिक्खवे, रूपं निच्चं वा अनिच्चं वा”तिआदिना अप्पटिपुच्छित्वा केवलं धम्मदेसनावसेनेव विनीतपरिसा । दुब्बिनीतपरिसाति दुक्खेन विनीतपरिसा । पुच्छित्वा विनीताति “तं किं मज्जथ, भिक्खवे”तिआदिना पुच्छित्वा अनुमतिग्गहणवसेन विनीता । सुविनीतपरिसाति सुखेन विनीतपरिसा । अनुमतिग्गहणवसेन विनयनज्झि न दुक्करं होति ।

परिसासुत्तवण्णना निड्ढिता ।

४. उप्पादासुत्तवण्णना

१३७. चतुत्थे उप्पादा वा तथागतानन्ति तथागतानं उप्पादेपि वेनेय्यपुग्गलानं मग्गफलुप्पत्ति विय सङ्खारानं अनिच्चादिसभावो न तथागतुप्पादायत्तो, अथ खो तथागतानं उप्पादेपि अनुप्पादेपि होतिमेवाति वुत्तं होति । ठिताव सा धातूति ठितो एव सो अनिच्चसभावो ब्यभिचाराभावतो न कदाचि सङ्खारा अनिच्चा न होति । कामं असङ्खता विय धातु न निच्चो सो सभावो, तथापि सब्बकालिकोयेवाति अधिप्पायो ।

अपरो नयो — ठिताव सा धातूति “सब्बे सङ्खारा अनिच्चा”ति एसा धातु एस सभावो तथागतानं उप्पादतो पुब्बे उद्भज्य अप्पटिविज्झियमानो न तथागतेहि उप्पादितो, अथ खो सब्बकालं सब्बे सङ्खारा अनिच्चा, ठिताव सा धातु, केवलं पन सयम्भुजाणेन अभिसम्बुज्झनतो “अयं धम्मो तथागतेन अभिसम्बुद्धो”ति पवेदनतो च तथागतो धम्मस्सामीति वुच्चति अपुब्बस्स तस्स उप्पादनतो । तेन वुत्तं “ठिताव सा धातू”ति ।

अभिसम्बुज्झतीति जाणेन अभिसम्बुज्झति । अभिसमेतीति जाणेन अभिसमागच्छति । आचिक्खतीति कथेति । देसेतीति दस्सेति । पज्जापेतीति जानापेति । पट्टपेतीति जाणमुखे ठपेति । विवरतीति विवरित्वा दस्सेति । विभजतीति विभागतो दस्सेति । उत्तानीकरोतीति पाकटं करोति ।

अथ वा अभिसम्बुज्झतीति पच्चक्खकरणेन अभिमुखं बुज्झति, याथावतो पटिविज्झति । ततो एव अभिसमेति अभिमुखं समागच्छति । आदितो कथेन्तो आचिक्खति, उद्दिसतीति अत्थो । तमेव उद्देसं परियोसापेन्तो देसेति । यथाउद्दिट्ठमत्थं निदस्सनवसेन पकारेहि जापेन्तो पज्जापेति । पकारेहि एतमत्थं पटिपुप्पेन्तो पट्टपेति । यथाउद्दिट्ठं पटिनिदस्सनवसेन विवरति विभजति । विवटं विभत्तज्ज अत्थं हेतूदाहरणदस्सनेहि पाकटं करोन्तो उत्तानीकरोति ।

उप्पादासुत्तवण्णना निड्ढिता ।

५-१०. केसकम्बलसुत्तादिवण्णना

१३८-१४३. पच्चमे तन्तावुतानं वत्थानन्ति इदं “यानि कानिची”ति इमिना समानाधिकरणन्ति आह “पच्चत्ते सामिवचन”न्ति । वायितानन्ति वीतानं । लामकोति निहीनो, मक्खलि मोघपुरिसोति एत्थ मक्खलीति तस्स नामं । तं किर सकद्दमाय भूमिया तेलघटं गहेत्वा गच्छन्तं, “तात, मा खली”ति सामिको आह । सो पमादेन खलित्वा पतित्वा सामिकस्स भयेन पलायितुं आरब्धो । सामिको उपधावित्वा नं दुस्सकण्णे अग्गहेसि, साटकं छट्टेत्वा अचेलको हुत्वा

पलायि । सो पण्णेन वा तिणेन वा पटिच्छादेतुम्पि अजानन्तो जातरूपेनेव एकं गामं पाविसि । मनुस्सा तं दिस्वा “अयं समणो अरहा अपिच्छो, नत्थि इमिना सदिसो”ति पूवभत्तादीनि गहेत्वा उपसङ्कमन्ति । सो “मय्हं साटकं अनिवत्थभावेन इदं उप्पन्न”न्ति ततो पट्टाय साटकं लभित्वापि न निवासेसि, तदेव च पब्बज्जं अग्गहेसि । तस्स सन्तिके अज्जेपि अज्जेपीति पज्जसता मनुस्सा पब्बजिंसु । तं सन्धायाह “मक्खलि मोघपुरिसो”ति । छट्ठादीनि उत्तानत्थानि एव ।

केसकम्बलसुत्तादिवण्णना निट्ठिता ।

११-१३. पठममोरनिवापसुत्तादिवण्णना

१४४-१४६. एकादसमे अकुप्पधम्मताय खयवयसङ्घातं अन्तं अतीताति अच्चन्ता, एवं अपरिहायनसभावत्ता अच्चन्ता निट्ठा अस्साति **अच्चन्तनिट्ठो** । तेनाह “अन्तं अतिक्कन्तनिट्ठो”तिआदि । न हि पटिविद्धस्स लोकुत्तरधम्मस्स दस्सनं कुप्पनं नाम अत्थि । **धुवनिट्ठो**ति सततनिट्ठो । अच्चन्तमेव चतूहि योगेहि खेमो एतस्स अत्थीति **अच्चन्तयोगक्खेमी**, निच्चयोगक्खेमीति अत्थो । मग्गब्रह्मचरियस्स वुसितत्ता तस्स अविहायनसभावत्ता अच्चन्तं ब्रह्मचारीति **अच्चन्तब्रह्मचारी**, निच्चब्रह्मचारीति अत्थो । **परियोसानन्ति** ब्रह्मचरियपरियोसानं वट्टदुक्खपरियोसानञ्च । अच्चन्तं परियोसानमस्साति **अच्चन्तपरियोसानो** । द्वादसमतेरसमानि उत्तानत्थानेव ।

पठममोरनिवापसुत्तादिवण्णना निट्ठिता ।

योधाजीववग्गवण्णना निट्ठिता ।

१४७-१५६. मङ्गलवग्गो उत्तानत्थोयेव ।

ततियपण्णासकं निट्ठितं ।

(१६) ६. अचेलकवग्गवण्णना

१५७-१६३. इतो परेसु पन सुत्तपदेसु “गाळ्हा”ति वुत्तमत्थं विवरन्तो “कक्खळा”ति आह । कक्खळचारो चस्सा न लूखसभावो । अथ खो तण्हावसेन थिरग्गहणन्ति आह “लोभवसेन थिरग्गहणा”ति । **अगाळ्हा पटिपदाति** वा कामानं ओगाहनं पटिपत्ति, कामसुखानुयोगोति अत्थो । **निज्झामा पटिपदाति** कायस्स निज्झापनवसेन खेपनवसेन पवत्ता पटिपत्ति, अत्तकिलमथानुयोगोति अत्थो । **निच्चेलो**ति निस्सट्ठुचेलो सब्बेन सब्बं पटिक्खित्तचेलो । नगियवतसमादानेन **नग्गो** । **ठितकोव उच्चारं करोतीति**आदि निदस्सनमत्तं वमित्वा मुखविक्खालनादिआचारस्सपि तेन विस्सट्ठत्ता । **जिक्काय हत्थं अपलेखति** अवलेखति उदकेन अधोवनतो । दतियविकप्पेपि एसेव नयो । “एहि, भदन्ते”ति वुत्ते उपगमनसङ्घातो विधि एहिभदन्तो, तं चरतीति एहिभदन्तिको, तप्पटिक्खेपेन **न एहिभदन्तिको** । **न करोति** “समणेन नाम परस्स वचनकरेन न भवितब्ब”न्ति अधिप्पायेन ।

पुरेतरन्ति तं ठानं अत्तनो उपगमनतो पुरेतरं । तं किर सो “भिक्षुना नाम यदिच्छका एव भिक्षा गहेतब्बा”ति अधिप्पायेन न गण्हाति । **उद्दिस्स कतं** मम निमित्तभावेन बहू खुद्दका पाणा सङ्घातं आपादिताति न गण्हाति । **निमन्तनं न सादियति** एवं तेसं वचनं कतं भविस्सतीति । कुम्भि आदीसुपि सो सत्तसज्जीति आह “**कुम्भि-कळोपियो**”तिआदि ।

कबळन्तरायो होतीति उट्टितस्स द्विन्नम्पि कबळन्तरायो होती । गामसभागादिवसेन सङ्गम्भ कित्तेन्ति एतिस्साति सङ्किन्ति, यथासंहततण्डुलादिसञ्चयो । मानुसकानीति वेय्यावच्चकरा मनुस्सा ।

सुरापानमेवाति मज्जलक्खणप्पत्ताय सुराय पानमेव । सुरागहणेनेवेत्थ मेरयम्पि सङ्गहितं । एकागारमेव उञ्छतीति एकागारिको । एकालोपेनेव वत्ततीति एकालोपिको । दीयति एतायाति दत्ति, द्वत्तिआलोपमत्तगाहि खुद्वकं भिक्खादानभाजनं । तेनाह “खुद्वकपाती”ति । अभुञ्जनवसेन एको अहो एतस्स अत्थीति एकाहिको, आहारो, तं एकाहिकं । सो पन अत्थतो एकदिवसं लङ्घको होतीति आह “एकादिवसन्तरिक”न्ति । द्वाहिकन्तिआदीसुपि एसेव नयो । एकाहं अभुञ्जित्वा एकाहं भुञ्जनं एकाहवारो, तं एकाहिकमेव अत्थतो । द्वीहं अभुञ्जित्वा द्वीहं भुञ्जनं द्वीहवारो । सेसपदद्वयेपि एसेव नयो । उक्कट्टो पन परियायभत्तभोजनिको द्वीहं अभुञ्जित्वा एकाहमेव भुञ्जति । सेसद्वयेपि एसेव नयो ।

मिच्छावायामवसेनेव उक्कुटिकवतानुयोगोति आह “उक्कुटिकवीरियमनुयुत्तो”ति । अत्तकिलमथानुयोगन्ति अत्तनो किलमथानुयोगं, सरीरदुक्खकारणन्ति अत्थो । सरीरपरियायो हि इध अत्तसद्दो “अत्तन्तपो”तिआदीसु (म० नि० २.४१३) विय । द्वे अन्तेति उभो कोटियो, उभो लामकपटिपत्तियोति अत्थो । लामकम्पि हि अन्तोति वुच्चति “अन्तमिदं, भिक्खवे, जीविकानं (सं० नि० ३.८०; इतिवु० ६१), कोट्टको अन्तो”ति एवमादीसु । मज्झिमपटिपदाय उप्पथभावेन अमनीया गन्तब्बा जातब्बाति अन्ता । ततो एव लामका ।

अचेलकवग्गवण्णना निट्ठिता ।

पेय्यालवग्गवण्णना

१६४-१८४. समनुञ्जोति सम्मदेव कतानुञ्जो । तेनाह “समानज्झासयो”ति । सेसमेत्थ उत्तानमेव ।

इति मनोरथपूरणिया अङ्गुत्तरनिकाय-अट्ठकथाय

तिकनिपातवण्णनाय अनुत्तानत्थदीपना समत्ता ।

॥ नमो तस्स भगवतो अरहतो सम्मासम्बुद्धस्स ॥

अङ्गुत्तरनिकाये

चतुक्कनिपात-टीका

१. पठमपण्णासकं

१. भण्डगामवग्गो

१-२. अनुबुद्धसुत्तादिवण्णना

१-२. चतुक्कनिपातस्स पठमे अनुबोधो पुब्बभागियं जाणं, पटिवेधो अनुबोधेन अभिसमयो। तत्थ यस्मा अनुबोधपुब्बको पटिवेधो अनुबोधेन विना न होति। अनुबोधो हि एकच्चो पटिवेधसम्बद्धो, तदुभयाभावहेतुकञ्च वट्टे संसरणं, तस्मा वुत्तं पाळियं “अननुबोधा...पे०... तुम्हाकञ्चा”ति। पटिसन्धिगगहणवसेन भवतो भवन्तरूपगमनं सन्धावनं, अपरापरं चवनूपपज्जनवसेन सञ्चरणं संसरणन्ति आह “भवतो”तिआदि। सन्धावितसंसरितपदानं कम्मसाधनतं सन्धायाह “मया च तुम्हेहि चा”ति पठमविकप्पे। दुतियविकप्पे पन भावसाधनतं हदये कत्वा “ममञ्चेव तुम्हाकञ्चा”ति यथारुतवसेनेव वुत्तं। दीघरज्जुना बद्धसकुणं विय रज्जुहत्थो पुरिसो देसन्तरं तण्हारज्जुना बद्धं सत्तसन्तानं अभिसङ्कारो भवन्तरं नेति एतायाति भवनेत्ति। तेनाह “भवरज्जु”तिआदी।

वट्टदुक्खस्स अन्तकरोति सकलवट्टदुक्खस्स सकसन्ताने परसन्ताने च विनासकरो अभावकरो। बुद्धचक्खुधम्मचक्खुदिब्बचक्खुमंसचक्खुसमन्तचक्खुसङ्घातेहि पञ्चहि चक्खूहि चक्खुमा। सवासनानं किलेसानं समुच्छिन्नत्ता सातिसयं किलेसपरिनिब्बानेन परिनिब्बुतो। दुतियं उत्तानमेव।

अनुबुद्धसुत्तादिवण्णना निड्डिता।

३-४. पठमखतसुत्तादिवण्णना

३-४. ततिये कलिन्ति अपराधं। विचिनातीति आचिनोति पसवति। तेन च कलिना सुखं न पटिलभतीति तेन अपराधेन सुखं न विन्दति। निन्दियप्पसंसाय हि पसंसियनिन्दाय च समकोव विपाको। पसंसियनिन्दाति च सम्पन्नगुणपरिधंसनवसेन पवत्तिया महासावज्जताय कटुकतरविपाका। निन्दियप्पसंसा पन कथं ताय समविपाकाति चे? तस्मिं अविज्जमानगुणसमारोपनेन अत्तनो परेसञ्च मिच्छापटिपत्तिहेतुभावतो पसंसियेन तस्स सञ्भावकरणतो च। लोकेपि हि असूरं सूरेन समं करोन्तो गारहो होति, पगेव दुष्पटिपन्नं सुष्पटिपन्नेन समं करोन्तोति। सकेन धनेनाति अत्तनो सापतेय्येन। अप्पमत्तकोव कलीति दिट्ठधम्मिकत्ता सप्पटिकारत्ता च अप्पमत्तको अपराधो। अयं...पे०... महन्ततरो कलि कतूपचितत्ता सम्परायिकत्ता अप्पटिकारत्ता च।

निरब्बुदोति गणनाविसेसो एसोति आह “निरब्बुदगणनाया”ति, सतसहस्सं निरब्बुदाति अत्थो। निरब्बुदपरिमाणं पन वस्सगणनाय एवं वेदितब्बं। यथेव हि सतं सतसहस्सानं कोटि होति, एवं सतं सतसहस्सानं कोटियो पकोटि नाम होति, सतं सतसहस्सानं पकोटियो कोटिपकोटि, सतं सतसहस्सकोटिपकोटियो नहुतं, सतं सतसहस्सनहुतानि निन्नहुतं, सतं सतसहस्सनिन्नहुतानि एकं अब्बुदं, ततो वीसतिगुणितं निरब्बुदं। यं अरिये गरहन्तो निरयं उपपज्जतीति अरिये गरहन्तो यं निरब्बुदसङ्घातं निरयं उपपज्जति, निरब्बुदोति च पाटियेक्को निरयो नत्थि, अवीचिम्हियेव पन निरब्बुदगणनाय पच्चितब्बट्टानस्सेतं नामं। चतुत्थं उत्तानमेव।

पठमखतसुत्तादिवण्णना निड्डिता।

५. अनुसोतसुत्तवण्णना

५. पञ्चमे अनुसोतं गच्छतीति संसारसोतस्स अनुकूलभावेन गच्छति। पच्चनीकपटिपत्तियाति संसारसोतस्स पटिकूलवसेन पवत्तनिब्बिदानुपस्सनादिपटिपत्तिया। ठितसभावोति अचलप्पसादादिसमन्नागमेन ठितसभावो। अनागामी हि अस्सद्भिद्येहि कामरागव्यापादेहि अकम्पनियचित्ताय तम्हा लोका अनावत्तिधम्मताय च ठितसभावो नाम। ओघं

तरित्वाति कामोधादिचतुर्बिधं ओघं अतिक्कमित्वा । परतीरं गतोति निब्बानपारं गतो । ब्राह्मणोति बाहितपापताय ब्राह्मणोति सङ्खं गतो खीणासवो । तेनाह “सेट्ठो निदोसो”ति । पञ्चवेरकम्मन्ति पाणातिपातादिपञ्चदुच्चरितं । सहापि दुक्खेन सहापि दोमनस्सेनाति किलेसपरियुट्ठाने सति उप्पन्नेन दुक्खदोमनस्सेन सद्धिम्पि । परिपुण्णन्ति तिस्सन्नं सिक्खानं एकायपि अनूनं । परिसुद्धन्ति निरुपक्विकलेसं । ब्रह्मचरियन्ति सेट्ठचरियं । इमिना वारेन सोतापन्नसकदागामिनो कथिता । किं पन ते रुदन्ता ब्रह्मचरियं चरन्तीति? आम, किलेसरोदनेन रोदन्ता चरन्ति नाम, सीलसम्पन्नो पुथुज्जनभिक्षु एत्थेव सङ्गहितो ।

चेतोविमुत्तिन्ति फलसमाधिं । पञ्चाविमुत्तिन्ति फलजाणं । छहाकारेहि पारगतोति अभिज्जापारगू, परिज्जापारगू, भावनापारगू, पहानपारगू, सच्छिकिरियापारगू, समापत्तिपारगूति एवं छहि आकारेहि सब्बधम्मानं पारं परियोसानं गतो । सेसमेत्थ सुविज्जेय्यमेव ।

अनुसोतसुत्तवण्णना निड्डिता ।

६. अप्पस्सुतसुत्तवण्णना

६. छट्ठे अप्पकं सुतं होतीति नवङ्गसत्थुसासने किञ्चिदेव सुतं होति । तदेव नवङ्गसत्थुसासनं दस्सेतुं “सुत्तं गेय्य”न्तिआदि वुत्तं । तत्थ सुत्तादीनि विभजित्वा दस्सेन्तो “उभतोविभङ्गनिद्वेसक्खन्धकपरिवारा”तिआदिमाह । कथं पनायं विभागो युज्जेय्य । सगाथकज्झि सुत्तं गेय्यं, निग्गाथकं सुत्तं वेय्याकरणं । तदुभयविनिमुत्तञ्च सुत्तं उदानादिविसेससञ्चारहितं नत्थि, यं सुत्तङ्गं सिया । मङ्गलसुत्तादीनञ्च (खु० पा० ५.१ आदयो; सु० नि० २६१ आदयो) सुत्तङ्गसङ्गहो न सिया गाथाभावतो धम्मपदादीनं विय । गेय्यङ्गसङ्गहो वा सिया सगाथकत्ता सगाथावग्गस्स विय । तथा उभतोविभङ्गादीसु सगाथकप्पदेसानन्ति? वुच्चते —

“सुत्तन्ति सामञ्जविधि, विसेसविधयो परे ।

सनिमित्ता निरुळ्हत्ता, सहताञ्जेन नाञ्जतो” ॥ (नेत्ति० अट्ठ० सङ्गहवारवण्णना; दी० नि० टी०

१.पठममहासङ्गीतिकथावण्णना; सारत्थ० टी० १.पठममहासङ्गीतिकथावण्णना)

सब्बस्सपि हि बुद्धवचनस्स सुत्तन्ति अयं सामञ्जविधि । तेनेवाह आयस्मा महाकच्चानो नेत्तियं (नेत्ति० सङ्गहवारो) “नवविधसुत्तन्तपरियेट्ठी”ति । एत्तकं तस्स भगवतो सुत्तागतं सुत्तपरियापन्नं (पाचि० ६५५, १२४२) सकवादे पञ्च सुत्तसतानीति (ध० स० अट्ठ० निदानकथा; कथा० अट्ठ० निदानकथा) एवमादि च एतस्स अत्थस्स साधकं । विसेसविधयो परे सनिमित्ता तदेकदेसेसु गेय्यादयो विसेसविधयो तेन तेन निमित्तेन पतिट्ठिता । तथा हि गेय्यस्स सगाथकत्तं तब्भावनिमित्तं । लोकेपि हि ससिलोकं सगाथकं वा चुण्णियगन्थं “गेय्य”न्ति वदन्ति । गाथाविरहे पन सति पुच्छं कत्वा विस्सज्जनभावो वेय्याकरणस्स तब्भावनिमित्तं । पुच्छाविस्सज्जनज्झि “ब्याकरण”न्ति वुच्चति । ब्याकरणमेव वेय्याकरणं । एवं सन्ते सगाथकादीनम्पि पुच्छं कत्वा विस्सज्जनवसेन पवत्तानं वेय्याकरणभावो आपज्जतीति? नापज्जति गेय्यादिसञ्जानं अनोकासभावतो, “गाथाविरहे सती”ति विसेसितत्ता च । तथा हि धम्मपदादीसु केवलं गाथाबन्धेसु सगाथकत्तेपि सोमनस्सजाणमयिकगाथायुत्तेसु “वुत्तं हेत”न्तिआदीवचनसम्बन्धेसु अब्भुतधम्मप्पटिसंयुत्तेसु च सुत्तविसेसेसु यथाक्कमं गाथाउदानइतिवुत्तकअब्भुतधम्मसञ्जा पतिट्ठिता, तथा सतिपि गाथाबन्धभावे भगवतो अतीतासु जातीसु चरियानुभावप्पकासकेसु जातकसञ्जा, सतिपि पञ्चविस्सज्जनभावे सगाथकत्ते च केसुचि सुत्तन्तेसु वेदस्स

लभापनतो वेदल्लसज्जा पतिट्ठिताति एवं तेन तेन सगाथकत्तादिना निमित्तेन तेसु तेसु सुत्तविसेसेसु गेय्यादिसज्जा पतिट्ठिताति विसेसविधयो सुत्तङ्गतो परे गेय्यादयो । यं पनेत्थ गेय्यङ्गादिनिमित्तरहितं, तं सुत्तङ्गं विसेससज्जापरिहारेण सामज्जसज्जाय पवत्तनतो । ननु च सगाथकं सुत्तं गेय्यं, निग्गाथकं सुत्तं वेय्याकरणन्ति सुत्तङ्गं न सम्भवतीति चोदना तदवत्थावाति? न तदवत्था सोधितत्ता । सोधितज्झि पुब्बे “गाथाविरहे सति पुच्छाविस्सज्जनभावो वेय्याकरणस्स तब्भावनिमित्त”न्ति ।

यच्च वुत्तं — “गाथाभावतो मङ्गलसुत्तादीनं सुत्तङ्गसङ्गहो न सिया”ति, तं न, निरुळहत्ता । निरुळहो हि मङ्गलसुत्तादीनं सुत्तभावो । न हि तानि धम्मपदबुद्धवंसादयो विय गाथाभावेन पज्जातानि, अथ खो सुत्तभावेनेव, तेनेव हि अट्ठकथायं “सुत्तनामक”न्ति नामगगहणं कतं । यं पन वुत्तं “सगाथकत्ता गेय्यङ्गसङ्गहो सिया”ति, तदपि नत्थि, यस्मा सहताज्जेन । सह गाथाहीति हि सगाथकं । सहभावो नाम अत्थतो अज्जेन होति, न च मङ्गलसुत्तादीसु गाथाविनिमुत्तो कोचि सुत्तप्पदेसो अत्थि, यो “सह गाथाही”ति वुच्चेय्य, न च समुदायो नाम कोचि अत्थि । यदपि वुत्तं — “उभतोविभङ्गादीसु सगाथकप्पदेसानं गेय्यङ्गसङ्गहो सिया”ति, तदपि न, अज्जतो । अज्जा एव हि ता गाथा जातकादिपरियापन्नत्ता । अतो न ताहि उभतोविभङ्गादीनं गेय्यङ्गभावोति । एवं सुत्तादीनं अङ्गानं अज्जमज्जं सङ्कराभावो वेदितब्बो । अयमेत्थ सङ्केपो, वित्थारो पन समन्तपासादिकाय विनयसंवण्णनाय सारत्थदीपनिया (सारत्थ० टी० १. पठममहासङ्गीतिकथावण्णना) अम्हेहि पकासितो, इच्छन्तेहि ततोयेव गहेतब्बो ।

न अत्थमज्जाय धम्ममज्जाय धम्मानुधम्मप्पटिपन्नो होतीति अट्ठकथाज्ज पाळिज्ज जानित्वा लोकुत्तरधम्मस्स अनुरूपधम्मं पुब्बभागप्पटिपदं पटिपन्नो न होतीति एवमेत्थ सम्बन्धो वेदितब्बो । तेनेवाह “न अत्थमज्जाय धम्ममज्जायाति अट्ठकथज्ज पाळिज्ज जानित्वा...पे०... न पटिपन्नो होती”ति ।

अप्पस्सुतसुत्तवण्णना निट्ठिता ।

७. सोभनसुत्तवण्णना

७. सत्तमे पज्जावेय्यत्तियेनाति सच्चसम्पटिवेधादिपज्जावेय्यत्तियेन । विनयं उपेताति तदङ्गादिवसेन किलेसानं विनयं उपेता । वेसारज्जेनाति सारज्जकरानं दिट्ठिविचिकिच्छादिपापधम्मानं विगमनतो वेसारज्जेन, सारज्जरहितेनाति अत्थो । तेपिटकवसेन बहु सुतं एतेसन्ति बहुस्सुता । तमेव परियत्तिधम्मं धारेन्ति सुवण्णभाजने पक्खित्तसीहवसं विय विनस्सन्तं अकत्वा सुप्पगुणसुप्पवत्तिभावेन हृदये ठपेन्तीति धम्मधरा । एदिसा च अत्तना सुतस्स धम्मस्स आधारभूता नाम होन्तीति आह “सुतधम्मानं आधारभूता”ति ।

सोभनसुत्तवण्णना निट्ठिता ।

८. वेसारज्जसुत्तवण्णना

८. अट्ठमे ब्यामोहवसेन सरणपरियेसनं सारज्जनं सारदो, ब्यामोहभयं । विगतो सारदो एतस्साति विसारदो, तस्स भावो वेसारज्जं । तं पन जाणसम्पदं, पहानसम्पदं, देसनाविसेससम्पदं खेमज्ज निस्साय पवत्तं चतुब्बिधपच्चवेक्खणजाणं । तेनाह “चतूसु ठानेसू”तिआदि । उसभस्स इदन्ति आसभं, सेट्ठानं । सब्बज्जुतपटिजाननवसेन अभिमुखं गच्छन्ति, अट्ठ वा परिसा उपसङ्कमन्तीति आसभा, पुब्बबुद्धा । इदं पनाति बुद्धानं ठानं सब्बज्जुतमेव वदति । तिट्ठमानोवाति अवदन्तोपि

तिट्टमानोव पटिजानाति नामाति अत्थो । **उपगच्छतीति** अनुजानाति ।

अट्टसु परिसासूति “अभिजानामि खो पनाहं, सारिपुत्त, अनेकसतं खत्तियपरिसं उपसङ्कमिता...पे... ब्राह्मणपरिसं गहपतिपरिसं, समणपरिसं, चातुमहाराजिकपरिसं, तावतिसपरिसं, मारपरिसं, ब्रह्मपरिसं उपसङ्कमिता, तत्रपि मया सन्निसिन्नपुब्बञ्चेव सल्लपितपुब्बञ्च साकच्छा च समापज्जितपुब्बा । तत्र वत मं ‘भयं वा सारज्जं वा ओक्कमिस्सती’ति निमित्तमेतं, सारिपुत्त, न समनुपस्सामी”ति (म० नि० १.१५१) एवं वुत्तपरिसासु । **अभीतनादं नदतीति** परतो दस्सितजाणयोगेन विसारदो अहन्ति अभीतनादं नदति । **सीहनादसुत्तेनाति** खन्धवग्गे आगतेन सीहनादसुत्तेन ।

“देवमनुस्सानं चतुचक्कं वत्तती”ति (अ० नि० ४.३१) सुत्तसेसेन सप्पुरिसूपनिस्सयादिफलसम्पत्तिपवत्ति वुत्ता, पुरिमसप्पुरिसूपनिस्सयादिउपनिस्सया पच्छिमसप्पुरिसूपनिस्सयादिसम्पत्तिपवत्ति वा वुत्ता । आदि-सद्देन तत्थ च चक्कसदस्स गहणं वेदितब्बं । विचक्कसण्ठाना असनि एव **असनिविचक्कं** । **उरचक्कादीसूति** **आदि-सद्देन** आणासमूहादीसुपि चक्कसदस्स पवत्ति वेदितब्बा । “सङ्गभेदं करिस्साम चक्कभेद”न्तिआदीसु (पारा० ४०९; चूळव० ३४३) हि आणा “चक्क”न्ति वुत्ता । “देवचक्कं असुरचक्क”न्तिआदीसु समूहोति ।

पटिवेधनिट्टत्ता अरहत्तमग्गजाणं पटिवेधोति “**फलक्खणे उप्पन्नं नामा**”ति वुत्तं । तेन पटिलद्धस्सपि देसनाजाणस्स किच्चनिप्फत्ति परस्स बुज्जनमत्तेन होतीति “**अज्जासिकोण्डज्जस्स सोतापत्ति...पे... फलक्खणे पवत्तं नामा**”ति वुत्तं । ततो परं पन याव परिनिब्बाना देसनाजाणप्पवत्ति तस्सेव पवत्तितस्स धम्मचक्कस्स ठानन्ति वेदितब्बं ।

दस्सितधम्मसूति वुत्तधम्मसु । वचनमत्तमेव हि तेसं, न पन दस्सनं तादिसस्सेव धम्मस्स अभावतो । भगवतो एव वा “इमे धम्मा अनभिसम्बुद्धो”ति परस्स वचनवसेन **दस्सितधम्मसु** । “धम्मपटिसम्भिदा”तिआदीसु (विभ० ७१८-७२१) विय **धम्म-सद्दो** हेतुपरियायोति आह “**सहधम्मनाति सहेतुना**”ति । हेतूति च उपपत्तिसाधनहेतु वेदितब्बो, न कारको, सम्पापको वा । **निमित्तन्ति** चोदनाय कारणं । तत्थ चोदको चोदनं करोतीति **कारणं**, धम्मो चोदनं करोति एतेनाति **कारणं** । तेनाह “**पुग्गलोपी**”तिआदि । **खेमन्ति** केनचि अप्पटिबाहियभावेन अनुपद्दुतं ।

अन्तरायो एतेसं अत्थि, अन्तराये वा नियुत्ताति **अन्तरायिका** । एवंभूता पन ते यस्मा अन्तरायकरा नाम होन्ति, तस्मा आह “**अन्तरायं करोन्तीति अन्तरायिका**”ति । असज्जिच्च वीतिक्कमे नातिसावज्जाति कत्वा वुत्तं “**सज्जिच्च वीतिक्कन्ता**”ति । **सत्त आपत्तिक्खन्थाति**आदि निदस्सनमत्तं इतरेसम्पि चतुन्नं “अन्तरायिका”ति वुत्तधम्मानं तब्भावे ब्यभिचाराभावतो । **इध पन मेथुनधम्मो अधिप्पेतोति** इदं अट्टप्पत्तिवसेन वुत्तं अरिट्टसिक्खापदं (पाचि० ४१७) विय । यस्मा तंखणम्पि कामानं आदीनवं दिस्वा विरतो होति चे, विसेसं अधिगच्छति, न कामेसु आसत्तो, तस्मा वुत्तं “**मेथुन... पे...अन्तरायो होती**”ति । तत्थ **यस्स कस्सचीति** न केवलं पब्बजितस्सेव, अथ खो यस्स कस्सचि । तथा हि वुत्तं “मेथुनमनुयुत्तस्स, मुस्सतेवापि सासन”न्ति (सु० नि० ८२०) ।

तस्मिं अनिय्यानिकधम्मेति तस्मिं परेहि परिकप्पितअनिय्यानिकधम्मनिमित्तं । निमित्तत्थे हि इदं कम्मसंयोगे भुम्मं ।

उपनिबद्धाति विरचिता । तेनाह “**अभिसङ्गता**”ति । **पुथुभावन्ति** बहुभावं । **पुथूहि वा सिताति** बहूहि समणब्राह्मणेहि सिता उपनिबद्धा ।

वेसारज्जसुत्तवण्णना निड्ढिता ।

९. तण्हप्पादसुत्तवण्णना

९. नवमे भवति एतेन आरोग्यन्ति भवो, गिलानपच्चयो । परिवुद्धो भवो अभवो । वुद्धिअत्थो हि अयमकारो यथा “संवरासंवरो, फलाफल”न्ति च । सप्पिनवनीतादीनीति आदि-सद्देन तेलमधुफाणितादीनं गहणं । सप्पिनवनीतादिगहणञ्चेत्थ निदस्सनमत्तं, सब्बस्सपि गिलानपच्चयस्स सङ्गहो दट्ठब्बो । भवाभवोति वा खुद्दको चेव महन्तो च उपपत्तिभवो वेदितब्बो । तेनेवाह “सम्पत्तिभवेसू”तिआदि । भवोति वा सम्पत्ति, अभवोति विपत्ति । भवोति वुद्धि, अभवोति हानि । तंनिमित्तञ्च तण्हा उप्पज्जतीति वुत्तं “भवाभवहेतु वा”ति ।

तण्हादुतियोति तण्हासहायो । तण्हा हि निरुदककन्तारे मरीचिकाय उदकसज्जा विय पिपासाभिभूतं तसितं सत्तं अस्सासदस्सनवसेन सहायकिच्चं करोन्ती भवादीसु अनिब्बिन्नं कत्वा परिब्भमापेति । तथा हि तं पपातकं अचिन्तेत्वा मधुगणहनकलुद्दका विय अनेकादीनवाकुलेसु भवेसु आनिसंसमेव दस्सेन्ती अनत्थजाले सा परिब्भमापेति, तस्मा तण्हा “पुरिसस्स दुतिया”ति वुत्ता । ननु च अज्जेपि किलेसादयो भवनिब्बत्तिपच्चयाति? सच्चमेतं, न पन तथा विसेसपच्चयो, यथा तण्हा । तथा हि सा कुसलेहि विना अकुसलेहि, कामावचरादिकुसलेहि च विना रूपावचरादिकुसलेहि भवनिब्बत्तिया विसेसपच्चयो । यतो समुदयसच्चन्ति वुच्चतीति । इत्थभावज्जथाभावन्ति इत्थभावो च अज्जथाभावो च इत्थभावज्जथाभावो, सो एतस्स अत्थीति इत्थभावज्जथाभावो, संसारो, तं इत्थभावज्जथाभावं । तत्थ इत्थभावो मनुस्सत्तं, अज्जथाभावो ततो अवसिद्धसत्तावासा । इत्थभावो वा तेसं तेसं सत्तानं पच्चुप्पन्नो अत्तभावो, अज्जथाभावो अनागतत्तभावो । एवरूपो वा अज्जोपि अत्तभावो इत्थभावो, न एवरूपो अज्जथाभावो । तेनेवाह “इत्थभावज्जथाभावन्ति एत्थ इत्थभावो नाम अयं अत्तभावो”तिआदि । संसरणं संसारो ।

“खन्धानञ्च पटिपाटि, धातुआयतनान च ।

अब्बोच्छिन्नं वत्तमाना, संसारोति पवुच्चति” ॥ (विसुद्धिं २.६१९; दी० नि० अट्ठ० २.९५ अपसादनावण्णना; सं० नि० अट्ठ० २.२.६०; अ० नि० अट्ठ० २.४.१९९; ध० स० अट्ठ० निदानकथा; विभ० अट्ठ० २२६ सङ्खारपदनिद्वेसो; सु० नि० अट्ठ० २.५२३; उदा० अट्ठ० ३९; इतिवु० अट्ठ० १४) ।

तेनाह “खन्धधातुआयतनानं पटिपाटि”न्ति, खन्धधातुआयतनानं हेतुफलभावेन अपरापरप्पवत्तिन्ति अत्थो ।

एवमादीनवं जत्वाति एत्थ एतमादीनवं जत्वातिपि पठन्ति, एतं सकलवट्ठदुक्खस्स सम्भवं समुदयं तण्हं आदीनवं जत्वाति अत्थो । अथ वा एवमादीनवं जत्वाति एतं यथावुत्तं संसारानतिवत्तनआदीनवं दोसं जत्वा । निग्गहणोति चतुरूपादानसङ्घातस्स सब्बस्स गहणस्स पटिनिस्सज्जनेन निग्गहणो, खन्धपरिनिब्बानेन सङ्खारप्पवत्तितो अपगच्छेय्याति एवं वा एत्थ अत्थो दट्ठब्बो ।

तण्हप्पादसुत्तवण्णना निड्ढिता ।

१०. योगसुत्तवण्णना

१०. दसमे योजेन्तीति कम्मं विपाकेन भवादिं, भवन्तरादीहि दुक्खेन सत्तं योजेन्ति घटेन्तीति योगा । कामनट्ठेन कामो

च सो यथावुत्तेनत्थेन योगो चाति कामयोगो। भवयोगो नाम भवरागोति दस्सेतुं “रूपारूपभवेसू”तिआदि वुत्तं। तत्थ पठमो उपपत्तिभवेसु रागो, दुतियो कम्मभवेसु, ततियो भवदिट्ठिसहगतो यथा रज्जनट्ठेन रागो, एवं युज्जनट्ठेन योगोति वुत्तो। **चतूसु सच्चेसु अज्जाणन्ति** इदं सुत्तन्तनयं निस्साय वुत्तं। सुत्तन्तसंवण्णना हेसाति, तदन्तो गधत्ता वा पुब्बन्तादीनं।

समुदयन्ति द्वे समुदया खणिकसमुदयो पच्चयसमुदयो च। उप्पादक्खणो खणिकसमुदयो, पच्चयोव पच्चयसमुदयो। समुदयते समुदयनं समुदयो, समुदेति एतस्माति समुदयोति एवं उभिन्नं समुदयानं सद्वत्थतोपि भेदो वेदितब्बो। पच्चयसमुदयं पजानन्तोपि भिक्खु खणिकसमुदयं पजानाति, खणिकसमुदयं पजानन्तोपि पच्चयसमुदयं पजानाति। पच्चयतो हि सङ्खारानं उदयं पस्सतो खणतो च नेसं उदयदस्सनं सुखं होति, खणतो च नेसं उदयं पस्सतो पगेव पच्चयानं सुगगहितत्ता पच्चयतो दस्सनं सुखेन इज्झति। इध पन खणिकसमुदयं दस्सेन्तो आह “**समुदयन्ति उप्पत्ति**”न्ति।

अत्थङ्गमोपि दुविधो अच्चन्तत्थङ्गमो, भेदत्थङ्गमोति। अच्चन्तत्थङ्गमो अप्पवत्तिनिरोधो, निब्बानन्ति केचि। भेदत्थङ्गमो खणिकनिरोधो। तदुभयं पुब्बभागे उगगपरिपुच्छादिवसेन पस्सतो अज्जतरदस्सनेन इतरदस्सनम्पि सिद्धमेव होति। पुब्बभागेयेव आरम्मणवसेन खयतो वयतो सम्मसनादिकाले भेदत्थङ्गमं पस्सन्तो ब्यतिरेकवसेन अनुस्सवादितो अच्चन्तत्थङ्गमं पस्सति, मग्गक्खणे पन आरम्मणतो अच्चन्तत्थङ्गमं पस्सन्तो असम्मोहतो इतरम्पि पस्सति। इध पन भेदत्थङ्गमं दस्सेन्तो आह “**अत्थङ्गमन्ति भेद**”न्ति। कामानं उप्पत्तिभेदग्गहणेनेव चेत्थ यथा कामानं पटिच्चसमुप्पन्नता विभाविता, एवं कामवत्थुनोपीति उभयेसम्पि अनिच्चता दुक्खता अनत्तता च विभाविताति दट्ठब्बं। **मधुरभावन्ति** इमिना कामसन्निस्सितं सुखं सोमनस्सं दस्सेति। “यं खो, भिक्खवे, इमे पज्ज कामगुणे पटिच्च उप्पज्जति सुखं सोमनस्सं, अयं कामानं अस्सादो”ति (म० नि० १.१६६) हि वुत्तं। **अमधुरभावन्ति** इमिना पन कामहेतुकं दुक्खं दोमनस्सं दस्सेति।

फस्सायतनानन्ति छद्धारिकस्स फस्सस्स कारणभूतानं चक्खादिआयतनानं। तेनाह “**चक्खादीनं चक्खुसम्फस्सादिकारणानं**”न्ति। पुनब्भवकरणं पुनोभवो उत्तरपदलोपेन, मनो-सदस्स विय च पुरिमपदस्स ओकारन्तता दट्ठब्बा। पुनोभवो सीलमेतेसन्ति **पोनोभविका**। अथ वा सीलत्थेन इकसद्देन गमितत्थत्ता किरियावाचकसदस्स अदस्सनं दट्ठब्बं यथा अपूपभक्खनसीलो आपूपिको। अथ वा पुनब्भवं देन्ति, पुनब्भवाय संवत्तन्ति, पुनप्पुनब्भवे निब्बत्तेन्तीति **पोनोभविका**। “तद्धिता”ति हि बहुवचननिद्देसा विचित्तता वा तद्धितानं अभिधानलक्खणत्ता वा “पुनब्भवं देन्ती”तिआदीसुपि अत्थेसु पोनोभविकसद्वसिद्धि दट्ठब्बा।

विसंयोजेन्ति पटिपन्नं पुगगलं कामयोगादितो वियोजेन्तीति **विसंयोगा**, असुभज्झानादीनि विसंयोजनकारणानि। तेनाह “**विसंयोगाति विसंयोजनकारणानी**”तिआदि।

योगसुत्तवण्णना निट्ठिता।

भण्डगामवग्गवण्णना निट्ठिता।

२. चरवग्गो

१. चरसुत्तवण्णना

११. दुतियस्स पठमे चरतोति गच्छन्तस्स, चङ्गमन्तस्स वा । उप्पज्जति कामवितक्को वाति वत्थुकामेसु अवीतरागताय तादिसे पच्चये कामपटिसंयुत्तो वा वितक्को उप्पज्जति चे, यदि उप्पज्जति । **ब्यापादवितक्को वा विहिंसावितक्को वाति** आघातविनये विसेसेन चित्तस्स अदमितत्ता आघातनिमित्ते ब्यापादपटिसंयुत्तो वा वितक्को, लेडुदण्डीति परिहंसनवसेन विहिंसापटिसंयुत्तो वा वितक्को उप्पज्जति चेति सम्बन्धो । **तं चे भिक्खु अधिवासेतीति** तं यथावुत्तं कामवितक्कादिं यथापच्चयं अत्तनो चित्ते उप्पन्नं “इतिपायं वितक्को पापको, इतिपि अकुसलो, इतिपि सावज्जो, सो च खो अत्तब्याबाधाय संवत्तती”ति आदिना नयेन पच्चवेक्खणाय अभावतो अधिवासेति अत्तनो चित्तं आरोपेत्वा वासेति । अधिवासेन्तोयेव च **नप्पजहति** तदङ्गादिप्पहानवसेन न पटिनिस्सज्जति । ततो एव च **न विनोदेति** अत्तनो चित्तसन्तानतो न नुदति न नीहरति । तथा अविनोदनतो **न व्यन्तीकरोति** न विगतन्तं करोति । आतापी पहितत्तो यथा तेसं अन्तोपि नावसिस्सति अन्तमसो भङ्गमत्तम्पि, एवं करोति, अयं पन तथा न करोतीति अत्थो । तथाभूतो पन **न अनभावं गमेति** अनु अनु अभावं न गमेति । न पजहति चे, न विनोदेति चेति इति आदिना चे-सद्वं योजेत्वा अत्थो वेदितब्बो ।

एवंभूतोति एवं कामवितक्कादीहि पापवितक्केहि समङ्गिभूतो । **अनातापीति** किलेसानं आतापयिकस्स वीरियस्स अभावेन अनातापी । पापुत्रासलक्खणस्स ओत्तप्पस्स अभावेन **अनोत्तापी । सततं समितं** सब्बकालं निरन्तरं । **कुसीतो हीनवीरियोति** कुसलेहि धम्मोहि परिहापयित्वा अकुसलपक्खे कुच्छितं सीदनतो कोसज्जसमन्नागमेन च कुसीतो, सम्मप्पधानवीरियाभावेन हीनवीरियो वीरियविरहितोति **वुच्चति** कथीयति । **ठितस्साति** गमनं उपच्छिन्दित्वा तिडुतो । सयनइरियापथस्स विसेसतो कोसज्जपक्खिकत्ता यथा तंसमङ्गिनो भावितत्ता सम्भवन्ति, तं दस्सेतुं “**जागरस्सा**”ति वुत्तं ।

सुकपक्खे **तज्जे भिक्खु नाधिवासेतीति** आरद्धवीरियस्सपि विहरतो अनादिमति संसारे चिरकालभावितत्ता तथारूपपच्चयसमायोगे सतिसम्मोसेन वा कामवितक्कादि उप्पज्जति चे, तं भिक्खु अत्तनो चित्तं आरोपेत्वा न वासेति, अब्भन्तरे न वासेतीति अत्थो । अनधिवासेन्तो किं करोति? **पजहति** छुट्टेति । किं कचवरं विय पिटकेनाति? न, अपिच खो तं **विनोदेति** नुदति नीहरति । किं बलिबद्धं विय पतोदेनाति? न, अथ खो **व्यन्तीकरोति** विगतन्तं करोति, यथा तेसं अन्तोपि नावसिस्सति अन्तमसो भङ्गमत्तम्पि, तथा ते करोति । कथं पन ते तथा करोति? **अनभावं गमेति** अनु अनु अभावं गमेति, विक्खम्भनप्पहानेन यथा सुविक्खम्भिता होन्ति, तथा ने करोतीति वुत्तं होति ।

एवंभूतोति आदीसु एवं कामवितक्कादीनं अनधिवासेन सुविसुद्धासयो समानो ताय च आसयसम्पत्तिया तन्निमित्ताय च पयोगसम्पत्तिया परिसुद्धसीलो इन्द्रियेसु गुत्तद्वारो भोजने मत्तज्जू सतिसम्पज्जनेन समन्नागतो जागरियं अनुयुत्तो तदङ्गादिवसेन किलेसानं आतापनलक्खणेन वीरियेन समन्नागतत्ता **आतापी** । सब्बसो पापुत्रासेन समन्नागतत्ता **ओत्तापी सततं** रत्तिन्दिवं । **समितं** निरन्तरं समथविपस्सनानुयोगवसेन चतुब्बिधसम्मप्पधानसिद्धिया **आरद्धवीरियो पहितत्तो** । निब्बानं पति पेसितचित्तोति **वुच्चति** कथीयतीति अत्थो ।

गाथासु **गेहनिस्सितन्ति** एत्थ गेहवासीहि अपरिच्यत्तत्ता गेहवासिसभावत्ता गेहधम्मत्ता वा गेहं वुच्चति वत्थुकामो । अथ वा गेहप्पटिबद्धभावतो, किलेसकामानं निवासट्टानभावतो वा गेहाति वुच्चन्ति, तंवत्थुकत्ता कामवितक्कादि गेहनिस्सितं नाम । **कुम्मगपटिपन्नोति** यस्मा अरियमग्गस्स उप्पथभावतो अभिज्झादयो तदेकदुधम्मा च कुम्मगो, तस्मा कामवितक्कादिबहुलो कुम्मगपटिपन्नो । **मोहनेय्येसु मुच्छितोति** मोहसंवत्तनियेसु रूपादीसु मुच्छितो सम्मत्तो अज्झोपन्नो । **सम्बोधिन्ति** अरियमग्गजाणं । **फुट्टन्ति** फुसितुं पत्तुं **पापो सो तादिसो** मिच्छासङ्कप्पगोचरो पुग्गलो **अभब्बो**, न कदाचि तं पापुणातीति अत्थो ।

वितक्कं समयित्वानाति यथावुत्तं मिच्छावितक्कं पटिसङ्खानभावनाबलेन वूपसमेत्वा । वितक्कूपसमे रतोति नवन्नम्पि महावितक्कानं अच्चन्तूपसमभूते अरहत्ते, निब्बाने एव वा अज्झासयेन रतो अभिरतो । भब्बो सोति सो यथावुत्तो सम्मापटिपज्जमानो पुगलो पुब्बभागे समथविपस्सनाबलेन सब्बवितक्के यथारहं तदङ्गादिवसेन वूपसमेत्वा ठितो विपस्सनं उस्सुक्कापेत्वा मग्गपटिपाटिया अरहत्तमग्गाजाणसङ्घातं निब्बानसङ्घातञ्च अनुत्तरं सम्बोधिं फुट्ठुं अधिगन्तुं भब्बो अरहा । एवमेत्थ पाळिवण्णना वेदितब्बा ।

चरसुत्तवण्णना निड्डिता ।

२. सीलसुत्तवण्णना

१२. द्रुतिये सम्पन्नसीलाति एत्थ तिविधं सम्पन्नं परिपुण्णसमङ्गिमधुरवसेन । तत्थ —

“सम्पन्नं सालिकेदारं, सुवा भुज्जन्ति कोसिय ।

पटिवेदेमि ते ब्रह्मे, न ने वारेतुमुस्सहे”ति ॥ (जा० १.१४.१) —

इदं परिपुण्णसम्पन्नं नाम । “इमिना पातिमोक्खसंवरेन उपेतो होति समुपेतो उपागतो समुपागतो उपपन्नो सम्पन्नो समन्नागतो”ति (विभ० ५११) इदं समङ्गिसम्पन्नं नाम । “इमिस्सा, भन्ते, महापथविया हेट्ठिमतलं सम्पन्नं, सेय्यथापि खुद्धमधुं अनीलकं, एवमस्साद”न्ति (पारा० १७) इदं मधुरसम्पन्नं नाम । इध परिपुण्णसम्पन्नवसेन अत्थं दस्सेन्तो “सम्पन्नसीलाति परिपुण्णसीला”ति आह । समङ्गिसम्पन्नवसेनपि अत्थो युज्जतियेव, तस्मा सम्पन्नसीलाति परिपुण्णसीला हुत्वातिपि सीलसमङ्गिनो हुत्वातिपि एवमेत्थ अत्थो दट्ठब्बो । तत्थ सीलस्स अनवसेससमादानेन अखण्डादिभावप्पत्तिया परिपुण्णसीला, समादानतो पट्टाय अविच्छिन्दनतो सीलसमङ्गिनो । समादानवतो हि अच्चन्तविरोधिधम्मानुप्पत्तिया सीलसमङ्गिता वेदितब्बा, चेतनादीनं पन सीलनलक्खणानं धम्मानं पवत्तिलक्खणेन वत्तब्बमेव नत्थि ।

तत्थ “परिपुण्णसीला”ति इमिना अत्थेन खेत्तदोसविगमेन खेत्तपारिपूरी विय सीलदोसविगमेन सीलपारिपूरी वुत्ता होति । यथा हि खेत्तं बीजखण्डं, वप्पखण्डं, उदकखण्डं, ऊसखण्डन्ति चतुदोससमन्नागतं अपरिपूरं होति । तत्थ बीजखण्डं नाम यत्थ अन्तरन्तरा बीजानि खण्डानि वा पूतीनि वा होन्ति, तानि यत्थ पतन्ति, तत्थ सस्सं न उट्ठेति, खेत्तं खण्डं होति, अपरिपूरं होतीति अत्थो । वप्पखण्डं नाम यत्थ अकुसलो बीजानि वपन्तो अन्तरन्तरा निपातेति । एवहि सब्बत्थ सस्सं न उट्ठेति, खेत्तं खण्डं होति । उदकखण्डं नाम यत्थ कत्थचि उदकं अतिबहुं वा होति, न वा होति । तत्रापि हि सस्सानि न उट्ठेन्ति, खेत्तं खण्डं होति । ऊसखण्डं नाम यत्थ कस्सको किस्मिञ्चि पदेसे नङ्गलेन भूमिं चत्तारो पञ्च वारे कसन्तो अतिगम्भीरं करोति, ततो ऊसं उप्पज्जति । तत्रापि हि सस्सं न उट्ठेति, खेत्तं खण्डं होति, तादिसञ्च खेत्तं न महप्फलं होति न महानिसंसं । तत्रापि बहुम्पि वपित्वा अप्पं लभति । इमेसं पन चतुन्नं दोसानं विगमा खेत्तं परिपुण्णं होति, तादिसञ्च खेत्तं महप्फलं होति महानिसंसं । एवमेव खण्डं, छिद्दं, सबलं, कम्मासन्ति चतुदोससमन्नागतं सीलं अपरिपूरं होति, तादिसञ्च सीलं न महप्फलं होति न महानिसंसं । इमेसं पन चतुन्नं दोसानं विगमा सीलं परिपुण्णं होति, तादिसञ्च सीलं महप्फलं होति महानिसंसं ।

“सीलसमङ्गिनो”ति इमिना पनत्थेन सीलेन समङ्गिभूता समोधानगता समन्नागता हुत्वा विहरथाति इदमेव वुत्तं होति ।

तत्थ द्वीहि कारणेहि सम्पन्नसीलता होति सीलविपत्तिया आदीनवदस्सनेन, सीलसम्पत्तिया च आनिसंसदस्सनेन । तदुभयम्पि **विसुद्धिमग्गे** (विसुद्धि० १.१४) वित्थारितं । तत्थ “सम्पन्नसीलाति एत्तावता च किर भगवा चतुपारिसुद्धिसीलं उद्दिसित्वा ‘पातिमोक्खसंवरसंवुता’ति इमिना तत्थ जेट्ठकसीलं वित्थारेत्वा दस्सेती”ति दिवाविहारवासी सुमत्थेरो आह । अन्तेवासिको पनस्स तेपिटकचूळनागत्येरो आह — “उभयत्थापि पातिमोक्खसंवरो भगवता वुत्तो, पातिमोक्खसंवरयेव हि सीलं, इतरानि पन तीणि सीलन्ति वुत्तट्ठानं नाम अत्थी”ति वत्त्वा तं अननुजानन्तो आह — “इन्द्रियसंवरो नाम छद्धाररक्खामत्तकमेव, आजीवपारिसुद्धि धम्मेन समेन पच्चयुप्पत्तिमत्तकं, पच्चयनिस्सितं पटिलद्धपच्चये इदमत्थन्ति पच्चवेक्खित्वा परिभुज्जनमत्तकं । निप्परियायेन पातिमोक्खसंवररोव सीलं । यस्स सो भिन्नो, अयं छिन्नसीसो विय पुरिसो हत्थपादे, सेसानि रक्खिस्सतीति न वत्तब्बो । यस्स पन सो अरोगो, अयं अच्छिन्नसीसो विय पुरिसो जीवितं, सेसानि पुन पाकतिकानि कत्वा रक्खितुं सक्कोति । तस्मा ‘सम्पन्नसीला’ति इमिना पातिमोक्खसंवरं उद्दिसित्वा ‘सम्पन्नपातिमोक्खा’ति तस्सेव वेवचनं वत्त्वा तं वित्थारेत्वा दस्सेन्तो ‘पातिमोक्खसंवरसंवुता’ति आदिमाहा”ति ।

पातिमोक्खसंवरसीलेन संवुताति यो नं पाति रक्खति, तं मोक्खेति मोचेति आपायिकादीहि दुक्खेहीति पातिमोक्खन्ति लद्धनामेन सिक्खापदसीलेन पिहितकायवचीद्वारा । एवंभूता च तेन उपेता समन्नागता नाम होन्तीति आह “उपेता हुत्वा”ति । **आचारेन च गोचरेन च सम्पन्नाति** कायिकवाचसिकअवीतिक्कमसङ्घातेन आचारेन, न-वेसियगोचरतादिसङ्घातेन गोचरेन च सम्पन्ना, सम्पन्नआचारगोचराति अत्थो । **अणुप्पमाणेसूति** अतिपरित्तकेसु अनापत्तिगमनीयेसु । दुक्कटदुब्भासितमत्तेसूति अपरे । **दोसेसूति** गारहेसु अकुसलधम्मेसु । **भयतो दस्सनसीलाति** परमाणुमत्तम्पि वज्जं सिनेरुप्पमाणं विय कत्वा भायनसीला । **सब्बसिक्खाकोट्टासेसूति** मूलपज्जत्तिअनुपज्जत्तिसब्बत्थपज्जत्तिपदेसपज्जत्तिआदिभेदेसु । **तं तं समादातब्बं समादायाति** यं किञ्चि सिक्खाकोट्टासेसु मूलपज्जत्तिआदिभेदेसु सिक्खितब्बं पटिपज्जितब्बं पूरितब्बं कायिकं वाचसिकं वा सीलं, तं सब्बं सम्मा आदाय, सम्मदेव सक्कच्चं सब्बसो च आदियित्वाति अत्थो ।

उदयं पस्सन्तो पञ्चवीसति लक्खणानि पस्सतीति “अविज्जासमुदया रूपसमुदयोति पच्चयसमुदयट्ठेन रूपक्खन्धस्स उदयं पस्सति । तण्हासमुदया...पे०... कम्मसमुदया...पे०... आहारसमुदया रूपसमुदयोति पच्चयसमुदयट्ठेन रूपक्खन्धस्स उदयं पस्सति । निब्बत्तिलक्खणं पस्सन्तोपि रूपक्खन्धस्स उदयं पस्सति । रूपक्खन्धस्स उदयं पस्सन्तो इमानि पञ्च लक्खणानि पस्सति । तथा अविज्जासमुदया वेदनासमुदयोति पच्चयसमुदयट्ठेन वेदनाक्खन्धस्स उदयं पस्सति । तण्हासमुदया...पे०... कम्मसमुदया...पे०... फस्ससमुदया वेदनासमुदयोति पच्चयसमुदयट्ठेन वेदनाक्खन्धस्स उदयं पस्सति । निब्बत्तिलक्खणं पस्सन्तोपि वेदनाक्खन्धस्स उदयं पस्सति । वेदनाक्खन्धस्स उदयं पस्सन्तो इमानि पञ्च लक्खणानि पस्सती”ति आदिना नयेन एकेकस्मिं खन्धे पञ्च पञ्च कत्वा वुत्तानि पञ्चवीसति उदयलक्खणानि पस्सति ।

वयं पस्सन्तो पञ्चवीसति लक्खणानि पस्सतीति “अविज्जानिरोधा रूपनिरोधोति पच्चयनिरोधट्ठेन रूपक्खन्धस्स वयं पस्सति । तण्हानिरोधा...पे०... कम्मनिरोधा...पे०... आहारनिरोधा रूपनिरोधोति पच्चयनिरोधट्ठेन रूपक्खन्धस्स वयं पस्सति । विपरिणामलक्खणं पस्सन्तोपि रूपक्खन्धस्स वयं पस्सति । रूपक्खन्धस्स वयं पस्सन्तो इमानि पञ्च लक्खणानि पस्सति । अविज्जानिरोधा...पे०... तण्हानिरोधा...पे०... फस्सनिरोधा वेदनानिरोधोति पच्चयनिरोधट्ठेन वेदनाक्खन्धस्स वयं पस्सति । विपरिणामलक्खणं पस्सन्तोपि वेदनाक्खन्धस्स वयं पस्सती । वेदनाक्खन्धस्स वयं पस्सन्तो इमानि पञ्च लक्खणानि पस्सति”ति आदिना नयेन एकेकस्मिं खन्धे पञ्च पञ्च कत्वा वुत्तानि पञ्चवीसति वयलक्खणानि पस्सति । **पेसितत्तोति** निब्बानं पति पेसितचित्तो । **कथयन्तीति** तथाविधं भिक्खुं बुद्धादयो अरिया आचिक्खन्ति ।

यतं चरेति वायममानो चरेय्य, चङ्कमनादिवसेन गमनं कप्पेन्तोपि “अनुप्पन्नानं पापकानं अकुसलानं धम्मानं अनुप्पादाय छन्दं जनेति वायमती”तिआदिना (विभ० ४३२) नयेन वुत्तप्पधानवीरियं करोन्तो घटेन्तो वायमन्तो यथा अकुसलधम्मा पहीयन्ति, कुसलधम्मा भावनापारिपूरिं गच्छन्ति, एवं गमनं कप्पेय्याति अत्थो। एस नयो सेसेसुपि। **यतमेनं पसारयेति** एतं पसारेतब्बं हत्थपादादिं यतं यतमानो यथावुत्तवीरियसमङ्गी हुत्वा पसारेय्य, सब्बत्थ पधानं न जहेय्याति अधिप्पायो।

इदानीं यथा पटिपज्जन्तो यतं यतन्तो नाम होति, तं पटिपदं दस्सेतुं “उद्ध”न्तिआदि वुत्तं। तत्थ उद्धन्ति उपरि। **तिरियन्ति** परितो, पुरत्थिमदिसादिवसेन समन्ततो दिसाभागेसूति अत्थो। **अपाचीनन्ति** हेट्ठा। **यावता जगतो गतीति** यत्तका सत्तसङ्खारभेदस्स लोकस्स पवत्ति, तत्थ सब्बत्थाति अत्थो। एत्तावता अनवसेसता सम्मसनजाणस्स विसयं सङ्गहेत्वा दस्सेति। **समवेक्खिताति** समा हेतुना जायेन अवेक्खिता, अनिच्चादिवसेन विपस्सिताति वुत्तं होति। **धम्मानन्ति** सत्तसुज्जानं। **खन्धानन्ति** रूपादीनं पज्चन्नं खन्धानं। **उदयब्बयन्ति** उदयज्ज वयज्ज। इदं वुत्तं होति — उपरि तिरियं अधोति तिधा सङ्गहिते सब्बस्मिं लोके अतीतादिभेदभिन्नानं पज्चुपादानक्खन्धसङ्घातानं सब्बेसं रूपारूपधम्मानं अनिच्चादिसम्मसनाधिगतेन उदयब्बयजाणेन पज्चवीसतिया आकारेहि उदयं, पज्चवीसतिया आकारेहि वयं समवेक्खिता समनुपस्सिता भवेय्याति।

चेतोसमथसामीचिन्ति चित्तसंकिलेसानं अच्चन्तवूपसमनतो चेतोसमथसङ्घातस्स अरियमग्गस्स अनुच्छविकं पटिपदाजाणदस्सनविसुद्धिं। **सिक्खमानन्ति** पटिपज्जमानं भावेन्तं जाणपरम्परा निब्बत्तेन्तं। **सदाति** सब्बकालं रत्तिज्जेव दिवा च। **सतन्ति** चतुसम्पज्जसमन्नागताय सतिया सतोकारी। एवम्पेत्थ गाथावण्णना दट्ठब्बा। सेसमेत्थ सुविज्जेय्यमेव।

सीलसुत्तवण्णना निट्ठिता।

३. पधानसुत्तवण्णना

१३. ततिये **उत्तमवीरियानीति** सेट्ठवीरियानि विसिट्ठस्स अत्थस्स साधनतो। मारो धिय्यति एत्थाति **मारधेय्यं**, किलेसमारस्स पवत्तिट्ठानभूतं, तं तेभूमकवट्टन्ति आह “**तेभूमकवट्टसङ्घातं मारधेय्यं**”न्ति। जातिमरणतो जातं भयं **जातिमरणभयं**, जातिमरणमेव वा भयहेतुतो भयन्ति **जातिमरणभयं**। तेनाह “**जातिज्ज मरणज्ज...पे०... भयस्सा**”ति सेसं उत्तानमेव।

पधानसुत्तवण्णना निट्ठिता।

४. संवरसुत्तवण्णना

१४. चतुत्थे संवरादीनं साधनवसेन पदहति एतेहीति **पधानानि**। **संवरन्तस्स उप्पन्नवीरियन्ति** यथा अभिज्झादयो न उप्पज्जन्ति, एवं सतिया उपट्ठाने चक्खादीनं पिदहने अनलसस्स उप्पन्नवीरियं। **पजहन्तस्साति** विनोदेन्तस्स। **उप्पन्नवीरियन्ति** तस्सेव पधानस्स साधनवसेन पवत्तवीरियं। **भावेन्तस्स उप्पन्नवीरियन्ति** एत्थापि एसेव नयो। **समाधिनिमित्तन्ति** समाधि एव। पुरिमुप्पन्नसमाधि हि परतो उप्पज्जनकसमाधिस्स कारणं होतीति “**समाधिनिमित्तं**”न्ति वुत्तं।

उपधिविवेकताति खन्धूपधिआदिउपधीहि विवित्तता विनिस्सटत्ता । तं आगम्माति तं निब्बानं मग्गेन अधिगमहेतु । रागादयो विरज्जन्ति एत्थ, एतेनाति विरागो । एवं निरोधोपि दट्ठब्बो । यस्मा इध बोज्झङ्गमिस्सकवसेन इच्छिता, तस्मा “आरम्मणवसेन वा अधिगन्तब्बवसेन वा”ति वुत्तं । तत्थ अधिगन्तब्बवसेनाति तन्निन्नतावसेन । वोस्सग्गपरिणामिन्ति वोस्सग्गवसेन परिणामितं परिच्चजनवसेन चेव पक्खन्दनवसेन च परिणामनसीलं । तेनाह “द्वे वोस्सग्गा”तिआदि । खन्धानं परिच्चजनं नाम तप्पटिबद्धकिलेसप्पहानवसेनाति येनाकारेण विपस्सना किलेसे पजहति, तेनेवाकारेण तन्निमित्तक्खन्धे च पजहतीति वत्तब्बतं अरहतीति आह “विपस्सना...पे०... परिच्चजती”ति । यस्मा विपस्सना वुट्ठानगामिनिभावं पापुणन्ती निन्नपोणपब्भारभावेन एकंसतो निब्बानं पक्खन्दतीति वत्तब्बतं लभति, मग्गो च समुच्छेदवसेन किलेसे खन्धे च रागं परिच्चजति, तस्मा यथाक्कमं विपस्सनामग्गानं वसेन पक्खन्दनपरिच्चागवोस्सग्गा वेदितब्बा । वोस्सग्गत्थायाति परिच्चागवोस्सग्गत्थाय चेव पक्खन्दनवोस्सग्गत्थाय च । परिणमतीति परिच्चजति । तं पन परिणामनं वुट्ठानगामिनिभावप्पत्तिया चेव अरियमग्गभावप्पत्तिया च इच्छितन्ति आह “विपस्सनाभावञ्च मग्गभावञ्च पापुणाती”ति । सेसपदेसूति “धम्मविचयसम्बोज्झङ्गं भावेती”तिआदीसु सेससम्बोज्झङ्गकोट्टासेसु ।

भद्दकन्ति अभद्दकानं नीवरणादिपापधम्मानं विक्खम्भनेन रागविगमनेन एकन्तहितत्ता दुल्लभत्ता च भद्दकं सुन्दरं । न हि अज्जं समाधिनिमित्तं एवं दुल्लभं रागस्स उज्जुविपच्चनीकभूतं अत्थि । अनुरक्खतीति एत्थ अनुरक्खना नाम अधिगतसमाधितो यथा परिहानि न होति, एवं पटिपत्तिसासन-तप्पटिपक्खविगमनेनाति आह “समाधी”तिआदि । अट्ठिकसज्जादिकाति अट्ठिकज्झानादिका । सज्जासीसेन हि ज्ञानं वदति । सेसमेत्थ उत्तानमेव ।

संवरसुत्तवण्णना निट्ठिता ।

५. पञ्चत्तिसुत्तवण्णना

१५. पञ्चमे अत्तभावो एतेसं अत्थीति अत्तभाविनो, तेसं अत्तभावीनं । तेनाह “अत्तभाववन्तानं”न्ति । याव छत्तिंसाय इन्दानं आयुप्पमाणं, ताव पणीते कामे परिभुज्जीति मन्धातुराजा किर एकदिवसं अत्तनो परिणायकरतनं पुच्छि — “अत्थि नु खो मनुस्सलोकतो रमणीयतरं ठान”न्ति । कस्मा देव एवं भणसि, किं न पस्ससि चन्दिमसूरियानं आनुभावं, ननु एतेसं ठानं इतो रमणीयतरन्ति? राजा चक्करतनं पुरक्खत्वा तत्थ अगमासि ।

चत्तारो महाराजानो “मन्धातुमहाराजा आगतो”ति सुत्वा “तावमहिद्धिको महाराजा न सक्का युद्धेन पटिबाहितु”न्ति सकरज्जं निव्यातेसुं । सो तं गहेत्वा पुन पुच्छि — “अत्थि नु खो इतो रमणीयतरं ठान”न्ति । अथस्स तावतिसंभवनं कथयिंसु । “तावतिसंभवनं, देव, रमणीयं, तत्थ सक्कस्स देवरज्जो इमे चत्तारो महाराजानो पारिचारिका दोवारिकभूमियं तिट्ठन्ति । सक्को देवराजा महिद्धिको महानुभावो । तस्सिमानि उपभोगट्ठानानि — योजनसहस्सुब्बेधो वेजयन्तपासादो, पञ्चयोजनसतुब्बेधा सुधम्मदेवसभा, दियड्ढयोजनसतिको वेजयन्तरथो, तथा एरावणो हत्थी, दिब्बरुक्खसहस्सपटिमण्डितं नन्दनवनं, चित्तलतावनं, फारुसकवनं, योजनसतुब्बेधो पारिच्छत्तको कोविळारो, तस्स हेट्ठा सट्ठियोजनायामा पज्जासयोजनवित्थारा पञ्चदसयोजनुब्बेधा जयसुमनपुप्फवण्णा पण्डुकम्बलसिला, यस्सा मुदुताय सक्कस्स निसीदतो उपट्ठकायो अनुप्पविसती”ति ।

तं सुत्वा राजा तत्थ गन्तुकामो चक्करतनं अब्भुक्किरि । तं आकासे उट्ठहि सट्ठिं चतुरङ्गिनिया सेनाय । अथ द्विन् देवलोकानं वेमज्झतो चक्करतनं ओतरित्वा पथविया आसन्ने ठाने अट्ठासि सट्ठिं परिणायकरतनप्पमुखाय चतुरङ्गिनिया

सेनाय । राजा एककोव अत्तनो आनुभावेन तावतिसंभवनं अगमासि । सक्को “मन्धाता आगतो”ति सुत्वा तस्स पच्चुगमनं कत्वा “स्वागतं, महाराज, सकं, ते महाराज, अनुसास महाराजा”ति वत्वा सद्धिं नाटकेहि रज्जं द्वे भागे कत्वा एकं भागमदासि । रज्जो तावतिसंभवने पतिट्ठितमत्तस्सेव मनुस्सगन्धसरीरनिस्सन्दादिमनुस्सभावो विगच्छि, देवलोके पवत्तिविपाकदायिनो अपरपरियायवेदनीयस्स कम्मस्स कतोकासत्ता सब्बदा सोळसवस्सुद्देसिकतामालामिलायनादिदेवभावो पातुरहोसि । तस्स सक्केन सद्धिं पण्डुकम्बलसिलाय निसिन्नस्स अक्खिनिमिसनमत्तेन नानत्तं पज्जायति । तं असल्लक्खेन्ता देवा सक्कस्स च तस्स च नानत्ते मुहन्ति । सो तत्थ दिब्बसम्पत्तिं अनुभवमानो तदा मनुस्सानं असङ्ख्येय्यायुक्ताय याव छत्तिस सक्का उपपज्जित्वा चुता, ताव सक्करज्जं कारेत्वा “किं मे इमिना उपट्ठुरज्जेना”ति अतित्तो कामेहि ततो चवित्वा अत्तनो उय्याने पतितो मनुस्सलोके उत्तुककखळताय वातातपेन फुसितगतो कालमकासि । तेन वुत्तं “देवलोके पन याव छत्तिसाय इन्दानं आयुप्पमाणं, ताव पणीते कामे परिभुज्जी”ति ।

पज्जत्तिसुत्तवण्णना निट्ठिता ।

६. सोखुम्मसुत्तवण्णना

१६. छट्ठे सुखुमलक्खणप्पटिविज्झनकानीति अनिच्चादिसुखुमलक्खणानं पटिविज्झनकानि ।

सुखुमलक्खणपरिग्गाहकजाणेनाति सुखुमलक्खणपरिग्गाहकेन जाणेन । परतो जानित्वाति अवसवत्तनेन अज्जतो जानित्वा । सङ्खारा हि “मा भिज्जिसू”ति इच्छितापि भिज्जन्तेव, तस्मा ते अवसवत्तिताय परे नाम । सा च नेसं परता अनिच्चदस्सने पाकटा होतीति वुत्तं “इमिना हि पदेन अनिच्चानुपस्सना कथिता”ति । सेसं उत्तानमेव ।

सोखुम्मसुत्तवण्णना निट्ठिता ।

७-१०. पठमअगत्तिसुत्तादिवण्णना

१७-२०. सत्तमे छन्दागतित्ति एत्थ सन्धिवसेन सरलोपोति दस्सेन्तो आह “छन्देन अगति”न्ति । छन्दाति हेतुम्हि निस्सक्कवचनन्ति आह “छन्देना”ति, पेमेनाति अत्थो । छन्दसद्वो हेत्थ तण्हापरियायो, अकुसलच्छन्दपरियायो वा । सेसेसूति “दोसागतिं गच्छती”ति आदीसु ।

एत्थ च यो “अयं मे मित्तोति वा, सन्दिट्ठोति वा, जातकोति वा, लज्जं वा पन मे देती”ति छन्दवसेन अस्सामिकं सामिकं करोति, अयं छन्देन अकत्तब्बं करोति नाम । यो “अयं मे वेरी”ति चिरकालानुबद्धवेरवसेन वा, तङ्घुणुप्पन्नकोधवसेन वा सामिकं अस्सामिकं करोति, अयं दोसेन अकत्तब्बं करोति नाम । यो पन मन्दत्ता मोमूहत्ता यं वा तं वा अयुत्तं अकारणं वत्वा अस्सामिकं सामिकं करोति, अयं मोहेन अकत्तब्बं करोति नाम । यो पन “अयं राजवल्लभोति वा विसमे चोरादिके विसमानि वा कायदुच्चरितादीनि समादाय वत्तनेन विसमनिस्सितो वा, अनत्थम्पि मे करेय्या”ति भीतो अस्सामिकं सामिकं करोति, अयं भयेन अकत्तब्बं करोति नाम ।

यो पन किञ्चि भाजेन्तो “अयं मे सन्दिट्ठो वा सम्भत्तो वा”ति पेमवसेन अतिरेकं देति, “अयं मे वेरी”ति दोसवसेन ऊनकं देति, यो मुहन्तो दिन्नादिन्नं अजानमानो कस्सचि ऊनं, कस्सचि अधिकं देति, “अयं इमस्मिं अदीयमाने मय्हं अनत्थम्पि करेय्या”ति सीतो कस्सचि अतिरेकं देति, सो चतुब्बिधोपि यथानुक्कमेन छन्दागतिआदीनि गच्छन्तो अकत्तब्बं

करोति नाम ।

निहीयति तस्स यसोति तस्स अगतिगामिनो कित्तियसोपि परिवारयसोपि निहीयति परिहायति । यस्सति तेन कित्तीयतीति हि यसो, कित्ति थुतिघोसो । यस्सति तेन पुरेचरानुचरभावेन परिवारयतीति यसो, परिवारो । अट्टमनवमदसमानि उत्तानत्थानेव ।

चरवग्गो दुतियो ।

३. उरुवेलवग्गो

१. पठमउरुवेलसुत्तवण्णना

२१. ततियस्स पठमे महावेला विय महावेला, विपुलवालिकपुञ्जताय महन्तो वेलातटो वियाति अत्थो । तेनाह “महावालिकरासीति अत्थो”ति । उरु, मरु, सिकता, वालुका, वण्णु, वालिकाति इमे सद्वा समानत्था, ब्यञ्जनमेव नानं । तेनाह “उरूति वालिका वुच्चती”ति ।

नज्जाति नदति सद्वायतीति नदी, तस्सा नज्जा, नदिया निन्नगायाति अत्थो । नेरञ्जरायाति “नेलञ्जलाया”ति वत्तब्बे ल-कारस्स र-कारं कत्वा “नेरञ्जराया”ति वुत्तं, कद्धमसेवालपणकादिदोसरहितसलिलायाति अत्थो । केचि “नीलं-जलायाति वत्तब्बे नेरञ्जराया”ति वदन्ति । नाममेव वा एतं तस्सा नदियाति वेदितब्बं । तस्सा नदिया तीरे यत्थ भगवा विहासि, तं दस्सेतुं “अजपालनिग्रोधे”ति वुत्तं । कस्मा पनायं अजपालनिग्रोधो नाम जातोति आह “तस्सा”तिआदि । केचि पन “यस्मा तत्थ वेदे सज्झायितुं असमत्था महल्लकब्राह्मणा पाकारपरिक्खेपयुत्तानि निवेसनानि कत्वा सब्बे वसिंसु, तस्मास्स अजपालनिग्रोधोति नामं जात”न्ति वदन्ति । तत्रायं वचनत्थो — न जपन्तीति अजपा, मन्तानं अनज्झायकाति अत्थो । अजपालन्ति आदियन्ति निवासं एत्थाति अजपालोति । अपरे पन वदन्ति “यस्मा मज्झन्हिकसमये अन्तोपविट्ठे अजे अत्तनो छायाय पालोति रक्खति, तस्मा ‘अजपालो’तस्स नामं रुळ्ळ”न्ति । सब्बत्थापि नाममेतं तस्स रुक्खस्स ।

पठमाभिसम्बुद्धोति पठमं अभिसम्बुद्धो, अनुनासिकलोपेनायं निद्देसो । तेनेवाह “सम्बुद्धो हुत्वा पठममेवा”ति । पठमन्ति च भावनपुंसकनिद्देसो, तस्मा अभिसम्बुद्धो हुत्वा पठमं अजपालनिग्रोधे विहरामीति एवमेत्थ सम्बन्धो वेदितब्बो । अयं वितक्कोति अयं “किन्नु ख्वाहं...पे०... विहरेय्य”न्ति एवं पवत्तवितक्को । हत्थी च वानरो च तित्तिरो च हत्थिवानरतित्तिरा ।

ये वुद्धमपचायन्तीति जातिवुद्धो, वयोवुद्धो, गुणवुद्धोति तयो वुद्धा । तेसु जातिसम्पन्नो जातिवुद्धो नाम, वये ठितो वयोवुद्धो नाम, गुणसम्पन्नो गुणवुद्धो नाम । तेसु गुणसम्पन्नो वयोवुद्धो इमस्मिं ठाने वुद्धोति अधिप्पेतो । अपचायन्तीति जेट्ठापचायिकाकम्मेन पूजेन्ति । धम्मस्स कोविदाति जेट्ठापचायनधम्मस्स कोविदा कुसला । दिट्ठेव धम्मेति इमस्मिंयेव अत्तभावे । पासंसाति पसंसारहा । सम्पराये च सुगतीति सम्परेतब्बे इमं लोकं हित्वा गन्तब्बे परलोकेपि तेसं सुगतियेव । अयं पनेत्थ पिण्डत्थो — खत्तिया वा होन्तु ब्राह्मणा वा वेस्सा वा सुद्धा वा गहट्ठा वा पब्बजिता वा तिरच्छानगता वा, ये केचि सत्ता जेट्ठापचितिकम्मेन सीलादिगुणसम्पन्नानं वयोवुद्धानं अपचितिं करोन्ति, ते इमस्मिञ्च अत्तभावे जेट्ठापचितिकारकाति पसंसं वण्णनं थोमनं लभन्ति, कायस्स च भेदा सग्गे निब्बत्तन्तीति ।

अञ्जस्मिन्ति परस्मिं । अत्ता न होतीति अञ्जो, परो । सो पनेत्थ न यो कोचि अधिप्पेतो, अथ खो गरुट्टानियो । तेनाह “कञ्चि गरुट्टाने अट्टपेत्वा”ति । पतिस्सति गरुनो आणं सम्पटिच्छतीति पतिस्सो, न पतिस्सो अप्पतिस्सो, पतिस्सयरहितो, गरुपस्सयरहितोति अत्थो ।

सदेवकेति अवयवेन विग्गहो समुदायो समासत्थो । सदेवकगहणेन पञ्चकामावचरदेवगहणं पारिसेसजायेन इतरेसं पदन्तरेहि सङ्गहितत्ता । समारकगहणेन छट्टकामावचरदेवगहणं पच्चासत्तिजायेन । तत्थ हि मारो जातो तन्निवासी च होति । सब्रह्मकवचनेन ब्रह्मकायिकादिब्रह्मगहणं पच्चासत्तिजायेनेव । सस्समणब्राह्मणिया पजायाति सासनस्स पच्चत्थिकसमणब्राह्मणगहणं । निदस्सनमत्तज्चेतं अपच्चत्थिकानं असमिताबाहितपापानञ्च समणब्राह्मणानं तेनेव वचनेन गहितत्ता । कामं “सदेवके”तिआदिविसेसनानं वसेन सत्तविसयो लोकसद्दोति विज्जायति तुल्ययोगविसयत्ता तेसं, “सलोमको सपक्खको”तिआदीसु पन अतुल्ययोगे अयं समासो लब्धतीति ब्यभिचारदस्सनतो पजागहणन्ति पजावचनेन सत्तलोकगहणं ।

देवभावसामञ्जेन मारब्रह्मेसु गहितेसुपि इतरेहि तेसं लब्धमानविसेसदस्सनत्थं विसुं गहणन्ति दस्सेन्तो “मारो नामा”तिआदिमाह । मारो ब्रह्मानम्पि विचक्खुकम्माय पहीतीति आह “सब्बेस”न्ति । उपरीति उपरिभागे । ब्रह्माति दससहस्सिब्रह्मानं सन्धायाह । तथा चाह “दसहि अङ्गुलीही”तिआदि । इध दीघनिकायादयो विय बाहिरकानम्पि गन्थनिकायो लब्धतीति आह “एकनिकायादिवसेना”ति । वत्थुविज्जादीति आदि-सद्देन विज्जाट्टानानि सङ्गहन्ति । यथासकं कम्मकिलेसेहि पजातत्ता निब्बत्तत्ता पजा, सत्तनिकायो, तस्सा पजाय । सदेवमनुस्सायाति वा इमिना सम्मुतिदेवगहणं तदवसिद्धमनुस्सलोकगहणञ्च दट्ठब्बं ।

एवं भागसो लोकं गहेत्वा योजनं दस्सेत्वा इदानीं अभागसो लोकं गहेत्वा योजनं दस्सेतुं “अपिचेत्था”तिआदि वुत्तं । लोकवसेन वुत्तानि “लोकीयन्ति एत्थ कम्मं कम्मफलानी”ति कत्वा । पजावसेन “हेतुपच्चयेहि पजाता”ति कत्वा । सीलसम्पन्नतरन्ति एत्थ परिपुण्णसम्पन्नता अधिप्पेता “सम्पन्नं सालिकेदार”न्तिआदीसु (जा० १.१४.१) विय । तेनाह “अधिकतरन्ति अत्थो”ति । परिपुण्णहि अधिकतरन्ति वत्तुं अरहति । कारणन्ति युत्तिं । अत्थन्ति अविपरीतत्थं । वड्ढिन्ति अतिवड्ढिनिमित्तं ।

इमिना वचनेनाति इमस्मिं सुत्ते अनन्तरं वुत्तवचनेन । न केवलं इमिनाव, सुत्तन्तरम्पि आनेत्वा पटिबाहितब्बोति दस्सेन्तो “न मे आचरियो अत्थी”तिआदिमाह । तत्थ न मे आचरियो अत्थीति लोकुत्तरधम्मे मय्हं आचरियो नाम नत्थि । किञ्चापि लोकियधम्मानम्पि यादिसो लोकनाथस्स अधिगमो, न तादिसो अधिगमो परूपदेसो अत्थि । लोकुत्तरधम्मे पनस्स लेसोपि नत्थि । नत्थि मे पटिपुग्गलोति मय्हं सीलादीहि गुणेहि पटिनिधिभूतो पुग्गलो नाम नत्थि । सरन्ति करणे एतं पच्चत्तवचनन्ति आह “सरन्तेना”ति, सरन्ति वा सरणहेतु चाति अत्थो ।

यतोति भुम्मत्थे तोसद्दोति आह “यस्मिं काले”ति । रत्तियो जानन्तीति रत्तञ्जू, अत्तनो पब्बजितदिवसतो पट्टाय बहू रत्तियो जानन्ति, चिरपब्बजिताति वुत्तं होति । रत्तञ्जूनं महन्तभावो रत्तञ्जुमहन्तं । भावप्पधानो एस निद्देसो । “रत्तञ्जुमहत्त”न्ति वा पाठो । एस नयो सेसेसुपि । थेरनवमज्झिमानं वसेन विपुलभावो वेपुल्लमहन्तं । सिक्खत्तयसङ्गहितस्स सासनब्रह्मचरियस्स ज्ञानाभिज्जादिवसेन विपुलभावो ब्रह्मचरियमहन्तं । विसिद्धस्स पच्चयलाभस्स विपुलभावो लाभग्गमहन्तं । चतुब्बिधेन महन्तेनाति चतुब्बिधेन महन्तभावेन । महापजापतिया दुस्सयुगदानकालेति भगवतो सङ्गे गारवस्स पाकटकालदस्सनमत्तं । न हि भगवा ततो पुब्बे सङ्गे गारवरहितो विहासि ।

पठमउरुवेलसुत्तवण्णना निट्ठिता ।

२.दुतियउरुवेलसुत्तवण्णना

२२. दुतिये हुहुङ्कजातिकेनाति सो किर दिट्ठमङ्गलिको मानवसेन कोधवसेन च “हुहु”न्ति करोन्तो विचरति, तस्मा हुहुङ्कजातिकोति वुच्चति । “हुहुक्कजातिको”तिपि पठन्ति, तेन सद्धिं आगताति अत्थो । **जराजिण्णाति** जराय खण्डदन्तपलितकेसादिभावं आपादिता । **वयोवुद्धाति** अङ्गपच्चङ्गानं वुद्धिमरियादप्पत्ता । **जातिमहल्लकाति** उपपत्तिया महल्लकभावेन समन्नागता । महत्तं लन्ति गणहन्तीति महल्लका, जातिया महल्लका, न विभवादिनाति जातिमहल्लका । **वयोअनुप्पत्ताति** पच्छिमवयं सम्पत्ता, पच्छिमवयो नाम वस्ससतस्स पच्छिमो ततियो भागो । **जिण्णाति** वा पोराणा, चिरकालप्पवत्तकुलन्वयाति वुत्तं होति । **वुद्धाति** सीलाचारादिगुणवुद्धियुत्ता । **महल्लकाति** विभवमहन्तताय समन्नागता । **महद्धनाति** महाभोगा । **अद्धगताति** मग्गप्पटिपन्ना ब्राह्मणानं वतचरियादिमरियादं अवीतिक्कम्म चरमाना । **वयोअनुप्पत्ताति** जातिवुद्धभावं अन्तिमवयं अनुप्पत्ता । **सुतं** नेतन्ति एत्थ सुतं नो एतन्ति पदच्छेदो । **नोति** च करणत्थे सामिवचनं । तेनाह “अम्हेहि सुत”न्ति ।

अकालेति अयुत्तकाले । **असभावं वदतीति** यं नत्थि, तं वदति । **अनत्थं वदतीति** अकारणनिस्सितं वदति । **अकारणनिस्सितन्ति** च निष्फलन्ति अत्थो । फलज्झि कारणनिस्सितं । अकारणनिस्सितता च तदविनाभावतो अकारणे निस्सितं, निष्फलं सम्फन्ति वुत्तं होति । **अविनयं वदतीति** न संवरविनयप्पटिसंयुत्तं वदति, अत्तनो सुणन्तस्स च न संवरविनयावहं वदतीति वुत्तं होति । **न हदये निधेतब्बयुत्तकन्ति** अहितसंहितत्ता चित्तं अनुप्पवेसेत्वा निधेतुं अयुत्तं । **कथेतुं अयुत्तकालेनाति** धम्मं कथेन्तेन यो अत्थो यस्मिं काले वत्तब्बो, ततो पुब्बे पच्छा च तस्स अकालो, तस्मिं अयुत्तकाले वत्ता । **अपदेसरहितन्ति** सुत्तापदेसरहितं । **सापदेसं सकारणं कत्वा न कथेतीति** “भगवता असुके सुत्ते एवं वुत्त”न्ति एवं सापदेसं कारणसहितं कत्वा न कथेति ।

परियन्तरहितन्ति परिच्छेदरहितं, सुत्तं वा जातकं वा निक्खिपित्वा तस्स अनुयोगं उपमं वा वत्थुं वा आहरित्वा यं सुत्तं जातकं वा निक्खिपितं, तस्स सरीरभूतं कथं अनामसित्वा बाहिरकथंयेव कथेति, निक्खित्तं निक्खित्तमत्तमेव होति, “सुत्तं नु खो कथेति जातकं नु खो, नास्स अन्तं वा कोटिं वा पस्सामा”ति वत्तब्बतं आपज्जति । यथा वटरुक्खसाखानं गतगतट्टाने पारोहा ओतरन्ति, ओतिण्णो-तिण्णट्टाने विरुळ्ळिह आपज्जित्वा पुन वट्टन्तियेव, एवं अट्टयोजनम्पि योजनम्पि गच्छतियेव । गच्छन्ते गच्छन्ते पन मूलरुक्खो विनस्सति, अनुजातपारोहमूलानियेव तिट्ठन्ति, एवं अयम्पि निग्रोधधम्मकथिको नाम होति । निक्खित्तं निक्खित्तमेव कत्वा पस्सेनेव परिहरन्तो गच्छति । यो पन बहुम्पि भणन्तो “एतदत्थमिदं वुत्त”न्ति निक्खित्तसुत्ततो अज्जम्पि अनुयोगूपमावत्थुवसेन तदुपयोगीनं आहरित्वा आहरित्वा जानापेतुं सक्कोति, तथारूपस्स धम्मकथिकस्स बहुम्पि कथेतुं वट्टति । **न लोकियलोक्तरअत्थनिस्सितन्ति** अत्तनो परेसज्ज न लोकियलोक्तरहितावहं ।

पकट्टानं उक्कट्टानं सीलादिअत्थानं बोधनतो सभावनिरुत्तिवसेन च बुद्धादीहि भासितत्ता पकट्टानं वचनप्पबन्धानं आळीति **पाळि**, परियत्तिधम्मो । पुरिमस्स अत्थस्स पच्छिमेन अत्थेन अनुसन्धानं **अनुसन्धि**, अत्थमुखेन पन पाळिप्पदेसानम्पि अनुसन्धि होतियेव । स्वायं अनुसन्धि पुच्छानुसन्धिअज्झासयानुसन्धियथानुसन्धिआदिवसेन चतुब्बिधो, तंतंदेसनानं पन पुब्बापरपाळिवसेन अनुसन्धिवसेन **पुब्बापरवसेनाति** पच्चेकं योजेतब्बं । **उग्गहितन्ति** ब्यज्जनसो अत्थसो च उद्धं उद्धं गहितं, परियापुणनवसेन चेव परिपुच्छावसेन च हदयेन गहितन्ति अत्थो । वट्टदुक्खनिस्सरणत्थिकेहि सोतब्बतो **सुतं**, परियत्तिधम्मो । तं धारेतीति **सुतधरो** । यो हि सुतधरो, सुतं तस्मिं पतिट्ठितं होति सुप्पतिट्ठितं अरोगिकं, तस्मा वुत्तं

“सुतस्स आधारभूतो”ति । तेनाह “यस्स ही”तिआदि । एकं पदं एकक्खरम्मि अविनट्टं हुत्वा सन्निचीयतीति सन्निचयो, सुतं सन्निचयो एतस्मिन्ति सुतसन्निचयो । अज्झोसायाति अनुप्पविसित्वा । तिट्ठतीति न सम्मुस्सति ।

पगुणाति वाचुग्गता । निच्चलिकन्ति अविपरिवत्तं । संसन्दित्वाति अज्जेहि संसन्दित्वा । समनुग्गाहित्वाति परिपुच्छावसेन अत्थं ओगाहित्वा । पबन्धस्स विच्छेदाभावतो गङ्गासोतसदिसं । “भवङ्गसोतसदिस”न्ति वा पाठो, अकित्तिमं सुखप्पवत्तीति अत्थो । सुत्तेकदेसस्स सुत्तमत्तस्स च वचसा परिचयो इध नाधिप्पेतो, वग्गादिवसेन पन अधिप्पेतोति आह “सुत्तदसक...पे... सज्झायिता”ति, “दससुत्तानि गतानि, दसवग्गानि गतानी”तिआदिना सल्लक्खेत्वा वाचाय सज्झायिताति अत्थो । मनसा अनु अनु पेक्खिता भागसो निज्झायिता चिन्तिता मनसानुपेक्खिता । रूपगतं विय पज्जायतीति रूपगतं विय चक्खुस्स विभूतं हुत्वा पज्जायति । सुप्पटिविद्धाति निज्जटं निग्गुम्बं कत्वा सुट्ठु याथावतो पटिविद्धा ।

अधिकं चेतोति अभिचेतो, उपचारज्झानचित्तं । तस्स पन अधिकता पाकतिककामावचरचित्तेहि सुन्दरताय, सा पटिपक्खतो सुद्धियाति आह “अभिवक्कन्तं विसुद्धं चित्तं”न्ति । अधिचित्तन्ति समाधिमाह । सोपि उपचारसमाधि दट्ठब्बो । विवेकजं पीतिसुखं, समाधिजं पीतिसुखं, अपीतिजं कायसुखं, सतिपारिसुद्धिजं जाणसुखन्ति चतुब्बिधम्मि ज्ञानसुखं पटिपक्खतो निक्खन्ततं उपादाय नेक्खम्मसुखन्ति वुच्चतीति आह “नेक्खम्मसुखं विन्दती”ति । इच्छितिच्छितक्खणे समापज्जितुं समत्थोति इमिना तेसु ज्ञानेसु समापज्जनवसीभावमाह । निकामलाभीति पन वचनतो आवज्जनाधिद्वानपच्चवेक्खणवसियोपि वुत्ता एवाति वेदितब्बा । सुखेनेव पच्चनीकधम्मे विक्खम्भेत्वाति एतेन तेसं ज्ञानानं सुखप्पटिपदतं खिप्पाभिज्जतज्च दस्सेति ।

विपुलानन्ति वेपुल्लं पापितानं ज्ञानानं । विपुलता नाम सुभावितभावेन चिरतरप्पवत्तिया, सा च परिच्छेदानुरूपान् इच्छितब्बाति “विपुलान”न्ति वत्वा “यथापरिच्छेदेन वुट्ठतुं समत्थोति वुत्तं होती”ति आह । परिच्छेदकालज्हि अप्पत्वाव वुट्ठहन्तो अकसिरलाभी न होति यावदिच्छितं पवत्तेतुं असमत्थत्ता । इदानीं यथावुत्ते समापज्जनादिवसीभावे ब्यतिरेकवसेन विभावेतुं “एकच्चो ही”तिआदि वुत्तं । तत्थ लाभीयेव होतीति इदं पटिलद्धमत्तस्स ज्ञानस्स वसेन वुत्तं । तथाति इच्छितिच्छितक्खणे । पारिपन्थिकेति वसीभावस्स पच्चनीकधम्मे । ज्ञानाधिगमस्स पन पच्चनीकधम्मा पगेव विक्खम्भिता, अज्जथा ज्ञानाधिगमो एव न सिया । किच्चेन विक्खम्भेतीति किच्चेन विसोधेति । कामादीनवपच्चवेक्खणादीहि कामच्छन्दादीनं विय अज्जेसम्मि समाधिपारिपन्थिकानं दूरसमुस्सारणं इध विक्खम्भनं विसोधनज्चाति वेदितब्बं । नाळिकयन्तन्ति कालमाननाळिकयन्तमाह ।

अट्ठपितसङ्कप्पोति न सम्पाणिहितसङ्कप्पो । अभिज्जापारगूति सब्बेसं लोकियलोकुत्तरधम्मानं अभिज्जाय पारं गतो, सब्बधम्मे अभिविसिट्ठाय अग्गमग्गपज्जाय जानित्वा ठितोति अत्थो । परिज्जापारगूति पज्चन्नं खन्धानं परिज्जाय पारं गतो, पज्चक्खन्धे परिजानित्वा ठितोति अत्थो । भावनापारगूति चतुन्नं मग्गानं भावनाय पारं गतो, चत्तारो मग्गे भावेत्वा ठितोति अत्थो । पहानपारगूति सब्बकिलेसानं पहानेन पारं गतो, सब्बकिलेसे पजहित्वा ठितोति अत्थो । सच्छिकिरियापारगूति निरोधसच्छिकिरियाय पारं गतो, निरोधं सच्छिकत्वा ठितोति अत्थो । समापत्तिपारगूति सब्बसमापत्तीनं समापज्जनेन पारं गतो, सब्बा समापत्तियो समापज्जित्वा ठितोति अत्थो । ब्रह्मचरियस्स केवलीति यं ब्रह्मचरियस्स केवलं सकलभावो, तेन समन्नागतो, सकलचतुमग्गब्रह्मचरियवासोति अत्थो । तेनाह “सकलब्रह्मचरियो”ति, परिपुण्णमग्गब्रह्मचरियोति अत्थो । सेसं सुविज्जेय्यमेव ।

दुतियउरुवेलसुत्तवण्णना निट्ठिता ।

३. लोकसुत्तवण्णना

२३. ततिये लोकोति लुज्जनपलुज्जनट्ठेन लोको । अत्थतो पुरिमस्मिं अरियसच्चद्वयं, इध पन दुक्खं अरियसच्चं वेदितब्बं । तेनाह “लोकोति दुक्खसच्च”न्ति । विसंयुतोति विसंसट्ठो न पटिबद्धो, सब्बेसं संयोजनानं सम्मदेव समुच्छिन्नत्ता ततो विप्पमुत्तोति अत्थो । लोकसमुदयोति सुत्तन्तनयेन तण्हा, अभिधम्मनयेन पन अभिसङ्खारेहि सङ्घि दियट्ठकिलेससहस्सं । लोकनिरोधोति निब्बानं । सच्छिकतोति अत्तपच्चक्खो कतो । लोकनिरोधगामिनी पटिपदाति सीलादिक्खन्धत्तयसङ्गहो अरियो अट्ठङ्गिको मग्गो । सो हि लोकनिरोधं निब्बानं गच्छति अधिगच्छति, तदत्थं अरियेहि पटिपज्जीयति चाति लोकनिरोधगामिनी पटिपदाति वुच्चति ।

एत्तावता तथानि अभिसम्बुद्धो याथावतो गतोति तथागतोति अयमत्थो दस्सितो होति । चत्तारि हि अरियसच्चानि तथानि नाम । यथाह —

“चत्तारिमानि, भिक्खवे, तथानि अवितथानि अनज्जथानि । कतमानि चत्तारि? इदं दुक्खन्ति, भिक्खवे, तथमेतं अवितथमेतं अनज्जथमेतं”न्ति (सं० नि० ५.१०९०; पटि० म० २.८) वित्थारो ।

अपिच तथाय गतोति तथागतो, गतोति च अवगतो अतीतो पत्तो पटिपन्नोति अत्थो । इदं वुत्तं होति — यस्मा भगवा सकललोकं तीरणपरिज्जाय तथाय अविपरीताय गतो अवगतो, तस्मा लोको तथागतेन अभिसम्बुद्धोति तथागतो । लोकसमुदयं पहाणपरिज्जाय तथाय गतो अतीतोति तथागतो । लोकनिरोधं सच्छिकिरियाय तथाय गतो पत्तोति तथागतो । लोकनिरोधगामिनिं पटिपदं तथं अविपरीतं गतो पटिपन्नोति तथागतोति । एवं इमिस्सा पाळिया तथागतभावदीपनवसेन अत्थो वेदितब्बो ।

इति भगवा चतुसच्चाभिसम्बोधवसेन अत्तनो तथागतभावं पकासेत्वा इदानि तत्थ दिट्ठादिअभिसम्बोधवसेनपि तं दस्सेतुं “यं, भिक्खवे”तिआदिमाह । अट्ठकथायं पन “चतूहि सच्चेहि अत्तनो बुद्धभावं कथेत्वा”ति वुत्तं, तं तथागतसद्बुद्धसद्धानं अत्थतो निन्नानाकरणतं दस्सेतुं वुत्तं । तथा चेव हि पाळि पवत्ताति । दिट्ठन्ति रूपायतनं दट्ठब्बतो । तेन यं दिट्ठं यं दिस्सति, यं दक्खति, यं समवाये पस्सेय्य, तं सब्बं दिट्ठन्तेव गहितं कालविसेसस्स अनामट्ठभावतो यथा “दुद्ध”न्ति दस्सेति । सुतन्तिआदीसुपि एसेव नयो । सुतन्ति सद्दायतनं सोतब्बतो । मुतन्ति सनिस्सये इन्द्रिये निस्सयं मुञ्चित्वा पापुणित्वा गहेतब्बं । तेनाह “पत्वा गहेतब्बतो”ति । विज्जातन्ति विजानितब्बं । तं पन दिट्ठादिविनिमुत्तं विज्जेय्यन्ति आह “सुखदुक्खादि धम्मारम्मण”न्ति । पत्तन्ति यथा तथा पत्वा हत्थगतं, अधिगतन्ति अत्थो । तेनाह “परियेसित्वा वा अपरियेसित्वा वा”ति । परियेसितन्ति पत्तिया अत्थं परियिट्ठं । तं पन पत्तं वा सिया अप्पत्तं वा, उभयथापि परियेसितमेवाति आह “पत्तं वा अप्पत्तं वा”ति । द्वयेनपि द्विप्पकारम्मि पत्तं द्विप्पकारम्मि परियेसितं तेन तेन पकारेण तथागतेन अभिसम्बुद्धन्ति दस्सेति । चित्तेन अनुसञ्चरितन्ति ते पन अपापेत्वा चित्तेनेव अनु अनु सञ्चरितं, विपरितक्कितन्ति अत्थो ।

पीतकन्तिआदीति आदिसद्देन लोहितओदातादिसब्बं रूपारम्मणभागं सङ्गण्हाति । सुमनोति रागवसेन लोभवसेन सद्भाववसेन वा सुमनो । दुम्मनोति ब्यापादवितक्कवसेन वा विहिंसावितक्कवसेन वा दुम्मनो । मज्झन्तोति अज्जाणवसेन,

जाणवसेन वा मज्झतो । एस नयो सब्बत्थ । तत्थ आदिसद्देन सङ्खसद्दो, पणवसद्दो, पत्तगन्धो, पुप्फगन्धो, पुप्फरसो, फलरसो, उपादिन्नं, अनुपादिन्नं, मज्झत्तवेदना कुसलकम्मं अकुसलकम्मन्ति एवमादीनं सङ्गहो दट्ठब्बो । अप्पत्तन्ति जाणेन असम्पत्तं, अविदितन्ति अत्थो । तेनाह “जाणेन असच्छिकत”न्ति । लोकेन गतन्ति लोकेन जातं । तथेव गतत्ताति तथेव जातत्ता अभिसम्बुद्धत्ता, गतसद्देन एकत्तं बुद्धिअत्थन्ति अत्थो । गतिअत्थो हि धातवो बुद्धिअत्था भवन्तीति अक्खरचिन्तका ।

यच्च, भिक्खवे, रत्तिं तथागतो अनुत्तरं सम्मासम्बोधिं अभिसम्बुज्झतीति यस्सच्च विसाखपुण्णमाय रत्तियं तथाआगतत्तादिअत्थेन तथागतो भगवा बोधिमण्डे अपराजितपल्लङ्के निसिन्नो तिण्णं मारानं मत्थकं महित्वा उत्तरितराभावतो अनुत्तरं सम्मासम्बोधिं आसवक्खयजाणेन सद्धिं सब्बञ्जुतञ्जाणं अधिगच्छति । यच्च रत्तिं अनुपादिसेसाय निब्बानधातुया परिनिब्बायतीति यस्सच्च विसाखपुण्णमाय रत्तियंयेव कुसिनारायं उपवत्तने मल्लानं सालवने यमकसालानमन्तरे अनुपादिसेसाय निब्बानधातुया परिनिब्बायति । यं एतस्मिं अन्तरेति इमासं द्विन्नं सउपादिसेसअनुपादिसेसनिब्बानधातूनं मज्झे पच्चचत्तालीसवस्सपरिमाणकाले पठमबोधियम्पि मज्झिमबोधियम्पि पच्छिमबोधियम्पि यं सुत्तगेय्यादिप्पभेदं धम्मं भासति निदस्सनवसेन, लपति उद्दिसनवसेन, निद्दिसति परिनिद्दिसनवसेन । सब्बं तं तथेव होतीति तं एत्थन्तरे देसितं सब्बं सुत्तगेय्यादिनवङ्गं बुद्धवचनं अत्थतो ब्यञ्जनतो च अनूनं अनधिकं सब्बाकारपरिपुण्णं रागमदनिम्मदं दोसमदनिम्मदं मोहमदनिम्मदं, नत्थि तत्थ वालग्गमत्तम्पि अवक्खलितं, एकमुद्दिक्काय लज्झितं विय एकाय नाळिया मितं विय एकतुलाय तुलितं विय च तं तथेव होति यस्सत्थाय भासितं, एकन्तेनेव तस्स साधनतो, नो अज्जथा, तस्मा तथं अविताथं अनज्जथं । एतेन तथावादिताय तथागतोति दस्सेति । गदअत्थो अयं गतसद्दो द-कारस्स त-कारं कत्वा, तस्मा तथं गदतीति तथागतोति अत्थो । अथ वा आगदनं आगदो, वचनन्ति अत्थो । ततो अविपरीतो आगदो अस्साति द-कारस्स त-कारं कत्वा तथागतोति एवमेत्थ पदसिद्धि वेदितब्बा ।

यथावादीति ये धम्मे भगवा “इमे धम्मा अकुसला सावज्जा विज्जुगरहिता समत्ता समादिन्ना अहिताय दुक्खाय संवत्तन्ती”ति परेसं धम्मं देसेन्तो वदति, ते धम्मे एकन्तेनेव सयं पहासि । ये पन धम्मे भगवा — “इमे धम्मा कुसला अनवज्जा विज्जुप्पसत्था समत्ता समादिन्ना हिताय सुखाय संवत्तन्ती”ति वदति, ते धम्मे एकन्तेनेव सयं उपसम्पज्ज विहरति, तस्मा यथावादी भगवा तथाकारीति वेदितब्बो । तथा सम्मदेव सीलादिपरिपूरणवसेन सम्मापटिपदायं यथाकारी भगवा, तथेव धम्मदेसनाय परेसं तत्थ पतिट्ठापनवसेन तथावादी । भगवतो हि वाचाय कायो अनुलोमेति, कायस्सपि वाचा, तस्मा यथावादी तथाकारी, यथाकारी तथावादी च होति । एवंभूतस्स च यथा वाचा, कायोपि तथा गतो पवत्तो । यथा च कायो, वाचापि तथा गता पवत्ताति अत्थो ।

अभिभू अनभिभूतोति उपरि भवग्गं, हेट्ठा अवीचिनिरयं परियन्तं कत्वा तिरियं अपरिमाणासु लोकधातूसु भगवा सब्बसत्ते अभिभवति सीलेनपि समाधिनापि पज्जायपि विमुत्तियापि, न तस्स तुला वा पमाणं वा अत्थि । असमो असमसमो अप्पटिमो अप्पटिभागो अप्पटिपुग्गलो अतुलो अप्पमेय्यो अनुत्तरो धम्मराजा देवदेवो सक्कानं अतिसक्को ब्रह्मानं अतिब्रह्मा, ततो एव अयं न केनचि अभिभूतो । दक्खतीति सब्बं पस्सति । विसेसवचनिच्छायपि अभावतो अनवसेसविसयो दससद्दो । तेन यं किञ्चि नेय्यं नाम, सब्बं तं हत्थतले आमलकं विय पस्सतीति दीपेति । अविपरीतं आसयादिअवबोधेन हितूपसंहारादिना च सत्ते, भावज्जत्थतूपनयवसेन सङ्गारे, सब्बाकारेन सुचिण्णवसिताय समापत्तियो, चित्तञ्च वसे वत्तेतीति वसवत्तीति एवमेत्थ अत्थो दट्ठब्बो ।

विसंयुतोति चतूहि योगेहि विसंयुतो। तेनाह “चतुन्नं योगानं पहाणेन विसंयुतो”ति। तण्हादिद्विउपयेहि विरहितोति सब्बस्मिम्पि लोके तण्हादिद्विसङ्घातेहि उपयेहि विरहितो।

अभिभवित्वा ठितोति तब्बिसयकिलेसप्पहानेन अभिभुय्य अतिक्कमित्वा ठितो। चत्तारोपि गन्थे मोचेत्वा ठितोति सब्बे अभिज्झाकायगन्थादिके सकसन्तानतो मोचेत्वा ठितो। वेनेय्यसन्ताने वा अत्तनो देसनाविलासेन तेसं पमोचनोति सब्बगन्थप्पमोचनो। फुट्टस्स परमा सन्तीति अस्स अनेन खीणासवेन बुद्धेन परमा सन्ति जाणफुसनेन फुट्ठाति एवमेत्थ सम्बन्धो वेदितब्बो। तेनाह “फुट्टस्सा”तिआदि। निब्बाने कुतोचि भयं नत्थीति कुतोचि भयकारणतो निब्बाने भयं नत्थि असङ्खतभावेन सब्बसो खेमत्ता। तेनाह भगवा — “खेमज्ज वो, भिक्खवे, धम्मं देसेस्सामि खेमगामिनिज्ज पटिपद”न्तिआदि (सं० नि० ४.३७९-४०८)। निब्बानप्पत्तस्स वा कुतोचि भयं नत्थीति निब्बानं अकुतोभयन्ति एवमेत्थ अत्थो दट्ठब्बो, न कुतोचि भयं एत्थ एतस्मिं अधिगतेति अकुतोभयं, निब्बानन्ति एवमेत्थ निब्बचनज्ज दट्ठब्बं।

अनीघो निहुक्खो। सब्बकम्मक्खयं पत्तोति सब्बेसं कम्मानं खयं परियोसानं अच्चन्तभावं पत्तो। उपधी सम्मदेव खीयन्ति एत्थाति उपधिसङ्खयो, निब्बानन्ति आह “उपधिसङ्खयसङ्घाते निब्बाने”ति। चक्कन्ति धम्मचक्कं। पवत्तयीति तेपरिवट्टं द्वादसाकारं पवत्तेसि। महन्तेहि सीलादिगुणेहि समन्नागतत्ता महन्तं। वीतसारदन्ति चतुवेसारज्जयोगेन वीतसारदं। सेसं उत्तानमेव।

लोकसुत्तवण्णना निड्ढिता।

४. काळकारामसुत्तवण्णना

२४. चतुत्थे बाळ्हं खो ने पसंससीति ने समणे बाळ्हं कत्वा पसंससि वण्णयसि। कीदिसं सीलं एतेसन्ति किंसीला। को समाचारो एतेसन्ति किंसमाचारा। गुणमग्गसण्ठिताति गुणग्गसण्ठिता। म-कारो पदसन्धिकरो, अग्गगुणे पतिट्ठिताति वुत्तं होति। सन्तिन्द्रिया सन्तमानसा, “सन्तं तेसं गतं ठित”न्तिपि पठन्ति। एककियाति एकका, चतूसु इरियापथेसु एकका हुत्वा विहरन्तीति अधिप्पायो। तेनेवाह “अदुत्तिया”ति। तादिसा समणा ममातीति एत्थ इति-सद्दो आदिअत्थो। तेन —

“कायकम्मं सुचि नेसं, वाचाकम्मं अनाविलं।

मनोकम्मं सुविसुद्धं, तादिसा समणा मम॥

“विमला सङ्खमुत्ताभा, सुद्धा अन्तरबाहिरा।

पुण्णा सुद्धेहि धम्मेहि, तादिसा समणा मम॥

“लाभेन उन्नतो लोको, अलाभेन च ओनतो।

लाभालाभेन एकट्ठा, तादिसा समणा मम॥

“यसेन उन्नतो लोको, अयसेन च ओनतो।

यसायसेन एकट्ठा, तादिसा समणा मम॥

“पसंसायुन्नतो लोको, निन्दायपि च ओनतो ।
समा निन्दापसंसासु, तादिसा समणा मम ॥

“सुखेन उन्नतो लोको, दुक्खेनपि च ओनतो ।
अकम्पा सुखदुक्खेसु, तादिसा समणा ममा”ति ॥ (ध० प० अट्ठ० २.३०३ चूळसुभद्दावत्थु) —

एवमादिं सङ्गहाति ।

“दूरे सन्तो”ति आदिगाथाय अयमत्थो । सन्तोति रागादीनं सन्तताय बुद्धादयो सन्तो नाम, इध पन पुब्बबुद्धेसु कताधिकारा उस्सन्नकुसलमूला भावितभावना सत्ता सन्तोति अधिप्पेता । पकासन्तीति दूरे ठितापि बुद्धानं जाणपथं आगच्छन्ता पाकटा होन्ति । हिमवन्तोवाति यथा तियोजनसहस्सवित्थतो पञ्चयोजनसतुब्बेधो चतुरासीतिया कूटसहस्सेहि पटिमण्डितो हिमवन्तपब्बतो दूरे ठितानम्पि अभिमुखे ठितो विय पकासति, एवं पकासन्तीति अत्थो । असन्तेत्थ न दिस्सन्तीति लाभगरुका, वित्थिण्णपरलोका, आमिसचक्खुका, जीविकत्थाय पब्बजिता, बालपुगला असन्तो नाम । ते एत्थ बुद्धानं दक्खिणस्स जाणुमण्डलस्स सन्तिके निसिन्नापि न दिस्सन्ति न पज्जायन्ति । रत्तिं खित्ता यथा सराति रत्तिं चतुरङ्गसमन्नागते अन्धकारे खित्ता सरा विय तथारूपस्स उपनिस्सयभूतस्स पुब्बहेतुनो अभावेन न पज्जायन्तीति अत्थो ।

ब्रह्मदेय्यन्ति सेट्ठदेय्यं, यथा दिन्नं न पुन गहेतब्बं होति निस्सट्ठं परिच्चत्तं, एवं दिन्नन्ति अत्थो ।

दिट्ठं न मज्जतीति एत्थ दिट्ठन्ति मंसचक्खुनापि दिट्ठं, दिब्बचक्खुनापि दिट्ठं, रूपायतनस्सेतं अधिवचनं । यज्झि चक्खुद्वयेन कतदस्सनकिरियासमापनं, यं चक्खुद्वयं पस्सति अपस्सि पस्सिस्सति, समवाये पस्सेय्यं, तं सब्बं कालविसेसवचनिच्छाय अभावतो “दिट्ठं”न्तेव वुत्तं यथा “दुद्धं”न्ति । तेनेवाह “दिट्ठं रूपायतनं”न्ति । एवरूपानि हि वचनानीति “दट्ठब्बं सोतब्बं”न्ति आदीनि ।

लाभेपि तादी, अलाभेपि तादीति यथा अलाभकाले लाभस्स लब्धकालेपि तथेवाति तादिसो । यसेपीति यसे सतिपि महापरिवारकालेपि । सेसमेत्थ उत्तानमेव ।

काळकारामसुत्तवण्णना निट्ठिता ।

५. ब्रह्मचरियसुत्तवण्णना

२५. पञ्चमे नयिदन्ति एत्थ न-इति पटिसेधे निपातो, तस्स “वुस्सती”ति इमिना सम्बन्धो “न वुस्सती”ति, य-कारो पदसन्धिकरो । इदं-सद्दो “एकमिदाहं, भिक्खवे, समयं उक्कट्टायं विहरामि सुभगवने सालराजमूले”ति आदीसु (दी० नि० २.९१; म० नि० १.५०१) निपातमत्तं, “इदं खो तं, भिक्खवे, अप्पमत्तकं सीलमत्तकं”न्ति आदीसु (दी० नि० १.२७) यथावुत्ते आसन्नपच्चक्खे आगतो ।

“इदज्झि तं जेतवनं, इसिसङ्घनिसेवितं ।

आवुत्थं धम्मराजेन, पीतिसज्जननं ममा”ति ॥ (म० नि० ३.३८७-३८८; सं० नि० १.४८, १०१) —

आदीसु वक्खमाने आसन्नपच्चक्खे । इधापि वक्खमानेयेव आसन्नपच्चक्खे दट्ठब्बो ।

ब्रह्मचरिय-सदो —

“किं ते वतं किं पन ब्रह्मचरियं,
किस्स सुचिण्णस्स अयं विपाको ।
इद्धी जुती बलवीरियूपपत्ति,
इदञ्च ते नाग महाविमानं ॥

“अहञ्च भरिया च मनुस्सलोके,
सद्धा उभो दानपती अहुम्हा ।
ओपानभूतं मे घरं तदासि,
सन्तप्पिता समणब्राह्मणा च ॥

“तं मे वतं तं पन ब्रह्मचरियं,
तस्स सुचिण्णस्स अयं विपाको ।
इद्धी जुती बलवीरियूपपत्ति,
इदञ्च मे वीर महाविमानं”न्ति ॥ —

इमस्मिं पुण्णकजातके (जा० २.२२.१५९५) दाने आगतो ।

“केन पाणि कामददो, केन पाणि मधुस्सवो ।
केन ते ब्रह्मचरियेन, पुज्जं पाणिमिह इज्झती”ति ॥ —

इमस्मिं अङ्कुरपेतवत्थुस्मिं (पे० व० २७५, २७७) वेय्यावच्चे ।

“एवं खो तं, भिक्खवे, तित्तिरियं नाम ब्रह्मचरियं अहोसी”ति इमस्मिं तित्तिरजातके (चूळव० ३११)
पञ्चसिक्खापदसीले ।

“तं खो पन मे, पञ्चसिख, ब्रह्मचरियं नेव निब्बिदाय न विरागाय...पे०... यावदेव ब्रह्मलोकूपपत्तिया”ति इमस्मिं
महागोविन्दसुत्ते (दी० नि० २.३२९) ब्रह्मविहारे ।

“परे अब्रह्मचारी भविस्सन्ति, मयमेत्थ ब्रह्मचारी भविस्सामा”ति इमस्मिं सल्लेखसुत्ते (म० नि० १.८३)
मेथुनविरतियं ।

“मयञ्च भरिया नातिक्कमाम,
अम्हे च भरिया नातिक्कमन्ति ।
अञ्जत्र ताहि ब्रह्मचरियं चराम,

तस्मा हि अमहं दहरा न मीयरे”ति ॥ —

इमस्मिं महाधम्मपालजातके (जा० १.१०.९७) सदारसन्तोसे ।

“अभिजानामि खो पनाहं, सारिपुत्त, चतुरङ्गसमन्नागतं ब्रह्मचरियं चरिता, तपस्सी सुदं होमी”ति लोमहंससुत्ते (म० नि० १.१५५) वीरिये ।

“हीनेन ब्रह्मचरियेन, खत्तिये उपपज्जति ।
मज्झिमेन च देवत्तं, उत्तमेन विसुज्झती”ति ॥ —

निमिजातके (जा० २.२२.४२९) अत्तदमनवसेन कते अट्ठङ्गिके उपोसथे ।

“इदं खो पन मे, पञ्चसिख, ब्रह्मचरियं एकन्तनिब्बिदाय विरागाय...पे०... अयमेव अरियो अट्ठङ्गिको मग्गो”ति महागोविन्दसुत्तेयेव (दी० नि० २.३२९) अरियमग्गे ।

“तयिदं ब्रह्मचरियं इद्धञ्चेव फीतञ्च वित्थारिकं बाहुजञ्चं पुथुभूतं याव देवमनुस्सेहि सुप्पकासित”न्ति पासादिकसुत्ते (दी० नि० ३.१७४) सिक्खत्तयसङ्गहिते सकलस्मिं सासने । इधापि अरियमग्गे सासने च वत्तति ।

वुस्सतीति वुसीयति, चरीयतीति अत्थो । जनकुहनत्थन्ति “अहो अय्यो सीलवा वत्तसम्पन्नो अपिच्छो सन्तुट्ठो महिद्धिको महानुभावो”ति आदिना जनस्स सत्तलोकस्स विम्हापनत्थं । केचि पन “कुहनत्थन्ति पापिच्छस्स इच्छापकतस्स सतो सामन्तजप्पनइरियापथनिस्सितपच्चयपटिसेवनसङ्घातेन तिविधेन कुहनवत्थुना कुहकभावेन जनस्स विम्हापनत्थ”न्ति वदन्ति । इधापि अयमेवत्थो दस्सितो । तेनेवाह “तीहि कुहनवत्थूहि जनस्स कुहनत्थाया”ति, जनस्स विम्हापनत्थायाति अत्थो । जनलापनत्थन्ति “एवरूपस्स नाम अय्यस्स दिन्नं महप्फलं भविस्सती”ति पसन्नचित्तेहि “केनत्थो, किं आहरीयतू”ति वदापनत्थं । “जनलपनत्थ”न्तिपि पठन्ति, तस्स पापिच्छस्स सतो पच्चयत्थं परिकथोभासादिवसेन लपनभावेन उपलापकभावेन जनस्स लपनत्थन्ति अत्थो । तेनेवाह “न जनलपनत्थन्ति न जनस्स उपलापनत्थ”न्ति ।

न इतिवादप्पमोक्खानिसंसत्थन्ति एत्थ “न लाभसक्कारसिलोकानिसंसत्थ”न्तिपि पठन्ति । तत्थ य्वायं “आकङ्खेय्य चे, भिक्खवे, भिक्खु ‘लाभी अस्सं चीवरपिण्डपातसेनासनगिलानपच्चयभेसज्जपरिक्खारान’न्ति, सीलेस्वेवस्स परिपूरकारी”ति (म० नि० १.६५) सीलानिसंसभावेन वुत्तो चतुपच्चयलाभो च । चतुन्नं पच्चयानं सक्कच्चदानसङ्घातो आदरबहुमानगरुकरणसङ्घातो च सक्कारो, यो च “सीलसम्पन्नो बहुस्सुतो सुतधरो आरद्धवीरियो”ति आदिना नयेन उग्गच्छनकथुतिघोससङ्घातो सिलोको ब्रह्मचरियं वसन्तानं दिट्ठधम्मिको आनिसंसो, तदत्थन्ति अत्थो । केचि पन “लाभसक्कारसिलोकानिसंसत्थन्ति पापिच्छस्सेव सतो लाभादिगरुताय लाभसक्कारसिलोकसङ्घातस्स आनिसंसस्स उदयस्स निप्फादनत्थ”न्ति एवमत्थं वदन्ति ।

न इति मं जनो जानातूति एवं ब्रह्मचरियवासे सति “सीलवा कल्याणधम्मो”ति आदिना मं लोको जानातु सम्भावेतूति अत्तनो सन्तगुणवसेन सम्भावनत्थम्पि न इदं ब्रह्मचरियं वुस्सतीति सम्बन्धो । केचि पन “पापिच्छस्स सतो असन्तगुणसम्भावनाधिप्पायेन ‘इति एवंगुणोति मं लोको जानातू’ति न इदं ब्रह्मचरियं वुस्सती”ति एवमेत्थ अत्थं वदन्ति । सब्बत्थापि पनेत्थ पुरिमो पुरिमोयेव अत्थविकप्पो सुन्दरतरो ।

अथ खोति एत्थ अथाति अज्जत्थे निपातो, खोति अवधारणे । तेन कुहनादितो अज्जदत्थंयेव इदं, भिक्खवे, ब्रह्मचरियं वुस्सतीति दस्सेति । इदानीं तं पयोजनं दस्सेन्तो “संवरत्थं पहानत्थ”न्ति आह । तत्थ पञ्चविधो संवरो — पातिमोक्खसंवरो, सतिसंवरो, जाणसंवरो, खन्तिसंवरो, वीरियसंवरोति । “इति इमिना पातिमोक्खसंवरेण उपेतो होति समुपेतो”तिआदिना (विभ० ५११) नयेन आगतो अयं पातिमोक्खसंवरो, सीलसंवरोतिपि वुच्चति । “रक्खति चक्खुन्द्रियं, चक्खुन्द्रिये संवरं आपज्जती”ति (म० नि० १.२९५; सं० नि० ४.२३९; अ० नि० ३.१६) आगतो अयं सतिसंवरो ।

“यानि सोतानि लोकस्मिं, सति तेसं निवारणं ।

सोतानं संवरं ब्रूमि, पज्जायेते पिधीयरे”ति ॥ (सु० नि० १०४१; चूळनि० अजितमाणवपुच्छानिद्देशो ४; नेत्ति० ४.११, ४५) —

आगतो अयं जाणसंवरो । “खमो होति सीतस्स उण्हस्सा”तिआदिना (म० नि० १.२४; अ० नि० ४.११४; ६.५८) नयेन आगतो अयं खन्तिसंवरो ।

“उप्पन्नं कामवितक्कं नाधिवासेती”तिआदिना (म० नि० १.२६; अ० नि० ४.११४; ६.५८) नयेन आगतो अयं वीरियसंवरो ।

अत्थतो पन पाणातिपातादीनं पजहनवसेन वत्तप्पटिवत्तानं पूरणवसेन च पवत्ता चेतना चेव विरति च । सङ्खेपतो सब्बो कायवचीसंयमो, वित्थारतो सत्तन्नं आपत्तिक्खन्धानं अवीतिक्कमो सीलसंवरो । सति एव सतिसंवरो, सतिप्पधाना वा कुसला खन्धा । जाणमेव जाणसंवरो । अधिवासनवसेन अदोसो, अदोसप्पधाना वा तथापवत्ता कुसला खन्धा खन्तिसंवरो, पज्जाति एके । कामवितक्कादीनं अभिभवनवसेन पवत्तं वीरियमेव वीरियसंवरो । तेषु पठमो कायदुच्चरितादीसु दुस्सीलस्स संवरणतो संवरो, दुतियो मुट्ठस्सच्चस्स, ततियो अज्जाणस्स, चतुत्थो अक्खन्तिया, पञ्चमो कोसज्जस्स संवरणतो पिदहनतो संवरोति वेदितब्बो । एवमेतस्स संवरस्स अत्थाय संवरत्थं संवरनिष्पादनत्थन्ति अत्थो ।

तीहि पहानेहीति तदङ्गविक्रम्भनसमुच्छेदसङ्घातेहि तीहि पहानेहि । पञ्चविधप्पहानम्पि इध वत्तुं वट्ठतियेव । पञ्चविधज्झि पहानं तदङ्गविक्रम्भनसमुच्छेदप्पटिप्पस्सद्धिनिस्सरणवसेन । तत्थ यं दीपालोकेनेव तमस्स पटिपक्खभावतो अलोभादीहि लोभादिकस्स नामरूपपरिच्छेदादिविपस्सनाजाणेहि तस्स तस्स अनत्थस्स पहानं, सेय्यथिदं — परिच्चागेन लोभादिमलस्स, सीलेन पाणातिपातादिदुस्सील्यस्स, सद्भादीहि अस्सद्धियादिकस्स, नामरूपववत्थानेन सक्कायदिट्ठिया, पच्चयपरिग्गहेन अहेतुविसमहेतुदिट्ठिीनं, तस्सेव अपरभागेन कङ्खावितरणेन कथंकथीभावस्स, कलापसम्मसनेन अहंममाति गाहस्स, मग्गामग्गववत्थानेन अमग्गे मग्गसज्जाय, उदयदस्सनेन उच्छेददिट्ठिया, वयदस्सनेन सस्सतदिट्ठिया, भयदस्सनेन सभये अभयसज्जाय, आदीनवदस्सनेन अस्सादसज्जाय, निब्बिदानुपस्सनेन अभिरतिसज्जाय, मुच्चितुकम्यताजाणेन अमुच्चितुकम्यताय, उपेक्खाजाणेन अनुपेक्खाय, अनुलोमेन धम्मट्ठितियं निब्बाने च पटिलोमभावस्स, गोत्रभुना सङ्खारनिमित्तगाहस्स पहानं, एतं तदङ्गप्पहानं नाम ।

यं पन उपचारप्पनाभेदेन समाधिना पवत्तिभावनिवारणतो घटप्पहारेनेव उदकपिट्ठे सेवालस्स, तेसं तेसं नीवरणादिधम्मनं पहानं, एतं विक्रम्भनप्पहानं नाम । यं चतुन्नं अरियमग्गानं भावितत्ता तंतंमग्गवतो अत्तनो सन्ताने “दिट्ठिगतानं पहानाया”तिआदिना (ध० स० २७७; विभ० ६२८) नयेन वुत्तस्स समुदयपक्खियस्स किलेसगहणस्स अच्चन्तं अप्पवत्तिभावेन समुच्छिन्दनं, एतं समुच्छेदप्पहानं नाम । यं पन फलक्खणे पटिप्पस्सद्धत्थं किलेसानं, एतं

पटिप्पस्सद्धिप्पहानं नाम । यं सब्बसङ्खतनिस्सटत्ता पहीनसब्बसङ्खतं निब्बानं, एतं **निस्सरणप्पहानं** नाम । तस्स पञ्चविधस्सपि तथा तथा रागादिकिलेसानं पटिनिस्सज्जनट्टेन समतिक्कमनट्टेन वा पहानस्स अत्थाय, पहानसाधनत्थन्ति एवमेत्थ अत्थो दट्टब्बो ।

तत्थ संवरेन किलेसानं चित्तसन्ताने पवेसनिवारणं पहानेन च पवेसनिवारणमेव समुग्घातो चाति वदन्ति । उभयेनपि पन यथारहं उभयं सम्पज्जतीति दट्टब्बं । सीलादिधम्मा एव हि संवरणतो संवरं, पजहनतो पहानन्ति ।

अनीतिहन्ति ईतियो वुच्चन्ति उपदवा दिट्ठधम्मिका सम्परायिका च । ईतियो हन्तीति ईतिहं, अनु ईतिहन्ति **अनीतिहं**, सासनब्रह्मचरियं मग्गब्रह्मचरियञ्च । अथ वा ईतीहि अनत्थेहि सद्धिं हनन्ति गच्छन्ति पवत्तन्तीति ईतिहा, तण्हादिउपक्किलेसा । नत्थि एत्थ ईतिहाति **अनीतिहं** । ईतिहा वा यथावुत्तेनत्थेन तित्थियसमया, तप्पटिपक्खतो इदं **अनीतिहं** । “अनीतिह”न्तिपि पाठो । तस्सत्थो — “इतिहाय”न्ति धम्मेसु अनेकंसग्गाहभावतो विचिकिच्छा इतिहं नाम, सम्मासम्बुद्धप्पवेदितत्ता यथानुसिद्धं पटिपज्जन्तानं निक्कङ्खभावसाधनतो च नत्थि एत्थ इतिहन्ति **अनीतिहं**, अपरपत्तियन्ति अत्थो । वुत्तज्हेतं “पच्चत्तं वेदितब्बो विज्जूही”ति, “अतक्कावचरो”ति (दी० नि० २.६७; म० नि० १.२८१; २.३३७; सं० नि० १.१७२; महाव० ७-८) च । गाथाबन्धसुखत्थं पन “अनीतिह”न्ति दीघं कत्वा पठन्ति । पच्छिमं पनेत्थ अत्थविकप्पं दस्सेतुं “इतिहपरिवज्जित”न्तिआदि वुत्तं ।

निब्बानसङ्घातं ओगधं पतिट्ठं पारं गच्छतीति निब्बानोगधगामी, विमुत्तिरसत्ता एकन्तेनेव निब्बानसम्पापकोति अत्थो, तं **निब्बानोगधगामिनं** ब्रह्मचरियं । **निब्बानोगधो**ति वा अरियमग्गो वुच्चति तेन विना निब्बानावगाहणस्स असम्भवतो तस्स च निब्बानं अनालम्बित्वा अप्पवत्तनतो, तज्जेतं एकन्तसम्पादनेन गच्छतीति **निब्बानोगधगामी** । अथ वा **निब्बानोगधगामिनन्ति** निब्बानस्स अन्तोगामिनं । मग्गब्रह्मचरियज्हि निब्बानं आरम्भणं करित्वा तस्स अन्तो एव पवत्ततीति । इममेव च अत्थविकप्पं दस्सेतुं “**निब्बानस्स अन्तोगामिन**”न्तिआदि वुत्तं । **सो**ति यो सो समतिस पारमियो पूरेत्वा सब्बकिलेसे भज्जित्वा अनुत्तरं सम्मासम्बोधिं अभिसम्बुद्धो, सो भगवा **अदेसयि** देसेसि । **महन्तेही**ति महाआतुमेहि उळारज्झासयेहि । महन्तं निब्बानं, महन्ते वा सीलक्खन्धादिके एसन्ति गवेसन्तीति **महेसिनो**, बुद्धादयो अरिया । तेहि **अनुयातो** पटिपन्नो ।

यथा बुद्धेन देसितन्ति यथा अभिज्जेय्यादिभावेन सम्मासम्बुद्धेन मया देसितं, एवं ये एतं मग्गब्रह्मचरियं तदत्थं सासनब्रह्मचरियञ्च पटिपज्जन्ति । ते दिट्ठधम्मिकसम्परायिकपरमत्थेहि यथारहं अनुसासन्तस्स सत्थु मय्हं सासनकारिनो ओवादप्पटिकरा सकलस्स वट्टदुक्खस्स अन्तं परियन्तं अप्पवत्तिं करिस्सन्ति, दुक्खस्स वा अन्तं निब्बानं सच्छिकरिस्सन्तीति ।

ब्रह्मचरियसुत्तवण्णना निट्ठिता ।

६. कुहसुत्तवण्णना

२६. छट्ठे कुहकाति सामन्तजप्पनादिना कुहनवत्थुना कुहका, असन्तगुणसम्भावनिच्छाय कोहज्जं कत्वा परेसं विद्धंसकाति अत्थो । **थद्धा**ति “कोधनो होति उपायासबहुलो, अप्पम्पि वुत्तो समानो अभिसज्जति कुप्पति ब्यापज्जति पतित्थीयती”ति (अ० नि० ३.२५, २७) एवं वुत्तेन कोधेन च, “दुब्बचो होति दोवचस्सकरणेहि धम्मेहि समन्नागतो

अक्खमो अप्पदक्खिणग्गाही अनुसासनि”न्ति (म० नि० १.१८१; पारा० ४२६)। एवं वुत्तेन दोवचस्सेन च, “जातिमदो, गोत्तमदो, लाभमदो, आरोग्यमदो, योब्बनमदो, जीवितमदो”ति (विभ० ८३२) एवं वुत्तजातिमदादिभेदेन मानेन च गरुकातब्बेसु गरूसुपि निपच्चकारं अक्त्वा अयोसलाकं गिलित्वा ठिता विय अनोन्ता हुत्वा विचरणका। तेनाह “कोधेन चा”तिआदि।

उपलापकाति मिच्छाजीववसेन कुलसङ्गणहका। **लपाति** पच्चयत्थं पयुत्तवाचावसेन निप्पेसिकतावसेन लपकाति अत्थो। **सिङ्गन्ति** सिङ्गारं। तज्झि कुसलस्स विज्झनतो सुद्धु आसेवितताय सीसे परिक्खित्तं सुनिब्बत्तं विसाणं विय थिरत्ता च सिङ्गं वियाति सिङ्गं, नागरिकभावसङ्घातस्स किलेससिङ्गस्सेतं नामं। सिङ्गारभावो **सिङ्गारता**, सिङ्गारकरणकआकारो वा। चातुरभावो **चातुरता**। तथा **चातुरियं**। परिक्खतभावो **परिक्खतता**, परिखणित्वा ठपितस्सेव दळ्हसिङ्गारस्सेतं नामं। इतरं तस्सेव वेवचनं। एवं सब्बेहि वारेहि किलेससिङ्गारताव कथिता।

उग्गतनळाति नळसदिसं तुच्छमानं उक्खिपित्वा विचरणका। तेनाह “**तुच्छमानं उक्खिपित्वा ठिता**”ति। यस्मा ते कुहनादियोगतो न सम्मापटिपन्ना, तस्मा “**मम सन्तका न होन्ती**”ति वुत्तं। **अपगताति** यदिपि ते मम सासने पब्बजिता, यथानुसिद्धं पन अप्पटिपज्जनतो अपगता एव इमस्मा धम्मविनया, इतो ते सुविदूरे ठिताति दस्सेति। वुत्तज्हेतं —

“नभञ्च दूरे पथवी च दूरे,
पारं समुद्वस्स तदाहु दूरे।
ततो हवे दूरतरं वदन्ति,
सतञ्च धम्मो असतञ्च राजा”ति॥ (जा० २.२१.४१४)।

सब्बत्थ पत्थटताय वेपुल्लं पापुणन्तीति सब्बत्थ पत्थटभावेन सीलादिधम्मक्खन्धपारिपूरिया वेपुल्लं पापुणन्ति।

कुहसुत्तवण्णना निद्धिता।

७. सन्तुट्टिसुत्तवण्णना

२७. सत्तमे निदोसानीति अवज्जरहितानि आगमनसुद्धितो कायमण्डनादिकिलेसवत्थुभावाभावतो च। तत्थ सुलभताय परियेसनदुक्खस्स अभावो दस्सितो, अप्पताय परिहरणदुक्खस्सपि अभावो दस्सितो, अनवज्जताय अगरहितब्बताय भिक्खुसारुप्पभावो दस्सितो होति। अप्पताय वा परित्तासस्स अवत्थुता, सुलभताय गोधादीनं अवत्थुता, अनवज्जताय आदीनवदस्सननिस्सरणपज्जानं अत्थिता दस्सिता होति। अप्पताय वा लाभेन न सोमनस्सं जनयन्ति, अलाभेन न दोमनस्सं जनयन्ति, अनवज्जताय विप्पटिसारनिमित्तं अज्जाणुपेक्खं न जनयन्ति अविप्पटिसारवत्थुभावतो।

पंसुकूलन्ति सङ्कारकूटादीसु यत्थ कत्थचि पंसूनं उपरि ठितत्ता अब्भुगतट्ठेन पंसुकूलं वियाति पंसुकूलं, पंसु विय कुच्छितभावं उलति गच्छतीति पंसुकूलन्ति एवं लद्धनामं रथिकादीसु पतितनन्तकानि उच्चिनित्वा कतचीवरं। **रुक्खमूलन्ति** विवेकानुरूपं यं किञ्चि रुक्खसमीपं। **यं किञ्चि मुत्तन्ति** यं किञ्चि गोमुत्तं। केचि पनेत्थ “गोमुत्तपरिभावितहरीतकखण्डं **पूतिमुत्त**”न्ति वदन्ति। “पूतिभावेन आपणादितो विस्सट्ठं छड्डितं अपरिग्गहितं यं किञ्चि भेसज्जं **पूतिमुत्तन्ति** अधिप्पेत”न्ति अपरे।

यतो खोति पच्चत्ते निस्सक्कवचनं, यं खोति वुत्तं होति । तेन तुट्ठो होतीति वुत्तकिरियं परामसति । तुट्ठोति सन्तुट्ठो । इदमस्साहन्ति य्वायं चतुब्बिधेन यथावुत्तेन पच्चयेन अप्पेन सुलभेन सन्तोसो, इदं इमस्स भिक्खुनो सीलसंवरादीसु अज्जतरं एकं सामज्जङ्गं समणभावकारणन्ति अहं वदामि । सन्तुट्ठस्स हि चतुपारिसुद्धिसीलं परिपुण्णं होति, समथविपस्सना च भावनापारिपूरिं गच्छन्ति । अथ वा सामज्जं नाम अरियमग्गो, तस्स सङ्खेपतो द्वे अङ्गा बाहिरं अज्झत्तिकन्ति । तत्थ बाहिरं सप्पुरिसूपनिस्सयो सद्धम्मस्सवनञ्च । अज्झत्तिकं पन योनिमनसिकारो धम्मनुधम्मप्पटिपत्ति च । तेसु यस्मा यथारहं धम्मनुधम्मप्पटिपत्तिभूता तस्स मूलभूता चेते धम्मा, यदिदं अप्पिच्छता सन्तुट्ठिता पविवित्ता असंसट्ठता आरद्धवीरियताति एवमादयो, तस्मा वुत्तं “इदमस्साहं अज्जतरं सामज्जङ्गन्ति वदामी”ति ।

सेनासनमारब्भाति विहारादिं मज्जपीठादिञ्च सेनासनं निस्साय । चीवरं पानभोजनन्ति निवासनादिचीवरं अम्बपानकादिपानं खादनीयभोजनीयादिभुज्जितब्बवत्थुञ्च आरब्भाति सम्बन्धो । विघातोति विघातभावो, चित्तस्स दुक्खं न होतीति योजना । अयज्हेत्थ सङ्खेपत्थो — “अमुकस्मिं नाम आवासे पच्चया सुलभा”ति लभितब्बट्ठानगमनेन वा “मय्हं पापुणाति, न तुय्ह”न्ति विवादापज्जनेन वा नवकम्मकरणादिवसेन वा सेनासनादीनि परियेसन्तानं असन्तुट्ठानं इच्छितालाभादिना यो विघातो चित्तस्स होति, सो तत्थ सन्तुट्ठस्स न होति । दिसा नप्पटिहज्जतीति सन्तुट्ठिया चातुदिसभावेन दिसा न पटिहनति । वुत्तज्हेतं “चातुदिसो अप्पटिघो च होति, सन्तुस्समानो इतरीतरेना”ति (सु० नि० ४२) ।

समणधम्मस्स अनुलोमाति समणधम्मस्स समथविपस्सनाभावनाय, अरियमग्गस्सेव वा अनुच्छविका अप्पिच्छतादयो । तुट्ठचित्तस्स भिक्खुनोति तुट्ठचित्तेन भिक्खुना । अधिग्गहिता होन्तीति पटिपक्खधम्मे अभिभवित्वा गहिता होन्ति । अन्तोगताति अब्भन्तरगता । न परिबाहिराति न बाहिरा कता ।

सन्तुट्ठिसुत्तवण्णना निट्ठिता ।

८. अरियवंससुत्तवण्णना

२८. अट्ठमे वंस-सद्वो “पिट्ठिवंसं अतिक्कमित्वा निसीदती”ति आदीसु द्विन्नं गोपानसीनं सन्धानट्ठाने ठपेतब्बदण्डके आगतो ।

“वंसो विसालो च यथा विसत्तो,
पुत्तेसु दारेसु च या अपेक्खा ।
वंसक्कळीरोव असज्जमानो,
एको चरे खग्गविसाणकप्पो”ति ॥ —

आदीसु कट्ठके । “भेरिसद्वो मुदिङ्गसद्वो वंसतालसद्वो”ति आदीसु तूरियविसेसे, वेणूतिपि वुच्चति । “भिन्नेन पिट्ठिवंसेन मतो हत्थी”ति आदीसु हत्थिआदीनं पिट्ठिवेमज्जे पदेसे । “कुलवंसं ठपेस्सामी”ति आदीसु कुलन्वये । “वंसानुरक्खको पवेणीपालको”ति आदीसु गुणानुपुब्बियं गुणानं पबन्धप्पवत्तियं । इध पन चतुपच्चयसन्तोसभावनारामतासङ्घातगुणानं पबन्धे दट्ठब्बो । तस्स पन वंसस्स कुलन्वयं गुणन्वयञ्च निदस्सनवसेन दस्सेतुं “यथा ही”ति आदि वुत्तं । तत्थ खत्तियवंसोति खत्तियकुलवंसो । एस नयो सेसपदेसुपि । समणवंसो पन समणतन्ति समणपवेणी । मूलगन्धादीनन्ति

आदि-सद्देन यथा सारगन्धादीनं सङ्गहो, एवमेत्थ गोरसादीनम्पि सङ्गहो दट्टब्बो, दुतियेन पन आदि-सद्देन कासिकवत्थसप्पिमण्डादीनं ।

अरिय-सद्दो अमिलक्खेसुपि मनुस्सेसु पवत्तति, येसं निवसनट्ठानं अरियं आयतनन्ति वुच्चति । यथाह “यावता, आनन्द, अरियं आयतनं”न्ति (दी० नि० २.१५२; उदा० ७६) । लोकियसाधुजनेसुपि “ये हि वो अरिया परिसुद्धकायसमाचारा, तेसं अहं अज्जतरो”तिआदीसु (म० नि० १.३५) । इध पन ये “आरका किलेसेही”तिआदिना लद्धनिब्बचना पटिविद्धअरियसच्चा, ते एव अधिप्पेताति दस्सेतुं “**के पन ते अरिया**”ति पुच्छं कत्वा “**अरिया वुच्चन्ती**”तिआदि वुत्तं । तत्थ ये महापणिधानकप्पतो पट्टाय यावायं कप्पो, एत्थन्तरे उप्पन्ना सम्मासम्बुद्धा । ते ताव सरूपतो दस्सेत्वा तदज्जेपि सम्मासम्बुद्धे पच्चेकबुद्धे बुद्धसावके च सङ्गहेत्वा अनवसेसतो अरिये दस्सेतुं “**अपिचा**”तिआदि वुत्तं । तत्थ याव सासनं अन्तरधायति, ताव सत्था धरति एव नामाति इममेव भगवन्तं । ये चेतरहि बुद्धसावका, ते च सन्धाय पच्चुप्पन्नगहणं । तस्मिं तस्मिं काले ते ते पच्चुप्पन्नाति चे, अतीतानागतगहणं न कत्तब्बं सिया ।

इदानी यथा भगवा “धम्मं वो, भिक्खवे, देसेस्सामि आदिकल्याणं मज्जेकल्याणं परियोसानकल्याणं सात्थं सब्यज्जनं केवलपरिपुण्णं परिसुद्धं ब्रह्मचरियं पकासेस्सामि, यदिदं छ छक्कानी”ति **छक्कदेसनाय** (म० नि० ३.४२०) अट्ठहि पदेहि वण्णं अभासि । एवं महाअरियवंसदेसनाय अरियानं वंसं “चत्तारोमे, भिक्खवे, अरियवंसा अगगज्जा रत्तज्जा वंसज्जा पोराणा, असंकिण्णा असंकिण्णपुब्बा न संकीयन्ति न संकीयिस्सन्ति, अप्पटिकुट्टा समणेहि ब्राह्मणेहि विज्जूही”ति येहि नवहि पदेहि वण्णं अभासि, तानि ताव आनेत्वा थोमनावसेनेव वण्णेन्तो “**ते खो पनेते**”तिआदिमाह । **अग्गाति जानितब्बा** सब्बवंसेहि सेट्ठभावतो सेट्ठभावसाधनतो च ।

रत्तज्जा चिररत्ताति जानितब्बा रत्तज्जूहि बुद्धादीहि तेहि च तथा अनुट्ठितत्ता । **वंसाति जानितब्बा**ति बुद्धादीनं अरियानं वंसाति जानितब्बा । **पोराणाति** पुरातना । **न अधुनप्पत्तिकाति** न अधुनातना । **अविकिण्णाति** न खित्ता न छट्ठिता । तेनाह “**अनपनीता**”ति । **न अपनीतपुब्बाति** न छट्ठितपुब्बा, तिस्सन्नम्पि सिक्खानं परिपूरणूपायभावतो न परिच्चत्तपुब्बा । ततो एव इदानीपि न अपनीयन्ति, अनागतेपि न अपनीयिस्सन्तियेव । धम्मसभावस्स विजाननेन **विज्जू** । समितपापा **समणा** चेव बाहितपापा **ब्राह्मणा** च । **तेहि अप्पटिकुट्टा** अप्पटिक्खित्ता । ये हि न पटिक्कोसितब्बा, ते अनिन्दितब्बा । अगरहितब्बा अपरिच्चजितब्बताय अप्पटिक्खित्ता होन्तीति ।

सन्तुट्ठोति एत्थ यथाधिप्पेतसन्तोसमेव दस्सेन्तेन पच्चयसन्तोसवसेन सन्तुट्ठोति वुत्तं, ज्ञानविपस्सनादिवसेनपि इध भिक्खुनो सन्तुट्ठता होतीति । **इतरीतरेनाति** इतरेन इतरेन । इतरसद्दो अनियमवचनो द्विक्खत्तुं वुच्चमानो यं-किञ्चिसद्देहि समानत्थो होतीति वुत्तं “**येन केनची**”ति । स्वायं अनियमवाचिताय एव यथा थूलादीनं अज्जतरवचनो, एवं यथालब्धादीनम्पि अज्जतरवचनोति । तत्थ दुतियपक्खस्सेव इध इच्छितभावं दस्सेन्तो “**अथ खो**”तिआदिमाह । ननु च यथालब्धादयोपि थूलादयो एव? सच्चमेतं, तथापि अत्थि विसेसो । यो हि यथालब्धेसु थूलादीसु सन्तोसो, सो यथालाभसन्तोसोव, न इतरो । न हि सो पच्चयमत्तसन्निस्सयो इच्छितो, अथ खो अत्तनो कायबलसारूप्यभावसन्निस्सयोपि । थूलदुकादयो तयोपि चीवरे लब्भन्ति, मज्झिमो चतुपच्चयसाधारणो, पच्छिमो पन चीवरे सेनासने च लब्भतीति दट्टब्बं । **इमे तयो सन्तोसेति** इदं सब्बसङ्गाहिकनयेन वुत्तं । ये हि परतो गिलानपच्चयं पिण्डपाते एव पक्खित्त्वा चीवरे वीसति, पिण्डपाते पन्नरस, सेनासने पन्नरसाति समपज्जास सन्तोसा वुच्चन्ति, ते

सब्बेपि यथारहं इमेसु एव तीसु सन्तोसेसु सङ्गहं समोसरणं गच्छन्तीति ।

चीवरं जानितब्बन्ति “इदं नाम चीवरं कप्पिय”न्ति जातितो चीवरं जानितब्बं । **चीवरखेत्तन्ति** चीवरस्स उप्पत्तिक्खेत्तं । **पंसुकूलन्ति** पंसुकूलचीवरं, पंसुकूललक्खणप्पत्तं चीवरं जानितब्बन्ति अत्थो । **चीवरसन्तोसो**ति चीवरे लब्धमानो सब्बो सन्तोसो जानितब्बो । **चीवरप्पटिसंयुत्तानि धुतङ्गानि जानितब्बानि**, यानि गोपेन्तो चीवरसन्तोसेन सम्मदेव सन्तुट्ठो होतीति । खोमकप्पासिककोसेय्यकम्बलसाणभङ्गानि **खोमादीनि** । तत्थ **खोमं** नाम खोमसुत्तेहि वायितं खोमपट्टचीवरं । तथा सेसानिपि । **साणन्ति** साणवाकसुत्तेहि कतचीवरं । **भङ्गन्ति** पन खोमसुत्तादीनि सब्बानि, एकच्चाणि वा मिस्सेत्वा कतचीवरं । भङ्गम्पि वाकमयमेवाति केचि । **छाति** गणनपरिच्छेदो । यदि एवं इतो अज्जा वत्थजाति नत्थीति? नो नत्थि । सा पन एतेसं अनुलोमाति दस्सेतुं “**दुकूलादीनी**”तिआदि वुत्तं । **आदि-**सद्देन पत्तुण्णं, सोमारपट्टं, चीनपट्टं, इद्धिजं, देवदिन्नन्ति तेसं सङ्गहो । तत्थ **दुकूलं** साणस्स अनुलोमं वाकमयत्ता । पत्तुण्णदेसे सज्जातवत्थं **पत्तुण्णं** । “कोसेय्यविसेसो”ति हि अभिधानकोसे वुत्तं । सोमारदेसे चीनदेसे च जातवत्थानि **सोमारचीनपट्टानि** । पत्तुण्णादीनि तीणि कोसेय्यस्स अनुलोमानि पाणकेहि कतसुत्तमयत्ता । **इद्धिजं** एहिभिक्षुनं पुज्जिद्धिया निब्बत्तचीवरं, तं खोमादीनं अज्जतरं होतीति तेसं एव अनुलोमं । देवताहि दिन्नचीवरं **देवदिन्नं**, तं कप्परुक्खे निब्बत्तं जालिनिया देवकज्जाय अनुरुद्धत्थेरस्स दिन्नवत्थसदिसं, तम्पि खोमादीनंयेव अनुलोमं होति तेसु अज्जतरभावतो ।

इमानीति अन्तोगधावधारणवचनं, इमानि एवाति अत्थो । बुद्धादीनं परिभोगयोगगताय **कप्पियचीवरानि** । इदानी अवधारणेन निवर्त्तितानि एकदेसेन दस्सेतुं “**कुसचीर**”न्तिआदि वुत्तं । तत्थ कुसतिणेहि अज्जेहि वा तादिसेहि तिणेहि कतचीवरं **कुसचीरं** । अक्कवाकादीहि वाकेहि कतचीवरं **वाकचीरं** । चतुक्कोणेहि तिकोणेहि वा फलकेहि कतचीवरं **फलकचीरं** । मनुस्सानं केसेहि कतकम्बलं **केसकम्बलं** । चामरिवालअस्सवालादीहि कतं **वालकम्बलं** । मकचित्तनूहि वायितो **पोत्थको** । **चम्मन्ति** मिगचम्मादि यं किज्जि चम्मं । उलूकपक्खेहि गन्थित्वा कतचीवरं **उलूकपक्खं** । भुजपत्ततचादिमयं **रुक्खदुस्सं** । तिरीटकन्ति अत्थो । सुखुमतराहि लताहि लतावाकेहि वा वायितं **लतादुस्सं** । एरकवाकेहि कतं **एरकदुस्सं** । तथा **कदलिदुस्सं** । सुखुमेहि वेळुविलीवेहि कतं **वेळुदुस्सं** । **आदि-**सद्देन वक्कलादीनं सङ्गहो । **अकप्पियचीवरानि** तित्थियद्धजभावतो ।

अट्टुन्नं मातिकानं वसेनाति “सीमाय देति, कतिकाय देती”तिआदिना (महाव० ३७९) आगतानं अट्टुन्नं चीवरुप्पत्तिमातिकानं वसेन । चीवरानं पटिलाभक्खेत्तदस्सनत्थज्झि भगवता “अट्टिमा, भिक्षवे, मातिका”तिआदिना मातिका ठपिता । **मातिकाति** हि मातरो चीवरुप्पत्तिजनिकाति ।

सोसानिकन्ति सुसाने पतितं । **पापणिकन्ति** आपणद्वारे पतितं । **रथियन्ति** पुज्जत्थिकेहि वातपानन्तरेन रथिकाय छड्डितचोळकं । **सङ्कारकूटकन्ति** सङ्कारद्वाने छड्डितचोळकं । **सिनानन्ति** नहानचोळकं, यं भूतवेज्जेहि ससीसं नहायित्वा कालकण्णिचोळन्ति छड्डित्वा गच्छन्ति । **तित्थन्ति** तित्थचोळं, सिनानतित्थे छड्डितपिलोतिका । **अग्गिदड्डन्ति** अग्गिना दड्डप्पदेसं । तज्झि मनुस्सा छड्डन्ति । **गोखायितादीनि** पाकटानेव । तानिपि हि मनुस्सा छड्डन्ति । **धजं उस्सापेत्वाति** नावं आरोहन्तेहि वा युद्धं पविसन्तेहि वा धजयट्ठिं उस्सापेत्वा, तत्थ बद्धं वातेन **आनीतं** तेहि छड्डितन्ति अधिप्पायो ।

सादकभिक्षुनाति गहपतिचीवरस्स सादियनभिक्षुना । **एकमासमत्तन्ति** चीवरमाससज्जितं एकमासमत्तं **वितक्केतुं वट्टति**, न ततो परन्ति अधिप्पायो । सब्बस्सपि हि तण्हानिग्गहत्था सासने पटिपत्तीति । **पंसुकूलिको अद्धमासेनेव करोति** अपरप्पटिबद्धत्ता पटिलाभस्स, इतरस्स पन परप्पटिबद्धत्ता मासमत्तं अनुज्जातं । **इदं**

मासड्ढमासमत्तं...पे०... वितक्कसन्तोसो वितक्केन्तस्स परिमितकालिकत्ता । महाथेरं तत्थ अत्तनो सहायं इच्छन्तोपि गरुगारवेन “गामद्वारं, भन्ते, गमिस्सामि” इच्चेवाह । थेरोपि तस्स अज्झासयं जत्वा “अहम्पावुसो, गमिस्सामी” ति आह । “इमस्स भिक्खुनो वितक्कस्स अवसरो मा होतू” ति पज्झं पुच्छमानो गामं पाविसि । उच्चारपलिबुद्धोति उच्चारेन पीळितो । तदा भगवतो दुक्करकिरियानुस्सरणमुखेन तथागते उप्पन्नस्स पीतिसोमनस्सवेगस्स बलवभावेन किलेसानं विक्खम्भितत्ता तस्मिंयेव...पे०... तीणि फलानि पत्तो ।

कत्थ लभिस्सामीति चिन्तनापि लाभासापुब्बिकाति तथा “अचिन्तेत्वा” ति वुत्तं । “सुन्दरं लभिस्सामि, मनापं लभिस्सामी” ति एवमादिचिन्तनाय का नाम कथा, कथं पन गन्तव्वन्ति आह “कम्मट्टानसीसेनेव गमन” न्ति । तेन चीवरं पटिच्च किञ्चिपि न चिन्तेतव्वमेवाति दस्सेति । अपेसलो अप्पतिरूपायपि परियेसनाय पच्चयो भवेय्याति “पेसलं भिक्खुं गहेत्वा” ति वुत्तं । आहरियमानन्ति सुसानादीसु पतितं वत्थं “इमे भिक्खू पंसुकूलपरियेसनं चरन्ती” ति जत्वा केनचि पुरिसेन ततो आनीयमानं । एवं लद्धं गणहन्तस्सपीति एवं पटिलाभसन्तोसं अकोपेत्वा लद्धं गणहन्तस्सपि । अत्तनो पहोनकमत्तेनेवाति यथालद्धानं पंसुकूलानं एकपट्टदुपट्टानं अत्थाय अत्तनो पहोनकप्पमाणेनेव । अवधारणेन उपरि पच्चासं निवत्तेति । गामे भिक्खाय आहिण्डन्तेन सपदानचारिना विय द्वारप्पटिपाटिया चरणं लोलुप्पविवज्जनं नाम लोलुप्पस्स दूरसमुस्सारितत्ता ।

यापेतुन्ति अत्तभावं पवत्तेतुं । धोवनुपगेनाति धोवनयोगेन । पण्णानीति अम्बजम्बादिपण्णानि । अकोपेत्वाति सन्तोसं अकोपेत्वा । पहोनकनीहारेनेवाति अन्तरवासकादीसु यं कातुकामो, तस्स पहोनकनियामेनेव यथालद्धं थूलसुखुमादिं गहेत्वा करणं । तिमण्डलप्पटिच्छादनमत्तस्सेवाति निवासनं चे नाभिमण्डलं, जाणुमण्डलं, इतरज्जे गलवाटमण्डलं, जाणुमण्डलन्ति तिमण्डलप्पटिच्छादनमत्तस्सेव करणं । तं पन अत्थतो तिण्णं चीवरानं हेट्ठिमन्तेन वुत्तपरिमाणंयेव होति । अविचारेत्वा न विचारेत्वा ।

कुसिबन्धनकालेति मण्डलानि योजेत्वा सिब्बनकाले । सत्त वारेति सत्त सिब्बनवारे । कप्पबिन्दुअपदेसेन कस्सचि विकारस्स अकरणं कप्पसन्तोसो ।

सीतप्पटिघातनादि अत्थापत्तितो सिज्झतीति मुख्यमेव चीवरपरिभोगे पयोजनं दस्सेतुं “हिरिकोपीनप्पटिच्छादनमत्तवसेना” ति वुत्तं । तेनाह भगवा “यावदेव हिरिकोपीनप्पटिच्छादनत्थ” न्ति (म० नि० १.२३; अ० नि० ६.५८; महानि० २०६) । वट्टति, न तावता सन्तोसो कुप्पति सम्भारानं दक्खिण्येय्यानं अलाभतो । सारणीयधम्मे ठत्वाति सीलवन्तोहि भिक्खूहि साधारणभोगिभावे ठत्वा । इतीति आदिना पठमस्सेव अरियवंसस्स पंसुकूलिकङ्गतेचीवरिकङ्गानं तेसज्जस्स पच्चयतं दस्सेन्तो “इति इमे धम्मा अज्जमज्जस्स समुट्ठापका उपत्थम्भका चा” ति दीपेति । एस नयो इतो परेसु ।

सन्तुट्ठो होति वण्णवादीति एत्थ चतुक्कोटिकं सम्भवति । तत्थ चतुत्थोयेव पक्खो वण्णितथोमितोति तथा देसना कता । एको सन्तुट्ठो होति, सन्तोसस्स वण्णं न कथेति सेय्यथापि थेरो नाळको । एको न सन्तुट्ठो होति, सन्तोसस्स वण्णं कथेति सेय्यथापि उपनन्दो सक्कपुत्तो । एको नेव सन्तुट्ठो होति, न सन्तोसस्स वण्णं कथेति सेय्यथापि थेरो लाळुदायि । एको सन्तुट्ठो चेव होति, सन्तोसस्स च वण्णं कथेति सेय्यथापि थेरो महाकस्सपो ।

अनेसनन्ति अयुत्तं एसनं । तेनाह “अप्पतिरूप” न्ति, सासने ठितानं अप्पतिरूपं अयोगं । कोहज्जं करोन्तोति

चीवरुप्पादननिमित्तं परेसं कुहनं विम्हापनं करोन्तो । उत्तसतीति तण्हासन्तासेन उपरूपरि तसति । परितस्सतीति परितो तस्सति । यथा सब्बे कायवचिप्पयोगा तदत्था एव जायन्ति, एवं सब्बभागेहि तसति । गधितं वुच्चति गिद्धो, सो चेत्य अभिज्झालक्खणो अधिप्पेतो । गधितं एतस्स नत्थीति **अगधितो**ति आह “**विगतलोभगिद्धो**”ति । मुच्छन्ति तण्हावसेन मुह्नं । तस्स समुस्सयस्स अधिगतं **अनापन्नो** अनुपगतो । **अनोत्थतो** अनज्झोत्थतो । **अपरियोनद्धो**ति तण्हच्छदनेन अच्छादितो । **आदीनवं पस्समानो**ति दिट्ठधम्मिकं सम्परायिकञ्च दोसं पस्सन्तो । गधितपरिभोगतो निस्सरति एतेनाति निस्सरणं, इदमट्टिकता । तं पजानातीति **निस्सरणपज्जो** । तेनाह “**यावदेव...पे०... जानन्तो**”ति ।

नेवत्तानुक्कंसेतीति अत्तानं नेव उक्कंसेति न उक्खिपति न उक्कट्टतो दहति । **अहन्ति**आदि उक्कंसनाकारदस्सनं । **न वम्भेति** न हीळेति न निहीनतो दहति । **तस्मिं चीवरसन्तोसेति** तस्मिं यथावुत्ते वीसतिविधे चीवरसन्तोसे । कामञ्चेत्थ वुत्तप्पकारसन्तोसग्गहणेनेव चीवरहेतु अनेसनापज्जनादिपि गहितमेव तस्मिं सति तस्स भावतो, असति च अभावतो । वण्णवादिताअत्तुक्कंसनपरवम्भनानि पन गहितानि न होन्तीति “**वण्णवादादीसु वा**”ति विकप्पो वुत्तो । एत्थ च **दक्खो**तिआदि येसं धम्मानं वसेनस्स यथावुत्तसन्तोसादी इज्झन्ति, तंदस्सनं । तत्थ **दक्खो**ति इमिना तेसं समुट्ठापनपज्जं दस्सेति । **अनलसो**ति इमिना पग्गणहनवीरियं, **सम्पजानो**ति इमिना पारिहारियपज्जं, **पटिस्सतो**ति इमिना तत्थ असम्मोसवुत्तिं दस्सेति ।

पिण्डपातो जानितब्बोति पभेदतो पिण्डपातो जानितब्बो । **पिण्डपातक्खेत्तन्ति** पिण्डपातस्स उप्पत्तिट्ठानं । **पिण्डपातसन्तोसो जानितब्बो**ति पिण्डपातसन्तोसप्पभेदो जानितब्बो । इध भेसज्जम्पि पिण्डपातगतिकमेव । आहरितब्बतो हि सप्पिआदीनम्पि गहणं कतं ।

पिण्डपातक्खेत्तं पिण्डपातस्स उप्पत्तिट्ठानं खेत्तं विय खेत्तं । उप्पज्जति एत्थ, एतेनाति च **उप्पत्तिट्ठानं** । सङ्गतो वा हि भिक्खुनो पिण्डपातो उप्पज्जति उद्दिस्सवसेन वा । तत्थ सकलस्स सङ्गस्स दातब्बभत्तं **सङ्गभत्तं** । कतिपये भिक्खू उद्दिसित्वा उद्देसेन दातब्बभत्तं **उद्देसभत्तं** । निमन्तेत्वा दातब्बभत्तं **निमन्तनं** । सलाकाय दातब्बभत्तं **सलाकभत्तं** । एकस्मिं पक्खे एकदिवसं दातब्बभत्तं **पक्खिकं** । उपोसथे उपोसथे दातब्बभत्तं **उपोसथिकं** । पाटिपददिवसे दातब्बभत्तं **पाटिपदिकं** । आगन्तुकानं दातब्बभत्तं **आगन्तुकभत्तं** । धुरगेहे एव ठपेत्वा दातब्बभत्तं **धुरभत्तं** । कुटिं उद्दिस्स दातब्बभत्तं **कुटिभत्तं** । गामवासिआदीहि वारेन दातब्बभत्तं **वारभत्तं** । विहारं उद्दिस्स दातब्बभत्तं **विहारभत्तं** । सेसानि पाकटानेव ।

वितक्केति “कत्थ नु खो अहं अज्ज पिण्डाय चरिस्सामी”ति । “**स्वे कत्थ पिण्डाय चरिस्सामा**”ति थेरेन वुत्ते “**असुकगामे, भन्ते**”ति काममेतं पटिवचनदानं, येन पन चित्तेन चिन्तेत्वा तं वुत्तं, तं सन्धायाह “**एत्तकं चिन्तेत्वा**”ति । **ततो पट्टायाति** वितक्कमाळके ठत्वा वितक्कितकालतो पट्टाय । **ततो परं वितक्केन्तो अरियवंसा चुतो** होतीति इदं तिण्णम्पि अरियवंसिकानं वसेन गहेतब्बं, न एकचारिकस्सेव । सब्बोपि हि अरियवंसिको एकवारमेव वितक्केतुं लभति, न ततो परं । **परिबाहिरो**ति अरियवंसिकभावतो बहिभूतो । स्वायं वितक्कसन्तोसो कम्मट्ठानमनसिकारेन न कुप्पति विसुज्झति च । इतो परेसुपि एसेव नयो । तेनेवाह “**कम्मट्ठानसीसेन गन्तब्ब**”न्ति । **गहेतब्बमेवाति** अट्ठानप्पयुत्तो एव-सद्दो । यापनमत्तमेव गहेतब्बन्ति योजेतब्बं ।

एत्थाति एतस्मिं पिण्डपातप्पटिग्गहणे । **अप्पन्ति** अत्तनो यापनप्पमाणतोपि अप्पं गहेतब्बं दायकस्स चित्ताराधनत्थं । **पमाणेनेवाति** अत्तनो पमाणेनेव अप्पं गहेतब्बं । **पमाणेन गहेतब्बन्ति** एत्थ कारणं दस्सेतुं “**पटिग्गहणस्मिज्ही**”तिआदि वुत्तं । **मक्खेतीति** विद्धंसेति अपनेति । **विनिपातेति** विनासेति अट्ठानविनियोगेन । **सासनन्ति** सत्थुसासनं अनुसिट्ठिं न

करोति न पटिपज्जति । सपदानचारिणा विय द्वारपटिपाटिया चरणं लोलुप्पविवज्जनसन्तोसोति आह
“द्वारपटिपाटिया गन्तब्ब”न्ति ।

हरापेत्वाति अधिकं अपनेत्वा । आहारगेधतो निस्सरति एतेनाति निस्सरणं । जिघच्छाय पटिविनोदनत्थं कता,
कायस्स ठितिआदिपयोजनं पन अत्थापत्तितो आगतमेवाति आह “जिघच्छाय...पे०... सन्तोसो नामा”ति । निदहित्वा न
परिभुज्जितब्बं तदहुपीति अधिप्पायो । इतरत्थ पन सिक्खापदेनेव वारितं । सारणीयधम्मे ठितेनाति सीलवन्तेहि भिक्खूहि
साधारणभोगिभावे ठितेन ।

सेनासनेनाति सयनेन आसनेन च । यत्थ यत्थ हि मज्जादिके विहारदिके च सेति, तं सेनं । यत्थ यत्थ पीठादिके
आसति, तं आसनं । तदुभयं एकतो कत्वा “सेनासन”न्ति वुत्तं । तेनाह “मज्जो”तिआदि । तत्थ मज्जो मसारकादि । तथा
पीठं । मज्जभिसि, पीठभिसीति दुविधो भिसि । विहारो पाकारपरिच्छिन्नो सकलो आवासो, “दीघमुखपासादो”ति केचि ।
अड्डयोगो दीघपासादो, “एकपस्सच्छादनकसेनासन”न्ति केचि । पासादोति चतुरस्सपासादो, “आयतचतुरस्सपासादो”ति
केचि । हम्मियन्ति मुण्डच्छदनपासादो । गुहाति केवला पब्बतगुहा । लेणं द्वारबन्धं । अट्टो बहलभित्तिकगेहं, यस्स
गोपानसियो अगगहेत्वा इट्ठकाहि एव छदनं होति, “अट्टलाकारेन करीयती”तिपि वदन्ति । माळो एककूटसङ्गहितो
अनेककोणो पटिस्सयविसेसो, “वट्टाकारेन कतसेनासन”न्ति केचि ।

पिण्डपाते वुत्तनयेनेवाति “सादको भिक्खु ‘अहं कत्थ वसिस्सामी’ति वितक्केती”तिआदिना यथारहं पिण्डपाते
वुत्तनयेनेव वेदितब्बा । “ततो परं वितक्केन्तो अरियवंसा चुतो होति परिबाहिरो, सेनासनं कुहिं लभिस्सामीति अचिन्तेत्वा
कम्मट्ठानसीसेनेव गन्तब्ब”न्ति च एवमादि सब्बं पुरिमनयेनेव ।

कस्मा पनेत्थ पच्चयसन्तोसं दस्सेन्तेन भगवता गिलानपच्चयसन्तोसो न गहितोति? न खो पनेतं एवं दट्ठब्बन्ति
दस्सेन्तो “गिलानपच्चयो पन पिण्डपाते एव पविट्ठो”ति आह, आहरितब्बतासामज्जेनाति अधिप्पायो । यदि एवं
तत्थापि पिण्डपाते विय वितक्कसन्तोसादयोपि पन्नरस सन्तोसा इच्छितब्बाति? नोति दस्सेन्तो आह “तत्था”तिआदि ।
ननु चेत्थ द्वादसेव धुतङ्गानि विनियोगं गतानि, एकं पन नेसज्जिकङ्गं न कत्थचि विनियुत्तन्ति आह “नेसज्जिकङ्गं
भावनारामअरियवंसं भजती”ति । अयञ्च अत्थो अट्ठकथारुळ्हो एवाति दस्सेन्तो “वुत्तम्मि चेत”न्तिआदिमाह ।

पथविं पत्थरमानो वियातिआदि अरियवंसदेसनाय सुदुक्करभावदस्सनं महाविसयत्ता तस्सा देसनाय । यस्मा
नयसहस्सपटिमण्डितं होति, अरियमग्गाधिगमाय वित्थारतो पवत्तियमाना देसना चित्तुप्पादकण्डे अयञ्च
भावनारामअरियवंसकथा अरियमग्गाधिगमाय वित्थारतो पवत्तियमाना एव होतीति वुत्तं “सहस्सनयपटिमण्डितं...पे०...
देसनं आरभी”ति ।

पटिपक्खविधमनतो अभिमुखभावेन रमणं आरमणं आरामोति आह “अभिरतीति अत्थो”ति । ब्यधिकरणानम्मि
पदानं वसेन भवति बाहिरत्थसमासो यथा “उरसिलोमो कण्ठेकाळो”ति आह “भावनाय आरामो अस्साति
भावनारामो”ति । अभिरमितब्बट्टेन वा आरामो, भावना आरामो अस्साति भावनारामोति एवम्पेत्य समासयोजना
वेदितब्बा । भावेन्तो रमतीति एतेन भावनारामसद्धानं कत्तुसाधनतं कम्मधारयसमासतज्ज दस्सेति । “पजहन्तो रमती”ति
वुत्तत्ता पनानारामोति एत्थापि एसेव नयो ।

कामं “नेसज्जिकङ्गं भावनारामअरियवंसं भजती”ति वुत्तं भावनानुयोगस्स अनुच्छविकत्ता, नेसज्जिकङ्गवसेन पन नेसज्जिकस्स भिक्खुनो एकच्चाहि आपत्तीहि अनापत्तिभावोति तम्पि सङ्गहन्तो “तेरसन्नं धुतङ्गानं”न्ति वत्वा विनयं पत्वा गरुके ठातब्बन्ति इच्छितत्ता सल्लेखस्स अपरिच्चजनवसेन पटिपत्ति नाम विनये ठितस्सेवाति आह “तेरसन्नं...पे०... कथितं होती”ति । कामं सुत्ताभिधम्मपिटकेसुपि तत्थ तत्थ सीलकथा आहटायेव, येहि पन गुणेहि सीलस्स वोदानं होति, तेसु कथितेसु यथा सीलकथाबाहुल्लं विनयपिटकं कथितं होति, एवं भावनाकथाबाहुल्लं सुत्तपिटकं अभिधम्मपिटकञ्च चतुत्थेन अरियवंसेन कथितेन कथितमेव होतीति वुत्तं “भावनारामेन अवसेसं पिटकद्वयं कथितं”न्ति । “सो नेक्खम्मं भावेन्तो रमती”ति नेक्खम्मपदं आदिं कत्वा तत्थ देसनाय पवत्तत्ता सब्बेसम्पि वा समथविपस्सनामग्गधम्मानं यथासकं पटिपक्खतो निक्खमनेन नेक्खम्मसज्जितानं तत्थ आगतत्ता सो पाठो नेक्खम्मपाळीति वुच्चतीति आह “नेक्खमपाळिया कथेतब्बो”ति । तेनाह अट्ठकथायं “सब्बेपि कुसला धमा, नेक्खम्मन्ति पवुच्चरे”ति । दसुत्तरसुत्तन्तपरियायेनाति दसुत्तरसुत्तन्तधम्मेन (दी० नि० ३.३५० आदयो) दसुत्तरसुत्तन्ते आगतनयेनाति वा अत्थो । सेसपदद्वयेपि एसेव नयो ।

सोति जागरियं अनुयुत्तो भिक्खु । नेक्खम्मन्ति कामेहि निक्खन्तभावतो नेक्खम्मसज्जितं पठमज्झानूपचारं, सो “अभिज्झं लोके पहाया”तिआदिना (विभ० ५०८) आगतो । पठमज्झानस्स पुब्बभागभावना हि इधाधिप्पेता, तस्मा “अब्ब्यापाद”न्तिआदीसुपि एवमेव अत्थो वेदितब्बो । सउपायानज्हि अट्ठन्नं समापत्तीनं अट्ठारसन्नं महाविपस्सनानं चतुन्नं अरियमग्गानञ्च वसेनेत्थ देसना पवत्ताति । तत्थ अब्ब्यापादन्ति मेत्ता । आलोकसज्जन्ति विभूतं कत्वा मनसिकरणेन उपट्ठितआलोकसज्जाननं । अविक्खेपन्ति समाधिं । धम्मववत्थानन्ति कुसलादिधम्मानं याथावनिच्छयं, “सपच्चयनामववत्थान”न्तिपि वदन्ति । एवं कामच्छन्दादिनीवरणप्पहानेन “अभिज्झं लोके पहाया”तिआदिना वुत्तस्स पठमज्झानस्स पुब्बभागपटिपदाय भावनारामतं पहानारामतञ्च दस्सेत्वा इदानि सह उपायेन अट्ठसमापत्तीहि अट्ठारसहि च महाविपस्सनाहि तं दस्सेतुं “जाण”न्तिआदिमाह । नामरूपपरिग्गहणकङ्कवितरणानज्हि विबन्धभूतस्स मोहस्स दूरीकरणेन जातपरिज्जाय ठितस्स अनिच्चसज्जादयो सिज्जन्ति । तथा ज्ञानसमापत्तीसु अनभिरतिनिमित्तेन पामोज्जेन तत्थ अनभिरतिया विनोदिताय ज्ञानादीनं समधिग्गमोति समापत्तिविपस्सनं अरतिविनोदनअविज्जापदालनउपायो । उप्पटिपाटिनिद्देशो पन नीवरणसभावाय अविज्जाय हेट्टानीवरणेसु सङ्गहदस्सनत्थन्ति दट्ठब्बं । किञ्चापि पठमज्झानूपचारेयेव दुक्खं, चतुत्थज्झानूपचारेयेव सुखं पहीयति, अतिसयप्पहानं पन सन्धायाह “चतुत्थज्झानं सुखदुक्खे”ति ।

अनिच्चस्स, अनिच्चन्ति च अनुपस्सना अनिच्चानुपस्सना, तेभूमकधम्मानं अनिच्चतं गहेत्वा पवत्ताय अनुपस्सनायेतं नामं । निच्चसज्जन्ति सङ्खतधम्मेसु निच्चा सस्सताति पवत्तं मिच्छासज्जं । सज्जासीसेन दिट्ठिचित्तानम्पि गहणं दट्ठब्बं । एस नयो इतो परेसुपि । निब्बिदानुपस्सनन्ति सङ्खारेसु निब्बिन्दनाकारेन पवत्तं अनुपस्सनं । नन्दन्ति सप्पीतिकतण्हं । विरागानुपस्सनन्ति विरज्जनाकारेन पवत्तं अनुपस्सनं । निरोधानुपस्सनन्ति सङ्खारानं निरोधस्स अनुपस्सनं । “ते सङ्खारा निरुज्जन्तिथेव, आयतिं समुदयवसेन न उप्पज्जन्ती”ति एवं वा अनुपस्सना निरोधानुपस्सना । तेनेवाह “निरोधानुपस्सनाय निरोधेति नो समुदेती”ति । मुच्चितुकामता हि अयं बलप्पत्ताति । पटिनिस्सज्जनाकारेन पवत्ता अनुपस्सना पटिनिस्सग्गानुपस्सना । पटिसङ्खा सन्तिट्ठना हि अयं । आदानन्ति निच्चादिवसेन गहणं । सन्ततिसमूहकिच्चारम्मणानं वसेन एकत्तगहणं घनसज्जा । आयूहनं अभिसङ्खरणं । अवत्थाविसेसापत्ति विपरिणामो । ध्रुवसज्जन्ति थिरभावग्गहणं ।

निमित्तन्ति समूहघनवसेन, सकिच्चपरिच्छेदताय च सङ्खारानं सविग्गहतं । पणिधित्ति रागादिपणिधिं । सा पनत्थतो

तण्हावसेन सङ्खारेसु निन्नता । अभिनिवेसन्ति अत्तानुदिट्ठि । अनिच्चदुक्खादिवसेन सब्बधम्मतीरणं अधिपञ्जाधम्मविपस्सना । सारादानाभिनिवेसन्ति असारे सारन्ति गहणविपल्लासं । “इस्सरकुत्तादिवसेन लोको समुप्पन्नो”ति अभिनिवेसो सम्मोहाभिनिवेसो । केचि पन “अहोसिं नु खो अहमतीतमद्धानन्ति आदिना (म० नि० १.१८; सं० नि० २.२०) पवत्तसंसयापत्ति सम्मोहाभिनिवेसो”ति वदन्ति । सङ्खारेसु ताणलेणभावग्गहणं आलयाभिनिवेसो । “आलयरता आलयसम्मुदिता”ति (दी० नि० २.६४, ६७; म० नि० १.२८१; २.३३७; सं० नि० १.१७२; महाव० ७, ८) च वचनतो आलयो तण्हा, सायेव चक्खादीसु रूपादीसु च अभिनिवेसवसेन पवत्तिया आलयाभिनिवेसोति केचि । एवं ठिता ते सङ्खारा पटिनिस्सज्जीयन्तीति पवत्तं जाणं पटिसङ्खानुपस्सना । वट्टतो विगतत्ता विवट्ठं निब्बानं, तत्थ आरम्भणसङ्खातेन अनुपस्सनेन पवत्तिया विवट्ठानुपस्सना गोत्रभु । संयोगाभिनिवेसन्ति संयुज्जनवसेन सङ्खारेसु निवेसनं । दिट्ठेकट्ठेति दिट्ठिया सहजातेकट्ठे पहानेकट्ठे च । ओळारिकेति उपरिमग्गवज्झे किलेसे अपेक्खित्वा वुत्तं, अज्जथा दस्सनप्पहातब्बापि दुत्तियमग्गवज्झेहिपि ओळारिकाति । अणुसहगतेति अणुभूते । इदं हेट्ठिमग्गवज्झे अपेक्खित्वा वुत्तं । सब्बकिलेसेति अवसिट्ठसब्बकिलेसे । न हि पठमादिमग्गेहिपि पहीना किलेसा पुन पहीयन्तीति ।

एवन्ति पटिसम्भिदामग्गे (पटि० म० १.४१, ९५) नेक्खम्मपाळिया योजनं निगमेत्वा दीघनिकायेति आदिना दसुत्तरपरियायेन (दी० नि० ३.३५० आदयो) योजनं दस्सेति । एकं धम्मं भावेन्तो रमति, एकं धम्मं पजहन्तो रमतीति च नयिदं दसुत्तरसुत्ते (दी० नि० ३.३५० आदयो) आगतनियामेन वुत्तं, तत्थ पन “एको धम्मो भावेतब्बो, एको धम्मो पहातब्बो”ति देसना आगता । एवं सन्तेपि यस्मा अत्थतो भेदो नत्थि, तस्मा पटिसम्भिदामग्गे (पटि० म० १.४१, ९५) नेक्खम्मपाळियं आगतनीहारेनेव “एकं धम्मं भावेन्तो रमति, एकं धम्मं पजहन्तो रमती”ति वुत्तं । एस नयो सेसवारेसुपि ।

एवन्ति आदिना दसुत्तरपरियायेन (दी० नि० ३.३५० आदयो) योजनं निगमेत्वा इदानि सतिपट्टानसुत्तन्तपरियायेन (म० नि० १.१०५ आदयो) योजनं दस्सेतुं “मज्झिमनिकाये”ति आदि आरब्धं । कामज्जेत्थ कायानुपस्सनावसेनेव संखिपित्वा योजना कता, एकवीसतिया पन ठानानं वसेनपि योजना कातब्बा । इदानि अभिधम्मनिद्देसपरियायेन दस्सेतुं “अभिधम्मे निद्देसपरियायेना”ति आदि आरब्धं । अनिच्चतोति आदीसु यं वत्तब्बं, तं विसुद्धिमग्गसंवण्णनासु (विसुद्धि० २.६९८; विसुद्धि० महाटी० २.६९८) वुत्तनयेन वेदितब्बं ।

उक्कण्ठितन्ति अधिकुसलेसु धम्मेसु पन्तसेनासनेसु च उक्कण्ठादिज्ज, अननुयोगोति अत्थो । अरियवंसपूरको धीरो सीलवा भिक्खु अरियवंसपरिपूरणस्स भेदं अनिच्छन्तो समाहितो विपस्सको च पच्चयघातेन अरतिया रतिया च सहिता अभिभविता होतीति वुत्तं “अरतिरतिसहो, भिक्खवे, धीरो”ति । सेसं सुविज्जेय्यमेव ।

अरियवंससुत्तवण्णना निट्ठिता ।

९. धम्मपदसुत्तवण्णना

२९. नवमे ज्ञानादिभेदो धम्मो पज्जति एतेनाति धम्मपदं, अनभिज्झाव धम्मपदं अनभिज्झाधम्मपदं, अनभिज्झापधानो वा धम्मकोट्टासो अनभिज्झाधम्मपदं । एवं सेसेसुपि । अत्थतो पन अनभिज्झाधम्मपदं नाम अलोभो वा अलोभसीसेन अधिगतज्झानविपस्सनामग्गफलनिब्बानानि वा । अब्यापादो धम्मपदं नाम मेत्ता वा मेत्तासीसेन अधिगतज्झानादीनि वा । सम्मासतिधम्मपदं नाम सूपट्ठितस्सति वा सतिसीसेन अधिगतज्झानादीनि वा ।

सम्मासमाधिधम्मपदं नाम अट्टसमापत्ति वा अट्टसमापत्तिसीसेन अधिगतज्झानविपस्सनामगगफलनिब्बानानि वा । दसअसुभवसेन वा अधिगतज्झानादीनि **अनभिज्जा धम्मपदं** । चतुब्रह्मविहारवसेन अधिगतानि **अव्यापादो धम्मपदं** । दसानुस्सति आहारेपटिकूलसज्जावसेन अधिगतानि **सम्मासतिधम्मपदं** । दसकसिणआनापानवसेन अधिगतानि **सम्मासमाधिधम्मपदं** । **अनभिज्जालूति** अनभिज्झायनसीलो । अभिपुब्बो झेसदो अभिज्झायनद्वो । तेनेवाह “**नित्तण्हो हुत्वा**”ति । **पकतिभावं अविजहन्तेनाति** परिसुद्धभावं सभावसङ्घातअनवज्जसङ्घातं पकतिभावं अविजहन्तेन । सावज्जधम्मसमुप्पत्तिया हि चित्तस्स अनवज्जभावो जहितो होतीति ।

धम्मपदसुत्तवण्णना निट्ठिता ।

१०. परिब्बाजकसुत्तवण्णना

३०. दसमे **अभिज्जाताति** एदिसो च एदिसो चाति अभिलक्खणवसेन जाता । तेनाह “**जाता पाकटा**”ति । **पटिसल्लाना वुट्ठितोति** एत्थ **पटिसल्लानन्ति** तेहि तेहि सद्धिविहारिकअन्तेवासिकउपासकादिसत्तेहि चेव रूपारम्मणादिसङ्खारेहि च पटिनिवत्तित्वा अपसक्कित्वा सल्लीनं निलीयनं, एकीभावो पविवेकोति वुत्तं होति । यो ततो वुट्ठितो, सो पटिसल्लाना वुट्ठितो नाम होति । भगवा पन यस्मा पटिसल्लाना उत्तमतो फलसमापत्तितो वुट्ठासि, तस्मा वुत्तं “**पटिसल्लाना वुट्ठितोति फलसमापत्तितो वुट्ठितो**”ति । **वत्थुकामेसूति** रूपादीसु किलेसकामस्स वत्थुभूतेसु कामेसु । **बहलरागन्ति** थिरमूलदुम्मोचनीयताहि अज्झोसानेन बहलभूतं किलेसकामं । **सकारणाति** येहि कारणेहि परेसं वादे दोसं दस्सेन्ति, तेहि कारणेहि सकारणा । न हि लक्खणयुत्तेन हेतुना विना परवादेसु दोसं दस्सेतुं सक्का ।

एवमादीति एत्थ **आदिसद्देन** “नत्थि हेतु नत्थि पच्चयो सत्तानं संकिलेसाया”ति (दी० नि० १.१६८) एवमादिं सङ्गण्हाति, तस्मा **एवमादिवादिनो** एवं हेतुप्पटिकखेपवादिनोति अत्थो । एत्थ च नत्थिकदिट्ठि विपाकं पटिबाहति, अकिरियदिट्ठि कम्मं पटिबाहति, अहेतुकदिट्ठि उभयं पटिबाहति । तत्थ कम्मं पटिबाहन्तेन विपाको पटिबाहितो होति, विपाकं पटिबाहन्तेनपि कम्मं पटिबाहितं । इति सब्बेपेते अत्थतो उभयपटिबाहका अहेतुवादा चेव अकिरियवादा च नत्थिकवादा च होन्ति ।

ओक्कन्तनियमाति ओगाळ्हमिच्छत्तनियमा । **सज्झायतीति** तं दिट्ठिदीपकं गन्थं उगहेत्वा पठति । **वीमंसतीति** तस्स अत्थं विचारेति । **तस्साति** आदि वीमंसनाकारदस्सनं । **तस्मिं आरम्मणेति** यथापरिकप्पितहेतुपच्चयाभावादिके नत्थि हेतूति आदिनयप्पवत्ताय लद्धिया आरम्मणे । **मिच्छासति सन्तिट्ठतीति** “नत्थि हेतू”ति आदिवसेन अनुस्सवूपलद्धे अत्थे तदाकारपरिवितक्कनेहि सविग्गहे विय सरूपतो चित्तस्स पच्चुपट्ठिते चिरकालपरिचयेन एवमेतन्ति निज्झानक्खमभावूपगमनेन निज्झानक्खन्तिया तथागहिते पुनप्पुनं तथेव आसेवन्तस्स बहुलीकरोन्तस्स मिच्छावितक्केन समानीयमाना मिच्छावायामोपत्थम्भिता अतंसभावं तंसभावन्ति गणहन्ती मिच्छासतीति लद्धनामा तंलद्धिसहगता तण्हा सन्तिट्ठति । **चित्तं एकगं होतीति** यथावुत्तवितक्कादिपच्चयलाभेन तस्मिं आरम्मणे अवट्ठितताय अनेकगगतं पहाय चित्तं एकगं अप्पितं विय होति मिच्छासमाधिना । सोपि हि पच्चयविसेसेन लद्धभावनाबलो कदाचि समाधानपटिरूपकिच्चकरो होतियेव पहरणविज्झनादीसु वियाति दट्ठब्बं ।

जवनानि जवन्तीति अनेकक्खत्तुं तेनाकारेन पुब्बभागियेसु जवनवारेसु पवत्तेसु सब्बपच्छिमे जवनवारे सत्त जवनानि जवन्ति । **पठमजवने सतेकिच्छो होति, तथा दुतियादीसूति** धम्मसभावदस्सनमेतं, न पन तस्मिं खणे तेसं

सतेकिच्छभावापादनं केनचि सक्का कातुं। तत्थाति तेसु तीसु मिच्छादस्सनेसु। कोचि एकं दस्सनं ओक्कमतीति यस्स एकस्मिंयेव अभिनिवेसो आसेवना पवत्ता, सो एकंयेव दस्सनं ओक्कमति। यस्स द्वीसु तीसुपि वा अभिनिवेसो आसेवना पवत्ता, सो द्वे तीणि ओक्कमति। एतेन या पुब्बे उभयपटिबाहिकतामुखेन पवत्ता अत्थसिद्धा सब्बदिट्ठिका, सा पुब्बभागिया, मिच्छानियामोक्कन्तिया पन यथासकं पच्चयसमुदागमदिट्ठितो भिन्नारम्मणानं विय विसेसाधिगमानं एकज्झं अनुप्पत्तिया अभिक्किण्णा एवाति दस्सेति। एकस्मिं ओक्कन्तेपि द्वीसु तीसु ओक्कन्तेसुपि नियतमिच्छादिट्ठिकोव होतीति इमिना तिस्सन्नम्पि दिट्ठिनं समानफलतं समानबलञ्च दस्सेति। तस्मा तिस्सोपि चेतना एकस्स उप्पन्ना अज्जमज्जं अनुबलप्पदायिका होन्ति।

किं पनेस एतस्मिञ्जेव अत्तभावे नियतो, उदाहु अज्जस्मिम्पीति? एतस्मिञ्जेव नियतो। अकुसलज्हि नामेतं अबलं, न कुसलं विय महाबलं। अज्जथा सम्मत्तनियामो विय अच्चन्तिको सिया, आसेवनवसेन पन भवन्तरेपि तं तं दिट्ठिं रोचेतियेव। तेनेवाह “वट्टखाणुको नामेस सत्तो”ति। तस्मा “सकिं निमुग्गो निमुग्गो एव बालो”ति विय वट्टखाणुजोतना, यादिसेहि पन पच्चयेहि अयं तं दस्सनं ओक्कन्तो पुन कदाचि मिच्छतनियामो तप्पटिक्खेपपच्चये पटिच्च ततो सीसुक्खेपनमस्स न होतीति न वत्तब्बं। तेन वुत्तं “येभुय्येना”ति। एदिसाति “बुद्धानम्पि अतेकिच्छा”तिआदिना वुत्तसदिसा।

अत्तनो निन्दाभयेनाति “सम्मा दिट्ठिञ्च नाम ते गरहन्ती”तिआदिना अत्तनो उपरि परेहि वत्तब्बनिन्दाभयेन। घट्टनभयेनाति तथा परेसं अपसादनभयेन। सहधम्ममेन परेन अत्तनो उपरि कातब्बनिग्गहो उपारम्भो, ततो परित्तासो उपारम्भभयं। तं पन अत्थतो उपवादभयं होतीति आह “उपवादभयेना”ति। पटिप्पस्सद्विवसेन अभिज्झा विनयति एतेनाति अभिज्झाविनयो, अरहत्तफलं। तेनाह “अभिज्झाविनयो वुच्चति अरहत्त”न्ति।

परिब्बाजकसुत्तवण्णना निट्ठिता।

उरुवेलवग्गवण्णना निट्ठिता।

४. चक्कवग्गो

१. चक्कसुत्तवण्णना

३१. चतुत्थस्स पठमे चत्तारि चक्कानीति एत्थ चक्कं नाम दारुचक्कं, रतनचक्कं, धम्मचक्कं, इरियापथचक्कं, सम्पत्तिचक्कन्ति पज्जविधं। तत्थ “यं पनिदं, सम्म, रथकारचक्कं छहि मासेहि निट्ठितं छारत्तूनेही”ति (अ० नि० ३.१५) इदं दारुचक्कं। “पितरा पवत्तितं चक्कं अनुवत्तेती”ति (सं० नि० १.२१५) इदं रतनचक्कं। “मया पवत्तितं चक्क”न्ति (सु० नि० ५६२; बु० वं० २७.१७; जा० १.१.१०४; १.५.१००, १०३) इदं धम्मचक्कं। “चतुचक्कं नवद्वार”न्ति (सं० नि० १.२९, १०९) इदं इरियापथचक्कं। “चत्तारिमानि, भिक्खवे, चक्कानि येहि समन्नागतानं देवमनुस्सानं चतुचक्कं पवत्तती”ति (अ० नि० ४.३१) इदं सम्पत्तिचक्कं। इधापि एतदेव अधिप्पेतन्ति आह “चत्तारि सम्पत्तिचक्कानि वत्तन्ती”ति। अनुच्छविके देसेति पुज्जकिरियाय सम्मापटिपत्तिया अनुरूपदेसे। सेवनं कालेन कालं उपसङ्कमनं। भजनं भक्तिवसेन पयिरुपासनं। अत्तनो सम्मा ठपनन्ति अत्तनो चित्तसन्तानस्स योनिसो ठपनं। सद्धादीसु निवेसनन्ति आह “सचे”तिआदि। इदमेव चेत्थ पमाणन्ति इदमेव पुब्बेकतपुज्जतासङ्घातं सम्पत्तिचक्कं एव एतेसु सम्पत्तिचक्केसु पमाणभूतं इतरेसं कारणभावतो।

तेनाह “येन ही”तिआदि । सो एव च कतपुज्जो पुगलो अत्तानं सम्मा ठपेति अकतपुज्जस्स तदभावतो ।

चक्कसुत्तवण्णना निट्ठिता ।

२. सङ्गहसुत्तवण्णना

३२. दुतिये तस्स दानमेव दातब्बन्ति पब्बजितस्स पब्बजितपरिक्खारं पत्तचीवरादि, गिहिनो गिहिपरिक्खारं वत्थावुधयानसयनादि दातब्बं । सब्बन्ति सब्बं उपकारं । मक्खेत्वा नासेति मक्खिभावे ठत्वा । तेलेन विय मक्खेतीति सतधोततेलेन मक्खेति विय । अत्थवड्डनकथाति हितावहकथा । कथागहणज्चेत्थ निदस्सनमत्तं, परेसं हितावहो कायप्पयोगोपि अत्थचरिया । अट्टकथायं पन वचिप्पयोगवसेनेव अत्थचरिया वुत्ता । समानत्तताति सदिसभावो, समानट्टाने ठपनं, तं पनस्स समानट्टपनं अत्तसदिसताकरणमुखेन एकसम्भोगता । अत्तनो सुखुप्पत्तियं तस्स च दुक्खुप्पत्तियं तेन दुक्खेन अत्तना एकसम्भोगताति आह “समानसुखदुक्खभावो”ति । सा च समानसुखदुक्खता एकतो निसज्जादिना पाकटा होतीति दस्सेन्तो “एकासने”तिआदिमाह ।

तत्थ जातिया हीनो भोगेन अधिको दुस्सङ्गहो होति । न हि सक्का तेन सद्धिं एकपरिभोगो कातुं जातिया हीनत्ता । तस्स तथा अकरियमाने च सो कुज्झति भोगेन अधिकत्ता, तस्मा सो दुस्सङ्गहो । भोगेन हीनो जातिया अधिकोपि दुस्सङ्गहो होति । सो हि “अहं जातिमा”ति भोगसम्पन्नेन सद्धिं एकपरिभोगं इच्छति, तस्मिं अकरियमाने कुज्झति । उभोहिपि हीनो सुसङ्गहो होति । न हि सो इतरेन सद्धिं एकपरिभोगं इच्छति जातिया हीनभावतो, न अकरियमानो कुज्झति भोगेन हीनभावतो । उभोहि सदिसोपि सुसङ्गहोयेव । सदिसभावेनेव इतरेन सह एकपरिभोगस्स पच्चासीसाय, अकरणे च तस्स कुज्झनस्स अभावतो । भिक्खु दुस्सीलो दुस्सङ्गहो होति । न हि सक्का तेन सद्धिं एकपरिभोगं कातुं, अकरियमाने च कुज्झति । सीलवा पन सुसङ्गहो होति । सीलवा हि अदीयमानेपि किस्मिञ्च आमिसे अकरियमानेपि सङ्गहे न कुज्झति, अज्जं अत्तना सद्धिं परिभोगं अकरोन्तम्पि न पापकेन चित्तेन पस्सति पेसलभावतो । ततो एव परिभोगोपि अनेन सद्धिं सुकरो होति, तस्मा गिहि चे, उभोहि सदिसो । पब्बजितो चे, सीलवा पुगलो । एवं समानत्तताय सङ्गहेतब्बो । तेनेवाह “सो सचे गहट्टस्स जातिया पब्बजितस्स सीलेन सदिसो होति, तस्सायं समानत्तता कातब्बा”ति । सेसं सुविज्जेय्यमेव ।

सङ्गहसुत्तवण्णना निट्ठिता ।

३. सीहसुत्तवण्णना

३३. ततिये सीहोति परिस्सयसहनतो पटिपक्खहननतो च “सीहो”ति लद्धनामो मिगाधिपति । चत्तारोति समानेपि सीहजातिभावे वण्णविसेसादिसिद्धेन विसेसेन चत्तारो सीहा । ते इदानी नामतो वण्णतो आहारतो दस्सेत्वा इधाधिप्पेतसीहं नानप्पकारतो विभावेतुं “तिणसीहो”तिआदि आरब्धं । तिणभक्खो सीहो तिणसीहो पुरिमपदे उत्तरपदलोपेन यथा “साकपत्थिवो”ति (पाणिनि २.१.६०) । काळवण्णताय काळसीहो । तथा पण्डुसीहो । तेनाह “काळगाविसदिसो, पण्डुपलासवण्णगाविसदिसो”ति च । रत्तकम्बलस्स विय केसरो केसरकलोमो एतस्स अत्थीति केसरी । लाखापरिकम्मकतेहि विय पादपरियन्तेहीति च योजना ।

कम्मानुभावसिद्धाधिपच्चमहेसक्खताहि सब्बमिगगणस्स राजा । सुवण्णगुहतो वातिआदि “सीहस्स विहारो किरिया एवं होती”ति कत्वा वुत्तं ।

समं पतिट्ठपेत्वाति सब्बभागेहि सममेव भूमियं पतिट्ठपेत्वा । आकट्ठित्वाति पुरतो आकट्ठित्वा । अभिहरित्वाति अभिमुखं हरित्वा । सङ्घातन्ति विनासं । वीसतियट्ठिकं ठानं उसभं ।

समसीहोति समजातिको समप्पभावो च सीहो । समानोस्मीति देसनामत्तं, समप्पभावताय एव न भायति । सक्कायदिट्ठिबलवतायाति “के अज्जे अम्हेहि उत्तरितरा, अथ खो मयमेव महाबला”ति एवं बलातिमाननिमित्ताय अहंकारहेतुभूताय सक्कायदिट्ठिया बलवभावेन । सक्कायदिट्ठिया पहीनत्ताति निरहंकारत्ता अत्तसिनेहस्स सुट्ठु समुग्घातत्ता न भायति ।

तथा तथाति सीहसदिसतादिना तेन तेन पकारेन अत्तानं कथेसीति वत्वा तमत्थं विवरित्वा दस्सेतुं “सीहोति खो”तिआदि वुत्तं ।

कतमहाभिनीहारस्स लोकनाथस्स बोधिया नियतभावप्पत्तिया एकन्तभावी बुद्धभावोति कत्वा “तीसु पासादेसु निवासकालो, मगधरज्जो पटिज्जादानकालो, पायासस्स परिभुत्तकालो”तिआदिना अभिसम्बोधितो पुरिमावत्थापि सीहसदिसा कत्वा दस्सिता । भाविनि भूतूपचारोपि हि लोकवोहारो । विज्जाभावसामज्जतो द्विविज्जं इतरविज्जम्पि एकज्जं गहेत्वा पटिच्चसमुप्पादसम्मसनतो तं पुरेतरसिद्धं विय कत्वा आह “तस्सो विज्जा सोधेत्वा”ति । अनुलोमपटिलोमतो पवत्तजाणस्स वसेन “यमकजाणमन्थनेना”ति वुत्तं ।

तत्थ विहरन्तस्साति अजपालनिग्रोधमूले विहरन्तस्स । एकादसमे दिवसेति सत्तसत्ताहतो परं एकादसमे दिवसे । अचलपल्लङ्केति इसिपतने धम्मचक्कप्पवत्तनत्थं निसिन्नपल्लङ्के । तम्पि हि केनचि अप्पटिवत्तियं धम्मचक्कप्पवत्तनत्थं निसज्जाति कत्वा वजिरासनं विय अचलपल्लङ्कं वुच्चति । इमस्मिञ्च पन पदेति “द्वेमे, भिक्खवे, अन्ता”तिआदिनयप्पवत्ते च इमस्मिं सद्धम्मकोट्टासे । धम्मघोसो...पे०... दससहस्सिलोकधातुं पटिच्छादेसि “सब्बत्थ ठिता सुणन्तू”ति अधिट्ठानेन । सोळसहाकारेहीति दुक्खपरिज्जा, समुदयप्पहानं, निरोधसच्छिकिरिया, मग्गभावनाति एकेकस्मिं मग्गे चत्तारि चत्तारि कत्वा सोळसहि आकारेहि ।

पठमेन नयेन अभिसम्बोधितो पुरिमतरावत्थापि अवस्संभाविताय गहेत्वा सीहसदिसतं दस्सेत्वा इदानी अभिसम्बुद्धावत्थासु एव सीहसदिसतं दस्सेतुं “अपरो नयो”तिआदि आरद्धं । अट्ठहि कारणेहीति “तथा आगतोति तथागतो, तथा गतोति तथागतो, तथलक्खणं आगतोति तथागतो, तथधम्मे याथावतो अभिसम्बुद्धोति तथागतो, तथदस्सिताय तथागतो, तथवादिताय तथागतो, तथाकारिताय तथागतो, अभिभवनट्ठेन तथागतो”ति (दी० नि० अट्ठ० १.७; म० नि० अट्ठ० १.१२; सं० नि० अट्ठ० २.३.७८; अ० नि० अट्ठ० १.१.१७०; उदा० अट्ठ० १८; इतिवु० अट्ठ० ३८; थेरगा० अट्ठ० १.३; बु० वं० अट्ठ० १.२ निदानकथा; महानि० अट्ठ० १४; पटि० म० १.३७) एवं वुत्तेहि अट्ठहि तथागतसाधकेहि कारणेहि । यदिपि भगवा बोधिपल्लङ्के निसिन्नमत्तेव अभिसम्बुद्धो न जातो, तथापि ताय निसज्जाय निसिन्नोव पनुज्ज सब्ब परिस्सयं अभिसम्बुद्धो जातो । तथा हि तं “अपराजितपल्लङ्क”न्ति वुच्चति, तस्मा “याव बोधिपल्लङ्का वा”ति वत्वा तेन अपरितुस्सन्तो “याव अरहत्तमग्गजाणा वा”ति आह ।

इति सक्कायोति एत्थ इतिसद्धो निदस्सनत्थो । तेन सक्कायो सरूपतो परिमाणतो परिच्छेदतो च दस्सितोति आह “अयं सक्कायो”तिआदि । “अयं सक्कायो”ति इमिना पञ्चुपादानकखन्धा सरूपतो दस्सिता । “एत्तको सक्कायो”ति इमिना ते परिमाणतो दस्सिता । तस्स च परिमाणस्स एकन्तिकभावं दस्सेन्तेन “न इतो भिय्यो सक्कायो अत्थी”ति वुत्तं ।

सभावतोति सलक्खणतो । सरसतोति सकिच्चतो । परियन्ततोति परिमाणपरियन्ततो । परिच्छेदतोति यत्तके ठाने तस्स पवत्तितस्स परिच्छिन्दनतो । परिवटुमतोति परियोसानप्पवत्तितो । सब्बेपि पञ्चुपादानक्खन्था दस्सिता होन्ति यथावुत्तेन विभागेन । अयं सक्कायस्स समुदयो नामाति अयं आहारादिसक्कायस्स समुदयो नाम । तेनाह “एत्तावता”तिआदि । अत्थङ्गमोति निरोधो । “आहारसमुदया आहारनिरोधो”ति च असाधारणमेव तं गहेत्वा सेसेसु आदि-सद्देन सङ्गणहाति ।

पण्णासलक्खणपटिमण्डितन्ति पण्णासउदयवयलक्खणविभूसितं समुदयत्थङ्गमगगणतो । खीणासवत्ताति अनवसेसं सावसेसञ्च आसवानं परिकखीणत्ता । अनागामीनम्पि हि भयं चित्तुत्रासञ्च न होतीति । जाणसंवेगो भयतुपट्टानपञ्चा । इतरासं पन देवतानन्ति अखीणासवदेवे सन्धाय वदति । भोति धम्मालपनमत्तन्ति सभावकथनमत्तं ।

चक्कन्ति सत्थु आणाचक्कं । तं पन धम्मतो आगतन्ति धम्मचक्कं । तत्थ अरियसावकानं पटिवेधधम्मतो आगतन्ति धम्मचक्कं । इतरेसं देसनाधम्मतो आगतन्ति धम्मचक्कं । दुविधेपि जाणं पधानन्ति जाणसीसेन वुत्तं “पटिवेधजाणम्पि देसनाजाणम्पी”ति । इदानीं तं जाणं सरूपतो दस्सेतुं “पटिवेधजाणं नामा”तिआदि वुत्तं । यस्मा तस्स जाणस्स पटिविद्धत्ता भगवा तानि सट्ठि नयसहस्सानि वेनेय्यानं दस्सेतुं समत्थो अहोसि, तस्मा तानि सट्ठि नयसहस्सानि तेन जाणेन सद्धियेव सिद्धानीति कत्वा दस्सेन्तो “सट्ठिया च नयसहस्सेहि पटिविज्झी”ति आह । तिपरिवट्टन्ति “इदं दुक्ख”न्ति च “परिज्जेय्य”न्ति च “परिज्जात”न्ति च एवं तिपरिवट्टं, तंयेव द्वादसाकारं । तन्ति देसनाजाणं । एस भगवा । अप्पटिपुग्गलोति पटिनिधिभूतपुग्गलरहितो । एकसदिसस्साति निब्बिकारस्स ।

सीहसुत्तवण्णना निट्ठिता ।

४. अग्गपसादसुत्तवण्णना

३४. चतुत्थे अग्गेसु पसादाति सेट्ठेसु पसादा । अग्गा वा पसादाति सेट्ठभूता पसादा । सेट्ठवचनो हेत्थ अग्गसद्धो । पुरिमस्मिं अत्थविकप्पे अग्गसद्देन बुद्धादिरतनत्तयं वुच्चति । तेसु भगवा ताव असदिसट्ठेन, गुणविसिट्ठेन, असमसमट्ठेन च अग्गो । सो हि महाभिनीहारं दसन्नं पारमीनं पविचयञ्च आदिं कत्वा बोधिसम्भारगुणेहि चेव बुद्धगुणेहि च पयोजनेहि च सेसजनेहि असदिसोति असदिसट्ठेनपि अग्गो । ये चस्स ते गुणा महाकरुणादयो, तेहि सेससत्तानं गुणेहि विसिट्ठेनपि सब्बसत्तुत्तमाय अग्गो । ये पन पुरिमका सम्मासम्बुद्धा सब्बसत्तेहि असमा, तेहि सद्धिं अयमेव रूपकायगुणेहि चेव धम्मकायगुणेहि च समोति असमसमट्ठेनपि अग्गो । तथा दुल्लभपातुभावतो अच्छरियमनुस्सभावतो बहुजनहितसुखावहतो अदुतियअसहायादिभावतो च भगवा लोके अग्गोति वुच्चति । यथाह —

“एकपुग्गलस्स, भिक्खवे, पातुभावो दुल्लभो लोकस्मिं । कतमस्स एकपुग्गलस्स? तथागतस्स अरहतो सम्मासम्बुद्धस्स । एकपुग्गलो, भिक्खवे, लोके उप्पज्जमानो उप्पज्जति अच्छरियमनुस्सो । एकपुग्गलो, भिक्खवे, लोके उप्पज्जमानो उप्पज्जति बहुजन...पे... सम्मासम्बुद्धो । एकपुग्गलो, भिक्खवे, लोके उप्पज्जमानो उप्पज्जति अदुतियो असहायो अप्पटिमो अप्पटिभागो अप्पटिपुग्गलो असमो असमसमो द्विपदानं अग्गो । कतमो एकपुग्गलो? तथागतो अरहं सम्मासम्बुद्धो”ति (अ० नि० १.१७१-१७३) ।

धम्मसङ्गा अज्जधम्मसङ्गेहि असदिसट्ठेन विसिट्ठगुणताय दुल्लभपातुभावादिना च अग्गा । तथा हि तेसं

स्वाक्खाततादिसुप्पटिपन्नतादिगुणविसेसेहि अज्जे धम्मसङ्घसदिसा अप्पतरं निहीना वा नत्थि, कुतो सेट्ठा । सयमेव तेहि विसिद्धगुणताय सेट्ठा । तथा दुल्लभुप्पादअच्छरियभावबहुजनहितसुखावहअदुतियासहायादिसभावा च ते । यदग्गेन हि भगवा दुल्लभपातुभावो, तदग्गेन धम्मसङ्घापीति । **अच्छरियादीसुपि एसेव नयो । एवं अग्गेसु सेट्ठेसु उत्तमेसु पवरेसु गुणविसिद्धेसु पसादाति अग्गप्पसादा ।**

दुतियस्मिं पनत्थे यथावुत्तेसु अग्गेसु बुद्धादीसु उप्पत्तिया अग्गभूता पसादा **अग्गप्पसादा** । ये पन अरियमग्गेन आगता अवेच्चप्पसादा, ते एकन्तेनेव अग्गभूता पसादाति **अग्गप्पसादा** । यथाह — “इध, भिक्खवे, अरियसावको बुद्धे अवेच्चप्पसादेन समन्नागतो होती”तिआदि (सं० नि० ५.१०३७-१०३८) । अग्गविपाकत्तापि चेते **अग्गप्पसादा** । वुत्तम्पि चेत्तं — “अग्गे खो पन पसन्नानं अग्गे विपाको”ति (अ० नि० ४.३४; इतिवु० ९०) ।

अपदा वातिआदीसु **वा-**सद्दो समुच्चयत्थो, न विकप्पत्थो । यथा “अनुप्पन्नो वा कामासवो उप्पज्जति, उप्पन्नो वा कामासवो पवड्ढती”ति (म० नि० १.१७) एत्थ अनुप्पन्नो च उप्पन्नो चाति अत्थो । यथा च “भूतानं वा सत्तानं ठितिया सम्भवेसीनं वा अनुग्गहाया”ति एत्थ भूतानज्ज सम्भवेसीनज्जाति अत्थो । यथा च “अग्गितो वा उदकतो वा मिथुभेदतो वा”ति (दी० नि० २.१५२) एत्थ अग्गितो च उदकतो च मिथुभेदतो चाति अत्थो, एवं “अपदा वा...पे०... अग्गमक्खायती”ति (अ० नि० ४.३४; इतिवु० ९०) एत्थापि अपदा च द्विपदा चाति सम्पिण्डनवसेन अत्थो दट्ठब्बो । तेन वुत्तं “वा-सद्दो समुच्चयत्थो, न विकप्पत्थो”ति ।

रूपिनोति रूपवन्तो । न रूपिनोति **अरूपिनो** । **सज्जिनो**ति सज्जवन्तो । न सज्जिनोति **असज्जिनो** । “अपदा वा”तिआदिसब्बपदेहि कामभवो, रूपभवो, अरूपभवो, एकवोकारभवो, चतुवोकारभवो, पञ्चवोकारभवो, सज्जिभवो, असज्जिभवो, नेवसज्जिनासज्जिभवोति नवविधेपि भवे सत्तेपि अनवसेसतो परियादियित्वा दस्सेति । एत्थ हि रूपिग्गहणेन कामभवो, रूपभवो, पञ्चवोकारभवो, एकवोकारभवो च दस्सितो, अरूपिग्गहणेन अरूपभवो, चतुवोकारभवो च दस्सितो, सज्जिभवादयो पन सरूपेनेव दस्सिता । अपदादिग्गहणेन कामभवपञ्चवोकारभवसज्जिभवानं एकदेसोव दस्सितो ।

कस्मा पनेत्थ यथा अदुतियसुत्ते “द्विपदानं अग्गे”ति द्विपदा एव गहिता, एवं द्विपदग्गहणमेव अकत्वा अपदादिग्गहणं कतन्ति? वुच्चते — अदुतियसुत्ते ताव सेट्ठतरवसेन द्विपदग्गहणमेव कतं । इमस्मिज्ज लोके सेट्ठो नाम उप्पज्जमानो अपदचतुप्पदबहुपदेसु न उप्पज्जति, द्विपदेसुयेव उप्पज्जति । कतरेसु द्विपदेसु? मनुस्सेसु चेव देवेसु च । मनुस्सेसु उप्पज्जमानो सकललोकं वसे वत्तेतुं समत्थो बुद्धो हुत्वा उप्पज्जति, देवेसु उप्पज्जमानो दससहस्सिलोकधातुं वसे वत्तनको महाब्रह्मा हुत्वा उप्पज्जति, सो तस्स कप्पियकारको वा आरामिको वा सम्पज्जति । इति ततोपि सेट्ठतरवसेनेस द्विपदानं अग्गेति तत्थ वुत्तं । इध पन अनवसेसपरियादानवसेन एवं वुत्तं “यावता, भिक्खवे, सत्ता अपदा वा...पे०... नेवसज्जिनासज्जिनो वा, तथागतो तेसं अग्गमक्खायती”ति । निब्धारणे चेत्तं सामिवचनं । **म-**कारो पदसन्धिकरो, अग्गे अक्खायतीति पदविभागो । तेनेवाह “**गुणेहि अग्गे**”तिआदि ।

अग्गे विपाको होतीति अग्गे सम्मासम्बुद्धे पसन्नानं यो पसादो अग्गे सेट्ठो उत्तमकोटिभूतो वा, तस्मा तस्स विपाकोपि अग्गे सेट्ठो उत्तमकोटिभूतो उल्लारतमो पणीततमो होति । सो पन पसादो दुविधो लोकियलोकुत्तरभेदतो । तेसु लोकियस्स ताव —

“ये केचि बुद्धं सरणं गतासे,
न ते गमिस्सन्ति अपायभूमिं ।
पहाय मानुसं देहं,
देवकायं परिपूरेस्सन्ति ॥ (दी० नि० २.३३२; इतिवु० अट्ठ० ९०; सं० नि० १.३७) ।

“बुद्धोति कित्तयन्तस्स, काये भवति या पीति ।
वरमेव हि सा पीति, कसिणेनपि जम्बुदीपस्स ॥ (दी० नि० अट्ठ० १.६; इतिवु० अट्ठ० ९०) ।

“सतं हत्थी सतं अस्सा, सतं अस्सतरीरथा ।
सतं कज्जासहस्सानि, आमुक्कमणिकुण्डला ।
एकस्स पदवीतिहारस्स, कलं नाग्घन्ति सोळसिं” ॥ (चूळव० ३०५) ।

“साधु खो, देवानमिन्द, बुद्धं सरणगमनं होति, बुद्धं सरणगमनहेतु खो, देवानमिन्द, एवमिधेकच्चे सत्ता कायस्स भेदा परं मरणा सुगतिं सगं लोकं उपपज्जन्ति । ते अज्जे देवे दसहि ठानेहि अधिगगणन्ति दिब्बेन आयुना, दिब्बेन वण्णेन, दिब्बेन सुखेन, दिब्बेन यसेन, दिब्बेन आधिपतेय्येन, दिब्बेहि रूपेहि, दिब्बेहि सद्देहि, दिब्बेहि गन्धेहि, दिब्बेहि रसेहि, दिब्बेहि फोड्डब्बेही”ति (सं० नि० ४.३४१) —

एवमादीनं सुत्तपदानं वसेन पसादफलविसेसयोगो वेदितब्बो, तस्मा सो अपायदुक्खविनिवत्तनेन सद्धिं सम्पत्तिभवेसु सुखविसेसदायकोव दट्ठब्बो ।

लोकोत्तरो पन सामञ्जफलविपाकदायको वट्टदुक्खविनिवत्तको । सब्बोपि चायं पसादो परम्पराय वट्टदुक्खं विनिवत्तेतियेव । वुत्तज्हेतं —

“यस्मिं समये, भिक्खवे, अरियसावको अत्तनो सद्धं अनुस्सरति, नेवस्स तस्मिं समये रागपरियुट्ठितं चित्तं होति, न दोसपरियुट्ठितं... पे०... न मोहपरियुट्ठितं चित्तं होति, उजुगतमेवस्स तस्मिं समये चित्तं होति, उजुगतचित्तस्स पामोज्जं जायति, पमुदितस्स पीति जायति... पे०... नापरं इत्थत्तायाति पजानाती”ति ।

धम्माति सभावधम्मा । सङ्गताति समेच्च सम्भूय पच्चयेहि कताति सङ्गता, सपच्चया धम्मा । हेतूहि पच्चयेहि च न केहिचि कता सङ्गताति असङ्गता, अपच्चयो निब्बानं । सङ्गतानं परियोसितभावेन “असङ्गता”ति पुथुवचनं । विरागो तेसं अगमक्खायतीति तेसं सङ्गतासङ्गतधम्मानं यो विरागसङ्गातो असङ्गतधम्मो, सो सभावेनेव सण्हसुखुमभावतो सन्ततरपणीततरभावतो गम्भीरादिभावतो मदनिम्मदनादिभावतो अगं सेट्ठं उत्तमं पवरन्ति वुच्चति । यदिदन्ति निपातो, यो अयन्ति अत्थो । मदनिम्मदनोतिआदीनि सब्बानि निब्बानवेवचनानि । तेनेवाह “विरागोतिआदीनि निब्बानस्सेव नामानी”ति । रागमदादयोति आदि-सद्देन मानमदपुरिसमदादिके सङ्गण्हाति । सब्बा पिपासाति कामपिपासादिका सब्बा पिपासा । सब्बे आलया समुघातं गच्छन्तीति कामालयादिका सब्बेपि आलया समुघातं यन्ति । वट्टानीति कम्मवट्टविपाकवट्टानि । तण्हाति अट्टसतप्पभेदा सब्बापि तण्हा ।

अगो विपाको होतीति एत्थापि —

“ये केचि धम्मं सरणं गतासे...पे०...” ॥ (दी० नि० २.३३२; सं० नि० १.३७) ।

“धम्मोति कित्तयन्तस्स, काये भवति या पीति...पे०...” ॥ (दी० नि० अट्ठ० १.६; इतिवु० अट्ठ० ९०) ।

“साधु खो, देवानमिन्द, धम्मं सरणगमनं होति, धम्मं सरणगमनहेतु खो, देवानमिन्द, एवमिधेकच्चे...पे०... दिब्बेहि फोड्ढेही”ति (सं० नि० ४.३४१) —

एवमादीनं सुत्तपदानं वसेन धम्मे पसादस्स फलविसेसयोगो वेदितब्बो ।

सङ्घा वा गणा वाति जनसमूहसङ्घाता यावता लोके सङ्घा वा गणा वा । **तथागतसावकसङ्घो**ति अट्ठअरियपुग्गलसमूहसङ्घातो दिट्ठि सीलसामञ्जेन संहतो तथागतस्स सावकसङ्घो । **अग्गमक्खायतीति** अत्तनो सीलसमाधिपञ्जाविमुत्तिआदिगुणविसेसेन तेसं सङ्घानं अग्गो सेट्ठो उत्तमो पवरोति वुच्चति । **यदिदन्ति** यानि इमानि । **चत्तारि पुरिसयुगानि** युगळवसेन, पठममग्गट्ठो पठमफलट्ठोति इदमेकं युगळं, याव चतुत्थमग्गट्ठो चतुत्थफलट्ठोति इदमेकं युगळन्ति एवं चत्तारि पुरिसयुगानि । **अट्ठ पुरिसपुग्गला**ति पुरिसपुग्गलवसेन एको पठममग्गट्ठो, एको पठमफलट्ठोति इमिना नयेन अट्ठ पुरिसपुग्गला । एत्थ च पुरिसोति वा पुग्गलोति वा एकत्थानि एतानि पदानि, वेनेय्यवसेन पनेवं वुत्तं । **एस भगवतो सावकसङ्घो**ति यानिमानि युगळवसेन चत्तारि युगानि पाटियेक्कतो अट्ठ पुरिसपुग्गला, एस भगवतो सावकसङ्घो । **आहुनेय्यो**ति आदीनि वुत्तत्थानेव । इधापि —

“ये केचि सङ्घं सरणं गतासे...पे०...” ॥ (दी० नि० २.३३२; सं० नि० १.३७) ।

“सङ्घोति कित्तयन्तस्स, काये भवति या पीति...पे०...” ॥ (दी० नि० अट्ठ० १.६; इतिवु० अट्ठ० ९०) ।

“साधु खो, देवानमिन्द, सङ्घं सरणगमनं होति, सङ्घं सरणगमनहेतु खो, देवानमिन्द...पे०... दिब्बेहि फोड्ढेही”ति (सं० नि० ४.३४१) —

आदीनं सुत्तपदानं वसेन सङ्घे पसादस्स फलविसेसयोगो तस्स अग्गविपाकता च वेदितब्बा । तथा अनुत्तरियपटिलाभो सत्तमभवादितो पट्टाय वट्ठदुक्खसमुच्छेदो अनुत्तरसुखाधिगमोति एवमादिउल्लारफलनिष्पादनवसेन अग्गविपाकता वेदितब्बा ।

गाथासु **अग्गतो**ति अग्गे रतनत्तये, अग्गभावतो वा पसन्नानं । **अग्गं धम्मन्ति** अग्गसभावं बुद्धसुबोधिं धम्मसुधम्मन्तं सङ्घसुष्पटिपत्तिं, रतनत्तयस्स अनञ्जसाधारणं उत्तमसभावं, दसबलादिस्वाक्खाततादिसुष्पटिपन्नतादिगुणसभावं वा । **विजानन्ति** विजानन्तानं । एवं साधारणतो अग्गप्पसादवत्थुं दस्सेत्वा इदानी असाधारणतो तं विभागेन दस्सेतुं “**अग्गे बुद्धे**”ति आदि वुत्तं । तत्थ **पसन्नानन्ति** अवेच्चप्पसादेन च इतरप्पसादेन च पसन्नानं अधिमुत्तानं । **विरागूपसमे**ति विरागे उपसमे च, सब्बस्स रागस्स सब्बेसं किलेसानं अच्चन्तविरागहेतुभूते अच्चन्तउपसमहेतुभूते चाति अत्थो । **सुखे**ति वट्ठदुक्खक्खयभावेन सङ्घारूपसमसुखभावेन सुखे ।

अग्गस्मिं दानं ददन्ति अग्गे रतनत्तये दानं ददन्तानं देय्यधम्मं परिच्चजन्तानं । तत्थ धरमानं भगवन्तं चतूहि पच्चयेहि उपट्ठहन्ता पूजेन्ता सक्करोन्ता, परिनिब्बुतं भगवन्तं उद्दिस्स धातुचेतियादिके उपट्ठहन्ता पूजेन्ता सक्करोन्ता बुद्धे

दानं ददन्ति नाम । “धम्मं पूजेस्सामा”ति धम्मधरे पुग्गले चतूहि पच्चयेहि उपट्ठहन्ता पूजेन्ता सक्करोन्ता धम्मञ्च चिरट्ठितिकं करोन्ता धम्मे दानं ददन्ति नाम । तथा अरियसङ्घं चतूहि पच्चयेहि उपट्ठहन्ता पूजेन्ता सक्करोन्ता तं उद्दिस्स इतरस्मिम्पि तथा पटिपज्जन्ता सङ्घे दानं ददन्ति नाम । **अग्गं पुज्जं पवड्ढतीति** एवं रतनत्तये पसन्नेन चेतसा उळारं परिच्चागं उळारञ्च पूजासक्कारं पवत्तेन्तानं दिवसे दिवसे अग्गं उळारं कुसलं उपचीयति । इदानी तस्स पुज्जस्स अग्गविपाकताय अग्गभावं दस्सेतुं “**अग्गं आयू**”तिआदि वुत्तं । तत्थ **आयू**ति दिब्बं वा मानुसं वा अग्गं उळारं परमं आयु **पवड्ढति** उपरूपरि ब्रूहि । **वण्णो**ति रूपसम्पदा । **यसो**ति परिवारसम्पदा । **किन्ती**ति थुतिघोसो । **सुखन्ति** कायिकं चेतसिकञ्च सुखं । **बलन्ति** कायबलञ्चेव जाणबलञ्च ।

अग्गस्स रतनत्तयस्स दानं **दाता** । अथ वा **अग्गस्स** देय्यधम्मस्स दानं उळारं कत्वा तत्थ पुज्जं पवत्तेता । **अग्गधम्मसमाहितो**ति अग्गेन पसादधम्मेन दानादिधम्मेन च संहितो समन्नागतो अचलप्पसादयुत्तो, तस्स वा विपाकभूतेहि बहुजनस्स पियमनापतादिधम्मेहि युत्तो । **अग्गप्पत्तो पमोदतीति** यत्थ यत्थ सत्तनिकाये उप्पन्नो, तत्थ तत्थ अग्गभावं सेट्ठभावं अधिगतो, अग्गभावं वा लोकुत्तरमग्गफलं अधिगतो पमोदति अभिरमति परितुस्सतीति ।

अग्गपसादसुत्तवण्णना निड्ढिता ।

५. वस्सकारसुत्तवण्णना

३५. पज्जमे **अरिये जायेति** संकिलेसतो आरकत्ता अरिये निदोसे परिसुद्धे निय्यानिकधम्मभावतो जाये कारणेति अत्थो । जायति निच्छयेन कमति निब्बानं, तं वा जायति पटिविज्झीयति एतेनाती जायो, अरियमग्गो । सो एव च सम्पापकहेतुभावतो कारणन्ति वुच्चति । इध पन सह विपस्सनाय अरियमग्गो अधिप्पेतोति आह “**सहविपस्सनके मग्गे**”ति । गाथासु “**जायं धम्म**”न्ति एत्थापि एसेव नयो ।

वस्सकारसुत्तवण्णना निड्ढिता ।

६. दोणसुत्तवण्णना

३६. छट्ठे **उक्काहि धारियमानाहीति** दीपिकाहि धारियमानाहि, दण्डदीपिकासु जालेत्वा धारियमानासु मापितत्ताति वुत्तं होति । तज्झि नगरं “मङ्गलदिवसे सुखणे सुनक्खत्तं मा अतिक्कमी”ति रत्तिम्पि उक्कासु धारियमानासु मापितं । उक्कासु ठाति **उक्कट्टा**, उक्कासु विज्जोतयन्तीसु ठिता पतिट्ठिताति मूलविभूजादिपक्खेपेन (पाणिनि ३.२.५) सदसिद्धि वेदितब्बा । निरुत्तिनयेन वा उक्कासु ठितासु ठिता आसीति **उक्कट्टा** । अपरे पन भणन्ति “भूमिभागसम्पत्तिया मनुस्ससम्पत्तिया उपकरणसम्पत्तिया च सा नगरी उक्कट्टगुणयोगतो **उक्कट्टा**ति नामं लभती”ति । **सेतव्यन्ति** तस्स नगरस्स नामं । तं पन कस्सपदसबलस्स जातनगरन्ति आह “**अतीते कस्सपसम्मासम्बुद्धस्स जातनगर**”न्ति ।

विज्जन्तरिकायाति विज्जुनिच्छरणक्खणे । **अन्तरतो**ति हृदये । **अन्तराति** आरम्भनिब्बत्तीनं वेमज्झे । **अन्तरिकायाति** अन्तराळे । एत्थ च “तदन्तरं को जानेय्य (अ० नि० ६.४४; १०.७५), एतेसं अन्तरा कप्पा गणनतो असङ्ख्येय्या (बु० वं० २८.३), अन्तरन्तरा कथं ओपपातेती”ति (म० नि० २.४२६) च आदीसु विय कारणवेमज्झेसु वत्तमाना अन्तरासद्वा एव उदाहरितब्बा सियुं, न पन चित्तक्खणविवरेसु वत्तमाना अन्तरअन्तरिकसद्वा । अन्तरासद्दस्स हि अयमत्थुद्धारोति ।

अयं पनेत्थ अधिप्पायो सिया — येसु अन्तरासद्दो वत्तति, तेसु अन्तरासद्दोपि वत्ततीति समानत्थत्ता अन्तरासद्दत्थे वत्तमानो अन्तरासद्दो उदाहटो । अन्तरासद्दो एव वा “यस्सन्तरतो”ति एत्थ गाथासुखत्थं रस्सं कत्वा वुत्तोति दट्ठब्बं । अन्तरासद्दो एव पन इकसद्देन पदं वट्ठेत्वा “अन्तरिका”ति वुत्तोति एवमेत्थ उदाहरणोदाहरितब्बानं विरोधाभावो दट्ठब्बो । अयोजियमाने उपयोगवचनं न पापुणाति सामिवचनस्स पसङ्गे अन्तरासद्दयोगेन उपयोगवचनस्स इच्छितत्ता । तेनेवाह “अन्तरासद्देन पन युत्तत्ता उपयोगवचनं कत”न्ति ।

सकलजम्बुदीपे उप्पन्नं महाकलहं वूपसमेत्वाति परिनिब्बुते भगवति धातूनं अत्थाय कुसिनारनगरं परिवारेत्वा ठितेहि सेसराजूहि “अम्हाकं धातुयो वा देन्तु युद्धं वा”तिआदिना कोसिनारकेहि मल्लेहि सद्धिं कतं विवादं वूपसमेत्वा । सो किर ब्राह्मणो तेसं विवादं सुत्वा “एते राजानो भगवतो परिनिब्बुतद्धाने विवादं करोन्ति, न खो पनेतं पतिरूपं, अलं इमिना कलहेन, वूपसमेस्सामि न”न्ति गन्त्वा उन्नते पदेसे ठत्वा द्वेभाणवारपरिमाणं दोणगज्जितं नाम अवोच । तत्थ पठमभाणवारे ताव एकपदम्पि ते न जानिंसु । दुतियभाणवारपरियोसाने च “आचरियस्स विय भो सद्दो, आचरियस्स विय भो सद्दो”ति सब्बे निरवा अहेसुं । जम्बुदीपतले किर कुलधरे जातो येभुय्येन तस्स न-अन्तेवासिको नाम नत्थि, अथ खो सो अत्तनो वचनं सुत्वा निरवे तुण्हीभूते विदित्वा पुन —

“सुणन्तु भोन्तो मम एकवाचं,
अम्हाक बुद्धो अहु खन्तिवादो ।
न हि साधुयं उत्तमपुग्गलस्स,
सरीरभागे सिया सम्पहारो ॥

“सब्बेव भोन्तो सहिता समग्गा,
सम्मोदमाना करोमट्ठभागे ।
वित्थारिका होन्तु दिसासु थूपा,
बहू जना चक्खुमतो पसन्ना”ति ॥ (दी० नि० २.२३७) —

इमं गाथाद्वयं वत्वा तं कलहं वूपसमेत्वा धातुयो अट्ठधा भाजेत्वा अदासि, तं सन्धायेतं वुत्तं “सकलजम्बुदीपे उप्पन्नं महाकलहं वूपसमेत्वा धातुयो भाजेस्सती”ति । लक्खणचक्कानीति द्वीसु पादतलेसु द्वे लक्खणचक्कानि ।

आसवेनाति कम्मकिलेसकारणेन आसवेन । एत्थ हि तेभूमकञ्च कम्मं, अवसेसा च अकुसला धम्मा “आसवा”ति वुत्ता । देवूपपत्तीति देवेसु उप्पत्ति निब्बत्ति । एत्थ च यक्खगन्धब्बताय विनिमुत्ता सब्बे देवा देवगहणेन गहिता । गन्धब्बो वा विहङ्गमो आकासचारी । अहन्ति विभत्तिविपरिणामेन योजेतब्बं ।

दोणसुत्तवण्णना निट्ठिता ।

७. अपरिहानियसुत्तवण्णना

३७. सत्तमे निब्बानसन्तिकेयेव चरतीति किलेसनिब्बानस्स अनुपादापरिनिब्बानस्स च सन्तिकेयेव चरति “न चिरस्सेव अधिगमिस्सती”ति कत्वा । गाथाय अप्पमादरतोति समथविपस्सनाय अप्पमज्जने रतो अभिरतो, अप्पमादेनेव रत्तिन्दिवं वीतिनामेन्तोति अत्थो । पमादं भयतो पस्सन्तोति निरयूपपत्तिआदिभयहेतुतो पमादं भयतो पस्सन्तो । अभब्बो

परिहानायाति सो एवरूपो समथविपस्सनाधम्मोहि मग्गफलेहि वा परिहानाय अभब्बो । समथविपस्सनातो हि सम्पत्ततो न परिहायति, इतरानि च अप्पत्तानि पापुणातीति ।

अपरिहानियसुत्तवण्णना निट्ठिता ।

८. पतिलीनसुत्तवण्णना

३८. अट्टमे अन्तवा लोकोति एकपस्सेन वट्ठितं कसिणनिमित्तं “लोको”ति गाहेन वा तक्केन वा उप्पन्नदिट्ठि । लाभी हि ज्ञानचक्खुना पस्सित्वा गण्हाति, इतरो तक्कमत्तेन । अनन्तवाति समन्ततो वट्ठितं अप्पमाणं कसिणनिमित्तं “लोको”ति गाहेन वा तक्केन वा उप्पन्नदिट्ठि । तं जीवं तं सरीरन्ति जीवो सरीरञ्च एकमेव वत्थूति उप्पन्नदिट्ठि । विस्सट्ठानीति सकपरिच्चजनवसेन निस्सट्ठानि । वन्तानीति इदं पुन अनादियनभावदस्सनवसेन वुत्तं । चत्तम्पि हि केचि गण्हन्ति, नयिदमेवन्ति दस्सनत्थं “वन्तानी”ति वुत्तं । न हि यं येन वन्तं, न सो तं पुन आदीयति । वन्तम्पि किञ्चि ससन्ततिलगं सिया, नयिदमेवन्ति दस्सनत्थं “मुत्तानी”ति वुत्तं । तेनेवाह “छिन्नबन्धनानि कतानी”ति, सन्ततितो विनिमोचनवसेन छिन्नबन्धनानि कतानीति अत्थो । मुत्तम्पि किञ्चि मुत्तबन्धनं विय फलं कुहिञ्चि तिट्ठति, न एवमिदन्ति दस्सनत्थं “पहीनानी”ति वुत्तं । यथा किञ्चि दुन्निस्सट्ठं पुन आदाय सम्मदेव निस्सट्ठं “पटिनिस्सट्ठ”न्ति वुच्चति, एवं विपस्सनाय निस्सट्ठानि आदिन्नसदिसानि मग्गेन पहीनानि पटिनिस्सट्ठानि नाम होन्तीति दस्सनत्थं “पटिनिस्सट्ठानी”ति वुत्तं । तेनेवाह “यथा न पुन चित्तं आरोहन्ति, एवं पटिनिस्सज्जितानी”ति ।

कामेसनाति कामानं एसना, कामसङ्गाता वा एसना कामेसना । वुत्तज्हेतं “तत्थ कतमा कामेसना? यो कामेसु कामच्छन्दो कामरागो कामनन्दी कामपिपासा काममुच्छा कामज्झोसानं, अयं वुच्चति कामेसना”ति, तस्मा कामरागो “कामेसना”ति वेदितब्बो । तेनेवाह “कामेसना...पे०... अनागामिमग्गेन पहीना”ति । भवानं एसना भवेसना । वुत्तम्पि चेतं “तत्थ कतमा भवेसना? यो भवेसु भवच्छन्दो...पे०... भवज्झोसानं, अयं वुच्चति भवेसना”ति, तस्मा भवेसनरागो रूपारूपभवपत्थनाति वेदितब्बो । तेनेवाह “भवेसना पन अरहत्तमग्गेन पहीयती”ति ।

ब्रह्मचरियस्स एसना ब्रह्मचरियेसना । सा च मग्गब्रह्मचरियस्स, दिट्ठिगतिकसम्मतब्रह्मचरियस्स च गवेसनवसेन द्विप्पकाराति आह “ब्रह्मचरियं एसिस्सामी”तिआदि । दिट्ठिगतिकसम्मतस्स ब्रह्मचरियस्स एसनापि हि ब्रह्मचरियेसनाति वुच्चति । वुत्तम्पि चेतं —

“तत्थ कतमा ब्रह्मचरियेसना? सस्सतो लोकोति वा, असस्सतो लोकोति वा, अन्तवा लोकोति वा, अनन्तवा लोकोति वा, तं जीवं तं सरीरन्ति वा, अज्जं जीवं अज्जं सरीरन्ति वा, होति तथागतो परं मरणाति वा, न होति तथागतो परं मरणाति वा, होति च न च होति तथागतो परं मरणाति वा, नेव होति न न होति तथागतो परं मरणाति वा, या एवरूपा दिट्ठि दिट्ठिगतं दिट्ठिगहनं दिट्ठिकन्तारं दिट्ठिविसूकायिकं दिट्ठिविप्फन्दितं दिट्ठिसंयोजनं गाहो पतिट्ठहो अभिनिवेसो परामासो कुम्मग्गो मिच्छापथो मिच्छत्तं तित्थायतनं विपरियेसग्गाहो, अयं वुच्चति ब्रह्मचरियेसना”ति (विभ० ९१९) ।

तस्मा दिट्ठिगतिकसम्मतस्स ब्रह्मचरियस्स एसना दिट्ठब्रह्मचरियेसनाति वेदितब्बा । तेनेवाह “दिट्ठिब्रह्मचरियेसना पन सोतापत्तिमग्गेनेव पटिप्पस्सम्भती”ति । एत्तावता च रागदिट्ठियो एसनाति दस्सितं होति । न केवलञ्च रागदिट्ठियो एव

एसना, तदेकद्वं कम्मप्पि । वुत्तप्पि चेतं —

“तत्थ कतमा कामेसना? कामरागो तदेकद्वं अकुसलं कायकम्मं वचीकम्मं मनोकम्मं, अयं वुच्चति कामेसना । तत्थ कतमा भवेसना? भवरागो तदेकद्वं अकुसलं कायकम्मं वचीकम्मं मनोकम्मं, अयं वुच्चति भवेसना । तत्थ कतमा ब्रह्मचरियेसना? अन्तर्गाहिका दिट्ठि तदेकद्वं अकुसलं कायकम्मं वचीकम्मं मनोकम्मं, अयं वुच्चति ब्रह्मचरियेसना”ति (विभ० ९१९) ।

नवविधमानोति “सेय्यस्स सेय्योहमस्मी”तिआदिना (सं० नि० ४.१०८; ध० सं० ११२१; विभ० ८६६; महानि० २१) आगतो नवविधमानो ।

“कामेसना”तिआदिगाथाय पन **ब्रह्मचरियेसना** सहाति ब्रह्मचरियेसनाय सद्धिं । विभत्तिलोपेन हि अयं निद्देशो । करणत्थे वा एतं पच्चत्तवचनं । इदं वुत्तं होति “ब्रह्मचरियेसनाय सद्धिं कामेसना भवेसनाति तिस्सो एसना”ति । तासु ब्रह्मचरियेसनं सरूपतो दस्सेतुं “**इतिसच्चपरामासो, दिट्ठिद्वाना समुस्सया**”ति वुत्तं । तस्सत्थो — इति एवं सच्चन्ति परामासो **इतिसच्चपरामासो** । इदमेव सच्चं मोघमज्जन्ति दिट्ठिया पवत्तिआकारं दस्सेति । दिट्ठियो एव सब्बानत्थहेतुभावतो **दिट्ठिद्वाना** । वुत्तज्जेतं — “मिच्छादिट्ठिपरमाहं, भिक्खवे, वज्जं वदामी”ति (अ० नि० १.३१०) । ता एव च उपरूपरि वुद्धिया मानलोभादिकिलेससमुस्सयनेन वट्टदुक्खसमुस्सयनेन च **समुस्सया**, “इदमेव सच्चं मोघमज्ज”न्ति मिच्छाभिनिविसमाना सब्बानत्थहेतुका किलेसदुक्खूपचयतो हेतुभूता च दिट्ठियो ब्रह्मचरियेसनाति वुत्तं होति । एतेन पवत्तिआकारतो निब्बत्तितो च ब्रह्मचरियेसना दस्सिताति वेदितब्बा ।

सब्बरागविरत्तस्साति सब्बेहि कामभवरागेहि विरत्तस्स । ततो एव तण्हाक्खयसङ्घाते निब्बाने विमुत्तत्ता **तण्हाक्खयविमुत्तिनो** अरहतो । **एसना पटिनिस्सट्ठा**ति कामेसना, भवेसना सब्बसो निस्सट्ठा पहीना । **दिट्ठिद्वाना समूहता**ति ब्रह्मचरियेसनासङ्घाता दिट्ठिद्वाना च पठममग्गेनेव समुग्धातिता । एवम्पि इमिस्सा गाथाय अत्थवण्णना वेदितब्बा । सेसं सुविज्जेय्यमेव ।

पतिलीनसुत्तवण्णना निट्ठिता ।

९. उज्जयसुत्तवण्णना

३९. नवमे **अनुकुलयज्जन्ति** अनुकुलं कुलानुक्कमं उपादाय दातब्बदानं । तेनाह “**अम्हाकं...पे०... कुलानुक्कलवसेन यजितब्ब**”न्ति । वंसपरम्पराय पच्छा दुग्गतपुरिसेहि पदातब्बदानं । एवरूपं कुलं सीलवन्ते उद्दिस्स निबद्धदानं, तस्मिं कुले दलिद्वानिपि न उपच्छिन्दन्ति । तत्रिदं वत्थु — अनाथपिण्डिकस्स घरे पज्ज सलाकभत्तसतानि दीयिंसु । दन्तमयसलाकानं पज्जसतानि अहेसुं । अथ तं कुलं अनुक्कमेन दालिद्वियेन अभिभूतं । एका तस्मिं कुले दारिका एकसलाकतो उद्धं दातुं नासक्खि । सापि पच्छा सातवाहनं रट्ठं गन्त्वा खलं सोधेत्वा लद्धधज्जेन तं सलाकं अदासि । एको थेरो रज्जो आरोचेसि । राजा तं आनेत्वा अग्गमहेसिट्ठाने ठपेसि । सा ततो पट्टाय पुन पज्जपि सलाकसतानि पवत्तेसि ।

अस्समेधन्तिआदीसु पोरानकराजकाले किर सस्समेधं, पुरिसमेधं, सम्मापासं, वाचापेय्यन्ति चत्तारि सङ्गहवत्थूनि अहेसुं, येहि राजानो लोकं सङ्गहिंसु । तत्थ निप्फन्नसस्सतो दसमभागगहणं **सस्समेधं** नाम, सस्ससम्पादने मेधाविताति अत्थो । महायोधानं छमासिकभत्तवेतनानुप्पदानं **पुरिसमेधं** नाम, पुरिससङ्गण्णे मेधाविताति अत्थो । दलिद्वमनुस्सानं हत्थे

लेखं गहेत्वा तीणि वस्सानि विना वड्डिया सहस्सद्विसहस्समत्तधनानुपदानं **सम्मापासं** नाम । तज्झि सम्मा मनुस्से पासेति हृदये बन्धित्वा विय ठपेति, तस्मा सम्मापासन्ति वुच्चति । “तात, मातुला”ति आदिना पन सण्णवाचाभणनं **वाचापेय्यं** नाम, पेय्यवज्जं पियवचनताति अत्थो । एवं चतूहि वत्थूहि सङ्गहितं रट्ठं इद्धज्जेव होति फीतज्ज पट्टतन्नपानं खेमं निरब्बुदं, मनुस्सा मुदा मोदना उरे पुत्ते नच्चेन्ता अपारुतघरद्वारा विहरन्ति । इदं घरद्वारेसु अग्गळानं अभावतो **निरग्गळन्ति** वुच्चति । अयं पोरणिका पवेणी । अपरभागे पन ओक्काकराजकाले ब्राह्मणा इमानि चत्तारि सङ्गहवत्थूनि इमज्ज रट्ठसम्पत्तिं परिवत्तेन्ता उम्मूलं कत्वा अस्समेधं पुरिसमेधन्ति आदिके पज्ज यज्जे नाम अकंसु । वुत्तज्जेतं भगवता **ब्राह्मणधम्मियसुत्ते** —

“तेसं आसि विपल्लासो, दिस्वान अणुतो अणुं...पे०... ।

ते तत्थ मन्ते गन्थेत्वा, ओक्काकं तदुपागमु”न्ति ॥ (सु० नि० ३०१-३०४) ।

इदानीं तेहि परिवत्तेत्वा ठपितमत्थं दस्सेन्तो “**अस्समेध**”न्ति आदिमाह । तत्थ **मेधन्तीति** वधेन्ति । **द्वीहि परियज्जेहीति** महायज्जस्स पुब्बभागे पच्छा च पवत्तेतब्बेहि द्वीहि परिवारयज्जेहि । **सत्तनवुत्तिपज्जपसुसतधातभिसनस्साति** सत्तनवुत्ताधिकानं पज्जन्नं पसुसतानं मारणेन भेरवस्स पापभीरुकानं भयावहस्स । तथा हि वदन्ति —

“छसतानि नियुज्जन्ति, पसूनं मज्झिमे हनि ।

अस्समेधस्स यज्जस्स, ऊनानि पसूहि तीही”ति ॥ (सं० नि० टी० १.१.१२०) ।

सम्मान्ति युगच्छिद्वे पक्खिपितब्बदण्डकं । **पासन्तीति** खिपन्ति । **संहारिमेहीति** सकटेहि वहितब्बेहि । पुब्बे किर एको राजा सम्मापासं यजन्तो सरस्सतिनदितीरे पथविया विवरे दिन्ने निमुग्गोयेव अहोसि, अन्धबालब्राह्मणा गतानुगतिगता “अयं तस्स सग्गगमनमग्गो”ति सज्जाय तत्थ सम्मापासयज्जं पट्टपेन्ति । तेन वुत्तं “**निमुग्गोकासतो पभुती**”ति । अयूपो अप्पकदिवसो यागो, सयूपो बहुदिवसं नेय्यो **सत्रयागोति** । मन्तपदाभिसङ्गुतानं सप्पिमधूनं **वाजमिति** समज्जा । हिरज्जसुवण्णगोमहिंसादि **सत्तरसकदक्खिणस्स** । सारगम्भकोट्टागारादीसु नत्थि एत्थ अग्गळन्ति **निरग्गळो** । तत्थ किर यज्जे अत्तनो सापतेय्यं अनवसेसतो अनिगूहित्वा निय्यातीयति ।

महारम्भाति बहुपसुघातकम्मा । अट्ठकथायं पन “विविधा यत्थ हज्जरे”ति वक्खमानत्ता “महाकिच्चा महाकरणीया”ति पठमो अत्थविकप्पो वुत्तो । दुतियो पन अत्थविकप्पो “महारम्भाति पपज्जवसेन अजेळका”ति आदि वुत्तन्ति अधिप्पायेन “**अपिचा**”ति आदिना आरद्धो । **निरारम्भाति** एत्थापि वुत्तनयेन अत्थो वेदितब्बो । ननु च पाणातिपातादिअकुसलकम्मस्स अप्पमत्तकम्पि फलं नुपलब्धति, तस्मा तस्स निष्फलभावं अवत्वा “न ते होन्ति महप्फला”ति कस्मा वुत्तन्ति आह “**निरवसेसत्थे**”ति आदि । अनुगतं कुलन्ति **अनुकुलं**, कुलानुगतन्ति अत्थो । ये निच्चभत्तादिं पुब्बपुरिसेहि पट्टपितं अपरापरं अनुपच्छिन्दन्ता मनुस्सा ददन्ति, ते अनुकुलं यजन्ति नाम । तेनेवाह “**ये अज्जे अनुकुलं यजन्ती**”ति आदि ।

उज्जयसुत्तवण्णना निट्ठिता ।

१०. उदायिसुत्तवण्णना

४०. दसमे पाणसमारम्भरहितन्ति पाणघातरहितं । अब्याबज्झं सुखं लोकं, पण्डितो उपपज्जतीति कामच्छन्दादिव्यापादविरहितत्ता अब्याबज्झं निदुक्खं । परपीळाभावे पन वत्तब्बं नत्थि । ज्ञानसमापत्तिवसेन सुखबहुलत्ता सुखं एकन्तसुखं ब्रह्मलोकं ज्ञानपुज्जेन, इतरपुज्जेन पन तदज्जसम्पत्तिभवसङ्घातं सुखं लोकं पण्डितो सप्पज्जो उपेति । सेसं उत्तानमेव ।

उदायिसुत्तवण्णना निट्ठिता ।

चक्कवग्गवण्णना निट्ठिता ।

५. रोहितस्सवग्गो

१. समाधिभावनासुत्तवण्णना

४१. पञ्चमस्स पठमे दिट्ठधम्मसुखविहारायाति इमस्मिंयेव अत्तभावे सुखविहारत्थाय, निक्किलेसताय निरामिसेन सुखेन विहरणत्थायाति अत्थो । इमिना चत्तारि फलसमापत्तिज्ज्ञानानि खीणासवस्स आसवक्खयाधिगमतो अपरभागे अधिगतरूपारूपज्ज्ञानानि च कथितानि । दिब्बचक्खुजाणदस्सनप्पटिलाभायाति दिब्बचक्खुजाणप्पटिलाभत्थाय । दिब्बचक्खुजाणहि रूपगतस्स दिब्बस्स इतरस्स च दस्सनट्ठेन इध “जाणदस्सन”न्ति अधिप्पेतं । आलोकसज्जं मनसि करोतीति दिवा वा रत्तिं वा सूरियदीपचन्दमणिउक्काविज्जुलतादीनं आलोको दिवा रत्तिञ्च उपलब्धो, यथालब्धवसेनेव आलोकं मनसि करोति चित्ते ठपेति, तथा च नं मनसि करोति, यथास्स सुभावितालोककसिणस्स विय कसिणालोको यथिच्छकं यावदिच्छकञ्च सो आलोको रत्तियं उपतिट्ठति, येन तत्थ दिवासज्जं ठपेति, दिवा विय विगतथिनमिद्दो होति । तेनाह “यथा दिवा तथा रत्ति”न्ति ।

यथा दिवा आलोकसज्जा मनसि कता, तथेव नं रत्तिम्पि मनसि करोतीति यथा दिवा दिट्ठो आलोको, तथेव तं रत्तिं मनसि करोति । दुतियपदेति “यथा रत्तिं तथा दिवा”ति इमस्मिं वाक्ये । एस नयोति इमिना यथा रत्तियं चन्दालोकादि आलोको दिट्ठो, एवमेव रत्तिं दिट्ठाकारेनेव दिवा तं आलोकं मनसि करोति चित्ते ठपेतीति इममत्थं अतिदिसति । इति विवटेन चेतसाति एवं अपिहितेन चित्तेन, थिनमिद्धानिधानेन अपिहितचित्तेनाति वुत्तं होति । अपरियोनद्धेनाति समन्ततो अनद्धेन असज्जादितेन । किञ्चापीतिआदिना अत्तना वुत्तमेवत्थं समत्थेति । आलोकसदिसं कतं “यथा दिवा तथा रत्ति”न्तिआदिना ।

सत्तट्ठानिकस्साति “अभिवक्कन्ते पटिक्कन्ते सम्पजानकारी होती”तिआदिना (दी० नि० १.२१४; २.३७६; म० नि० १.१०९) वुत्तस्स सत्तट्ठानिकस्स सतिसम्पजज्जस्स अत्थाय । परिग्गहितवत्थारम्मणतायाति वत्थुनो आरम्मणस्स च याथावतो विदितभावेन । यथा हि सप्पं परियेसन्तेन तस्स आसये विदिते सोपि विदितो गहितो एव च होति मन्तागदबलेन तस्स गहणस्स सुकरत्ता, एवं वेदनाय आसयभूते वत्थुम्हि आरम्मणे च विदिते आदिकम्मिकस्सपि वेदना विदिता गहिता एव होति सलक्खणतो सामज्जलक्खणतो च तस्सा गहणस्स सुकरत्ता । पगेव परिज्जातवत्थुकस्स खीणासवस्स । तस्स हि उप्पादक्खणेपि ठितिक्खणेपि भङ्गक्खणेपि वेदना विदिता पाकटा होन्ति “ता वेदना एवं उप्पज्जित्वा”तिआदिना । न केवलञ्च वेदना एव, इध वुत्ता सज्जादयोपि अवुत्ता चेतनादयोपि विदिताव उप्पज्जन्ति चेव तिट्ठन्ति च निरुज्झन्ति च । निदस्सनमत्तज्हेतं, यदिदं पाळियं वेदनासज्जावितक्कगहणं । तेन अनवसेसतो सब्बधम्माम्पि उप्पादादितो विदितभावं

दस्सेति ।

अपिच वेदनाय उप्पादो विदितो होति, उपट्ठानं विदितं होति, अत्थङ्गमो विदितो होति । कथं वेदनाय उप्पादो विदितो होति? अविज्जासमुदया वेदनासमुदयो, तण्हासमुदया कम्मसमुदयो, फस्ससमुदया वेदनासमुदयोति निब्बत्तिलक्खणं पस्सन्तोपि वेदनाक्खन्धस्स समुदयं पस्सति । एवं वेदनाय उप्पादो विदितो होति । कथं वेदनाय उपट्ठानं विदितं होति? अनिच्चतो मनसिकरोतो खयतुपट्ठानं विदितं होति, दुक्खतो मनसिकरोतो भयतुपट्ठानं विदितं होति, अनत्ततो मनसिकरोतो सुज्जतुपट्ठानं विदितं होति । एवं वेदनाय उपट्ठानं विदितं होति । इति खयतो भयतो सुज्जतो जानाति । कथं वेदनाय अत्थङ्गमो विदितो होति? अविज्जानिरोधा वेदनानिरोधो...पे०... एवं वेदनाय अत्थङ्गमो विदितो होति । इमिनापि नयेनेत्थ अत्थो वेदितब्बो ।

इति रूपन्ति एत्थ इतिसद्दो अनवसेसतो रूपस्स सरूपनिदस्सनत्थोति तस्स इदं रूपन्ति एतेन साधारणतो सरूपनिदस्सनमाह, **एत्तकं रूपन्ति** एतेन अनवसेसतो, **न इतो परं रूपं अत्थीति** तब्बिनिमुत्तस्स अज्जस्स अभावं । **इति वेदनातिआदीसुपि** अयं वेदना, एत्तका वेदना, इतो परं वेदना नत्थि । अयं सज्जा...पे०... इमे सङ्गारा...पे०... इदं विज्जाणं, एत्तकं विज्जाणं, इतो परं विज्जाणं नत्थीति एवमत्थो दट्ठब्बोति आह **“वेदनादीसुपि एसेव नयो”**ति ।

जाणेन जानित्वा परोपरानि । **परोपरानीति** परानि च ओपरानि च । **उत्तमाधमानीति** परत्तभावसकत्तभावादीनि उत्तमाधमानि । **चलितन्ति** तण्हादिट्ठिविप्फन्दितं । **अनीघोति** रागादिईधरहितो । **अतारि सोति** सो एवरूपो अरहा जातिजरं अतरि ।

समाधिभावनासुत्तवण्णना निट्ठिता ।

२-४. पज्जब्याकरणसुत्तादिवण्णना

४२-४४. दुतिये एतेसं पज्जानन्ति एकंसब्याकरणादीनं चतुन्नं पज्जानं । **तस्मिं तस्मिं ठाने ब्याकरणं जानातीति** “चक्खुं अनिच्च”न्ति पुट्ठे “अनिच्च”न्ति एकंसेनेव ब्याकातब्बं । “अनिच्चा नाम चक्खुं”न्ति पुट्ठे पन “न केवलं चक्खुमेव, सोतम्पि अनिच्च”न्ति एवं विभजित्वा ब्याकातब्बं । “यथा चक्खुं तथा सोतं, यथा सोतं तथा चक्खुं”न्ति पुट्ठे “केनट्ठेन पुच्छसी”ति पटिपुच्छित्वा “दस्सनट्ठेन पुच्छामी”ति वुत्ते “न ही”ति ब्याकातब्बं । “अनिच्चट्ठेन पुच्छामी”ति वुत्ते “आमा”ति ब्याकातब्बं । “तं जीवं तं सरीरं”न्तिआदीनि पुट्ठेन पन “अब्याकतमेतं भगवता”ति ठपेतब्बो, एस पज्जो न ब्याकातब्बोति एवं जानातीति अत्थो । **अत्थसमागमेनाति** अत्थस्स पटिलाभेन लद्धब्बेन । समिति सङ्गति समोधानन्ति समयो, पटिलाभो । समयो एव **अभिसमयो**, अभिमुखभावेन वा समयो **अभिसमयो**ति एवमेत्थ पदत्थो वेदितब्बो । सेसं सुविज्जेय्यमेव । ततियचतुत्थानि उत्तानत्थानेव ।

पज्जब्याकरणसुत्तादिवण्णना निट्ठिता ।

५-६. रोहितस्ससुत्तादिवण्णना

४५-४६. पज्जमे (सं० नि० टी० १.१.१०७) **एकोकासेति** चक्कवाळस्स परियन्तसज्जिते एकस्मिं ओकासे । **भुम्मन्ति** “यत्था”ति इदं भुम्मवचनं । सामज्जतो वुत्तम्पि “सो लोकस्स अन्तो”ति वचनतो विसिद्धविसयमेव होति । “न

जायति, न मीयती”ति वत्वा पुन “न चवति, न उपपज्जती”ति कस्मा वुत्तन्ति आह “इदं अपरापरं...पे०... गहित”न्ति । पदगमनेनाति पदसा गमनेन । सत्था सङ्खारलोकस्स अन्तं सन्धाय वदति उपरि सच्चानि पकासेतुकामो । सङ्खारलोकस्स हि अन्तो निब्बानं ।

दळ्हं थिरं धनु एतस्साति दळ्हधन्वा, सो एव “दळ्हधम्मा”ति वुत्तो । तेनाह “दळ्हधनू”ति । उत्तमप्पमाणं नाम सहस्सथामधनु । धनुग्गणहनसिप्पचित्तकताय धनुग्गहो, न धनुग्गहणमत्तेनाति आह “धनुग्गहोति धनुआचरियो”ति । “धनुग्गहो”ति वत्वा “सिक्खितो”ति वुत्ते धनुसिक्खाय सिक्खितोति विज्जायति । सिक्खा च एतकेन कालेन सिक्खन्तस्स उक्कंसगता होतीति आह “द्वादस वस्सानि धनुसिप्पं सिक्खितो”ति । उसभप्पमाणेति वीसति यट्ठियो उसभं, तस्मिं उसभप्पमाणे पदेसे । वालगन्ति वालकोटिं । कतहत्थोति परिचितहत्थो । कतसरक्खेपोति थिरलक्खे च चललक्खे च परेसं दस्सनवसेन सरक्खेपस्स कतापी । तेनाह “दस्सितसिप्पो”ति, “कतयोगो”ति केचि । असन्ति एतेनाति असनं, कण्डो । तालच्छादिन्ति तालच्छायं । सा पन रतनमत्ता विदत्थिचतुरङ्गुला ।

पुरत्थिमा समुद्वाति एकस्मिं चक्कवाळे पुरत्थिमा समुद्वा । समुद्दसीसेन पुरत्थिमचक्कवाळमुखवाट्टिं वदति । पच्छिमसमुद्वाति एत्थापि एसेव नयो । निप्पपञ्चतन्ति अदन्तकारितं । सम्पत्तेति तादिसेन जवेन गच्छन्तेन सम्पत्ते । अनोतत्तेति एत्थापि “सम्पत्ते”ति पदं आनेत्वा सम्बन्धो, तथा “नागलतादन्तकट्टु”न्ति एत्थापि । तदाति यदा सो लोकन्तगवेसको अहोसि, तदा । दीघायुककालोति अनेकवस्ससहस्सायुककालो । चक्कवाळलोकस्साति सामञ्जवसेन एकवचनं, चक्कवाळलोकानन्ति अत्थो । इमस्मियेव चक्कवाळे निब्बत्तिपुब्बपरिचयसिद्धाय निकन्तिया ।

ससज्जिहि समनकेति न रूपधम्ममत्तके, अथ खो पञ्चक्खन्धसमुदायेति दस्सेति । समितपापोति समुच्छिन्नसंकिलेसधम्मो । छट्ठं उत्तानमेव ।

रोहितस्ससुत्तादिवण्णना निड्डिता ।

७. सुविदूरसुत्तवण्णना

४७. सत्तमे सुविदूरविदूर-सद्धानं समानत्थानंयेव एकत्थ गहणं इध निद्वेसो दूरासन्नभावस्स अपेक्खासिद्धत्ता इधाधिपेतस्स दूरभावस्स केनचि परियायेन अनासन्नभावदस्सनत्थं कतन्ति आह “केनचि परियायेन अनासन्नानि हुत्वा”तिआदि । सेसमेत्थ उत्तानमेव ।

सुविदूरसुत्तवण्णना निड्डिता ।

८. विसाखसुत्तवण्णना

४८. अट्ठमे वाक्करणचातुरियतो वचनगुणहेतूनं पूरिया पोरी, पोरियं भवाति पोरी, ताय पोरिया । तेनाह “परिपुण्णवाचाया”ति, अक्खरपदपरिपुण्णाय वाचायाति अत्थो । अपलिबुद्धायाति पित्तादीहि न विबद्धाय अननुबुन्धिताय । अनेलगलायाति अनेलाय अगलाय निद्वोसाय अगळितपदव्यञ्जनाय च । थेरस्स हि कथयतो पदं वा व्यञ्जनं वा न परिहायति । तेनाह “अनेलगलायाति निद्वोसाय चेव अगळिताय चा”तिआदि । तत्थ निद्वोसायाति अत्थतो च व्यञ्जनतो च विगतदोसाय । अपतितपदव्यञ्जनायाति अविरहितपदव्यञ्जनाय । अथ वा अनेलगलायाति न

एलं दोसं गलतीति अनेलगला । अविच्छिन्नवाचाय अनेलगलाय यथा दन्धमनुस्सा मुखेन खेळं गळन्तेन वाचं भासन्ति, न एवरूपाय । अथ खो निद्दोसाय विसदवाचायाति अत्थो । विवट्टप्पकासिनी वाचा न कदाचि विवट्टमुत्ताति कत्वा आह “विवट्टपरियापन्नाया”ति, विवट्टं अमुञ्चित्वा पवत्तायाति अत्थो । विवट्टप्पकासिनी हि वाचा विवट्टं परिच्छिज्ज आपादेन्ती पवत्तति । नवलोकुत्तरधम्मो सब्बधम्मोहि समुस्सितट्ठेन अब्भुगतट्ठेन च धजो नामाति आह “अब्भुगतट्ठेना”तिआदि । सेसमेत्थ सुविज्जेय्यमेव ।

विसाखसुत्तवण्णना निड्ढिता ।

९. विपल्लाससुत्तवण्णना

४९. नवमे अनिच्चादीनि वत्थूनि निच्चन्तिआदिना विपरीततो असन्तीति विपल्लासा, सज्जाय विपल्लासो सज्जाविपल्लासो । इतरेसुपि तीसु एसेव नयो । एवमेते चतुन्नं वत्थून् वसेन चत्तारो, तेसु वत्थूसु सज्जादीनं वसेन द्वादस होन्ति । तेसु अट्ठ सोतापत्तिमग्गेन पहीयन्ति । असुभे सुभन्ति सज्जाचित्तविपल्लासा सकदागामिमग्गेन तनुका होन्ति, अनागामिमग्गेन पहीयन्ति । दुक्खे सुखन्ति सज्जाचित्तविपल्लासा अरहत्तमग्गेन पहीयन्तीति वेदितब्बा । सेसमेत्थ उत्तानमेव ।

विपल्लाससुत्तवण्णना निड्ढिता ।

१०. उपक्किलेससुत्तवण्णना

५०. दसमे उपक्किलिड्ढभावकरणेनाति मलीनभावकरणेन । पञ्चविधाय सुराय चतुब्बिधस्स च मेरयस्साति एत्थ पूवसुरा, पिट्टसुरा, ओदनसुरा, किण्णपक्खित्ता, सम्भारसंयुत्ताति पञ्च सुरा । पुप्फासवो, फलासवो, मध्वासवो, गुळासवोति चत्तारो आसवा, चतुब्बिधं मेरयं नाम । तत्थ पूवे भाजने पक्खिपित्वा तज्जं उदकं दत्वा मद्धित्वा कता पूवसुरा । एवं सेससुरापि । किण्णाति पन तस्सा सुराय बीजं वुच्चति । ये सुरा “मोदका”तिपि वुच्चन्ति, ते पक्खिपित्वा कता किण्णपक्खित्ता । धातकिआसवादिनासम्भारेहि संयोजिता सम्भारसंयुत्ता । मधुकतालनाळिकेरादिपुप्फरसो चिरपरिवासितो पुप्फासवो । पनसादिफलरसो फलासवो । मुद्दिकारसो मध्वासवो । उच्छुरसो गुळासवो ।

उपक्किलेससुत्तवण्णना निड्ढिता ।

रोहितस्सवग्गवण्णना निड्ढिता ।

पठमपण्णासकं निड्ढितं ।

२. दुतियपण्णासकं

(६) १. पुज्जाभिसन्दवग्गो

१. पठमपुज्जाभिसन्दसुत्तवण्णना

५१. दुतियस्स पठमे पुज्जाभिसन्दाति वा पुज्जनदियो । अविच्छेदेन निच्चं पवत्तियमानानि हि पुज्जानि अभिसन्दनद्वेन “पुज्जाभिसन्दा”ति वुत्ता । अपरिमितन्ति आळ्हकगणनाय अपरिमितं, योजनवसेन पनस्स परिमाणं अत्थि । तथा हि हेट्ठा महापथविया उपरि आकासेन परतो चक्कवाळपब्बतेन मज्झे तत्थ तत्थ ठितेहि दीपपब्बतपरियन्तेहि परिच्छिन्नत्ता योजनतो सक्का पमाणं कातुं । भेरवारम्मणेहीति सविज्जाणकाविज्जाणकेहि भेरवारम्मणेहि । तथा हि तं महासरीरमच्छकुम्भीलयक्खरक्खसमहानागदानवादीनं सविज्जाणकानं वळवामुखपातालादीनं अविज्जाणकानञ्च भेरवारम्मणानं वसेन “बहुभेरव”न्ति वुच्चति । सेसमेत्थ उत्तानमेव ।

पठमपुज्जाभिसन्दसुत्तवण्णना निट्ठिता ।

२. दुतियपुज्जाभिसन्दसुत्तवण्णना

५२. दुतिये सोतापन्नस्स सद्धा अधिप्पेताति सोतापन्नस्स मग्गेनागता सद्धा अधिप्पेता ।

दुतियपुज्जाभिसन्दसुत्तवण्णना निट्ठिता ।

३-४. पठमसंवाससुत्तादिवण्णना

५३-५४. ततिये यथाकम्मं ता ता गतियो अरन्ति उपगच्छन्तीति अरिया, सत्ता । इमे पन कुच्छिता अरियाति कदरिया । थद्धमच्छरिनो, थद्धेन मच्छरेन समन्नागताति अत्थो । थद्धमच्छरियसदिसज्हि कुच्छितं सब्बदा निहीनं नत्थि सब्बगुणानं आदिभूतस्स भोगसम्पत्तिआदिसब्बसम्पत्तीनं मूलभूतस्स दानस्स निसेधनतो । तेनाह “कदरियाति थद्धमच्छरिनो”ति । एकच्चो हि अत्तनो वसनद्वाने भिक्खू हत्थं पसारेत्वापि न वन्दति । अज्जत्थ गतो विहारं पविसित्वा सक्कच्चं वन्दित्वा मधुरप्पटिसन्थारं करोति “किं, भन्ते, अम्हाकं वसनद्वानं नागच्छथ, सम्पन्नो पदेसो, पटिबलाहं अय्यानं यागुभत्तादीहि उपट्टानं कातुं”न्ति । भिक्खु “सद्धो अयं उपासको”ति यागुभत्तादीहि सङ्गण्हाति ।

अथेको थेरो तस्स गामं गन्त्वा पिण्डाय चरति । सो तं दिस्वा अज्जेन वा गच्छति, घरं वा पविसति । सचेपि सम्मुखीभावं आगच्छति, हत्थेन वन्दित्वा “अय्यस्स भिक्खं देथ, अहं एकेन कम्मेन गच्छामी”ति पक्कमति । थेरो सकलगामं चरित्वा तुच्छपत्तोव निक्खमति । इदं ताव मुदुमच्छरियं नाम । येन अदायकोपि दायको विय पज्जायति । इध पन थद्धमच्छरियं अधिप्पेतं । येन समन्नागतो भिक्खूसु पिण्डाय पविट्ठेसु “थेरा ठिता”ति वुत्ते “किं मय्हं पादा रुज्जन्ती”तिआदीनि वत्वा सिलाथम्भो विय खाणुको विय च थद्धो हुत्वा तिट्ठति, सामीचिम्पि न करोति, कुतो दानं । अयमिध अधिप्पेतो । तेन वुत्तं “थद्धमच्छरिनोति थद्धेन मच्छरेन समन्नागताति अत्थो”ति । मच्छरं मच्छेरं मच्छरियन्ति अत्थतो एकं ।

परिभासकाति भिक्खू घरद्वारे ठिते दिस्वा “किं तुम्हे कसित्वा आगता वपित्वा लायित्वा, मयं अत्तनोपि न लभाम, कुतो तुम्हाकं, सीधं निक्खमथा”तिआदीहि सन्तज्जका । याचकानं वचनस्स अत्थं जानन्तीति एत्थ किञ्चापि भिक्खू घरद्वारे ठिता तुण्ही होन्ति, अत्थतो पन “भिक्खं देथा”ति वदन्ति नाम अरियाय याचनाय । वुत्तज्हेतं “उद्दिस्स अरिया तिट्ठन्ति, एसा अरियान याचना”ति (मि० प० ४.५.९) । तत्र ये “मयं पचाम, इमे न पचन्ति, पचमाने पत्वा अलभन्ता कुहिं लभिस्सती”ति देय्यधम्मं संविभजन्ति, ते वदञ्जू याचकानं वचनस्स अत्थं जानन्ति नाम जत्वा कत्तब्बकरणतो । चतुत्थं उत्तानमेव ।

पठमसंवाससुत्तादिवण्णना निट्ठिता ।

५-६. समजीवीसुत्तादिवण्णना

५५-५६. पञ्चमे अनुगणहनत्थन्ति नकुलमाता नकुलपिताति इमेसं द्विन्नं सङ्गहत्थाय । नकुलस्स दारकस्स पिता नकुलपिता । नकुलमाताति एत्थापि एसेव नयो । सेसमेत्थ उत्तानमेव । छट्ठे नत्थि वत्तब्बं ।

समजीवीसुत्तादिवण्णना निट्ठिता ।

७-१०. सुप्पवासासुत्तादिवण्णना

५७-६०. सत्तमे आयुभागपटिलाभिनी होतीति आयुकोट्टासस्स पटिलाभिनी होति । तिविधलोकन्ति सत्तसङ्खारभाजनसङ्खातं तिविधं लोकं । विदितं कत्वाति विभूतं कत्वा । लोकविदून्ति करणत्थे सामिवचनन्ति आह “बुद्धेहि पसत्था”ति । अट्टमनवमदसमानि उत्तानत्थानेव ।

सुप्पवासासुत्तादिवण्णना निट्ठिता ।

पुज्जाभिसन्दवग्गवण्णना निट्ठिता ।

(७) २. पत्तकम्मवग्गो

१-४. पत्तकम्मसुत्तादिवण्णना

६१-६४. दुतियस्स पठमे ये अनिट्ठा न होन्ति, ते इट्ठाति अधिप्पेताति आह “अनिट्ठपटिक्खेपेन इट्ठा”ति । इट्ठाति च परियिट्ठा वा होतु मा वा, इट्ठारम्मणभूताति अत्थो । गवेसितम्पि हि इट्ठन्ति वुच्चति, तं इध नाधिप्पेतं । मनेति मनस्मिं । कन्ताति वा कमनीया, कामेतब्बाति अत्थो । मनं अप्पायन्तीति इट्ठभावेन मनं वट्ठेन्ति । कम्मसाधनो इध भोग-सद्दोति आह “भोगाति भुज्जितब्बा”तिआदि । धम्मूपघातं कत्वा कुसलधम्मं विनोदेत्वा । उपनिज्झायीयन्तीति उपज्झायाति आह “सुखदुक्खेसु उपनिज्झायितब्बत्ता”ति, सुखदुक्खेसु उप्पन्नेसु अनुस्सरितब्बत्ताति अत्थो । सन्दिट्ठसम्भत्तेहीति एत्थ तत्थ तत्थ सङ्गम्म दिट्ठमत्ता नातिदळ्हमित्ता सन्दिट्ठा, सुट्ठु भत्ता सिनेहवन्तो दळ्हमित्ता सम्भत्ता ।

विसमलोभन्ति बलवलोभं । सुखितन्ति सज्जातसुखं । पीणितन्ति धातं सुहितं । तथाभूतो पन यस्मा बलसम्पन्नो होति, तस्मा “बलसम्पन्नं करोती”ति वुत्तं ।

सोभने कायिकवाचसिककम्मे रतोति सूरतो उकारस्स दीघं कत्वा, तस्स भावो सोरच्चं, कायिकवाचसिको अवीतिककमो । सो पन अत्थतो सुसीलभावोति आह “खन्तिसोरच्चे निविट्ठाति अधिवासनक्खन्तियच्च सुसीलताय च निविट्ठा”ति । एकमत्तानन्ति एकं चित्तन्ति अत्थो । रागादीनज्झि पुब्बभागियं दमनादि पच्चेकं इच्छितब्बं, न मग्गक्खणे विय एकज्झं पटिसङ्खानमुखेन पजहनतो । एकमत्तानन्ति वा विवेकवसेन एकं एकाकिनं अत्तानं । तेनेवाह “एकं अत्तनोव अत्तभाव”न्तिआदि । उपरूपरिभूमीसूति छकामसग्गसङ्खातासु उपरूपरिकामभूमीसु । कम्मस्स फलं अग्गं नाम । तं पनेत्थ

उच्चगामीति आह “उद्धमग्गमस्सा”ति । सुवग्गे नियुत्ता, सुवग्गप्पयोजनाति वा सोवग्गिका । दसन्नं विसेसानन्ति दिब्बआयुवण्णयससुखआधिपतेय्यानज्जेव इट्ठरूपादीनज्ज फलविसेसानं । वण्णग्गहणेन चेत्य सको अत्तभाववण्णो गहितो, रूपग्गहणेन बहिद्भा रूपारम्मणं । दुतियततियचतुत्थानि उत्तानत्थानेव ।

पत्तकम्मसुत्तादिवण्णना निट्ठिता ।

५. रूपसुत्तवण्णना

६५. पञ्चमे पमिनोति उळारतादिविसेसं एतेनाति पमाणं, रूपकायो पमाणं एतस्साति रूपप्पमाणो । ततो एव रूपे पसन्नोति रूपप्पसन्नो । घोसोति चेत्य थुतिघोसो । लूखन्ति पच्चयलूखता । धम्माति सीलादयो गुणधम्मा अधिप्पेता । इमेसं पन चतुन्नं पुग्गलानं नानाकरणं पाळियंयेव आगतं । वुत्तज्हेतं —

“कतमो च पुग्गलो रूपप्पमाणो रूपप्पसन्नो? इधेकच्चो पुग्गलो आरोहं वा पस्सित्वा परिणाहं वा पस्सित्वा सण्ठानं वा पस्सित्वा पारिपूरिं वा पस्सित्वा तत्थ पमाणं गहेत्वा पसादं जनेति । अयं वुच्चति पुग्गलो रूपप्पमाणो रूपप्पसन्नो ।

“कतमो च पुग्गलो घोसप्पमाणो घोसप्पसन्नो? इधेकच्चो पुग्गलो परवण्णनाय परथोमनाय परपसंसनाय परवण्णहारिकाय तत्थ पमाणं गहेत्वा पसादं जनेति । अयं वुच्चति पुग्गलो घोसप्पमाणो घोसप्पसन्नो ।

“कतमो च पुग्गलो लूखप्पमाणो लूखप्पसन्नो? इधेकच्चो पुग्गलो चीवरलूखं वा पस्सित्वा पत्तलूखं वा पस्सित्वा सेनासनलूखं वा पस्सित्वा विविधं वा दुक्करकारिकं पस्सित्वा तत्थ पमाणं गहेत्वा पसादं जनेति । अयं वुच्चति पुग्गलो लूखप्पमाणो लूखप्पसन्नो ।

“कतमो च पुग्गलो धम्मप्पमाणो धम्मप्पसन्नो? इधेकच्चो पुग्गलो सीलं वा पस्सित्वा समाधिं वा पस्सित्वा पज्जं वा पस्सित्वा तत्थ पमाणं गहेत्वा पसादं जनेति । अयं वुच्चति पुग्गलो धम्मप्पमाणो धम्मप्पसन्नो”ति (पु० प० १७१-१७२) ।

तत्थ आरोहन्ति उच्चतं । सा च खो तस्मिं तस्मिं काले पमाणयुत्ता दट्ठब्बा । परिणाहन्ति नातिकिसथूलतावसेन पीणतं । सण्ठानन्ति तेसं तेसं अङ्गपच्चङ्गानं सुसण्ठिततं दीघरस्सवट्ठादियुत्तद्धानेसु तथाभावं । पारिपूरिन्ति सब्बेसं सरीरावयवानं परिपुण्णतं अविकलतं । तत्थ पमाणं गहेत्वाति तस्मिं रूपे रूपसम्पत्तियं पमाणभावं उपादाय । पसादं जनेतीति अधिमोक्खं जनेति उप्पादेति ।

परवण्णनायाति “असुको एदिसो च एदिसो चा”ति परस्स गुणवचनेन । परथोमनायाति परम्मुखा परस्स सिलाघुप्पादकेन अभित्थवनेन परेन थुतिवसेन, गाथादिउपनिबन्धनेन वुत्ताय थोमनायाति वुत्तं होति । परपसंसनायाति परम्मुखा परस्स गुणसंकित्तनेन । परवण्णहारिकायाति परम्परवण्णहारिकाय परम्पराय परस्स कित्तनसदस्स उपसंहारेन । तत्थाति तस्मिं थुतिघोसे ।

चीवरलूखन्ति थूलजिण्णबहुतुन्नकतादिचीवरस्स लूखभावं । पत्तलूखन्ति अनेकगन्थिकाहटतादिपत्तस्स लूखभावं ।

विविधं वा दुक्करकारिकन्ति धुतङ्गादिवसेन पवत्तनानाविधं दुक्करचरियं। **सीलं वा पस्सित्वाति** सीलपारिपूरिवसेन विसुद्धं कायवचीसुचरितं जाणचक्खुना पस्सित्वा, ज्ञानादिअधिगमसुद्धिसमाधिं वा विपस्सनाभिज्जासङ्घातं पज्जं वा पस्सित्वाति अत्थो।

एवमेतस्मिं चतुप्पमाणे लोकसन्निवासे बुद्धेसु अप्पसन्ना मन्दा, पसन्ना बहुका। रूपप्पमाणस्स हि बुद्धरूपतो उत्तरि पसादावहं रूपं नाम नत्थि। घोसप्पमाणस्स बुद्धानं कित्तिघोसतो उत्तरि पसादावहो घोसो नाम नत्थि। लूखप्पमाणस्स कासिकानि वत्थानि महारहानि कञ्चनभाजनानि तिण्णं उत्तूनं अनुच्छविके सब्बसम्पत्तियुत्ते पासादवरे पहाय पंसुकूलचीवरसेलमयपत्तरुक्खमूलादिसेनासनसेविनो बुद्धस्स भगवतो लूखतो उत्तरि पसादावहं अज्जं लूखं नाम नत्थि। धम्मप्पमाणस्स सदेवके लोके असाधारणसीलादिगुणस्स तथागतस्स सीलादिगुणतो उत्तरि पसादावहो अज्जो सीलादिगुणो नाम नत्थि। इति भगवा इमं चतुप्पमाणिकं लोकसन्निवासं मुट्ठिना गहेत्वा विय ठितोति।

पमाणिसूति पमाणं अगगहेसुं। **नियकज्झत्ते तस्स गुणं न जानातीति** तस्स अब्भन्तरे पवत्तमानं सीलादिगुणं न जानाति। सेसं सुविज्जेय्यमेव।

रूपसुत्तवण्णना निट्ठिता।

७. अहिराजसुत्तवण्णना

६७. सत्तमे दट्ठविसानेवाति अवधारणेन दिट्ठविसादयो निवत्तेति। कट्ठमुखादयो हि चत्तारो आसीविसा दट्ठविसो, दिट्ठविसो, फुट्ठविसो, वातविसोति पच्चेकं चतुब्बिधा होन्तीति विसवेगविकारवसेन सोळस वुत्ता। तेसु दट्ठविसानंयेव इध गहणं, न इतरेसन्ति दस्सेति। सेसं सुविज्जेय्यमेव।

अहिराजसुत्तवण्णना निट्ठिता।

८. देवदत्तसुत्तवण्णना

६८. अट्ठमे काले सम्पत्तेति गब्भस्स परिपाकगतत्ता विजायनकाले सम्पत्ते। **पोतकन्ति** अस्सतरिया पुत्तं। “फलं वे कदलिं हन्ती”तिआदिगाथाय कुक्कुजकेनेव पत्तवट्ठिपसवस्स उच्छिन्नत्ता फलुप्पत्ति कदलिया पराभवाय होतीति आह “फलं वे कदलिं हन्ती”ति। **कुक्कुजकं** नाम कदलिया पुप्फनाळं। तथा फलपाकपरियोसानत्ता ओसधीनं “फलं वेळुं नळ”न्ति वुत्तं। अयं पनेत्थ पिण्डत्थो – यथा अत्तनो फलं कदलिवेळुनळे विनासेति, गब्भो च अस्सतरिं, एवं अत्तनो कम्मभूतो सक्कारो असप्पुरिसं विनासेतीति।

देवदत्तसुत्तवण्णना निट्ठिता।

९. पधानसुत्तवण्णना

६९. नवमे पदहति एतेहीति पधानानि। उत्तमवीरियानि सेट्ठवीरियानि विसिट्ठस्स अत्थस्स साधनतो। **किलेसानं संवरत्थायाति** यथा अभिज्झादयो न उप्पज्जन्ति, एवं सतिया उपट्ठानेन किलेसानं संवरणत्थाय। **पजहनत्थायाति**

कामवितक्कादीनं विनोदनत्थाय । पधानन्ति तस्सेव पजहनस्स साधनवसेन पवत्तवीरियं । कुसलानं धम्मानं ब्रूहन्त्थायाति बोज्झङ्गसङ्घातानं कुसलधम्मानं वड्ढनत्थाय । पधानन्ति तस्सेव वड्ढनस्स साधनवसेन पवत्तवीरियं ।

पधानसुत्तवण्णना निड्ढिता ।

१०. अधम्मिकसुत्तवण्णना

७०. दसमे विसमन्ति भावनपुंसकमेतं । तेनाह “विसमा हुत्वा”ति । असमयेनाति अकाले । भुम्मत्थे हेतं करणवचनं । पकट्टं पधानं अञ्जसं एतेसन्ति पञ्जसा, अञ्जसं पगता पटिपन्नाति वा पञ्जसा, पकतिमग्गगामिनो । न पञ्जसा अपञ्जसा, अमग्गपटिपन्ना । ते पन यस्मा मग्गतो अपगता नाम होन्ति, तस्मा वुत्तं “मग्गतो अपगता”तिआदि ।

गाथासु पन एवमेत्थ सम्बन्धो वेदितब्बो । गुन्नं चे तरमानानन्ति गावीसु महोघं तरन्तीसु । जिम्हं गच्छति पुङ्गवोति यदि यूथपति उसभो कुटिलं गच्छति । सब्बा ता जिम्हं गच्छन्तीति सब्बा ता गावियो कुटिलमेव गच्छन्ति । कस्मा? नेत्ते जिम्हं गते सति तस्स कुटिलगतत्ता । सो हि तासं पच्चयिको उपद्वहरो च । एवमेवन्ति यथा चेतं, एवमेव यो मनुस्सेसु पधानसम्मतो, यदि सो अधम्मचारी सिया, ये तस्स अनुजीविनो, सब्बेपि अधम्मिका होन्ति । सामिसम्पदा हि पकतिसम्पदं सम्पादेति । यस्मा एतदेवं, तस्मा सब्बं रट्ठं दुक्खं सेति, राजा चे होति अधम्मिको ।

अधम्मिकसुत्तवण्णना निड्ढिता ।

पत्तकम्मवग्गवण्णना निड्ढिता ।

(८) ३. अपण्णकवग्गो

१-२. पधानसुत्तादिवण्णना

७१-७२. ततियवग्गस्स पठमे यवति तेन फलं मिस्सितं विय होतीति योनि, एकन्तिकं कारणं । अस्साति यथावुत्तस्स भिक्खुनो । परिपुण्णन्ति अविकलं अनवसेसं । आसवे खेपेतीति आसवक्खयो, अग्गमग्गो । इध पन अरहत्तफलं अधिप्पेतन्ति आह “अरहत्तत्थाया”ति । दुतियं उत्तानमेव ।

पधानसुत्तादिवण्णना निड्ढिता ।

३-५. सप्पुरिससुत्तादिवण्णना

७३-७५. ततिये पज्जत्थाय अभिनीतोति पज्जकरणत्थाय अभिमुखं नीतो । अलम्बितं कत्वाति अलम्बं कत्वा, अयमेव वा पाठो, विपलम्बं अकत्वाति अत्थो । अवजानातीति अवज्जं करोति, निन्दतीति अत्थो । चतुत्थपञ्चमे नत्थि वत्तब्बं ।

सप्पुरिससुत्तादिवण्णना निड्ढिता ।

६. कुसिनारसुत्तवण्णना

७६. छट्ठे नगरं पविसितुकामा उय्यानतो उपेच्च वत्तन्ति गच्छन्ति एतेनाति उपवत्तनं । यथेव हि कलम्बनदितीरतो राजमातुविहारद्वारेन थूपारामं गन्तब्बं होति, एवं हिरञ्जवतिकाय पारिमतीरतो सालवनं उय्यानं, यथा अनुराधपुरस्स थूपारामो दक्खिणपच्छिमदिसाय, एवं तं उय्यानं कुसिनाराय दक्खिणपच्छिमदिसाय होति । यथा थूपारामतो दक्खिणद्वारेन नगरं पविसनमग्गो पाचीनमुखो गन्त्वा उत्तरेन निवत्तति, एवं उय्यानतो सालपन्ति पाचीनमुखा गन्त्वा उत्तरेन निवत्ता, तस्मा तं “उपवत्तन”न्ति वुच्चति । अन्तरेति द्विन्नं सालरुक्खानं वेमज्झे । तत्थ हि पञ्जापियमानस्स मञ्चस्स एका सालपन्ति सीसभागे होति, एका पादभागे । तत्रपि एको तरुणसालो सीसभागस्स आसन्नो होति, एको पादभागस्स । अपिच यमकसाला नाम मूलखन्धविटपपत्तेहि अञ्जमञ्जं संसिब्बित्वा ठितसालातिपि वदन्ति ।

द्वेळ्हकन्ति द्विधागाहो, अनेकंसग्गाहोति अत्थो । विमतीति संसयापत्तीति आह “विनिच्छित्तुं असमत्थता”ति । तं वो वदामीति तं संसयवन्तं भिक्खुं सन्धाय वो तुम्हे वदामीति । निक्कङ्खभावपच्चक्खकरणन्ति बुद्धादीसु तेसं भिक्खून् निक्कङ्खभावस्स पच्चक्खकारिया याथावतो तमत्थं पटिविज्झित्वा ठितं सब्बञ्जुतञ्जाणमेव । एत्थाति एतस्मिं अत्थे ।

कुसिनारसुत्तवण्णना निड्ढिता ।

७. अचिन्तेय्यसुत्तवण्णना

७७. सत्तमे लोकचिन्ताति लोकसन्निवेसप्पटिसंयुत्ता वीमंसा । तेनाह “केन नु खो चन्दिमसूरिया”ति आदि । नाळिकेरादयोति आदि-सद्देन अवुत्तानं ओसधित्तिणवनप्पतिआदीनं सङ्गहो । एवरूपा लोकचिन्ताति एदिसा वुत्तसदिसा अञ्जापि सा लोकचिन्ता ।

अचिन्तेय्यसुत्तवण्णना निड्ढिता ।

८. दक्खिणसुत्तवण्णना

७८. अट्ठमे दानसङ्घाताय दक्खिणायाति देय्यधम्मसङ्घाताय दक्खिणाय । विसुद्धि नाम महाजुतिकता । सा पन महप्फलताय वेदितब्बाति आह “महप्फलभावेना”ति । विसुज्झतीति न किलिस्सति, अमलिना महाजुतिका महाविप्फारा होतीति अत्थो । सुचिधम्मोति रागादिअसुचिविधमनेन सुचिसभावो । लामकधम्मोति हीनसभावो पापकिरियाय । अकुसलधम्मा हि एकन्तनिहीना । जूजको सीलवा कल्याणधम्मो न होति, तस्स महाबोधिसत्तस्स अत्तनो पुत्तदानं दानपारमिया मत्थकं गणहन्तं महापथविकम्पनसमत्थं जातं । स्वायं दायकगुणोति आह “वेस्सन्तरमहाराजा कथेतब्बो”ति आदि । उद्धरतीति बहुलं पापकम्मवसेन लद्धब्बविनिपाततो उद्धरति, तस्मा नत्थि मय्हं किञ्चि चित्तस्स अञ्जत्थत्तन्ति अधिप्पायो ।

पेतदक्खिणन्ति पेटे उद्दिस्स दातब्बदक्खिणं । पापितकालेयेवाति “इदं दानं असुकस्स पेतस्स होतू”ति तं उद्दिसनवसेन पत्तिया पापितकालेयेव । अस्साति पेतस्स । पापुणीति फलसम्पत्तिलभापनवसेन पापुणि । अयज्झि पेटे उद्दिस्स दाने धम्मा । तदा कोसलरञ्जो परिच्चागवसेन अतिविय दानज्झासयतं बुद्धप्पमुखस्स च सङ्गस्स उक्कंसगतगुणविसिद्धतं सन्धायाह “असदिसदानं कथेतब्ब”न्ति ।

दक्खिणसुत्तवण्णना निट्ठिता ।

९-१०. वणिज्जसुत्तादिवण्णना

७९-८०. नवमे तंसदिसाति यादिसा वणिज्जा पयुत्ता अयथाधिप्पाया अज्जा वा सम्पज्जति, तादिसावाति अत्थो । छेदं गच्छतीति विनासं पापुणाति । अधिप्पायतो परा विसिद्धाति पराधिप्पायो । तेनेवाह “अज्झासयतो अधिकतरफला होती”ति । चीवरादिना पच्चयेन वदेय्यासीति चीवरादिपच्चयहेतु मं वदेय्यासि पत्थेय्यासि । अथ वा यदा चीवरादिना पच्चयेन अत्थो होति, तदा मं याचेय्यासीति अत्थो । सेसं सुविज्जेय्यमेव । दसमं उत्तानमेव ।

वणिज्जसुत्तादिवण्णना निट्ठिता ।

अपण्णकवग्गवण्णना निट्ठिता ।

(९) ४. मचलवग्गो

१-६. पाणातिपातसुत्तादिवण्णना

८१-८६. चतुत्थस्स पठमादीनि उत्तानत्थानेव । पज्जमे (सं० नि० टी० १.१.१३२) “नीचे कुले पच्चाजातो”तिआदिकेन अप्पकासभावेन तमतीति तमो, तेन तमेन युत्तोति तमो पुगलो वुच्चति । तथा हि तंयोगतो पुगलस्स तब्बोहारो यथा “मच्छेरयोगतो मच्छरो”ति, तस्मा तमोति अप्पकासभावेन तमो तमभूतो अन्धकारं विय जातो, अन्धकारत्तं वा पत्तोति अत्थो । वुत्तलक्खणं तममेव परम्परतो अयनं गति निट्ठा एतस्साति तमपरायणो । उभयेनपि तमग्गहणेन खन्धतमो कथितो, न अन्धकारतमो । खन्धतमोति च सम्पत्तिरहिता खन्धपवत्तियेव दट्ठब्बा । “उच्चे कुले पच्चाजातो”तिआदिकेन पकासभावेन जोतेतीति जोति, तेन जोतिनायुत्तोतिआदि सब्बं वुत्तनयेन वेदितब्बं । इतरे द्वेति जोतितमपरायणो, जोतिजोतिपरायणोति इतरे द्वे पुगले ।

वेणुवेत्तादिविलीवेहि पेळभाजनादिकारका विलीवकारका । मिगमच्छादीनं निसादनतो नेसादा, मागविकमच्छबन्धादयो । रथेसु चम्मेन नहणकरणतो रथकारा, चम्मकारा । पुइति करीसस्स नामं, तं कुसेन्ति अपनेन्तीति पुक्कुसा, पुप्फछड्डुका । दुब्बण्णोति विरूपो । ओकोटिमकोति आरोहाभावेन हेडिमको, रस्सकायोति अत्थो । तेनाह “लकुण्डको”ति । लकु विय घटिका विय डेति पवत्ततीति लकुण्डको, रस्सो । कणति निमीलतीति काणो । तं पनस्स निमीलनं एकेन अक्खिना द्वीहिपि वाति आह “एकच्छिकाणो वा उभयच्छिकाणो वा”ति । कुणनं कुणो, हत्थवेकल्लं, सो एतस्स अत्थीति कुणी । खज्जो वुच्चति पादविकलो । हेडिमकायसङ्घातो सरीरस्स पक्खो पदेसो हतो अस्साति पक्खहतो । तेनाह “पीठसप्पी”ति । पदीपे पदीपने एतब्बं नेतब्बन्ति पदीपेय्यं, तेलकपालादिउपकरणं । वुत्तन्ति अट्ठकथायं वुत्तं ।

आगमनविपत्तीति आगमनद्वानवसेन विपत्ति “आगमो एत्था”ति कत्वा । पुब्बुप्पन्नपच्चयविपत्तीति पठमुप्पन्नपच्चयवसेन विपरावत्ति । चण्डालादिसभावा हिस्स मातापितरो पठमुप्पन्नपच्चयो । पवत्तपच्चयविपत्तीति पवत्ते सुखपच्चयविपत्ति । तादिसे निहीनकुले उप्पन्नोपि कोचि विभवसम्पन्नो सिया, अयं पन दुग्गतो दुरूपो ।

आजीवुपायविपत्तीति आजीवनुपायवसेन विपत्ति । सुखेन हि जीविकं पवत्तेतुं उपायभूता हत्थिसिप्पादयो इमस्स नत्थि, पुप्फछड्डुनसिलाकोट्टनादिकम्मं पन कत्वा जीविकं पवत्तेति । तेनाह “कसिरवुत्तिके”ति । अत्तभावविपत्तीति उपधिविपत्ति । दुक्खकारणसमायोगोति कायिकचेतसिकदुक्खुप्पत्तिया पच्चयसमोधानं । सुखकारणविपत्तीति सुखपच्चयपरिहानि । उपभोगविपत्तीति उपभोगसुखस्स विनासो अनुपलब्धि । जोति चेव जोतिपरायणभावो च सुक्कपक्खो । छट्ठं उत्तानमेव ।

पाणातिपातसुत्तादिवण्णना निड्ढिता ।

७. पुत्तसुत्तवण्णना

८७. सत्तमे म-कारो पदसन्धिकरो “अज्जमज्ज”न्ति आदीसु विय । निच्चलसमणोति थिरसमणो । अभिसिञ्चितब्बोति अभिसेकोति कम्मसाधनो अभिसेकसद्दो । तेनाह “अभिसेकं कातुं युत्तो”ति ।

बाकुलत्थेरो वियाति थेरो हि महायसस्सी, तस्स पुत्तधीतरो नत्तुपनत्तका सुखुमसाटकेहि चीवरानि कारेत्वा रजापेत्वा समुग्गे पक्खिपित्वा पहिणन्ति । थेरस्स नहानकाले नहानकोट्टके ठपेन्ति । थेरो तानि निवासेति चेव पारुपति च । तेनेवेतं वुत्तं ।

खदिरवनमग्गे सीवलित्थेरो वियाति सत्थरि किर तं मग्गं पटिपन्ने देवता “अम्हाकं अय्यस्स सीवलित्थेरस्स सक्कारं करिस्सामा”ति चिन्तेत्वा एकेकयोजने विहारं कारेत्वा एकयोजनतो उद्धं गन्तुं अदत्वा पातोव उट्ठाय दिब्बानि यागुआदीनि गहेत्वा “अम्हाकं अय्यो सीवलित्थेरो कहं निसिन्नो”ति विचरन्ति । थेरो अत्तनो अभिहटं बुद्धप्पमुखस्स भिक्खुसङ्घस्स दापेसि । एवं सत्था सपरिवारो तिसयोजनिकं कन्तारं सीवलित्थेरस्स पुज्जफलं अनुभवमानोव अगमासि । तेनेवेतं वुत्तं ।

अट्टकनागरसुत्ते आनन्दत्थेरो वियाति अट्टकनागरको किर गहपति थेरस्स धम्मदेसनाय पसीदित्वा पच्चसतग्घनकं विहारं कारेत्वा अदासि । तं सन्धायेतं वुत्तं ।

पिलिन्दवच्छत्थेरो वियाति थेरस्स किर इद्धानुभावेन पसन्ना मनुस्सा सप्पिआदीनि बहूनि भेसज्जानि अभिहरिंसु । पकतियापि च आयस्मा पिलिन्दवच्छो लाभी होति पच्चन्नं भेसज्जानं, लद्धं लद्धं परिसाय विस्सज्जेति । तेनेतं वुत्तं “गिलानपच्चयं पिलिन्दवच्छत्थेरो विया”ति ।

तिण्णम्पि सन्निपातेन निब्बत्तानीति पित्तादीनं तिण्णम्पि विसमानं सन्निपातेन जातानि । अतिसीतादिभावेन उत्तूनं परिणामोति आह “अतिसीतअतिउण्हउत्तुतो जातानी”ति । पुरिमउत्तुतो विसदिसो उत्तु उत्तुपरिणामो, ततो जातानि उत्तुपरिणामजानि, विसभागउत्तुतो जातानीति अत्थो । जङ्गलदेसवासीनज्झि अनूपदेसे वसन्तानं विसभागोव उत्तु उप्पज्जति, अनूपदेसवासीनज्ज जङ्गलदेसेति । एवं मलयसमुद्धतीरादिवसेनपि उत्तुविसभागता उप्पज्जतियेव । ततो जातानि उत्तुपरिणामजानि नाम ।

अत्तनो पकतिचरियानं विसमं कायस्स परिहरणवसेन विसमपरिहारजानि । तानि पन अच्छासनअतिट्ठानादिना वेदितब्बानीति आह “अच्छासनअतिट्ठानादिका”ति । आदि-सद्देन महाभारवहणसुधाकोट्टनअदेसकालचरणादीनि

सङ्गण्हाति । परस्स उपक्कमतो निब्बत्तानि **ओपक्कमिकानि**, अयं चोरोति वा पारदारिकोति वा गहेत्वा जण्णुककप्परमुगारादीहि निप्पोथनउपक्कमं पच्चयं कत्वा उप्पन्नानीति अत्थो । तेनाह “**वधबन्धनादिउपक्कमेन निब्बत्तानी**”ति । केवलन्ति बाहिरं पच्चयं अनपेक्खित्वा केवलं, तेन विनाति अत्थो । तेनाह “**पुब्बेकतकम्मविपाकवसेनेव जातानी**”ति ।

पुत्तसुत्तवण्णना निट्ठिता ।

८-१०. संयोजनसुत्तादिवण्णना

८८-९०. अट्टमे सोतापन्नो चतूहि वातेहि इन्दखीलो विय परप्पवादेहि अकम्पियो अचलसद्भाय समन्नागतत्ता सासने लद्धप्पतिट्ठो **समणमचलो** नामाति आह “**सासने लद्धप्पतिट्ठता**”तिआदि । थद्धभावकरानं किलेसानं सब्बसो **समुच्छिन्नत्ताति** चित्तस्स थद्धभावकरानं उद्धम्भागियकिलेसानं सब्बसो अभावा **समणसुखुमालो** नाम सुखुमालभावप्पत्तितो । नवमदसमानि सुविज्जेय्यानेव ।

संयोजनसुत्तादिवण्णना निट्ठिता ।

मचलवग्गवण्णना निट्ठिता ।

(१०) ५. असुरवग्गो

१-२. असुरसुत्तादिवण्णना

९१-९२. पञ्चमस्स पठमदुतियानि उत्तानत्थानेव ।

असुरसुत्तादिवण्णना निट्ठिता ।

३. दुतियसमाधिसुत्तवण्णना

९३. ततिये **अप्पटिवानी**ति भावप्पधानो निद्वेसोति आह “**अनिवत्तनता**”ति । “अप्पटिवानिता”ति वत्तब्बे “अप्पटिवानी”ति वुत्तं । तथा हि वीरियप्पवाहे वत्तमाने अन्तरा एव पटिगमनं निवत्तनं पटिवानं, तं अस्स अत्थीति पटिवानी, न पटिवानी अप्पटिवानी, तस्स भावो **अप्पटिवानिता**, अनिवत्तनाति अत्थो । **अप्पटिवानी**ति वा इत्थिलिङ्गवसेनेवायं निद्वेसो । अन्तरायेव पटिगमनं निवत्तनं पटिवानी, न पटिवानी **अप्पटिवानी**, अनिवत्तनाति अत्थो ।

दुतियसमाधिसुत्तवण्णना निट्ठिता ।

४. ततियसमाधिसुत्तवण्णना

९४. चतुत्थे **सण्ठपेतब्बन्ति** सम्मदेव ठपेतब्बं । यथा पन ठपितं सण्ठपितं होति, तं दस्सेतुं “**सन्निसादेतब्ब**”न्तिआदि वुत्तं । तत्थ **सन्निसादेतब्बन्ति** समाधिप्पटिपक्खे किलेसे सन्निसीदापेन्तेन चित्तं गोचरज्झत्ते

सन्निसीदापेतब्बन्ति । एकोदि कातब्बन्ति अब्यग्गभावापादनेन एकगं कातब्बं । समादहितब्बन्ति यथा आरम्मणे सुट्ठु अप्पितं होति, एवं सम्मा सम्मदेव आदहितब्बं, सुट्ठु आरोपेतब्बं समाहितं कातब्बन्ति अत्थो ।

ततियसमाधिसुत्तवण्णना निट्ठिता ।

५-६. छवालातसुत्तादिवण्णना

९५-९६. पञ्चमे छवालातन्ति छवानं दड्ढुट्ठाने अलातं । तेनेवाह “सुसाने अलात”न्ति । मज्झट्ठाने गूथमक्खितन्ति पमाणेन अट्ठङ्गुलमत्तं द्वीसु ठानेसु आदित्तं मज्झे गूथमक्खितं । कटुत्थन्ति कट्टेन कातब्बकिच्चं । सेसमेत्थ उत्तानमेव । छट्ठं उत्तानमेव ।

छवालातसुत्तादिवण्णना निट्ठिता ।

७-१०. खिप्पनिसन्तिसुत्तादिवण्णना

९७-१००. सत्तमे खिप्पनिसन्तीति खिप्पपज्जो । तेनाह “खिप्पनिसामनो”तिआदि । अनुरूपधम्मन्ति लोकोत्तराधिगमस्स अनुच्छविकसभावं । कल्याणा सुन्दरा परिमण्डलपदव्यञ्जना वाचा अस्साति कल्याणवाचो । तेनाह “सुन्दरवचनो”ति । कल्याणं मधुरं वाक्करणं उदाहारघोसो अस्साति कल्याणवाक्करणो । गुणपरिपुण्णभावेन पूरे पुण्णभावे भवाति पोरी, ताय पोरिया । तेनाह “गुणपरिपुण्णया”ति । पुरे भवत्ता पोरिया नागरिकित्थिया सुखुमालत्तनेन सदिसाति पोरी, ताय पोरिया । “सुखुमालत्तनेना”ति इमिना तस्सा वाचाय मुदुसण्हभावो वुत्तो । अपलिबुद्धायाति पित्तसेम्हादीहि न पलिवेठिताय । अदोसायाति सन्दिद्धविलम्बितादिदोसरहिताय अगळितपदव्यञ्जनायाति अपतितपदव्यञ्जनाय अविरहितपदव्यञ्जनाय । उभयमेतं अनेलगलायाति इमस्सेव अत्थवचनं । अनेलगलायाति हि अनेलाय चेव अगलाय चाति अत्थो । अत्थं विज्जापेतुं समत्थायाति आदिमज्झपरियोसानं पाकटं कत्वा भासितत्थस्स विज्जापनसत्थाय । अट्ठमनवमदसमानि उत्तानत्थानेव ।

खिप्पनिसन्तिसुत्तादिवण्णना निट्ठिता ।

असुरवग्गवण्णना निट्ठिता ।

दुतियपण्णासकं निट्ठितं ।

३. ततियपण्णासकं

(११) १. वलाहकवग्गो

१-२. वलाहकसुत्तद्वयवण्णना

१०१-२. ततियपण्णासकस्स पठमे गज्जिताति थनिता । तत्थ गज्जित्वा नोवस्सनभावो नाम पापको । मनुस्सा हि यदा देवो गज्जति, तदा “सुवुट्ठिता भविस्सती”ति बीजानि नीहरित्वा वपन्ति । अथ देवे अवस्सन्ते खेत्ते बीजानि खेत्तेयेव

नस्सन्ति, गेहे बीजानि गेहेयेव नस्सन्तीति दुब्भिकखं होति । नोगज्जित्वा वस्सनभावोपि पापको । मनुस्सा हि इमस्मिं काले “दुब्बुट्टिका भविस्सती”ति निन्नद्वानेसुयेव वप्पं करोन्ति । अथ देवो वस्सित्वा सब्बबीजानि महासमुदं पापेति, दुब्भिकखमेव होति । गज्जित्वा वस्सनभावो पन भद्दको । तदा हि सुभिकखं होति । नोगज्जित्वा नोवस्सनभावो एकन्तपापकोव । **भासिता होति नो कत्ता**ति “इदानीं गन्थधुरं पूरेस्सामि, वासधुरं पूरेस्सामी”ति कथेतियेव, न उद्देसं गण्हाति, न कम्मद्वानं भावेति ।

कत्ता होति नो भासिताति “गन्थधुरं पूरेस्सामि, वासधुरं वा”ति न भासति, सम्पत्ते पन काले समत्तं सम्पादेति । इमिना नयेन इतरेपि वेदितब्बा । अथ वा सब्बं पनेतं पच्चयदायकेहेव कथितं । एको हि “असुकदिवसे नाम दानं दस्सामी”ति सङ्गं निमन्तेति, सम्पत्ते काले नो करोति । अयं पुग्गलो पुज्जेन परिहायति, भिक्खुसङ्घो पन लाभेन परिहायति । अपरो सङ्गं अनिमन्तेत्वा सक्कारं कत्वा “भिक्खू आनेस्सामी”ति न लभि, सब्बे अज्जत्थ निमन्तिता होन्ति । अयम्पि पुज्जेन परिहायति, सङ्घोपि लाभेन परिहायति । अपरो पठमं सङ्गं निमन्तेत्वा पच्छा सक्कारं कत्वा दानं देति, अयं किच्चकारी होति । अपरो नेव सङ्गं निमन्तेति, न दानं देति, अयं पापपुग्गलोति वेदितब्बो । दुतियं उत्तानमेव ।

वलाहकसुत्तद्वयवण्णना निट्ठिता ।

३. कुम्भसुत्तवण्णना

१०३. ततिये **रित्तको**ति अन्तो रित्तो । **पिहितमुखो**ति पिदहित्वा ठपितो । **अपारुतमुखो**ति विवरित्वा ठपितो, उपमितपुग्गलेसु पनेत्थ अन्तो गुणसारविरहितो च **तुच्छो**, बाहिरसोभनताय **पिहितो** पुग्गलोति वेदितब्बो । सेसेसुपि एसेव नयो ।

कुम्भसुत्तवण्णना निट्ठिता ।

४. उदकरहदसुत्तवण्णना

१०४. चतुत्थे उदकरहदो जण्णुकमत्तेपि उदके सति पण्णरससम्भिन्नवण्णत्ता वा बहलत्ता वा उदकस्स अपज्जायमानतलो **उत्तानो गम्भीरोभासो** नाम होतीति आह “पुराणपण्णरस...पे०... **गम्भीरोभासो नामा**”ति । तिपोरिसचतुपोरिसे पन उदके सति अच्छत्ता उदकस्स पज्जायमानतलो **गम्भीरो उत्तानोभासो** नाम होतीति आह “**अच्छविप्पसन्नमणिवण्णउदको उत्तानोभासो नामा**”ति । उभयकारणसम्भवतो पन इतरे द्वे वेदितब्बा । पुग्गलेपि किलेसुस्सदभावतो गुणगम्भीरताय च अभावतो गुणगम्भीरानं सदिसेहि अभिक्कमनादीहि युत्तो **उत्तानो गम्भीरोभासो** नाम । इमिना नयेन सेसा वेदितब्बा ।

उदकरहदसुत्तवण्णना निट्ठिता ।

५-६. अम्बसुत्तादिवण्णना

१०५-६. पच्चमे **आमकं** हुत्वाति अन्तो आमं हुत्वा । **पक्कं आमवण्णी**ति अन्तो पक्कं बहि आमसदिसं । तत्थ यथा अम्बे अपक्कभावो आमता होति, एवं पुग्गलेपि पुथुज्जनता । यथा च तत्थ पक्कसदिसता पक्कवण्णिता, एवं

पुगगलेपि अरियानं अभिक्कमनादिसदिसता पक्कवणिताति इमिना नयेन सेसा वेदितब्बा । छट्ठं उत्तानमेव ।

अम्बसुत्तादिवण्णना निट्ठिता ।

७. मूसिकसुत्तवण्णना

१०७. सत्तमे आवाटं खनतीति अत्तनो आसयं बिलकूपं खनति । न च तत्थ वसतीति तत्थ अवसित्वा किस्मिच्चिदेव ठाने वसति, एवं बिळारादिअमित्तवसं गच्छति । वसिता नो गाधं कत्ताति सयं न खनति, परेन कते बिले वसति, एवं जीवितं रक्खति । ततिया द्वेपि करोन्ती जीवितं रक्खति । चतुत्थी द्वेपि अकरोन्ती अमित्तवसं गच्छति । इमाय पन उपमाय उपमितेसु पुगगलेसु पठमो यथा सा मूसिका गाधं खनति, एवं नवङ्गं सत्थुसासनं उग्गण्हाति । यथा पन सा तत्थ न वसति, किस्मिच्चिदेव ठाने वसन्ती अमित्तवसं गच्छति, तथा अयम्पि परियत्तिवसेन जाणं पेसेत्वा चतुसच्चधम्मं न पटिविज्झति, लोकामिसद्धानेसु विचरन्तो मच्चुमारकिलेसमारदेवपुत्तमारसङ्घातानं वसं गच्छति । दुतियो यथा मूसिका गाधं न खनति, एवं नवङ्गं सत्थुसासनं न उग्गण्हाति । यथा पन परेन खनिते बिले वसन्ती जीवितं रक्खति, एवं परस्स कथं सुत्वा चतुसच्चधम्मं पटिविज्झित्वा तिण्णं मारानं वसं अतिक्कमति । इमिना नयेन ततियचतुत्थेसुपि ओपम्मसंसन्दनं वेदितब्बं ।

मूसिकसुत्तवण्णना निट्ठिता ।

८. बलीबद्दसुत्तवण्णना

१०८. अट्ठमे बलीबद्दो ताव यो अत्तनो गोगणं घट्टेति उब्बेजेति, परगोणे पन सूरतो सुखसीलो होति, अयं सगवचण्डो नो परगवचण्डो नाम । पुगगलोपि अत्तनो परिसं घट्टेन्तो विज्झन्तो फरुसे समुदाचरन्तो, परपरिसाय पन सोरच्चं निवातवुत्तितं आपज्जन्तो सगवचण्डो नामाति इमिना नयेन सेसापि वेदितब्बा ।

बलीबद्दसुत्तवण्णना निट्ठिता ।

९. रुक्खसुत्तवण्णना

१०९. नवमे रुक्खो ताव फेग्गु सारपरिवारोति वनजेट्ठकरुक्खो सयं फेग्गु होति, परिवाररुक्खा पनस्स सारा होन्ति । इमिना नयेन सेसा वेदितब्बा । पुगगलेसु पन सीलसारविरहिततो फेग्गुता, सीलाचारसमन्नागमेन च सारता वेदितब्बा ।

रुक्खसुत्तवण्णना निट्ठिता ।

१०. आसीविससुत्तवण्णना

११०. दसमे यस्स विसं पज्जलिततिणुक्काय अग्गि विय सीघं अभिरुहित्वा अक्खीनि गहेत्वा खन्धं गहेत्वा सीसं गहेत्वा ठितन्ति वत्तब्बतं आपज्जति मणिसप्पादीनं विसं विय, मन्तं पन परिवत्तेत्वा कण्णवातं दत्वा दण्डकेन पहटमत्ते ओतरित्वा दट्ठुद्धानेयेव तिट्ठति, अयं आगतविसो न घोरविसो नाम । यस्स पन विसं सणिकं अभिरुहति, आरुळ्हारुळ्हुद्धाने पन आसित्तउदकं विय होति उदकसप्पादीनं विय, द्वादसवस्सच्चयेनपि कण्णविद्धखन्धपिट्ठिकादीसु पज्जायति, मन्तपरिवत्तनादीसु च करियमानेसु सीघं न ओतरति, अयं घोरविसो न आगतविसो नाम । यस्स पन विसं

सीधं अभिरुहति, न सीधं ओतरति अनेळकसप्पादीनं विसं विय, अयं **आगतविसो च घोरविसो च**।
अनेळकसप्पो नाम महाआसीविसो। यस्स विसं मन्दं होति, ओहारियमानम्पि सुखेनेव ओतरति नीलसप्पधमनिसप्पादीनं
 विसं विय, अयं **नेव आगतविसो न घोरविसो**। **नीलसप्पो** नाम साखवण्णो रुक्खग्गादीसु विचरणसप्पो।

आसीविससुत्तवण्णना निड्ढिता।

वलाहकवग्गवण्णना निड्ढिता।

(१२) २. केसिवग्गो

१-७. केसिसुत्तादिवण्णना

१११-११७. दुतियस्स पठमे **अस्सदम्मे**ति दम्मनयोगे अस्से। **सारेती**ति सिक्खापेति पवत्तेति। सेसमेत्थ उत्तानमेव।
 दुतियादीनि उत्तानत्थानेव।

केसिसुत्तादिवण्णना निड्ढिता।

८-१०. संवेजनीयसुत्तादिवण्णना

११८-१२०. अट्ठमे **सद्धस्सा**ति बुद्धादीसु पसन्नचित्तस्स वत्तसम्पन्नस्स, यस्स पातो वुट्ठाय चेतियङ्गणवत्तादीनि
 सब्बवत्तानि कतानेव पज्जायन्ति। **दस्सनीयानी**ति दस्सनारहानि। **संवेगो** नाम सहोत्तप्पं जाणं। अभिजातिट्ठानादीनिपि
 तस्स उप्पत्तिहेतूनि भवन्तीति सिक्खापेन्तो आह “**संवेगजनकानी**”ति। **ठानानी**ति कारणानि, पदेसट्ठानानि वा।
 नवमदसमानि सुविज्जेय्यानि।

संवेजनीयसुत्तादिवण्णना निड्ढिता।

केसिवग्गवण्णना निड्ढिता।

(१३) ३. भयवग्गो

१. अत्तानुवादसुत्तवण्णना

१२१. ततियस्स पठमे **अत्तानं अनुवदन्तस्स उप्पज्जनकभयन्ति** अत्तानं अनुवदन्तस्स पापकम्मिनो
 उप्पज्जनकभयं। **द्वत्तिसकम्मकारणे पटिच्च उप्पज्जनकभयन्ति** अगारिकानं वसेन वुत्तं, अनगारिकानं पन विनयदण्डं
 पटिच्च उप्पज्जनकभयम्पि दण्डभयन्तेव सङ्खं गच्छति। सेसं सुविज्जेय्यमेव।

अत्तानुवादसुत्तवण्णना निड्ढिता।

२. ऊमिभयसुत्तवण्णना

१२२. दुतिये कोधूपायासस्सेतं अधिवचनन्ति एत्थ कुज्झनट्टेन कोधो, स्वेव चित्तस्स कायस्स च अतिप्पमहनमथनुप्पादनेहि दब्बहायासट्टेन उपायासो । अनेकवारं पवत्तित्वा अत्तना समवेतं सत्तं अज्झोत्थरित्वा सीसं उक्खिपितुं अदत्त्वा ऊमिसदिसता दट्ठब्बा । यथा हि बाहिरं उदकं ओतिण्णो ऊमीसु ओसीदित्वा मरति, एवं इमस्मिं सासने कोधूपायासे ओसीदित्वा विब्भमति, तस्मा कोधूपायासो “ऊमिभय”न्ति वुत्तो । ओदरिकत्तस्सेतं अधिवचनन्ति यथा हि बाहिरं उदकं ओतिण्णो कुम्भीलेन खादितो मरति, एवं इमस्मिं सासने ओदरिकत्तेन ओदरिकभावेन आमिसगेधेन मिच्छाजीवेन जीविककप्पनेन नासितसीलादिगुणताय खादितधम्मसरीरो विब्भमति, तस्मा ओदरिकत्तं “कुम्भीलभय”न्ति वुत्तं ।

अनुपट्ठिताय सतियाति कायगतं सतिं अनुट्ठापेत्वा । असंवुत्तेहीति अपिहितेहि । पञ्चन्नेतं कामगुणानं अधिवचनन्ति यथा हि बाहिरं उदकं ओतिण्णो आवट्टे निमुज्जित्वा मरति, एवं इमस्मिं सासने पब्बजितो पञ्चकामगुणावट्टे निमुज्जित्वा विब्भमति । कामरागाभिभूतो हि सत्तो इतो च एत्तो, एत्तो च इतोति एवं मनापियरूपादिविसयसङ्घाते आवट्टे अत्तानं संसारेत्वा यथा ततो बहिभूते नेक्खम्मे चित्तम्पि न उप्पादेति, एवं आवट्टेत्वा ब्यसनापादनेन कामगुणानं आवट्टसदिसता दट्ठब्बा ।

अनुद्धंसेतीति किलमेति विलोलति । रागानुद्धंसितेनाति रागेन अनुद्धंसितेन । मातुगामस्सेतं अधिवचनन्ति । यथा हि बाहिरं उदकं ओतिण्णो चण्डमच्छं आगम्म लद्धप्पहारो मरति, एवं इमस्मिं सासने मातुगामं आरब्ध उप्पन्नकामरागो विब्भमति, तस्मा मातुगामो “सुसुकाभय”न्ति वुत्तो । मातुगामो हि योनिसोमनसिकाररहितं अधीरपुरिसं इत्थिकुत्तभूतेहि अत्तनो हासभावविलासेहि अभिभुय्य गहेत्वा धीरजातिकम्पि अत्तनो रूपादीहि सम्पलोभनवसेन अनवसेसं अत्तनो उपकारधम्मे सीलादिके सम्पादेतुं असमत्थं करोन्तो अनयव्यसनं पापेति ।

इमानि पन चत्तारि भयानि भायित्वा यथा उदकं अनोरोहन्तस्स उदकं निस्साय उदकपिपासाविनयनं सरीरसुद्धिपरिळाहूपसमो कायउतुग्गाहापनन्ति, एवमादि आनिसंसो नत्थि, एवमेवं इमानि चत्तारि भयानि भायित्वा सासने अपब्बजन्तस्सपि इमं सासनं निस्साय सङ्खेपतो वट्टदुक्खूपसमो, वित्थारतो पन सीलानिसंसादिवसेन अनेकविधो आनिसंसो नत्थि । यथा पन इमानि चत्तारि भयानि अभायित्वा उदकं ओरोहन्तस्स वुत्तप्पकारो आनिसंसो होति, एवं इमानि अभायित्वा सासने पब्बजन्तस्सपि वुत्तप्पकारो आनिसंसो होति । महाधम्मरक्खितत्थेरो पनाह “चत्तारि भयानि भायित्वा उदकं अनोतरन्तो सोतं छिन्दित्वा परतीरं पापुणितुं न सक्कोति, अभायित्वा ओतरन्तो सक्कोति, एवमेवं भायित्वा सासने अपब्बजन्तोपि तण्हासोतं छिन्दित्वा निब्बानपारं दट्ठुं न सक्कोति, अभायित्वा पब्बजन्तो सक्कोती”ति ।

ऊमिभयसुत्तवण्णना निट्ठिता ।

३. पठमनानाकरणसुत्तवण्णना

१२३. ततिये ब्रह्मकायिकानं देवानन्ति एत्थ ब्रह्मानं कायो समूहोति ब्रह्मकायो, तप्परियापन्नताय तत्थ गताति ब्रह्मकायिका । एताय च सब्बस्सपि ब्रह्मकायस्स समज्जाय भवितव्वं । आभस्सरानं देवानन्ति आदिना पन दुतियज्झानभूमिकादीनं उपरि गहितत्ता गोबलीबद्धज्जायेन तदवसिट्ठानं अयं समज्जा, तस्मा “ब्रह्मकायिकानं देवान”न्ति पठमज्झानभूमिकानयेव गहणं वेदितव्वं । सह ब्ययति गच्छतीति सहब्यो, सहवत्तनको । तस्स भावो सहव्यता, सहपवत्तीति आह “सहभावं उपगच्छती”ति । कप्पो आयुप्पमाणन्ति एत्थ यदिपि ब्रह्मपारिसज्जादीनं आयुनो अन्तरं अत्थि,

उक्कट्टपरिच्छेदेन पनेतं वुत्तन्ति दस्सेन्तो “पठमज्झानं अत्थि हीन”न्ति आदिमाह ।

द्वे कप्पा आयुप्पमाणन्ति एत्थ पन हीनज्झानेन निब्बत्तानं वसेन अयं परिच्छेदो कतोति दस्सेतुं “दुतियज्झानं वुत्तनयेनेव तिविधं होती”ति आदि आरब्धं । चत्तारो कप्पाति एत्थ पन उक्कट्टपरिच्छेदेन चतुसट्ठि कप्पा वत्तब्बाति दस्सेन्तो “यं हेट्ठा वुत्तं ‘कप्पो द्वे कप्पा’ति, कप्पि आहरित्वा अत्थो वेदितब्बो”ति आह । कथं पनेत्थ अयमत्थो लब्धतीति आह “कप्पोति च गुणस्सपि नाम”न्ति । तत्थ पठमं वुत्तो कप्पो, ततो एकेन गुणेन, एकस्मिं वारे गणनायाति अत्थो । द्वे कप्पा होन्तीति एकवारगणनाय कप्पस्स द्विगुणितत्ता द्वे महाकप्पा होन्तीति अत्थो । दुतियेनाति दुतियवारगणनाय । चत्तारोति दुतियवारगणनाय द्वीसु कप्पेसु द्विगुणितेसु चत्तारो महाकप्पा होन्तीति अत्थो । पुन ते चत्तारो कप्पाति वुत्तनयेन द्वे वारे गुणेत्वा ये चत्तारो कप्पा दस्सिता, पुन ते चत्तारो कप्पा चतुग्गुणा होन्तीति अत्थो । इदं वुत्तं होति — द्वे वारे गुणेत्वा ये चत्तारो कप्पा दस्सिता, तेसु चतुक्खत्तुं गुणितेसु चतुसट्ठि कप्पा सम्पज्जन्तीति । तथा हि चत्तारो एकस्मिं वारे गुणिता अट्ठ होन्ति, पुन ते अट्ठ दुतियवारे गुणिता सोळस होन्ति, पुन ते सोळस ततियवारे गुणिता द्वत्तिस होन्ति, पुन ते द्वत्तिस चतुत्थवारे गुणिता चतुसट्ठि होन्ति । तेनेवाह “इमेहि चतूहि गुणेहि गुणिता एकेन गुणेन अट्ठ होन्ती”ति आदि । एत्थ च हेट्ठा उपोसथसुत्ते (अ० नि० ३.७१) —

“यानि मानुसकानि पज्जास वस्सानि, चातुमहाराजिकानं देवानं एसो एको रत्तिन्दिवो”ति —

आदिना कामावचरदेवानमेव आयुप्पमाणं दस्सितं । हेट्ठायेव —

“तयोमे, भिक्खवे, पुग्गला सन्तो संविज्जमाना लोकस्मिं । कतमे तयो? इध, भिक्खवे, एकच्चो पुग्गलो सब्बसो रूपसज्जानं समतिक्कमा...पे०... आकासानज्जायतनूपगानं देवानं सहब्यतं उपपज्जति । आकासानज्जायतनूपगानं, भिक्खवे, देवानं वीसति कप्पसहस्सानि आयुप्पमाण”न्ति (अ० नि० ३.११७) —

आदिना अरूपावचरानयेव आयुप्पमाणं वुत्तं । इध पन रूपावचरानमेव आयुप्पमाणं दस्सितं । विभङ्गपाळियं (विभ० १०२२) पन “मनुस्सानं कित्तकं आयुप्पमाणं, वस्ससतं अप्पं वा भिय्यो”ति आदिना देवमनुस्सानज्जेव रूपारूपावचरसत्तानज्ज आयुप्पमाणं दस्सितं ।

तत्थ सम्मासम्बुद्धेन मनुस्सानं देवानज्ज आयुं परिच्छिन्दमानेन चतूसु अपायेसु भुम्मदेवेसु च आयु न परिच्छिन्नं । तं कस्माति? निरये ताव कम्ममेव पमाणं । याव कम्मं न खीयति, ताव पच्चन्ति । तथा सेसअपायेसु । भुम्मदेवानप्पि कम्ममेव पमाणं । तत्थ निब्बत्ता हि केचि सत्ताहमत्तं तिट्ठन्ति, केचि अट्ठमासं, कप्पं तिट्ठमानापि अत्थियेव । तत्थ मनुस्सेसु गिहिभावे ठितायेव सोतापन्नापि होन्ति, सकदागामिफलं अनागामिफलं अरहत्तम्पि पापुणन्ति, तेसु सोतापन्नादयो यावजीवं तिट्ठन्ति, खीणासवा पन परिनिब्बायन्ति वा पब्बजन्ति वा । कस्मा? अरहत्तं नाम सेट्ठगुणं, गिहिलिङ्गं हीनं, तं हीनताय उत्तमं गुणं धारेतुं न सक्कोति, तस्मा ते परिनिब्बातुकामा वा होन्ति पब्बजितुकामा वा । भुम्मदेवा पन अरहत्तं पत्तापि यावजीवं तिट्ठन्ति, छसु कामावचरेसु देवेसु सोतापन्नसकदागामिनो यावजीवं तिट्ठन्ति, अनागामिना रूपभवं गन्तुं वट्ठति खीणासवेन परिनिब्बातुं । कस्मा? निलीयनोकासस्स अभावा । रूपावचरारूपावचरेसु सब्बेपि यावजीवं तिट्ठन्ति, तत्थ रूपावचरे निब्बत्ता सोतापन्नसकदागामिनो न पुन इधागच्छन्ति, तत्थेव परिनिब्बायन्ति । एते हि ज्ञानअनागामिनो नाम ।

अट्ठसमापत्तिलाभीनं पन किं नियमेति? पगुणज्झानं । यदेवस्स पगुणं होति, तेन उपपज्जति । सब्बेसु पगुणेषु किं

नियमेति? नेवसज्जानासज्जायतनसमापत्ति । एकंसेनेव हि सो नेवसज्जानासज्जायतने उपपज्जति । नवसु ब्रह्मलोकेसु निब्बत्तअरियसावकानं ततूपपत्तिपि उपरूपपत्तिपि, न हेटूपपत्ति । पुथुज्जनानं पन ततूपपत्तिपि होति, उपरूपपत्तिपि, हेटूपपत्तिपि । पञ्चसु सुद्धावासेसु चतूसु च अरूपेसु अरियसावकानं ततूपपत्तिपि होति उपरूपपत्तिपि । पठमज्झानभूमियं निब्बत्तो अनागामी नव ब्रह्मलोके सोधेत्वा मत्थके ठितो परिनिब्बाति । वेहप्फलं, अकनिट्ठं, नेवसज्जानासज्जायतनन्ति इमे तयो देवलोका सेट्ठभवा नाम । इमेसु तीसु ठानेसु निब्बत्तअनागामिनो नेव उद्धं गच्छन्ति, न अधो, तत्थ तत्थेव परिनिब्बायन्तीति इदं पकिण्णकं वेदितव्वं ।

पठमनानाकरणसुत्तवण्णना निट्ठिता ।

४-६. दुतियनानाकरणसुत्तादिवण्णना

१२४-६. चतुत्थे ते धम्मेति ते “रूपगत”न्तिआदिना नयेन वुत्ते रूपादयो धम्मे । अनिच्चतोति इमिना निच्चप्पटिक्खेपतो तेसं अनिच्चतमाह, ततो एव च उदयवयवन्ततो विपरिणामतो तावकालिकतो च ते अनिच्चाति जोतितं होति । यज्झि निब्बत्तं होति, तं उदयवयवपरिच्छिन्नं । जराय मरणेन च तदेव विपरीतं, इत्तरक्खणमेव च होतीति । दुक्खतोति इमिना सुखप्पटिक्खेपतो तेसं दुक्खतमाह । ततो एव च अभिण्हप्पटिपीळनतो दुक्खवत्थुतो च ते दुक्खाति जोतितं होति । उदयवयवन्तताय हि ते अभिण्हप्पटिपीळनतो निरन्तरदुक्खताय दुक्खस्सेव च अधिट्ठानभूता । पच्चययापनीयताय रोगमूलताय च रोगतो । दुक्खतासूलयोगतो किलेसासुचिपग्घरणतो उप्पादजराभङ्गेहि उद्धमातपरिपक्कपभिन्नतो च गण्डतो । पीळाजननतो, अन्तोतुदनतो, दुन्नीहरणतो च सल्लतो । अवट्ठिआवहनतो अघवत्थुतो च अघतो । असेरिभावजननतो आबाधपदट्ठानताय च आबाधतो । अवसवत्तनतो अविधेय्यताय च परतो । ब्याधिजरावरणेहि पलुज्जनीयताय पलोकतो । सामिनिवासिकारकवेदकअधिट्ठायकविरहतो सुज्जतो । अत्तप्पटिक्खेपट्ठेन अनत्ततो । रूपादिधम्मा हि न एत्थ अत्ता अत्थीति अनत्ता । एवं सयम्पि अत्ता न होन्तीति अनत्ता । तेन अब्यापारतो निरीहतो तुच्छतो अनत्ताति दीपितं होति । लक्खणत्तयमेव सुखावबोधनत्थं एकादसहि पदेहि विभजित्वा गहितन्ति दस्सेतुं “तत्था”तिआदि वुत्तं । पञ्चमछट्ठानि उत्तानत्थानेव ।

दुतियनानाकरणसुत्तादिवण्णना निट्ठिता ।

७. पठमत्थागतअच्छरियसुत्तवण्णना

१२७. सत्तमे वत्तमानसमीपे वत्तमाने विय वोहरितव्वन्ति “ओक्कमती”ति आह “ओक्कन्तो होतीति अत्थो”ति । दससहस्सचक्कवाळपत्थरणो समुज्जलभावेन उळारो । देवानुभावन्ति देवानं पभानुभावं । देवानज्झि पभं सो ओभासो अधिभवति, न देवे । तेनाह “देवान”न्तिआदि । रुक्खगच्छादिना केनचि न हज्जतीति अघा, असम्बाधा । तेनाह “निच्चविवरा”ति । असंवुताति हेट्ठा उपरि केनचि अपिहिता । तेनाह “हेट्ठापि अप्पतिट्ठा”ति । तत्थ पि-सद्देन यथा हेट्ठा उदकस्स पिधायिका सन्धारिका पथवी नत्थि असंवुता लोकन्तरिका, एवं उपरिपि चक्कवाळेसु देवविमानानं अभावतो असंवुता अप्पतिट्ठाति दस्सेति । अन्धकारो एत्थ अत्थीति अन्धकारा । चक्खुविज्जाणं न जायति आलोकस्स अभावतो, न चक्खुनो । तथा हि “तेनोभासेन अज्जमज्जं सज्जानन्ती”ति वुत्तं । जम्बुदीपे ठितमज्झन्हिकवेलाय पुब्बविदेहवासीनं अत्थङ्गमवसेन उपट्ठं सूरियमण्डलं पज्जायति, अपरगोयानवासीनं उग्गमनवसेन । एवं सेसदीपेसुपीति आह “एकप्पहारेनेव तीसु दीपेसु पज्जायन्ती”ति । इतो अज्जथा द्वीसु एव दीपेसु पज्जायन्ति । एकेकाय दिसाय

नवनवयोजनसतसहस्सानि अन्धकारविधमनम्पि इमिनाव नयेन ददृब्बं । पभाय नप्पहोन्तीति अत्तनो पभाय ओभासितुं नाभिसम्भुणन्ति । युगन्धरपब्बतमत्थकसमप्पमाणे आकासे विचरणतो “चक्कवाळपब्बतस्स वेमज्जेन चरन्ती”ति वुत्तं ।

ब्यावटाति खादनत्थं गण्हितुं उपक्कमन्ता । विपरिवत्तित्वाति विवट्टित्वा । छिज्जित्वाति मुच्छापवत्तिया ठितट्ठानतो मुच्चित्वा, अङ्गपच्चङ्गछेदनवसेन वा छिज्जित्वा । अच्चन्तखारेति आतपसन्तपाभावेन अतिसीतभावं सन्धाय अच्चन्तखारता वुत्ता सिया । न हि तं कप्पसण्ठानउदकं सम्पत्तिकरमहामेघवुट्ठं पथविसन्धारकं कप्पविनासकउदकं विय खारं भवितुमरहति, तथा सति पथवीपि विलीयेय्य, तेसं वा पापकम्मफलेन पेतानं पकतिउदकस्स पुब्बखेळभावापत्ति विय तस्स उदकस्स खारभावापत्ति होतीति वुत्तं “अच्चन्तखारे उदके”ति ।

पठमतथागतअच्छरियसुत्तवण्णना निट्ठिता ।

८. दुतियतथागतअच्छरियसुत्तवण्णना

१२८. अट्टमे आलीयन्ति आरमितब्बट्टेन सेवीयन्तीति आलया, पञ्च कामगुणा । आरमन्तीति रतिं विन्दन्ति कीळन्ति लळन्ति । आलीयन्ति वा अल्लीयन्ता अभिरमणवसेन सेवन्तीति आलया, तण्हाविचरितानि । तेहि आलयेहि रमन्तीति आलयारामा । यथेव हि सुसज्जितं पुप्फफलभरितरुक्खादिसम्पन्नउय्यानं पविट्ठो राजा ताय सम्पत्तिया रमति, सम्मुदितो आमोदितप्पमोदितो होति, न उक्कण्ठेति, सायम्पि निक्खमितुं न इच्छति, एवमिमेहि कामालयतण्हालयेहि सत्ता रमन्ति, संसारवट्टे पमुदिता अनुक्कण्ठिता वसन्ति । तेन तेसं भगवा दुविधम्पि आलयं उय्यानभूमिं विय दस्सेन्तो “आलयारामा”तिआदिमाह । सेसमेत्थ उत्तानमेव ।

दुतियतथागतअच्छरियसुत्तवण्णना निट्ठिता ।

९-१०. आनन्दअच्छरियसुत्तादिवण्णना

१२९-१३०. नवमे पटिसन्धारधम्मन्ति पकतिचारित्तवसेन वुत्तं, उपगतानं पन भिक्खूनं भिक्खुनीनञ्च पुच्छाविस्सज्जनवसेन चेव चित्तरुचिवसेन च यथाकालं धम्मं देसेतियेव, उपासकउपासिकानं पन उपनिसिन्नककथावसेन । दसमं उत्तानमेव ।

आनन्दअच्छरियसुत्तादिवण्णना निट्ठिता ।

भयवग्गवण्णना निट्ठिता ।

(१४) ४. पुग्गलवग्गो

१. संयोजनसुत्तवण्णना

१३१. चतुत्थस्स पठमे उपपत्तिप्पटिलाभं संवत्तनिकानीति उपपत्तिपटिलाभियानि । भवपटिलाभियानीति एत्थापि

एसेव नयो । येहीति येहि संयोजनेहि हेतुभूतेहि, करणभूतेहि वा । ननु च सोतापन्नस्सपि ओरम्भागियानि संयोजनानि अप्पहीनानि, कस्मा पन सकदागामीयेव इध गहितोति आह “सकदागामिस्साति इदं अप्पहीनसंयोजनेसु अरियेसु उत्तमकोटिया गहितं” न्ति । तत्थ अप्पहीनसंयोजनेसूति अप्पहीनओरम्भागियसंयोजनेसु । उत्तमकोटिया गहितन्ति उक्कट्टपरिच्छेदेन गहितं । सकदागामितो परञ्चि अप्पहीनओरम्भागियसंयोजनो अरियो नाम नत्थि । ननु च सकदागामिस्स पहीनानिपि ओरम्भागियानि संयोजनानि अत्थि दिट्ठिविचिकिच्छासीलब्बतपरामाससंयोजनानं पहीनत्ता, तस्मा “ओरम्भागियानि संयोजनानि अप्पहीनानी” ति कस्मा वुत्तन्ति आह “ओरम्भागियेसु च अप्पहीनं उपादाया” तिआदि । यस्मा कामरागव्यापादसंयोजनानि सकदागामिस्स अप्पहीनानि, तस्मा तानि अप्पहीनानि उपादाय “ओरम्भागियानि संयोजनानि अप्पहीनानी” ति वुत्तं, न सब्बेसं अप्पहीनत्ताति अधिप्पायो ।

संयोजनसुत्तवण्णना निट्ठिता ।

२. पटिभानसुत्तवण्णना

१३२. दुतिये पटिभानं वुच्चति जाणम्पि जाणस्स उपट्ठितवचनम्पि, तं इध अधिप्पेतं, अत्थयुत्तं कारणयुत्तञ्च पटिभानमस्साति युत्तप्पटिभानो । पुच्छानन्तरमेव सीधं ब्याकातुं असमत्थताय नोमुत्तप्पटिभानमस्साति नोमुत्तप्पटिभानो । इमिना नयेन सेसा वेदितब्बा । एत्थ पन पठमो कञ्चि कालं वीमंसित्वा युत्तमेव पेक्खति तिपिटकचूळनागत्येरो विय । सो पन पञ्चं पुट्ठो परिग्गहेत्वा युत्तप्पत्तकारणमेव कथेति । दुतियो पुच्छानन्तरमेव येन वा तेन वा वचनेन पटिबाहति, वीमंसित्वापि च युत्तं न पेक्खति चतुनिकायिकपिण्डतिस्सत्थेरो विय । सो पन पञ्चं पुट्ठो पञ्चपरियोसानम्पि नागमेति, यं वा तं वा कथेति येव, वचनत्थं पनस्स वीमंसियमानं कत्थचि न लगति । ततियो पुच्छासमकालमेव युत्तं पेक्खति, तंखणंयेव च नं ब्याकरोति तिपिटकचूळाभयत्थेरो विय । सो पन पञ्चं पुट्ठो सीधमेव कथेति, युत्तप्पत्तकारणो च होति । चतुत्थो पुट्ठो समानो नेव युत्तं पेक्खति, न येन वा तेन वा पटिबाहितुं सक्कोति, तिब्बन्धकारनिमुग्गो विय होति लाळुदायित्थेरो विय ।

पटिभानसुत्तवण्णना निट्ठिता ।

३-४. उग्घटितञ्जूसुत्तादिवण्णना

१३३-४. ततिये उग्घटितञ्जूति एत्थ उग्घटनं नाम जाणुग्घटनं, जाणेन उग्घटितमत्तेयेव जानातीति अत्थो । सह उदाहटवेलायाति उदाहारे उदाहटमत्तेयेव । धम्माभिसमयो होतीति चतुसच्चधम्मस्स जाणेन सद्धिं अभिसमयो । अयं वुच्चतीति अयं “चत्तारो सतिपट्ठाना” तिआदिना (विभ० ३५५) नयेन संखित्तेन मातिकाय ठपियमानाय देसनानुसारेन जाणं पेसेत्वा अरहत्तं गणितुं समत्थो पुग्गलो “उग्घटितञ्जू” ति वुच्चति । विपज्चितं वित्थारितमेव अत्थं जानातीति विपज्चितञ्जू । अयं वुच्चतीति अयं संखित्तेन मातिकं ठपेत्वा वित्थारेन अत्थे भाजियमाने अरहत्तं पापुणितुं समत्थो पुग्गलो “विपज्चितञ्जू” ति वुच्चति । उद्देसादीहि नेतब्बोति नेय्यो । अनुपुब्बेन धम्माभिसमयोति अनुक्कमेन अरहत्तप्पत्ति । ब्यञ्जनपदमेव परमं अस्साति पदपरमो । न ताय जातिया धम्माभिसमयो होतीति तेन अत्तभावेन ज्ञानं वा विपस्सनं वा मग्गं वा फलं वा निब्बत्तेतुं न सक्कोतीति अत्थो । चतुत्थं उत्तानमेव ।

उग्घटितञ्जूसुत्तादिवण्णना निट्ठिता ।

५-८. सावज्जसुत्तादिवण्णना

१३५-८. पञ्चमे सावज्जोति सदोसो । सावज्जेन कायकम्मेनाति सदोसेन पाणातिपातादिना कायकम्मेन । इतरेसुपि एसेव नयो । अयं वुच्चतीति अयं पुगगलो तीहि द्वारेहि आयूहनकम्मस्स सदोसत्ता गूथकुणपादिभरितो पदेसो विय “सावज्जो”ति वुच्चति । सावज्जेन बहुलन्ति यस्स सावज्जमेव कायकम्मं बहुलं होति, अप्पं अनवज्जं । सो “सावज्जेन बहुलं कायकम्मेन समन्नागतो अप्पं अनवज्जेना”ति वुच्चति । इतरेसुपि एसेव नयो । को पन एवरूपो होतीति? यो गामधम्मताय वा निगमधम्मताय वा कदाचि करहचि उपोसथं समादियति, सीलानि पूरेति । अयं वुच्चतीति अयं पुगगलो तीहि द्वारेहि आयूहनकम्मेसु सावज्जस्सेव बहुलताय अनवज्जस्स अप्पताय “वज्जबहुलो”ति वुच्चति । यथा हि एकस्मिं पदेसे दुब्बण्णानि दुग्गन्धानि पुप्फानि रासिकतानस्सु, तेसं उपरि तहं तहं अधिमुत्तकवस्सिकपाटलानि पतितानि भवेय्युं, एवरूपो अयं पुगगलो वेदितब्बो । यथा पन एकस्मिं पदेसे अधिमुत्तकवस्सिकपाटलानि रासिकतानस्सु, तेसं उपरि तहं तहं दुग्गन्धानि बदरपुप्फादीनि पतितानि भवेय्युं । एवरूपो ततियो पुगगलो वेदितब्बो । चतुत्थो पन तीहि द्वारेहि आयूहनकम्मस्स निदोसत्ता च चतुमधुरभरितसुवण्णवाति विय दट्ठब्बो । छट्ठादीनि उत्तानत्थानेव ।

सावज्जसुत्तादिवण्णना निड्ढिता ।

९-१०. धम्मकथिकसुत्तादिवण्णना

१३९-१४०. नवमे अप्पञ्च भासतीति सम्पत्तपरिसाय थोकमेव कथेति । असहितज्वाति कथेन्तो च पन न अत्थयुत्तं कालयुत्तं कथेति । परिसा चस्स न कुसला होतीति सोतुं निसिन्नपरिसा चस्स युत्तायुत्तं कारणाकारणं सिलिद्धासिलिद्धं न जानातीति अत्थो । एवरूपोति अयं एवंजातिको बालधम्मकथिको एवंजातिकाय बालपरिसाय धम्मकथिकोत्वेव नामं लभति । इमिना नयेन सब्बत्थ अत्थो वेदितब्बो । एत्थ च द्वेयेव जना सभावधम्मकथिका, न इतरे । इतरे पन धम्मकथिकानं अन्तो पविट्ठत्ता एवं वुत्ता । दसमं उत्तानमेव ।

धम्मकथिकसुत्तादिवण्णना निड्ढिता ।

पुगगलवग्गवण्णना निड्ढिता ।

(१५) ५. आभावग्गो

१-६. आभासुत्तादिवण्णना

१४१-१४६. पञ्चमस्स पठमादीनि उत्तानत्थानेव ।

आभासुत्तादिवण्णना निड्ढिता ।

७-१०. दुतियकालसुत्तादिवण्णना

१४७-१५०. सत्तमे परमत्थतो अविज्जमानसभावस्स कालस्स भावनादियोगो न सम्भवतीति आह “कालाति तस्मिं तस्मिं काले धम्मस्सवनादिवसेन पवत्तानं कुसलधम्मानं एतं अधिवचन”न्ति । कालसहचरिता हि कुसला धम्मा इध काल-सद्देन गहिता अपरस्स असम्भवतो । अट्ठमादीनि उत्तानत्थानेव ।

दुतियकालसुत्तादिवण्णना निड्ढिता ।

आभावग्गवण्णना निड्ढिता ।

ततियपण्णासकं निड्ढितं ।

४. चतुत्थपण्णासकं

(१६) १. इन्द्रियवग्गो

१-५. इन्द्रियसुत्तादिवण्णना

१५१-१५५. चतुत्थस्स पठमादीनि उत्तानानेव ।

इन्द्रियसुत्तादिवण्णना निड्ढिता ।

६-८. कप्पसुत्तादिवण्णना

१५६-१५८. छट्ठे संवट्टनं विनस्सनं **संवट्टो**, संवट्टतो उद्धं तथा ठायी **संवट्टट्ठायी** । विवट्टनं निब्बत्तनं, वट्टनं वा **विवट्टो** । “तेजोसंवट्टो, आपोसंवट्टो, वायोसंवट्टोति एवं संवट्टसीमानुक्कमेन संवट्टेसु वत्तब्बेसु तथा अवत्वा आपोसंवट्टो, तेजोसंवट्टो, वायोसंवट्टोति वचनं संवट्टमहाभूतदेसनानुपुब्बिया”ति केचि । “भावीसंवट्टानुपुब्बिया”ति अपरे । आपेन संवट्टो **आपोसंवट्टो** । **संवट्टसीमा**ति संवट्टनमरियादा । **संवट्टती**ति विनस्सति । **सदा**ति सब्बकालं, तीसुपि संवट्टकालेसूति अत्थो । **एकं बुद्धक्खेत्तं विनस्सती**ति एत्थ बुद्धक्खेत्तं नाम तिविधं होति जातिक्खेत्तं, आणाक्खेत्तं, विसयक्खेत्तञ्च ।

तत्थ **जातिक्खेत्तं** दससहस्सचक्कवाळपरियन्तं होति, तथागतस्स पटिसन्धिग्गहणादीसु कम्पति । **आणाक्खेत्तं** कोटिसतसहस्सचक्कवाळपरियन्तं, यत्थ **रतनसुत्तं** (खु० पा० ६.१ आदयो; सु० नि० २२४ आदयो) **खन्धपरित्तं** (अ० नि० ४.६७; चूळव० २५१) **धजग्गपरित्तं** (सं० नि० १.२४९) **आटानाटियपरित्तं** (दी० नि० ३.२७७-२७८) **मोरपरित्तन्ति** (जा० १.२.१७-१८) इमेसं परित्तानं आनुभावो वत्तति । **विसयक्खेत्तं** अनन्तापरिमाणं, यं “यावता वा पनाकङ्खेय्या”ति (अ० नि० ३.८१) वुत्तं । तत्थ यं यं तथागतो आकङ्खति, तं तं जानाति । एवमेतेसु तीसु बुद्धक्खेत्तेसु एकं आणाक्खेत्तं विनस्सति, तस्मिं पन विनस्सन्ते जातिक्खेत्तं विनट्टमेव होति, विनस्सन्तञ्च एकतोव विनस्सति, सण्ठहन्तञ्च एकतोव सण्ठहति । सेसमेत्थ **विसुद्धिमग्गसंवण्णनासु** (विसुद्धि० महाटी० २.४०४) वुत्तनयेनेव गहेतब्बं । सत्तमट्टमानि उत्तानत्थानेव ।

कप्पसुत्तादिवण्णना निड्ढिता ।

९. भिक्खुनीसुत्तवण्णना

१५९. नवमे एवं पवत्तं पच्चुप्पन्नतण्हं निस्सायाति “कुदास्सु नामाहम्पि आसवानं खया”तिआदिना नयेन अनुत्तरे विमोक्खे पिहं उप्पादेन्तस्स उप्पन्नतण्हं निस्साय । कथं पन लोकुत्तरधम्मे आरब्भ आसा उप्पज्जतीति? न खो पनेतं एवं दट्ठब्बं, न आरम्मणकरणवसेन तत्थ पिहा पवत्तति अविसयत्ता पुग्गलस्स च अनधिगतभावतो । अनुस्सवूपलद्धे पन

अनुत्तरविमोक्षे उद्दिश्य पिहं उप्पादेन्तो तत्थ पिहं उप्पादेति नाम । नाकड्ढतीति कम्मपथभावं अप्पत्तताय पटिसन्धिं न देति । सेसं सुविज्जेय्यमेव ।

भिक्षुनीसुत्तवण्णना निड्ढिता ।

१०. सुगतविनयसुत्तवण्णना

१६०. दसमे वळ्ळेन्तीति सज्झायन्ति चेव वाचुग्गतं करोन्ता धारेन्ति च । अविगततण्हताय तं तं परिक्खारजातं बहुम्पि आदियन्तीति बहुला, ते एव बाहुलिका यथा “वेनयिको”ति (म० नि० १.२४६; अ० नि० ८.११; पारा० ८) । ते पन यस्मा पच्चयबहुलभावा युत्तप्पयुत्ता नाम होन्ति, तस्मा आह “पच्चयबाहुल्लाय पटिपन्ना”ति । सिथिलं गणहन्तीति साथलिका, सिक्खाय आदरगारवाभावेन सिथिलं अदळ्हं गणहन्तीति अत्थो । सिथिलन्ति च भावनपुंसकनिद्देशो, सिथिलसद्देन वा समानत्थस्स साथलसद्दस्स वसेन साथलिकाति पदसिद्धि वेदितब्बा । अवगमनतोति अधोगमनतो, ओरम्भागियभावतोति अत्थो । निब्बीरियाति उज्झितुस्साहा तदधिगमाय आरम्भम्पि अकुरुमाना ।

सुगतविनयसुत्तवण्णना निड्ढिता ।

इन्द्रियवग्गवण्णना निड्ढिता ।

(१७) २. पटिपदावग्गो

१. संखित्तसुत्तवण्णना

१६१. दुतियस्स पठमे दुक्खापटिपदा दन्धाभिज्जातिआदीसु पाळिया आगतनयेन अत्थो वेदितब्बो । तथा हि —

“तत्थ कतमा दुक्खपटिपदा दन्धाभिज्जा पज्जा? किच्छेन कसिरेन समाधिं उप्पादेन्तस्स दन्धं तं ठानं अभिजानन्तस्स या उप्पज्जति पज्जा पजानना...पे०... अमोहो धम्मविचयो सम्मादिट्ठि, अयं वुच्चति दुक्खपटिपदा दन्धाभिज्जा पज्जा । तत्थ कतमा दुक्खपटिपदा खिप्पाभिज्जा पज्जा? किच्छेन कसिरेन समाधिं उप्पादेन्तस्स खिप्पं तं ठानं अभिजानन्तस्स या उप्पज्जति पज्जा पजानना...पे०... सम्मादिट्ठि, अयं वुच्चति दुक्खपटिपदा खिप्पाभिज्जा पज्जा । तत्थ कतमा सुखपटिपदा दन्धाभिज्जा पज्जा? अकिच्छेन अकसिरेन समाधिं उप्पादेन्तस्स दन्धं तं ठानं अभिजानन्तस्स या उप्पज्जति पज्जा पजानना...पे०... सम्मादिट्ठि, अयं वुच्चति सुखपटिपदा दन्धाभिज्जा पज्जा । तत्थ कतमा सुखपटिपदा खिप्पाभिज्जा पज्जा? अकिच्छेन अकसिरेन समाधिं उप्पादेन्तस्स खिप्पं तं ठानं अभिजानन्तस्स या उप्पज्जति पज्जा पजानना...पे०... सम्मादिट्ठि, अयं वुच्चति सुखपटिपदा खिप्पाभिज्जा पज्जा”ति (विभ० ८०१) — अयमेत्थ पाळि ।

तत्थ किच्छेन कसिरेन समाधिं उप्पादेन्तस्साति पुब्बभागे आगमनकाले किच्छेन कसिरेन दुक्खेन ससङ्खारेण सप्पयोगेन किलेसे विक्खम्भेत्वा लोकुत्तरसमाधिं उप्पादेन्तस्स । दन्धं तं ठानं अभिजानन्तस्साति विक्खम्भितेसु किलेसेसु विपस्सनापरिवासे चिरं वसित्वा तं लोकुत्तरसमाधिसङ्घातं ठानं दन्धं सणिकं अभिजानन्तस्स पटिविज्झन्तस्स, पापुणन्तस्साति अत्थो । अयं वुच्चतीति या एसा एवं उप्पज्जति, अयं किलेसविक्खम्भनप्पटिपदाय दुक्खत्ता,

विपस्सनापरिवासपञ्जाय च दन्धत्ता मग्गकाले एकचित्तक्खणे उप्पन्नापि पञ्जा आगमनवसेन “दुक्खपटिपदा दन्धाभिज्जा नामा”ति वुच्चति । उपरि तीसु पदेसुपि इमिना नयेन अत्थो वेदितब्बो ।

संखित्तसुत्तवण्णना निट्ठिता ।

२. वित्थारसुत्तवण्णना

१६२. दुतिये अकताभिनिवेसोति अकताधिकारो । रूपानं लक्खणादीहि परिच्छिन्दित्वा गहणं रूपपरिग्गहो । तीसु अद्धासु किलमतीति पुब्बन्ते अपरन्ते पुब्बन्तापरन्तेति एवं तीसु पदेसेसु किलमति । पञ्चसु जाणेसूति रूपपरिग्गहादीसु पञ्चसु जाणेसु । नवसु विपस्सनाजाणेसूति उदयब्बयादिनवविपस्सनाजाणेसु । सेसमेत्थ उत्तानमेव ।

वित्थारसुत्तवण्णना निट्ठिता ।

३. असुभसुत्तवण्णना

१६३. ततिये “यथा एतं, तथा इदं”न्ति इमिना नयेनाति एतेन —

“यथा इदं तथा एतं, यथा एतं तथा इदं ।

अज्झत्तञ्च बहिद्धा च, काये छन्दं विराजये”ति ॥ (सु० नि० २०५) । —

इमं देसनानयं सङ्गणहाति । तस्सत्थो — यथा इदं सविज्जाणकासुभं आयुउस्माविज्जाणानं अनपगमा चरति तिट्ठति निसीदति सयति, तथा एतं एतरहि सुसाने सयितं अविज्जाणकम्पि पुब्बे तेसं धम्मानं अनपगमा अहोसि । यथा च एतं एतरहि मतसरीरं तेसं धम्मानं अपगमा न चरति न तिट्ठति न निसीदति न सेय्यं कप्पेति, तथा इदं सविज्जाणकम्पि तेसं धम्मानं अपगमा भविस्सति । यथा च इदं सविज्जाणकं नेतरहि सुसाने मतं सेति न उद्धुमातकादिभावमुपगतं, तथा एतं एतरहि मतसरीरम्पि पुब्बे अहोसि । यथा पनेतं एतरहि अविज्जाणकासुभं मतकसुसाने सेति उद्धुमातकादिभावञ्च उपगतं, तथा इदं सविज्जाणकम्पि भविस्सतीति । तत्थ यथा इदं तथा एतन्ति अत्तना मतसरीरस्स समानभावं करोन्तो बाहिरे दोसं पजहति । यथा एतं तथा इदन्ति मतसरीरेन अत्तनो समानभावं करोन्तो अज्झत्तिके रागं पजहति । येनाकारेन उभयं समं करोति, तं सम्पजानन्तो उभयत्थ मोहं पजहति ।

बहिद्धा दिट्ठानन्ति बहिद्धा सुसानादीसु दिट्ठानं उद्धुमातकादिदसन्नं असुभानं । “नवन्नं पाटिकुल्यानं वसेना”ति कस्मा वुत्तं, ननु अन्तिमजीविकाभावतो पिण्डपातस्स अलाभलाभेसु परितस्सनगेधादिसमुपत्तितो भत्तस्स सम्मदजननतो किमिकुलसंवद्धनतोति एवमादीहिपि आकारेहि आहारेपटिकूलता पच्चवेक्खितब्बा । वुत्तज्हेतं — “अन्तमिदं, भिक्खवे, जीविकानं यदिदं पिण्डोल्यं अतिपापोयं लोकस्मिं यदिदं पिण्डोल्यो विचरति पत्तपाणीति (सं० नि० ३.८०; इतिवु० ९१) । अलद्धा च पिण्डपातं परितस्सति, लद्धा च पिण्डपातं गधितो मुच्छितो अज्झोपन्नो अनादीनवदस्सावी अनिस्सरणपञ्जो परिभुज्जतीति (अ० नि० ३.१२४) । भुत्तो च आहारो कस्सचि कदाचि मरणं वा मरणमत्तं वा दुक्खं आवहती”ति ।

कटुकीटकादयो द्वत्तिसकुलप्पभेदा किमियो नं उपनिस्साय जीवन्तीति? वुच्चते — अन्तिमजीविकाभावो ताव चित्तसंकिलेसविसोधनत्थं कम्मट्ठानाभिनिवेसनतो पगोव मनसि कातब्बो “माहं छवालातसदिसो भवेय्य”न्ति । तथा

पिण्डपातस्स अलाभलाभेसु परितस्सनगेधादिसमुप्पत्तिनिवारणं पगेव अनुद्धातब्बं सुपरिसुद्धसीलस्स पटिसङ्ख्यानवतो तदभावतो । भत्तसम्मदो अनेकन्तिको परिभोगे अन्तोगधोवाति वेदितब्बो । किमिकुलसंवद्धनं पन सङ्गहेतब्बं, सङ्गहितमेव वा “नवन्नं पाटिकुल्यानं वसेना”ति एत्थ नियमस्स अकतत्ता । इमिना वा नयेन इतरेसम्पेत्य सङ्गहो दट्ठब्बो यथासम्भवमेत्थ पटिकूलतापच्चवेक्खणस्स अधिप्पेतत्ता ।

एवञ्च कत्वा **विसुद्धिमग्गे** (विसुद्धि० १.२९४-२९५) दसहि आकारेहि पटिकूलता वेदितब्बा । सेय्यथिदं — गमनतो, परियेसनतो, परिभोगतो, आसयतो, निधानतो, अपरिपक्कतो, परिपक्कतो, फलतो, निस्सन्दतो, सम्मक्खनतोति । एवं दसन्नं वसेन पाटिकुल्यवचनेनपि इध “नवन्नं”न्ति वचनं न विरुज्झति, सम्मक्खनस्स परिभोगादीसु लब्धमानभावा विसुं तं अगगहेत्वा न वदन्ति । **विसुद्धिमग्गे** (विसुद्धि० १.३०४) पन सम्मक्खनं परिभोगादीसु लब्धमानमि निस्सन्दवसेन विसेसतो पटिकूलन्ति दस्सेतुं सब्बपच्छा ठपिता ।

उक्कण्ठितसज्जाय समन्नागतोति तीसु भवेसु अरुच्चनवसेन पवत्ताय विपस्सनापज्जाय समन्नागतो । निब्बिदानुपस्सना हेसा सज्जासीसेन वुत्ता । सेसमेत्थ उत्तानमेव ।

असुभसुत्तवण्णना निट्ठिता ।

४-६. पठमखमसुत्तादिवण्णना

१६४-१६६. चतुत्थे पधानकरणकाले सीतादीनि नक्खमति न सहतीति **अक्खमा** । खमति सहति अभिभवतीति **खमा** । इन्द्रियदमनं **दमा** । “उप्पन्नं कामवितक्कं नाधिवासेती”ति आदिना (म० नि० १.२६; अ० नि० ४.१४; ६.५८) नयेन वितक्कसमनं **समा**ति आह “अकुसलवितक्कानं वूपसमनपटिपदा”ति । निदस्सनमत्तज्चेतं, सब्बेसमि किलेसानं समनवसेन पवत्ता पटिपदा समा । पञ्चमछट्ठानि उत्तानत्थानेव ।

पठमखमसुत्तादिवण्णना निट्ठिता ।

७-८. महामोग्गल्लानसुत्तादिवण्णना

१६७-१६८. सत्तमट्ठमेसु **महामोग्गल्लानत्थेरस्सा**ति आदिना मोग्गल्लानत्थेरस्स हेट्ठा तिण्णं मग्गानं सुखपटिपददन्धाभिज्जभावो, अरहत्तमग्गस्स दुक्खपटिपदखिप्पाभिज्जभावो वुत्तो, सारिपुत्तत्थेरस्स पन हेट्ठिमानं तिण्णं मग्गानं सुखपटिपददन्धाभिज्जभावो, अरहत्तमग्गस्स च सुखपटिपदखिप्पाभिज्जभावो दस्सितो । यं पन वुत्तं **विसुद्धिमग्गे** (विसुद्धि० २.८०१) “बुद्धानं पन चत्तारोपि मग्गा सुखपटिपदखिप्पाभिज्जाव अहेसुं, तथा धम्मसेनापतिस्स । महामोग्गल्लानत्थेरस्स पन पठममग्गो सुखपटिपदखिप्पाभिज्जो अहोसि, उपरि तयो दुक्खपटिपददन्धाभिज्जा”ति । यञ्च वुत्तं **अट्ठसालिनियं** (ध० स० अट्ठ० १४७६) “तथागतस्स हि सारिपुत्तत्थेरस्स च चत्तारोपि मग्गा सुखपटिपदखिप्पाभिज्जाव अहेसुं, महामोग्गल्लानत्थेरस्स पन पठममग्गो सुखपटिपदखिप्पाभिज्जो उपरि तयो दुक्खपटिपदखिप्पाभिज्जा”ति, तं सब्बं अज्जमज्जं नानुलोमेति । इमाय पाळिया इमाय च अट्ठकथाय न समेति, तस्मा वीमंसितब्बमेतं । तंतं भाणकानं वा मतेन तत्थ तत्थ तथा तथा वुत्तन्ति गहेतब्बं ।

महामोग्गल्लानसुत्तादिवण्णना निट्ठिता ।

९. ससङ्खारसुत्तवण्णना

१६९. नवमे ससङ्खारेन दुक्खेन कसिरेन अधिमत्तपयोगं कत्वाव किलेसपरिनिब्बानधम्मोति **ससङ्खारपरिनिब्बायी** । असङ्खारेन अप्पयोगेन अधिमत्तपयोगं अकत्वाव किलेसपरिनिब्बानधम्मोति **असङ्खारपरिनिब्बायी** । धम्मानुसारी पुग्गलो हि आगमनम्हि किलेसे विक्खम्भेन्तो अप्पदुक्खेन अकसिरेन अकिलमन्तोव विक्खम्भेतुं सक्कोति । सद्धानुसारी पुग्गलो पन दुक्खेन कसिरेन किलमन्तो हुत्वा विक्खम्भेतुं, तस्मा धम्मानुसारिस्स पुब्बभागमग्गक्खणे किलेसच्छेदकं जाणं अदन्धं तिखिणं सूरं हुत्वा वहति । यथा नाम तिखिणेन असिना कदलिं छिन्दन्तस्स छिन्नद्वानं मट्ठं होति, अतिसीधं वहति, सद्दो न सुय्यति, बलववायामकिच्चं न होति, एवरूपा धम्मानुसारिनो पुब्बभागभावना होति । सद्धानुसारिनो पन पुब्बभागक्खणे किलेसच्छेदकं जाणं दन्धं अतिखिणं असूरं हुत्वा वहति । यथा नाम कुण्ठेन असिना कदलिं छिन्दन्तस्स छिन्नद्वानं न मट्ठं होति, अतिसीधं न वहति, सद्दो सुय्यति, बलववायामकिच्चं इच्छितब्बं होति, एवरूपा सद्धानुसारिनो पुब्बभागभावना होति । एवं सन्तेपि नेसं किलेसक्खये नानत्तं नत्थि, अनवसेसाव किलेसा खीयन्ति ।

ससङ्खारसुत्तवण्णना निट्ठिता ।

१०. युगनद्धसुत्तवण्णना

१७०. दसमे **समथपुब्बङ्गमं विपस्सनं भावेतीति** इदं समथयानिकस्स वसेन वुत्तं । सो हि पठमं उपचारसमार्धिं वा अप्पनासमार्धिं वा उप्पादेति, अयं समथो । सो तज्ज तं सम्पयुत्ते च धम्मे अनिच्चादीहि विपस्सति, अयं विपस्सना, इति पठमं समथो, पच्छा विपस्सना । तेन वुच्चति “समथपुब्बङ्गमं विपस्सनं भावेती”ति । **विपस्सनापुब्बङ्गमं समथं भावेतीति** इदं पन विपस्सनायानिकस्स वसेन वुत्तं । सो तं वुत्तप्पकारं समथं असम्पादेत्वा पञ्चुपादानक्खन्धे अनिच्चादीहि विपस्सति । **पठमो लोकुत्तरमग्गो निब्बत्ततीति** सोतापत्तिमग्गं सन्धाय वदति, लोकियमग्गवसेनेव वा इमिस्सा पाळिया अत्थो वेदितब्बो । कथं? **मग्गो सज्जायति**, पुब्बभागियो लोकियमग्गो उप्पज्जति । **आसेवति** निब्बिदानुपस्सनावसेन । **भावेति** मुच्चितुकम्यतावसेन । **बहुलीकरोति** पटिसङ्खानुपस्सनावसेन । **आसेवति** वा भयतुपट्टानादिजाणवसेन । **भावेति** मुच्चितुकम्यतादिजाणवसेन । **बहुलीकरोति** वुट्टानगामिनिविपस्सनावसेन । **संयोजनानि पहीयन्ति** । **अनुसया ब्यन्ती होन्तीति** मग्गप्पटिपाटिया पहीयन्ति ब्यन्ती होन्ति ।

धम्मुद्धच्चविग्गहितमानसन्ति ओभासादीसु अरियधम्मोति पवत्तं उद्धच्चं विक्खेपो धम्मुद्धच्चं, तेन धम्मुद्धच्चेन विपस्सनावीथितो उग्गमनेन विरूपं गहितं पवत्तियमानं धम्मुद्धच्चविग्गहितमानसं । वुत्तज्हेतं —

“धम्मुद्धच्चविग्गहितमानसं होति, अनिच्चतो मनसि करोति, ओभासो उप्पज्जति, ओभासो धम्मोति ओभासं आवज्जति, ततो विक्खेपो उद्धच्चं, तेन उद्धच्चेन विग्गहितमानसो अनिच्चतो उपट्टानं यथाभूतं नप्पजानाति । दुक्खतो...पे०... अनत्ततो उपट्टानं यथाभूतं नप्पजानाति । तथा अनिच्चतो मनसिकरोतो जाणं उप्पज्जति...पे०... पीति पस्सद्दि सुखं अधिमोक्खो पग्गहो उपट्टानं उपेक्खा निकन्ति उप्पज्जति, निकन्ति धम्मोति निकन्ति आवज्जति, ततो विक्खेपो उद्धच्चं, तेन उद्धच्चेन विग्गहितमानसो अनिच्चतो उपट्टानं यथाभूतं नप्पजानाति । दुक्खतो...पे०... अनत्ततो उपट्टानं यथाभूतं नप्पजानाती”ति (पटि० म० २.६) । सेसमेत्थ उत्तानमेव ।

युगनद्धसुत्तवण्णना निट्ठिता ।

पटिपदावगवण्णना निड्ढिता ।

(१८) ३. सञ्चेतनियवग्गो

१. चेतनासुत्तवण्णना

१७१. ततियस्स पठमे कायसञ्चेतनाहेतूति कायकम्मनिमित्तं, कायिकस्स कम्मस्स कटत्ता उपचितत्ताति अत्थो । एस नयो सेससञ्चेतनाद्वयेपि । उद्धच्चसहगतचेतना पवत्तिविपाकं देतियेवाति “वीसतिविधा”ति वुत्तं । तथा वचीसञ्चेतना मनोसञ्चेतनाति एत्थ कामावचरकुसलाकुसलवसेन वीसति चेतना लब्भन्ति । इदं तथा-सद्देन उपसंहरति । अपिचेत्थ नव महगगतचेतनापि लब्भन्तीति इमिना नवहि रूपारूपकुसलचेतनाहि सद्धिं मनोद्वारे एकूनतिसाति तीसु द्वारेसु एकूनसत्तति चेतना होन्तीति दस्सेति । अविज्जापच्चयावाति इदं तापि चेतना अविज्जापच्चयाव होन्तीति दस्सनत्थं वुत्तं । यथावुत्ता हि एकूनसत्तति चेतना कुसलापि अविज्जापच्चया होन्ति, पगेव इतरा अप्पहीनाविज्जस्सेव उप्पज्जनतो पहीनाविज्जस्स अनुप्पज्जनतो ।

यस्मा यं तं यथावुत्तं चेतनाभेदं कायसङ्खारञ्चेव वचीसङ्खारञ्च मनोसङ्खारञ्च परेहि अनुस्साहितो सामम्पि असङ्खारिकचित्तेन करोति, परेहि कारियमानो ससङ्खारिकचित्तेनपि करोति, “इदं नाम कम्मं करोन्तोपि तस्स एवरूपो नाम विपाको भविस्सती”ति एवं कम्मं विपाकञ्च जानन्तोपि करोति, मातापितूसु चेतियवन्दनादीनि करोन्तेसु अनुकरोन्तो दारको विय केवलं कम्मञ्चेव विज्जानन्तो “इमस्स पन कम्मस्स अयं विपाको”ति विपाकं अजानन्तोपि करोति, तस्मा तं दस्सेतुं “सामं वा त”न्तिआदि वुत्तं । परेहि अनाणत्तोति सरसेनेव वत्तमानो । जानन्तोति अनुस्सवादिवसेन जानन्तो ।

ननु च खीणासवो चेतियं वन्दति, धम्मं भणति, कम्मट्ठानं मनसि करोति, कथमस्स कायकम्मादयो न होन्तीति? अविपाकत्ता । खीणासवेन हि कतकम्मं नेव कुसलं होति नाकुसलं, अविपाकं हुत्वा किरियामत्ते तिड्ढति । तेनस्स ते कायादयो न होन्ति । तेनेवाह “खीणासवस्स कायेन करणकम्मं पञ्जायती”तिआदि । तन्ति कुसलाकुसलं ।

खिड्ढाय पदुस्सन्तीति खिड्ढापदोसिनो, खिड्ढापदोसिनो एव खिड्ढापदोसिका । खिड्ढापदोसो वा एतेसं अत्थीति खिड्ढापदोसिका । ते किर पुञ्जविसेसाधिगतेन महन्तेन अत्तनो सिरिविभवेन नक्खत्तं कीळन्ता ताय सम्पत्तिया महन्तताय “आहारं परिभुज्जिम्हा न परिभुज्जिम्हा”तिपि न जानन्ति । अथ एकाहारातिक्कमतो पट्टाय निरन्तरं खादन्तापि पिवन्तापि चवन्तियेव न तिड्ढन्ति । कस्मा? कम्मजतेजस्स बलवताय करजकायस्स मन्दताय । मनुस्सानज्झि कम्मजतेजो मन्दो, करजकायो बलवा । तेसं तेजस्स मन्दताय कायस्स बलवताय सत्ताहम्पि अतिक्कमित्वा उण्होदकअच्छयागुआदीहि सक्का करजकायं उपत्थम्भेतुं । देवानं पन तेजो बलवा होति उळारपुञ्जनिब्बत्तता उळारगरुसिनिद्धसुधाहारजीरणतो च । करजं मन्दं मुदुसुखुमालभावतो । ते एकं आहारवेलं अक्कमित्वाव सण्ठापेतुं न सक्कोन्ति । यथा नाम गिम्हानं मज्झन्हिके तत्तपासाणे ठपितं पदुमं वा उप्पलं वा सायन्हसमये घटसतेनपि सिञ्चियमानं पाकतिकं न होति विनस्सतियेव, एवमेव पच्छा निरन्तरं खादन्तापि पिवन्तापि चवन्तियेव न तिड्ढन्ति । कतमे पन ते देवाति? “इमे नामा”ति अट्ठकथाय विचारणा नत्थि, “आहारूपच्छेदेन आतपे खित्तमाला विया”ति वुत्तत्ता ये केचि कबळीकाराहारूपजीविनो देवा एवं करोन्ति, ते एवं चवन्तीति वेदितब्बा । अभयगिरिवासिनो पनाहु “निम्मानरतिपरनिमित्तवसवत्तिनो ते देवा, खिड्ढाय पदुस्सनमत्तेनेव हेते खिड्ढापदोसिकाति वुत्ता”ति । को पनेत्थ देवानं आहारो, का आहारवेलाति? “सब्बेसम्पि कामावचरदेवानं सुधा आहारो, सा हेट्ठिमेहि हेट्ठिमेहि उपरिमानं उपरिमानं पणीततमा होति । तं यथासकं दिवसवसेनेव दिवसे दिवसे भुज्जन्ति । केचि पन

बदरप्पमाणं सुधाहारं परिभुञ्जन्ति । सो जिह्वायं ठपितमत्तोयेव याव केसगगनखग्गा कायं फरति, तेसंयेव दिवसवसेन सत्तदिवसं यापनसमत्थोव होती”ति वदन्ति ।

इस्सापकतत्ता पदुट्ठेन मनसा पदुस्सन्तीति **मनोपदोसिका** । उसूयवसेन वा मनसो पदोसो मनोपदोसो, सो एतेसं अत्थि विनासहेतुभूतोति **मनोपदोसिका** । **अक्कुद्धो रक्खतीति** कुद्धस्स सो कोधो इतरस्मिं अक्कुद्धन्ते अनुपादानो एकवारमेव उप्पत्तिया अनासेवनो चावेतुं न सक्कोति, उदकन्तं पत्वा अग्गि विय निब्बायति, तस्मा अक्कुद्धो तं चवनतो रक्खति । उभोसु पन कुद्धेसु भिय्यो भिय्यो अञ्जमञ्जम्हि परिवट्ठनवसेन तिखिणसमुदाचारो निस्सयदहनरसो कोधो उप्पज्जमानो हदयवत्थुं निदहन्तो अच्चन्तसुखुमालं करजकायं विनासेति, ततो सकलोपि अत्तभावो अन्तरधायति । तेनाह “**उभोसु पना**”तिआदि । तथा चाह भगवा “अञ्जमञ्जम्हि पदुट्ठचित्ता किलन्तकाय...पे०... चवन्ती”ति (दी० नि० १.४७) ।

कतमे तेन देवा दट्ठब्बाति एत्थ तेनाति पच्चत्ते करणवचनन्ति आह “**कतमे नाम ते देवा दट्ठब्बा**”ति । करणत्थेयेव वा एतं करणवचनन्ति दस्सेन्तो आह “**तेन वा अत्तभावेना**”ति । सेसमेत्थ उत्तानमेव ।

चेतनासुत्तवण्णना निड्ढिता ।

२. विभत्तिसुत्तवण्णना

१७२. दुतिये अत्थप्पभेदस्स सल्लक्खणविभावनववत्थानकरणसमत्थं अत्थे पभेदगतं जाणं **अत्थपटिसम्भिदा** । **अत्थो**ति चेत्थ सङ्खेपतो हेतुफलं । तज्झि हेतुवसेन अरणीयं गन्तब्बं पत्तब्बं, तस्मा “अत्थो”ति वुच्चति । पभेदतो पन यं किञ्चि पच्चयसमुप्पन्नं, निब्बानं, भासितत्थो, विपाको, किरियाति इमे पञ्च धम्मा “अत्थो”ति वेदितब्बा, तं अत्थं पच्चवेक्खन्तस्स तस्मिं अत्थे पभेदगतं जाणं **अत्थपटिसम्भिदा** । तेनाह “**पञ्चसु अत्थेसु पभेदगतं जाणं**”न्ति । **आचिक्खामीति**आदीसु आदितो कथेन्तो **आचिक्खति** नाम, उद्दिसतीति अत्थो । तमेव उद्देसं परियोसापेन्तो **देसेति** । यथाउद्दिट्ठमत्थं उद्दिसनवसेन पकारेहि आपेन्तो **जापेति** । पकारेहि एव तमत्थं पतिट्ठापेन्तो **पट्टपेति** । यथाउद्दिट्ठं पटिनिद्दिसनवसेन **विवरति** । विवटं **विभजति** । विभत्तअत्थं हेतूदाहरणदस्सनेहि पाकटं करोन्तो **उत्तानिं करोति** ।

तिस्सो पटिसम्भिदाति धम्मनिरुत्तिपटिभानपटिसम्भिदा । तत्थ **धम्मपटिसम्भिदा** नाम धम्मप्पभेदस्स सल्लक्खणविभावनववत्थानकरणसमत्थं जाणं । **धम्मो**ति च सङ्खेपतो पच्चयो । सो हि यस्मा तं तं विदहति पवत्तेति चेव पापेति च, तस्मा “धम्मो”ति वुच्चति । पभेदतो पन यो कोचि फलनिब्बत्तको हेतु, अरियमग्गो, भासितं, कुसलं, अकुसलन्ति इमे पञ्च धम्मा “धम्मो”ति वेदितब्बा, तं धम्मं पच्चवेक्खन्तस्स तस्मिं धम्मे पभेदगतं जाणं **धम्मपटिसम्भिदा** । निरुत्तिप्पभेदस्स सल्लक्खणविभावनववत्थानकरणसमत्थं निरुत्ताभिलापे पभेदगतं जाणं **निरुत्तिपटिसम्भिदाति** । इदं वुत्तं होति — अत्थे च धम्मे च या सभावनिरुत्ति, तं सभावनिरुत्तिं सद्दं आरम्भणं कत्वा पच्चवेक्खन्तस्स तस्मिं सभावनिरुत्ताभिलापे पभेदगतं जाणं निरुत्तिपटिसम्भिदाति ।

एवमयं निरुत्तिपटिसम्भिदा सहारम्भणा नाम जाता, न पज्जत्तिआरम्भणा । कस्मा? यस्मा सद्दं सुत्वा “अयं सभावनिरुत्ती”ति जानन्ति । पटिसम्भिदाप्पत्तो हि “फस्सो”ति वुत्ते “अयं सभावनिरुत्ती”ति जानाति, “फस्सा”ति वा “फस्स”न्ति वा वुत्ते पन “अयं असभावनिरुत्ती”ति जानाति । वेदनादीसुपि एसेव नयो । अञ्जं पनेस नामाख्यातउपसग्गब्यञ्जनसद्दं जानाति न जानातीति? यदग्गेन सद्दं जानित्वा “अयं सभावनिरुत्ति, अयं

असभावानिरुत्ती”ति जानाति, तदग्गेन तम्पि जानिस्सतीति । तं पन “नयिदं पटिसम्भिदाकिच्च”न्ति पटिक्खिपित्वा इदं वत्थु कथितं —

तिस्सदत्तत्थेरो किर बोधिमण्डे सुवण्णसलाकं गहेत्वा “अट्टारससु भासासु कतरभासाय कथेमी”ति पवारिसि । तं पन तेन अत्तनो उग्गहे ठत्वा पवारितं, न पटिसम्भिदाय ठितेन । सो हि महापज्जताय तं तं भासं कथापेत्वा उग्गहेत्वा एवं पवारिसि । “भासं नाम सत्ता उग्गणहन्ती”ति वत्वा पनेत्थ इदं कथितं । मातापितरो हि दहरकाले कुमारके मज्जे वा पीठे वा निपज्जापेत्वा तं तं कथयमाना तानि तानि किच्चानि करोन्ति । दारका तेसं तं तं भासं ववत्थापेन्ति “इमिना इदं वुत्त”न्ति । गच्छन्ते गच्छन्ते काले सब्बम्पि भासं जानन्ति । माता दमिळी, पिता अन्धको । तेसं जातो दारको सचे मातुकथं पठमं सुणाति, दमिळभासं भासिस्सति । सचे पितुकथं पठमं सुणाति, अन्धकभासं भासिस्सति । उभिन्नम्पि पन कथं अस्सुणन्तो मागधभासं भासिस्सति । योपि अगामके महाअरज्जे निब्बत्तो, तत्थ अज्जो कथेन्तो नाम नत्थि । सोपि अत्तनो धम्मताय वचनं समुट्ठापेन्तो, मागधभासमेव भासिस्सति । निरये, तिरच्छानयोनियं, पेत्तिविसये, मनुस्सलोके, देवल्लोकेति सब्बत्थ मागधभासाव उस्सन्ना, सेसा ओट्टकिरातअन्धकयोनकदमिळभासादिका अट्टारस भासा परिवत्तन्ति, कालन्तरेन अज्जथा होन्ति च नस्सन्ति च ।

अयमेवेका यथाभुच्चब्रह्मवोहारअरियवोहारसङ्घाता मागधभासा न परिवत्तति । सा हि कत्थचि कदाचि परिवत्तन्तीपि न सब्बत्थ सब्बदा सब्बथाव परिवत्तति, कप्पविनासेपि तिट्ठितियेव । सम्मासम्बुद्धोपि हि तेपिटकं बुद्धवचनं तन्ति आरोपेन्तो मागधभासाय एव आरोपेसि । कस्मा? एवहि आहरितुं सुखं होति । मागधभासाय हि तन्ति आरुळहस्स बुद्धवचनस्स पटिसम्भिदाप्पत्तानं सोतपथागमनमेव पपज्जो । तेन सङ्घटितमत्तेनेव नयसतेन नयसहस्सेन अत्थो उपट्ठाति । अज्जाय भासाय तन्ति आरुळहकं सोधेत्वा उग्गहेतब्बं होति, बहुम्पि उग्गहेत्वा पन पुत्थुज्जनस्स पटिसम्भिदाप्पत्ति नाम नत्थि, अरियसावको नोपटिसम्भिदाप्पत्तो नाम नत्थि ।

पटिभानप्पभेदस्स सल्लक्खणविभावनववत्थानकरणसमत्थं पटिभाने पभेदगतं जाणं **पटिभानपटिसम्भिदा** । अत्थधम्मादिविसयेसु हि तीसु जाणेसु “इमानि जाणानि इदमत्थजोतकानी”ति (विभ० ७२५-७३१) एवं पवत्तजाणस्सेतं अधिवचनं । इमा पन चतस्सो पटिसम्भिदा द्वीसु ठानेसु पभेदं गच्छन्ति, पज्जहि कारणेहि विसदा होन्तीति वेदितब्बा । कतमेसु द्वीसु? सेक्खभूमियज्ज असेक्खभूमियज्ज, तत्थ सारिपुत्तत्थेरस्स महामोग्गल्लानत्थेरस्स महाकस्सपत्थेरस्स महाकच्चायनत्थेरस्स महाकोट्टिकत्थेरस्साति असीतियापि महाथेरानं पटिसम्भिदा असेक्खभूमियं पभेदगता । आनन्दत्थेरस्स, चित्तस्स गहपतिनो, धम्मिकस्स उपासकस्स, उपालिस्स गहपतिनो, खुज्जुत्तराय उपासिकायाति एवमादीनं पटिसम्भिदा सेक्खभूमियं पभेदगताति इमासु द्वीसु भूमीसु पभेदं गच्छन्ति । पभेदो नाम मग्गेहि अधिगतानं पटिसम्भिदानं पभेदगमनं ।

कतमेहि पज्जहि कारणेहि पटिसम्भिदा विसदा होन्तीति? अधिगमेन, परियत्तिया, सवनेन, परिपुच्छाय, पुब्बयोगेन । तत्थ **अधिगमो** नाम अरहत्तं । तज्जि पत्तस्स पटिसम्भिदा विसदा होन्ति । **सवनं** नाम धम्मस्सवनं । सक्कच्चं सुणन्तस्स हि पटिसम्भिदा विसदा होन्ति । **परिपुच्छा** नाम अट्ठकथा । उग्गहितपाळिया अत्थं कथेन्तस्स हि पटिसम्भिदा विसदा होन्ति । **पुब्बयोगो** नाम पुब्बयोगावचरता हरणपच्चाहरणनयेन परिहटकम्मट्टानता । पुब्बयोगावचरस्स हि पटिसम्भिदा विसदा होन्ति ।

एतेसु पन परियत्ति, सवनं, परिपुच्छाति इमानि तीणि पभेदस्सेव बलवकारणानि, पुब्बयोगो अधिगमस्स

बलवपच्चयो । पभेदस्स होति न होतीति? होति, न पन यथा अधिगमस्स बलवपच्चयो होति, तथा पभेदस्स । परियत्तिसवनपरिपुच्छा हि पुब्बे होन्तु वा मा वा, पुब्बयोगेन पन पुब्बे चेव एतरहि च सङ्खारसम्मसनं विना पटिसम्भिदाधिगमो नाम नत्थि । इमे पन द्वेपि एकतो हुत्वा पटिसम्भिदा उपत्थम्भेत्वा विसदा होन्तीति ।

विभत्तिसुत्तवण्णना निड्डिता ।

३-४. महाकोट्टिकसुत्तादिवण्णना

१७३-४. ततिये **फस्सायतनानन्ति** एत्थ आकरट्ठो आयतनसद्दोति आह “**फस्साकरान**”न्तिआदि । “सुवण्णायतनं, रजतायतनं”न्तिआदीसु आकरोपि “आयतनं”न्ति वुत्तो, सज्जातिसमोसरणादिवसेनपि आयतनट्ठो लब्धतियेव । **मा**-इति पटिसेधे निपातो । स्वायं छन्नं फस्सायतनानं असेसं विरागनिरोधा अत्थज्जं वचनं किञ्चीति सन्धायाहाति आह “**मा भणीति अत्थो**”ति । **पच्चफस्सायतनानि निरुद्धानीति** चक्खादीनञ्च तत्थ अभावं सन्धाय वदति । **छट्ठस्साति** मनायतनस्स । चतुत्थे नत्थि वत्तब्बं ।

महाकोट्टिकसुत्तादिवण्णना निड्डिता ।

५-६. उपवाणसुत्तादिवण्णना

१७५-६. पच्चमे **विज्जायाति** दिब्बचक्खुपुब्बेनिवासानुस्सतिआसवक्खयजाणसङ्घाताय तिविधाय विज्जाय, अट्ठविधाय वा । अट्ठविधापि हि विज्जा विपस्सनाजाणेन मनोमयिद्विया च सह अभिज्जा परिग्गहेत्वा वुत्ता । **पन्नरसधम्मभेदेन चरणेन समन्नागतोति** सीलसंवरो, इन्द्रियेसु गुत्तद्वारता, भोजने मत्तज्जुता, जागरियानुयोगो, सद्भा, हिरी, ओत्तपं, बाहुसच्चं, वीरियं, सति, पज्जा, चत्तारि रूपावचरज्झानानीति एवं पन्नरसभेदेन चरणधम्मेन समन्नागतो । इमेयेव हि पन्नरस धम्मा यस्मा एतेहि चरति अरियसावको गच्छति अमतं दिसं, तस्मा “**चरण**”न्ति वुत्ता । छट्ठे नत्थि वत्तब्बं ।

उपवाणसुत्तादिवण्णना निड्डिता ।

७. राहुलसुत्तवण्णना

१७७. सत्तमे **पथवीधातुरेवेसाति** दुविधापेसा थद्धट्ठेन, कक्खळट्ठेन, फरुसट्ठेन एकलक्खणा पथवीधातु एवाति अज्झत्तिकं बाहिराय सद्धिं योजेत्वा दस्सेति । कस्मा? बाहिराय पथवीधातुया अचेतनाभावो पाकटो, न अज्झत्तिकाय, तस्मा बाहिराय सद्धिं एकसदिसा अचेतनायेवाति गणहन्तस्स सुखपरिग्गाहा होति, यथा किं? दन्तेन गोणेन सद्धिं योजितो अदन्तो कतिपाहमेव विसुकायति विप्फन्दति, अथ न चिरस्सेव दमथं उपेति, एवं अज्झत्तिकं बाहिराय सद्धिं एकसदिसाति गणहन्तस्स कतिपाहमेव अचेतनभावेन उपट्ठाति, अथ न चिरेनेवस्सा अचेतनभावो पाकटो होति धातुमत्तताय दस्सनतो । **नेतं मम...पे०... दट्ठब्बन्ति** तं उभयमपि “न एतं मम, न एसोहमस्मि, न एसो मे अत्ता”ति एवं यथाभूतं सम्मण्णज्जाय दट्ठब्बं । **यथाभूतन्ति** यथासभावं । तज्हि अनिच्चादिसभावं, तस्मा अनिच्चं दुक्खमनत्ताति एवं दट्ठब्बन्ति अत्थो । यस्मा “नेतं मम, नेसोहमस्मि, न मेसो अत्ता”ति पस्सन्तो नेव कत्थचि अत्तानं पस्सति, न तं परस्स किञ्चनभावे उपनेतब्बं पस्सति, न परस्स अत्तानं अत्तनो किञ्चनभावे उपनेतब्बं पस्सति, तस्मा वुत्तं “**चतुकोटिकसुज्जता नाम कथिता**”ति ।

राहुलसुत्तवण्णना निड्ढिता ।

८. जम्बालीसुत्तवण्णना

१७८. अट्ठमे सन्तन्ति अङ्गसन्तताय चेव आरम्मणसन्तताय च कमनीयं मनोहरं । **चेतोविमुत्तिन्ति** रूपारूपावचरं चित्तविमुत्तिं । तेनेवाह “**अट्ठन्नं समापत्तीनं अज्जरं समापत्तिं**”न्ति । **लेपमक्खितेनाति** लाखामक्खितेन । **पारिपन्थिके असोधेत्वाति** कामच्छन्दादिपारिपन्थिके असोधेत्वा । यो हि कामादीनवपच्चवेक्खणादीहि कामच्छन्दं न सुट्ठु विक्खम्भेत्वा कायप्पस्सद्धिवसेन दुट्ठुल्लं सुप्पटिप्पस्सद्धं अकत्वा आरम्भधातुमनसिकारादिवसेन थिनमिद्धं न सुट्ठु पटिविनोदेत्वा समथनिमित्तमनसिकारादिवसेन उद्धच्चकुक्कुच्चं न समूहतं कत्वा अज्जेपि समाधिपरिपन्थे धम्मे न सुट्ठु सोधेत्वा ज्ञानं समापज्जति । सो असोधितं आसयं पविट्ठभमरो विय असुद्धं उय्यानं पविट्ठराजा विय च खिप्पमेव निक्खमति । यो पन समाधिपरिपन्थे धम्मे सुट्ठु विसोधेत्वा ज्ञानं समापज्जति, सो सुविसोधितं आसयं पविट्ठभमरो विय सुपरिसुद्धं उय्यानं पविट्ठराजा विय च सकलम्पि दिवसभागं अन्तोसमापत्तियंयेव होति ।

आयमुखानीति नदितळाककन्दरपदरादितो आगमनमग्गा । ते च कन्दरायेवाति आह “**चतस्सो पविसनकन्दरा**”ति । **अपायमुखानीति** अपगमनमग्गा । अपेन्ति अपगच्छन्ति एतेहीति हि अपाया, ते एव मुखानीति **अपायमुखानि** । तानि च उदकनिक्खमनच्छिद्धानीति आह “**अपवाहनच्छिद्धानी**”ति, अपायसङ्घातानि उदकनिक्खमनच्छिद्धानीति अत्थो । सेसं सुविज्जेय्यमेव ।

जम्बालीसुत्तवण्णना निड्ढिता ।

९. निब्बानसुत्तवण्णना

१७९. नवमे अभिधम्मे वुत्तनयेनाति —

“कतमा हानभागिनी पज्जा? पठमस्स ज्ञानस्स लाभिं कामसहगता सज्जामनसिकारा समुदाचरन्ति हानभागिनी पज्जा, तदनुधम्मता सति सन्तिट्ठति ठितिभागिनी पज्जा । अवितक्कसहगता सज्जामनसिकारा समुदाचरन्ति विसेसभागिनी पज्जा । निब्बिदासहगता सज्जामनसिकारा समुदाचरन्ति विरागूपसज्जिता निब्बेधभागिनी पज्जा”ति (विभ० ७९९) —

आदिना विभङ्गे वुत्तनयेन एवमत्थो वेदितब्बो ।

तत्थ पठमस्स ज्ञानस्स लाभिन्ति ख्यायं अप्पगुणस्स पठमस्स ज्ञानस्स लाभी, तं । **कामसहगता सज्जामनसिकारा समुदाचरन्तीति** ततो वुट्ठितं आरम्मणवसेन कामसहगता हुत्वा सज्जामनसिकारा समुदाचरन्ति तुदन्ति चोदेन्ति । तस्स कामानुपक्खन्दानं सज्जामनसिकारानं वसेन सा पठमज्ज्ञानपज्जा हायति परिहायति, तस्मा “हानभागिनी पज्जा”ति वुत्ता । **तदनुधम्मताति** तदनुरूपसभावा । **सति सन्तिट्ठतीति** इदं मिच्छासतिं सन्धाय वुत्तं, न सम्मासतिं । यस्स हि पठमज्ज्ञानानुरूपसभावा पठमज्ज्ञानं सन्ततो पणीततो दिस्वा अस्सादयमाना अभिनन्दमाना निकन्ति उप्पज्जति, तस्स निकन्तिवसेन पठमज्ज्ञानपज्जा नेव हायति न वड्ढति, ठितिकोट्टासिका होति । तेन वुत्तं “**ठितिभागिनी पज्जा**”ति । **अवितक्कसहगताति** अवितक्कं दुतियज्ज्ञानं सन्ततो पणीततो मनसिकरोतो आरम्मणवसेन अवितक्कसहगता

सञ्जामनसिकारा । समुदाचरन्तीति पगुणतो पठमज्ज्ञानतो वुट्ठितं दुतियज्ज्ञानाधिगमत्थाय तुदन्ति चोदेन्ति, तस्स उपरि दुतियज्ज्ञानानुपक्खन्दानं सञ्जामनसिकारानं वसेन सा पठमज्ज्ञानपज्जा विसेसभूतस्स दुतियज्ज्ञानस्स उप्पत्तिपदट्ठानताय “विसेसभागिनी”ति वुत्ता ।

निब्बिदासहगताति तंयेव पठमज्ज्ञानलाभिं ज्ञानतो वुट्ठितं निब्बिदासङ्घातेन विपस्सनाजाणेन सहगता । विपस्सनाजाणज्झि ज्ञानङ्गभेदे वत्तन्ते निब्बिन्दति उक्कण्ठति, तस्मा “निब्बिदा”ति वुच्चति । समुदाचरन्तीति निब्बानसच्छिकिरियत्थाय तुदन्ति चोदेन्ति । विरागूपसज्झिताति विरागसङ्घातेन निब्बानेन उपसंहिता । विपस्सनाजाणज्झि सक्का इमिना मग्गेन विरागं निब्बानं सच्छिकातुन्ति पवत्तितो “विरागूपसंहिता”न्ति वुच्चति । तंसम्पयुत्तसञ्जामनसिकारापि विरागूपसंहिता एव नाम । तस्स तेसं सञ्जामनसिकारानं वसेन सा पठमज्ज्ञानपज्जा अरियमग्गप्पटिवेधस्स पदट्ठानताय “निब्बेधभागिनी”ति वुत्ताति ।

निब्बानसुत्तवण्णना निट्ठिता ।

१०. महापदेससुत्तवण्णना

१८०. दसमे महाओकासेति महन्ते ओकासे महन्तानि धम्मस्स पतिट्ठापनट्ठानानि । येसु पतिट्ठापितो धम्मो निच्छीयति असन्देहतो । कानि पन तानि? आगमनविसिट्ठानि सुत्तोतरणादीनि । दुतियविकप्पे अपदिसीयन्तीति अपदेसा, महन्ता अपदेसा एतेसन्ति महापदेसा । “सम्मुखा मेतं, आवुसो, भगवतो सुत”न्तिआदिना केनचि आभतस्स धम्मोति विनिच्छयने कारणं । किं पन तन्ति? तस्स यथाभतस्स सुत्तोतरणादि एव । यदि एवं कथं चत्तारोति? यस्मा धम्मस्स द्वे सम्पदायो सत्था सावको च । तेसु सावका सङ्खगणपुग्गलवसेन तिविधा । एवमिमम्हा मयायं धम्मो पटिग्गहितोति अपदिसितब्बानं भेदेन चत्तारो । तेनाह “सम्मुखा मेतं, आवुसो, भगवतो सुत”न्तिआदि । तथा च वुत्तं नेत्तियं (नेत्ति० ४.१८) “चत्तारो महापदेसा बुद्धापदेसो, सङ्खापदेसो, गणापदेसो, पुग्गलापदेसो । इमे चत्तारो महापदेसा”ति । बुद्धो अपदेसो एतस्साति बुद्धापदेसो । एस नयो सेसेसुपि । तेनाह “बुद्धादयो... पे०... महाकारणानी”ति ।

नेव अभिनन्दितब्बन्ति न सम्पटिच्छितब्बं, गन्थस्स सम्पटिच्छनं नाम सवनन्ति आह “न सोतब्ब”न्ति । पदव्यञ्जनानीति पदानि च व्यञ्जनानि च, अत्थपदानि व्यञ्जनपदानि चाति अत्थो । पज्जति अत्थो एतेहीति पदानि, अक्खरादीनि व्यञ्जनपदानि । पज्जितब्बतो पदानि, सङ्कासनादीनि अत्थपदानि । “अट्ठकथायं पदसङ्घातानि व्यञ्जनानीति व्यञ्जनपदानेव वुत्तानी”ति केचि । अत्थं व्यञ्जेन्तीति व्यञ्जनानि, व्यञ्जनपदानि । तेहि व्यञ्जितब्बतो व्यञ्जनानि, अत्थपदानीति उभयसङ्गहतो । इमस्मिं ठानेति तेनाभतसुत्तस्स इमस्मिं पदेसे । पाळि वुत्ताति केवलो पाळिधम्मो वुत्तो । अत्थो वुत्तोति पाळिया अत्थो वुत्तो निट्ठितो । अनुसन्धि कथितोति यथारद्धदेसनाय उपरिदेसनाय च अनुसन्धानं कथितं, सम्बन्धो कथितो । पुब्बापरं कथितन्ति पुब्बेन परं अविरुज्जनज्चेव विसेसट्ठानज्च कथितं पकासितं । एवं पाळिधम्मादीनि सम्मदेव सल्लक्खेत्वा गहणं साधुकं उग्गहणन्ति आह “सुट्ठु गहेत्वा”ति । सुत्ते ओतारेतब्बानीति जाणेन सुत्ते ओगाहेत्वा तारेतब्बानि । तं पन ओगाहेत्वा तरणं तत्थ ओतरणं अनुप्पवेसनं होतीति वुत्तं “ओतरितब्बानी”ति । संसन्देत्वा दस्सनं सन्दस्सनन्ति आह “विनये संसन्देतब्बानी”ति ।

“किं पन तं सुत्तं, को वा विनयो”ति विचारणायं आचरियानं मतिभेदमुखेन तमत्यं दस्सेतुं “एत्थ चा”तिआदि वुत्तं । विनयोति विभङ्गपाठमाह । सो हि मातिकासज्जितस्स सुत्तस्स अत्थे सूचनतो “सुत्त”न्ति वत्तब्बतं अरहति । विविधनयत्ता

विसिद्धनयत्ता च **विनयो**, खन्धकपाठो । **एवन्ति** एवं सुत्तविनयेसु परिगग्यहमानेसु विनयपिटकम्पि न परियादियति परिवारपाळिया असङ्गहितत्ता । सुत्तन्ताभिधम्मपिटकानि वा **सुत्तं** अत्थसूचनादिअत्थसम्भवतो । **एवम्पीति** सुत्तन्ताभिधम्मपिटकानि सुत्तं, विनयपिटकं विनयोति एवं सुत्तविनयविभागे वुच्चमानेपि । **न ताव परियादियन्तीति** न ताव अनवसेसतो परिगग्यहन्ति । कस्माति चेति आह “**असुत्तनामकञ्ही**”तिआदि । यस्मा सुत्तन्ति इमं नामं अनारोपेत्वा सङ्गीतं जातकादिबुद्धवचनं अत्थि, तस्मा वुत्तनयेन तीणि पिटकानि न परियादियन्तीति । सुत्तनिपातउदानइतिवुत्तकानि दीघनिकायादयो विय सुत्तन्ति नामं आरोपेत्वा असङ्गीतानीति अधिप्पायेनेत्थ जातकादीहि सद्धिं तानिपि गहितानि । बुद्धवंसचरियापिटकानं पनेत्थ अगगहणे कारणं मग्गितब्बं, किं वा एतेन मग्गनेन । सब्बोपायं वण्णनानयो थेरवाददस्सनमुखेन पटिक्खित्तो एवाति ।

किं अत्थीति असुत्तनामकं बुद्धवचनं नत्थियेवाति दस्सेति । तं **सब्बं पटिक्खिपित्वा**ति “सुत्तन्ति विनयो”तिआदिना वुत्तसंवण्णनायं “नायमत्थो इधाधिप्पेतो”ति पटिसेधेत्वा । विनेति एतेन किलेसेति विनयो, किलेसविनयनूपायो, सो एव कारणन्ति आह “**विनयो पन कारणं**”न्ति ।

धम्मोति परियत्तिधम्मो । **सरागायाति** सरागभावाय कामरागभवरागपरिब्रूहनाय । **संयोगायाति** भवसंयोजनाय । **सउपादानायाति** चतुरूपादानूपसंहितताय । **महिच्छतायाति** महिच्छभावाय । **असन्तुट्टियाति** असन्तुट्टभावाय । **कोसज्जायाति** कुसीतभावाय । **सङ्गणिकायाति** किलेससङ्गणिकविहाराय । **आचयायाति** तिविधवट्टाचयाय । **विरागायाति** सकलवट्टतो विरज्जनत्थाय । **विसंयोगायाति** कामरागादीहि विसंयुज्जनत्थाय । **अनुपादानायाति** सब्बस्सपि कम्मभवस्स अगगहणाय । **अप्पिच्छतायाति** पच्चयप्पिच्छतादिवसेन सब्बसो इच्छाय अपगमाय । **सन्तुट्टियाति** द्वादसविधसन्तुट्टभावाय । **वीरियारम्भायाति** कायिकस्स चैव चेतसिकस्स च वीरियस्स पग्गणहनत्थाय । **विवेकायाति** पविवित्तभावाय कामविवेकादितदङ्गविवेकादिविवेकसिद्धिया । **अपचयायाति** सब्बस्सपि वट्टस्स अपचयनाय, निब्बानायाति अत्थो । एवं यो परियत्तिधम्मो उगगहणधारणपरिपुच्छामनसिकारवसेन योनिस्सो पटिपज्जन्तस्स सरागादिभावपरिवज्जनस्स कारणं हुत्वा विरागादिभावाय संवत्तति, एकंसतो **एसो धम्मो, एसो विनयो** सम्मदेव अपायादीसु अपतनवसेन धारणतो किलेसानं विनयनतो च । सत्थु सम्मासम्बुद्धस्स ओवादानुरूपप्पवत्तिभावतो **एतं सत्थुसासनन्ति** च जानेय्यासीति अत्थो ।

चतुसच्चत्थसूचनं सुत्तन्ति आह “**सुत्तेति तेपिटके बुद्धवचने**”ति । तेपिटकञ्चि बुद्धवचनं सच्चविनिमुत्तं नत्थि । रागादिविनयकारणं यथा तेन सुत्तपदेन पकासितन्ति आह “**विनयेति एतस्मिं रागादिविनयकारणे**”ति । सुत्ते ओतरणज्चेत्थ तेपिटकबुद्धवचनपरियापन्नतावसेनेव वेदितब्बं, न अज्जथाति आह “**सुत्तप्पटिपाटिया कत्थचि अनागन्त्वा**”ति । **छल्लिं उट्टपेत्वा**ति अरोगस्स महतो रुक्खस्स तिट्ठतो उपक्कमेन छल्लिकाय सकलिकाय पपटिकाय वा उट्टापनं विय अरोगस्स सासनधम्मस्स तिट्ठतो ब्यज्जनमत्तेन तप्परियापन्नं विय हुत्वा छल्लिसदिसं पुब्बापरिविरुद्धतादिदोसं उट्टपेत्वा परिदीपेत्वा । तादिसानि पन एकंसतो गुळ्ळवेस्सन्तरादिपरियापन्नानि होन्तीति आह “**गुळ्ळवेस्सन्तर...पे०... पज्जायन्तीति अत्थो**”ति । **रागादिविनयेति** रागादिविनयनत्थेन अतदाकारताय **अपज्जायमानानि छुट्टेत्वा**नि चजितब्बानि न गहेत्वा । **सब्बत्थाति** सब्बवारेसु ।

महापदेससुत्तवण्णना निट्ठिता ।

सज्चेतनियवग्गवण्णना निट्ठिता ।

(१९) ४. ब्राह्मणवग्गो

१-३. योधाजीवसुत्तादिवण्णना

१८१-१८३. चतुत्थस्स पठमादीनि उत्तानत्थानेव ।

४. अभयसुत्तवण्णना

१८४. चतुत्थे सोचतीति चित्ते उप्पन्नबलवसोकेन सोचति, चित्तसन्तापेन अन्तो निज्झायतीति अत्थो । किलमतीति तस्सेव सोकस्स वसेन काये च उप्पन्नदुक्खेन किलमति । परिदेवतीति सोकुद्देहकवसेन तं तं विप्पलपन्तो वाचाय परिदेवति । उरत्ताळिन्ति उरत्ताळं, उरं ताळेत्वाति अत्थो । तेनाह “उरं ताळेत्वा”ति । कङ्खाविचिकिच्छाति एत्थ “एकमेविदं पञ्चमं नीवरणं । किं नु खो इदं”न्ति आरम्मणं कङ्खनतो कङ्खा, “इदमेव वर”न्ति निच्छेतुं असमत्थभावतो “विचिकिच्छा”ति वुच्चति — “धम्मसभावं विचिनन्तो किच्छति, विगता चिकिच्छा”ति वा कत्वा ।

अभयसुत्तवण्णना निड्ढिता ।

५. ब्राह्मणसच्चसुत्तवण्णना

१८५. पञ्चमे एत्थाति एतस्मिं सुज्जतानुपस्सनाधिकारे । क्वचीति कत्थचि ठाने, काले, धम्मे वा । अथ वा क्वचीति अज्झत्तं बहिद्भा वा । अत्तनो अत्तानन्ति सकत्तानं “अयं खो, भो ब्रह्मा, महाब्रह्मा...पे०... वसी पिता भूतभब्यान”न्तिआदिना (दी० नि० १.४२) परेहि परिकप्पितं अत्तानञ्च कस्सचि किञ्चनभूतं न पस्सतीति दस्सेन्तो “कस्सची”तिआदिमाह । तत्थ परस्साति परजाति परो पुरिसोति वा एवं गहितस्स । न च मम क्वचनीति एत्थ मम-सद्वो अट्टानप्पयुत्तोति आह “मम-सद्वं ताव ठपेत्वा”ति । परस्स चाति अत्तनो अज्जस्स । परो पुरिसो नाम अत्थि ममत्थाय ठितो । तस्स वसेन मय्हं सब्बं इज्झतीति एकच्चदिट्ठिगतिकपरिकप्पितवसेन परं अत्तानं तज्च अत्तनो किञ्चनभूतं न पस्सतीति दस्सेन्तो “न च क्वचनी”तिआदिमाह । एत्थ च नाहं क्वचनीति सकअत्तनो सम्भावं न पस्सति । न कस्सचि किञ्चनतस्मिन्ति सकअत्तनो एव कस्सचि अत्तनियतं न पस्सति । न च ममाति एतं द्वयं यथारहं सम्बन्धितब्बं, अत्थि-पदं पच्चेकं । न च क्वचनि परस्स अत्ता अत्थीति परस्स अत्तनो अभावं पस्सति । तस्स परस्स अत्तनो मम किञ्चनता नत्थीति परस्स अत्तनो अनत्तनियतं पस्सति । एवं अज्झत्तं बहिद्भा खन्धानं अत्तत्तनियसुज्जता-सुद्धसङ्खारपुज्जता-चतुकोटिकसुज्जतापरिगणहनेन निट्ठा होति । सेसमेत्थ सुविज्जेय्यमेव ।

ब्राह्मणसच्चसुत्तवण्णना निड्ढिता ।

६. उम्मगसुत्तवण्णना

१८६. छट्ठे आकङ्खीयतीति चित्तवसिको लोको तत्थ तत्थ उपकङ्खीयति । तेसंयेवेत्थ गहणं वेदितब्बन्ति ये अपरिज्जातवत्थुका चित्तस्स वसं गच्छन्ति, तेसंयेव गहणं । न हि परिज्जातक्खन्धा पहीनकिलेसा चित्तस्स वसं गच्छन्ति, चित्तं पन अत्तनो वसे वत्तेन्ति । सह सीलेनाति चारित्तवारित्तसीलेन सद्धिं । पुब्बभागपटिपदन्ति धुतङ्गमादिं कत्वा याव गोत्रभुजाणं, ताव पवत्तेतब्बं समथविपस्सनासङ्घातं सम्मापटिपदं । सेसं सुविज्जेय्यमेव ।

उम्मगसुत्तवण्णना निट्ठिता ।

७. वस्सकारसुत्तवण्णना

१८७. सत्तमे वस्सकारो ब्राह्मणो मगधमहामत्तोति एत्थ वस्सकारोति तस्स ब्राह्मणस्स नामं । महति या इस्सरियमत्ताय समन्नागतो महामत्तो । इस्सरियमत्तायाति च इस्सरियप्पमाणेनाति अत्थो, इस्सरियेन चेव वित्तूपकरणेन चाति एवं वा एत्थ अत्थो दट्ठब्बो, उपभोगूपकरणानिपि हि लोके “मत्ता”ति वुच्चन्ति । मगधरज्जो, मगधरट्ठे वा महामत्तोति मगधमहामत्तो । तुदिसज्जितो गामो निवासो एतस्साति तोदेय्यो । तेनेवाह “तुदिगामवासिकस्सा”ति । तुदिगामवासिता चस्स तत्थ अधिपतिभावेनाति दट्ठब्बा । सो हि तं गामं सोणदण्डो विय, चम्पं कूटदन्तो विय, खाणुमतं अधिपतिभावेन अज्झावसति । महद्धनो होति पञ्चचत्तालीसकोटिविभवो । परिसतीति परिसायं, जनसमूहेति अत्थो । तेनाह “सन्निपतिताय परिसाया”ति । अभिप्पसन्नोति एत्थ अभिक्कमनत्थो अभि-सद्दोति आह “अतिक्कम्म पसन्नो”ति, पसादनीयं ठानं अतिक्कमित्वा अप्पसादनीयद्वाने पसन्नोति अधिप्पायो । तं तं किच्चं अत्थं पस्सतीति अत्थदसा, अलं समत्था पटिबला अत्थदसा अलमत्थदसा, अलमत्थदसे अतिसयन्तीति अलमत्थदसतरा । तेनाह “अत्थे पस्सितुं समत्था”ति आदि । नेव सप्पुरिसं न असप्पुरिसं जानाति सप्पुरिसधम्मानं असप्पुरिसधम्मानञ्च याथावतो अजाननतो । सेसमेत्थ उत्तानमेव ।

वस्सकारसुत्तवण्णना निट्ठिता ।

८. उपकसुत्तवण्णना

१८८. अट्ठमे निब्बत्तिवसेन निरयं अरहति, निरयसंवत्तनियेन वा कम्मुना निरये नियुत्तोति नेरयिको । अवीचिम्हि उप्पज्जित्वा तत्थ आयुकप्पसज्जितं अन्तरकप्पं तिट्ठतीति कप्पट्ठो । निरयूपपत्तिं परिहरणवसेन तिकिच्छितुं असक्कुण्येयोति अतेकिच्छो । अपरियादिन्नावति अपरिक्खीणायेव । सचे हि एको भिक्खु कायानुपस्सनं पुच्छति, अज्जो वेदनानुपस्सनं... पे०... चित्तानुपस्सनं । “इमिना पुट्ठे अहं पुच्छामी”ति एको एकं न ओलोकेति, एवं सन्तेपि तेसं वारो पज्जायति एव, बुद्धानं पन वारो न पज्जायति । विदत्थिचतुरङ्गलं छायां अतिक्कमनतो पुरेतरंयेव भगवा चुद्धसविधेन कायानुपस्सनं, नवविधेन वेदनानुपस्सनं, सोळसविधेन चित्तानुपस्सनं, पञ्चविधेन धम्मानुपस्सनं कथेति । तिट्ठन्तु वा एवं चत्तारो । सचे हि अज्जे चत्तारो सम्मप्पधानेसु, अज्जे इद्धिपादेसु, अज्जे पज्चिन्द्रियेसु, अज्जे पञ्चबलेसु, अज्जे सत्तबोज्झङ्गेसु, अज्जे अट्ठमगङ्गेसु पज्हे पुच्छेय्युं, तम्मि भगवा कथेय्य । तिट्ठन्तु वा एते अट्ठ । सचे अज्जे सत्ततिस जना बोधिपक्खियेसु पज्हे पुच्छेय्युं, तम्मि भगवा तावदेव कथेय्य । कस्मा? यावता हि लोकियमहाजने एकं पदं कथेन्ते ताव आनन्दत्थेरो अट्ठ पदानि कथेति । आनन्दत्थेरे पन एकं पदं कथेन्तेयेव भगवा सोळस पदानि कथेति । कस्मा? भगवतो हि जिक्का मुदु, दन्तावरणं सुफुसितं, वचनं अगळितं, भवङ्गपरिवासो लहुको । तेन वुत्तं — “अपरियादिन्नावस्स तथागतस्स धम्मदेसना, अपरियादिन्नं धम्मपदव्यञ्जनं”ति ।

तत्थ धम्मदेसनाति तन्तिट्ठपना । धम्मपदव्यञ्जनन्ति एत्थ धम्मोति पाळि । पज्जति अत्थो एतेनाति पदं । वाक्यञ्च पदेनेव सङ्गहितं । अत्थं व्यञ्जेतीति व्यञ्जनं, अक्खरं । तज्झि पदवाक्यं परिच्छिज्जमानं तं तं अत्थं व्यञ्जेति पकासेति । एतेन अपरापरेहि पदव्यञ्जनेहि सुचिरम्मि कालं कथेन्तस्स तथागतस्स न कदाचि तेसं परियादानं अत्थीति दस्सेति । गुणधंसीति गुणधंसनसीलो । पगब्बोति वाचापागब्बियेन समन्नागतो ।

उपकसुत्तवण्णना निट्ठिता ।

९. सच्छिकरणीयसुत्तवण्णना

१८९. नवमे नामकायेनाति सहजातनामकायेन । सेसमेत्थ उत्तानमेव ।

सच्छिकरणीयसुत्तवण्णना निट्ठिता ।

१०. उपोसथसुत्तवण्णना

१९०. दसमे तुण्हीभूतं तुण्हीभूतन्ति आमोडितवचनं व्यापनिच्छावसेन वुत्तन्ति आह “यतो यतो अनुविलोकेती”ति । अनुविलोकेत्वाति एत्थ अनु-सद्वोपि व्यापनिच्छावचनमेवाति अनु अनु विलोकेत्वाति अत्थो, पञ्चपसादप्पटिमण्डितानि अक्खीनि उम्मीलेत्वा ततो ततो विलोकेत्वाति वुत्तं होति । अलन्ति युत्तं, ओपायिकन्ति अत्थो “अलमेव निब्बिन्दितु”न्तिआदीसु (दी० नि० २.२७२; सं० नि० २.१२४-१२६) विय । पुटबन्धनेन परिहरित्वा असितब्बं पुटोसं सम्बलं अ-कारस्स ओ-कारं कत्वा । तेनाह “पाथेय्य”न्ति । सेसमेत्थ सुविज्जेय्यमेव ।

उपोसथसुत्तवण्णना निट्ठिता ।

ब्राह्मणवग्गवण्णना निट्ठिता ।

(२०) ५. महावग्गो

१. सोतानुगतसुत्तवण्णना

१९१. पञ्चमस्स पठमे सोतानुगतानन्ति पसादसोतं अनुगन्त्वा गतानं, पगुणानं वाचुगगतानन्ति अत्थो । एवंभूता च पसादसोतं ओदहित्वा जाणसोतेन सुट्ठु ववत्थपिता नाम होन्तीति आह “पसादसोत”न्तिआदि । एकच्चस्स हि उग्गहितपुब्बवचनं तं तं पगुणं निच्छरितं सुट्ठु ववत्थपितं न होति । “असुकं सुत्तं वा जातकं वा कथेही”ति वुत्ते “सज्झायित्वा संसन्दित्वा समनुग्गाहित्वा जानिस्सामी”ति वदन्ति । एकच्चस्स तं तं पगुणं भवङ्गसोतसदिसं होति “असुकं सुत्तं वा जातकं वा कथेही”ति वुत्ते उद्धरित्वा तमेव कथेति । तं सन्धायेतं वुत्तं “जाणसोतेन ववत्थपितान”न्ति । इत्थिलिङ्गादीनि तीणि लिङ्गानि । नामादीनि चत्तारि पदानि । पठमादयो सत्त विभक्तियो ।

वळज्जेतीति पाळि अनुसन्धिं पुब्बापरवसेन वाचुगतं करोन्तो धारेति । वचसा परिचिताति सुत्तदसकवग्गदसकपण्णासदसकवसेन वाचाय सज्झायिता, “दससुत्तानि गतानि, दसवग्गानि गतानी”तिआदिना सल्लक्खेत्वा वाचाय सज्झायिताति अत्थो । वग्गादिवसेन हि इध वचसा परिचयो अधिप्पेतो, न पन सुत्तेकदेसस्स सुत्तमत्तस्स वचसा परिचयो । मनसा अनु अनु पेक्खिता भागसो निज्झायिता विदिता मनुसानुपेक्खिता । यस्स वाचाय सज्झायितं बुद्धवचनं मनसा चिन्तेन्तस्स तत्थ तत्थ पाकटं होति, महादीपं जालेत्वा ठितस्स रूपगतं विय विभूतं हुत्वा पज्जायति । तं सन्धायेतं वुत्तं । सुप्पटिविद्धाति निज्जटं निग्गुम्बं कत्वा सुट्ठु याथावतो पटिविद्धा । सेसमेत्थ सुविज्जेय्यमेव ।

सोतानुगतसुत्तवण्णना निट्ठिता ।

२. ठानसुत्तवण्णना

१९२. दुतिये संवासेनाति सहवासेन । सीलं वेदितब्बन्ति “अयं सुसीलो वा दुस्सीलो वा”ति सह वसन्तेन उपसङ्कमन्तेन जानितब्बो । तच्च खो दीधेन अब्बुना, न इत्तरन्ति तच्च सीलं दीधेन कालेन वेदितब्बं, न इत्तरेन । द्वीहतीहज्झि संयताकारो च संवुतिन्द्रियाकारो च न सक्का दस्सेतुं । मनसि करोताति तम्पि “सीलमस्स परिग्गहेस्सामी”ति मनसिकरोन्तेन पच्चवेक्खन्तेनेव सक्का जानितुं, न इतरेन । पज्जवताति तम्पि सप्पज्जेनेव पण्डितेन । बालो हि मनसिकरोन्तोपि जानितुं न सक्कोति ।

संवोहारेनाति अपरापरं कथनेन ।

“यो हि कोचि मनुस्सेसु, वोहारं उपजीवति ।

एवं वासेट्ठ जानाहि, वाणिजो सो न ब्राह्मणो”ति ॥ (म० नि० २.४५७; सु० नि० ६१९) —

एत्थ हि ब्यवहारो नाम । “चत्तारो अरियवोहारा, चत्तारो अनरियवोहारा”ति (दी० नि० ३.३१३) एत्थ चेतना । “सङ्घा समज्जा पज्जत्ति वोहारो”ति (ध० स० १३१३-१३१५; महानि० ७३) एत्थ पज्जत्ति । “वोहारमत्तेन सो वोहरेय्या”ति (सं० नि० १.२५) एत्थ कथावोहारो । इधापि एसोव अधिप्पेतो । एकच्चस्स हि सम्मुखाकथा परम्मुखाकथाय न समेति परम्मुखाकथा सम्मुखाकथाय । तथा पुरिमकथा पच्छिमकथाय, पच्छिमकथा च पुरिमकथाय । सो कथनेनेव सक्का जानितुं “असुचि एसो पुग्गलो”ति । सुचिसीलस्स पन पुरिमं पच्छिमेन, पच्छिमञ्च पुरिमेन समेति । सम्मुखाकथितं परम्मुखाकथितेन समेति, परम्मुखाकथितञ्च सम्मुखाकथितेन, तस्मा कथनेन सक्का सुचिभावो जानितुन्ति पकासेन्तो एवमाह ।

थामोति जाणथामो । यस्स हि जाणथामो नत्थि, सो उप्पन्नेसु उपद्वेसु गहेतब्बं गहणं कत्तब्बं किच्चं अपस्सन्तो अद्वारकघरं पविट्ठो विय चरति । तेनाह “आपदासु, भिक्खवे, थामो वेदितब्बो”ति ।

साकच्छायाति संकथाय । दुप्पज्जस्स हि कथा उदके गेण्डु विय उप्पिलवति । पज्जवतो कथेन्तस्स पटिभानं अनन्तं होति । उदकविप्फन्दितेनेव हि मच्छो खुद्दको वा महन्तो वाति आयति ।

जातिविनासोति चोररोगभयादीहि आतीनं विनासो । भोगानं ब्यसनं भोगव्यसनं, राजचोरादिवसेन भोगविनासोति अत्थो । तेनाह “दुतियपदेपि एसेव नयो”ति । पज्हुम्मग्गोति पज्हुगवेसनं, जातुं इच्छितस्स अत्थस्स वीमंसनन्ति अत्थो । अतप्पकन्ति अतित्तिकरट्ठेन अतप्पकं सादुरसभोजनं विय । सण्हन्ति सुखुमसभावं ।

ठानसुत्तवण्णना निट्ठिता ।

३. भदियसुत्तवण्णना

१९३. ततिये करणस्स उत्तरं किरियं करणुत्तरियं, तं लक्खणं एतस्साति करणुत्तरियलक्खणो । सेसं सुविज्जेय्यमेव ।

भद्वियसुत्तवण्णना निड्ढिता ।

४. सामुगियसुत्तवण्णना

१९४. चतुत्थे पुग्गलस्स पारिसुद्धिया पधानभूतानि वा अङ्गानि पारिसुद्धिपधानियङ्गानि । सेसमेत्थ सुविज्जेय्यमेव ।

सामुगियसुत्तवण्णना निड्ढिता ।

५. वप्पसुत्तवण्णना

१९५. पञ्चमे पिहितत्ताति अकुसलस्स पवेसनद्वारं पिदहित्वा ठितत्ता । कायेन संवरितब्बज्झि अपिहितेन द्वारेन पवत्तनकं पापधम्मं संवरित्वा ठितो कायेन संवुतो नाम । खयविरागेनाति अच्चन्तखयसङ्घातेन विरज्जनेन, अनुप्पादनिरोधेनाति अत्थो । किं विज्जा पुब्बे उप्पन्नाति? उभयमेतं न वत्तब्बं । पहानाभिसमयभावनाभिसमयानं अभिन्नकालत्ता पदीपुज्जलनेन अन्धकारं विय विज्जुप्पादेन अविज्जा निरुद्धाव होति, वत्तब्बं वा हेतुफलत्तमुपचारवसेन । यथा हि पदीपुज्जलनहेतुको अन्धकारविगमो, एवं विज्जुप्पादहेतुको अविज्जानिरोधो । हेतुफलधम्मा च समानकालापि पुब्बापरकाला विय वोहरीयन्ति यथा “चक्खुञ्च पटिच्च रूपे च उप्पज्जति चक्खुविज्जाण”न्ति (म० नि० १.४००; ३.४२१, ४२५, ४२६; सं० नि० २.४३-४४; २.४.६०; कथा० ४६५, ४६७) पच्चयादानुप्पज्जनकिरिया । चित्तस्स कायस्स च विहननतो विघातो, दुक्खं । परिदहनतो परिळाहो ।

निच्चविहाराति सब्बदा पवत्तनकविहारा । ठपेत्वा हि समापत्तिवेलं भवङ्गवेलञ्च खीणासवा इमिना छळङ्गुपेक्खाविहारेण सब्बकालं विहरन्ति । चक्खुना रूपं दिस्वाति चक्खुविज्जाणेन रूपं दिस्वा । चक्खुना रूपं दिस्वाति हि निस्सयवोहारेण वुत्तं । ससम्भारकथा हेसा यथा “धनुना विज्झती”ति, तस्मा निस्सयसीसेन निस्सितस्स गहणं दट्ठब्बं । रागवसेन न सोमनस्सजातो होतीति गेहसितपेमवसेनपि जवनक्खणे सोमनस्सजातो न होति मग्गेन समुच्छिन्नत्ता, न दोमनस्सजातो पसादज्जत्तवसेनपि । उपेक्खको मज्झत्तो हुत्वा विहरतीति असमपेक्खनेन मोहं अनुप्पादेन्तो जाणुपेक्खावसेनेव उपेक्खको विहरति मज्झत्तो । खीणासवो हि इट्ठेपि अनिट्ठेपि मज्झत्तेपि आरम्मणे यो असमपेक्खनेन समसमा अयोनिसोगहणे अखीणासवानं मोहो उप्पज्जति, तं अनुप्पादेन्तो मग्गेनेव तस्स समुग्धातितत्ता जाणुपेक्खावसेनेव उपेक्खको विहरति, अयञ्चस्स पटिपत्ति सतिवेपुल्लपत्तिया पज्जावेपुल्लपत्तिया चाति वुत्तं “सतिसम्पज्जपरिगहिताया”ति ।

एत्थ च “छसु द्वारेसु उपेक्खको विहरती”ति इमिना छळङ्गुपेक्खा कथिता । “सम्पजानो”ति वचनतो पन चत्तारि जाणसम्पयुत्तचित्तानि लब्धन्ति तेहि विना सम्पजानताय असम्भवतो । “सततविहारा”ति वचनतो अट्ठपि महाकिरियचित्तानि लब्धन्ति जाणुप्पत्तिपच्चयरहितकालेपि पवत्तिजोतनतो । “अरज्जन्तो अदुस्सन्तो”ति वचनतो हसितुप्पादवोड्ढब्बनेहि सद्धिं दस चित्तानि लब्धन्ति । अरज्जनादुस्सनवसेन पवत्ति हि तेसम्पि साधारणाति । ननु चेत्थ “उपेक्खको विहरती”ति छळङ्गुपेक्खावसेन इमेसं सततविहारानं आगतत्ता सोमनस्सं कथं लब्धतीति? आसेवनतोति । किञ्चापि हि खीणासवो इट्ठानिट्ठेपि आरम्मणे मज्झत्ते विय बहुलं उपेक्खको विहरति अत्तनो पारिसुद्धप्पकतिभावाविजहनतो, कदाचि पन तथा चेतोभिसङ्खारभावे यं तं सभावतो इट्ठं आरम्मणं, तस्स याथावतो सभावगहणवसेनपि अरहतो चित्तं सोमनस्ससहगतं हुत्वा पवत्ततेव, तञ्च खो पुब्बासेवनवसेन ।

कायोति (सं० नि० टी० २.२.५१) पञ्चद्वारकायो, सो अन्तो अवसानं एतिस्साति कायन्तिका, तं कायन्तिकं । तेनाह — “याव पञ्चद्वारकायो पवत्तति, ताव पवत्त”न्ति । जीवितन्तिकन्ति एत्थापि एसेव नयो । पच्छा उप्पज्जित्वाति एतस्मिं अत्तभावे मनोद्वारिकवेदनातो पच्छा उप्पज्जित्वा ततो पठमं निरुज्झति, ततो एव अत्थसिद्धमत्थं सरूपेनेव दस्सेतुं “मनोद्वारिकवेदना पठमं उप्पज्जित्वा पच्छा निरुज्झती”ति वुत्तं । इदानीं तमेव सङ्खेपेन वुत्तं विवरितुं “सा ही”ति आदिमाह । याव तेत्तिसवस्सानि पठमवयो । पञ्जासवस्सकालेति पठमवयतो याव पञ्जासवस्सकाला, ताव ठिता होतीति वड्ढिहानियो अनुपगन्त्वा समरूपेनेव ठिता होती । मन्दाति मुदुका अतिखिणा । तदाति असीतिनवुतिवस्सकाले वदन्तेपि तथाचिरपरिचितेपीति अधिप्पायो । भग्गाति तेजोभग्गेन भग्गा दुब्बण्णा । हृदयकोटियेवाति चक्खादिवत्थूसु अप्पवत्तित्वा तेसं आदिअन्तकोटिभूतं हृदयवत्थुंयेव । तावाति याव वेदना वत्तति, ताव ।

वापियाति महातळाकेन । पञ्चउदकमग्गसम्पन्नन्ति पञ्चहि उदकस्स पविसननिक्खमनमग्गेहि युत्तं । ततो ततो विस्सन्दमानं सब्बसो पुण्णत्ता । पठमं देवे वस्सन्तेति आदि उपमासंसन्दनं । इमं वेदनं सन्धायाति इमं यथावुत्तं परियोसानप्पत्तं मनोद्वारिकवेदनं सन्धाय ।

कायस्स भेदाति अत्तभावस्स विनासनतो । परतो अगन्त्वाति परलोकवसेन अगन्त्वा । वेदनानं सीतिभावो नाम सङ्खारदरथपरिळाहाभावो । सो पनायं सब्बसो अप्पवत्तिवसेनेवाति आह “अप्पवत्तनधम्मानि भविस्सन्ती”ति ।

अत्तभावं नासेतुकामस्स दळ्हं उप्पन्नं संवेगजाणं सन्धायाह “कुदालो विय पज्जा”ति । ततो निब्बत्तितज्झानसमाधिं सन्धाय “पिटकं विय समाधी”ति । तन्निस्साय पवत्तेतब्बविपस्सनारम्भजाणं सन्धाय “खनित्ति विय विपस्सना”ति च वुत्तं । सेसमेत्थ उत्तानमेव ।

वप्पसुत्तवण्णना निड्डिता ।

६. साळहसुत्तवण्णना

१९६. छट्ठे कायदळ्हिबहुलतं तपतीति तपो, अत्तकिलमथानुयोगवसेन पवत्तं वीरियं । तेन कायदळ्हिबहुलतानिमित्तस्स पापस्स जिगुच्छनं विरज्जनं तपोजिगुच्छाति आह “दुक्करकारिकसङ्घातेना”ति आदि । तपोजिगुच्छवादाति आदीसु तपोजिगुच्छं वदन्ति, मनसापि तमेव सारतो गहेत्वा विचरन्ति, कायेनपि तमेव अल्लीना नानप्पकारं अत्तकिलमथानुयोगमनुयुत्ता विहरन्तीति अत्थो । अपरिसुद्धकायसमाचाराति अपरिसुद्धेन पाणातिपातादिना कायसमाचारेण समन्नागता । अपरिसुद्धवचीसमाचाराति अपरिसुद्धेन मुसावादादिना वचीसमाचारेण समन्नागता । अपरिसुद्धमनोसमाचाराति अपरिसुद्धेन अभिज्झादिना मनोसमाचारेण समन्नागता । कामं अकुसलकायसमाचारवचीसमाचारप्पवत्तिकालेपि अभिज्झादयो पवत्तन्तियेव, तदा पन ते चेतनापक्खिका वा अब्बोहारिका वाति, मनोसमाचारवारे एव अभिज्झादिवसेन योजना कता । अथ वा द्वारन्तरे पवत्तानं पाणातिपातादीनं वचीसमाचारादिभावाभावो विय द्वारन्तरे पवत्तानम्पि अभिज्झादीनं कायसमाचारादिभावो असिद्धो, मनोसमाचारभावो एव पन सिद्धोति कत्वा मनोसमाचारवारे एव अभिज्झादयो उद्धटा । तथा हि वुत्तं —

“द्वारे चरन्ति कम्मानी, न द्वारा द्वाराचारिनो ।

तस्मा द्वारेहि कम्मानी, अज्जमज्जं ववत्थिता”ति ॥ (ध० स० अट्ठ० १ कामावचरकुसलद्वारकथा) ।

अपरिसुद्धाजीवाति अपरिसुद्धेन वेज्जकम्मदूतकम्मवड्ढियोगादिना एकवीसतिअनेसनाभेदेन आजीवेन समन्नागता । इदञ्च सासने पब्बजितानयेव वसेन वुत्तं, “येपि ते समणब्राह्मणा”ति पन वचनतो बाहिरकवसेन गहट्टवसेन च योजना वेदितब्बा । गहट्टानम्मि हि जातिधम्मकुलधम्मदेसधम्मविलोमनवसेन अञ्जथापि मिच्छाजीवो लब्भतेव ।

जाणदस्सनायाति एत्थ जाणदस्सनन्ति मग्गजाणम्मि वुच्चति फलजाणम्मि सब्बञ्जुतञ्जाणम्मि पच्चवेक्खणजाणम्मि विपस्सनाजाणम्मि । “किं नु खो, आवुसो, जाणदस्सनविसुद्धत्थं भगवति ब्रह्मचरियं वुस्सती”ति (म० नि० १.२५७) हि एत्थ मग्गजाणं “जाणदस्सन”न्ति वुत्तं । “अयमञ्जो उत्तरिमनुस्सधम्मो अलमरियजाणदस्सनविसेसो अधिगतो फासुविहारो”ति (म० नि० १.३२८) एत्थ फलजाणं । “भगवतोपि खो जाणं उदपादि सत्ताहकालकतो आळारो कालामो”ति (महाव० १०) एत्थ सब्बञ्जुतञ्जाणं । “जाणञ्च पन मे दस्सनं उदपादि, अकुप्पा मे विमुत्ति, अयमन्तिमा जाती”ति (सं० नि० ५.१०८१; महाव० १६; पटि० म० २.३०) एत्थ पच्चवेक्खणजाणं । “जाणदस्सनाय चित्तं अभिनीहरती”ति (दी० नि० १.२३४-२३५) एत्थ विपस्सनाजाणं । इध पन जाणदस्सनायाति मग्गजाणं “जाणदस्सन”न्ति वुत्तं । तेनाह “मग्गजाणसङ्घाताय दस्सनाया”ति । अविराधितं विज्झतीति अविराधितं कत्वा विज्झति । सेसमेत्थ सुविज्जेय्यमेव ।

साळ्हसुत्तवण्णना निड्ढिता ।

७. मल्लिकादेवीसुत्तवण्णना

१९७. सत्तमे अप्पेसक्खाति अप्पानुभावा । सा पन अप्पेसक्खता आधिपतेय्यसम्पत्तिया परिवारसम्पत्तिया च अभावेन पाकटा होति । तत्थ परिवारसम्पत्तिया अभावं दस्सेन्तो “अप्पपरिवारा”ति आह । इस्सराति आधिपतेय्यसंवत्तनकम्मबलेन ईसनसीला । सा पनस्सा इस्सरता विभवसम्पत्तिपच्चया पाकटा जाताति अड्डतापरियायभावेन वदन्तो “अड्डति इस्सरा”ति आह । महन्तं धनमेतिस्सा भूमिगतञ्चेव वळञ्जनकञ्चाति महद्धना । इध पन वळञ्जनकेनेव धनेन महद्धनतं दस्सेन्तो “वळञ्जनकधनेन महद्धना”ति आह । ईसतीति ईसा, अभिभूति अत्थो । महती ईसा महेसा, सुप्पतिट्ठितमहेसताय पन परेहि महेसोति अक्खातब्बताय महेसक्खा । यस्मा पन सो महेसक्खाभावो आधिपतेय्यपरिवारसम्पत्तिया विज्जायति, तस्मा “महापरिवारा”ति वुत्तं ।

सण्ठानपारिपूरिया अधिकं रूपमस्साति अभिरूपा । सण्ठानपारिपूरियाति च हत्थपादादिसरीरावयवानं सुसण्ठिततायाति अत्थो । अवयवपारिपूरिया हि समुदायपारिपूरिसिद्धि । रूपन्ति च सरीरं “रूपवन्तेव सङ्ख्यं गच्छती”ति आदीसु विय । दस्सनयुत्ताति सुरुपभावेन पस्सितब्बयुत्ता, दिस्समाना चक्खूनि पियायतीति अञ्जकिच्चविक्खेपं हित्वापि दट्टब्बाति वुत्तं होति । दिस्समानाव सोमनस्सवसेन चित्तं पसादेतीति पासादिका । तेनाह “दस्सनेन पासादिका”ति । पोक्खरताति वुच्चति सुन्दरभावो, वण्णस्स पोक्खरता वण्णपोक्खरता, ताय वण्णसम्पत्तियाति अत्थो । पोराणा पन पोक्खरन्ति सरीरं वदन्ति, वण्णं वण्णमेव । तेसं मतेन वण्णञ्च पोक्खरञ्च वण्णपोक्खरानि, तेसं भावो वण्णपोक्खरता । इति परमाय वण्णपोक्खरतायाति उत्तमपरिसुद्धेन वण्णेन चैव सरीरसण्ठानसम्पत्तिया चाति अत्थो दट्टब्बो । तेनेवाह “वण्णेन चैव सरीरसण्ठानेन चा”ति । तत्थ वण्णेनाति वण्णधातुया । सरीरं नाम सन्निवेसविसिद्धो करचरणगीवासीसादिअवयवसमुदायो, सो च सण्ठानमुखेन गय्हतीति आह “सरीरसण्ठानेना”ति ।

अभिसज्जतीति कुज्झनवसेनेव कुटिलकण्टको विय तस्मिं तस्मिं समुद्धाने मकरदन्तो विय लगति । यज्झि कोधस्स उप्पत्तिट्ठानभूते आरम्मणे उपनाहस्स पच्चयभूतं कुज्झनवसेन अभिसज्जनं, तं इधाधिप्पेतं, न लुब्भनवसेन ।
कुप्पतीति आदीसु पुब्बुप्पत्ति **कोपो**, ततो बलवतरो **ब्यापादो** लब्धासेवनताय चित्तस्स ब्यापज्जनतो । सातिसयं लब्धासेवनताय ततो ब्यापादतोपि बलवतरा पच्चत्थिकभावेन थामप्पत्ति **पतित्थियना** । **अन्नं पानन्ति** आदीसु अदीयतो **अन्नं**, खादनीयं भोजनीयञ्च । पातब्यतो **पानं**, यंकिज्जि पानं । वसितब्बतो अच्छादेतब्बतो **वत्थं**, निवासनपावुरणं । यन्ति तेनाति **यानं**, छत्तुपाहनवय्हसिविकादि यंकिज्जि गमनपच्चयं । छत्तम्पि हि वस्सातपदुक्खनिवारणेन मग्गगमनसाधनन्ति कत्वा “**यान**”न्ति वुच्चति । **मालन्ति** यंकिज्जि सुमनमालादिपुप्फं । **गन्धन्ति** यंकिज्जि चन्दनादिविलेपनं ।

मल्लिकादेवीसुत्तवण्णना निट्ठिता ।

८. अत्तन्तपसुत्तवण्णना

१९८. अट्टमे आहितो अहंमानो एत्थाति अत्ता, अत्तभावो । इध पन यो परो न होति, सो अत्ता, तं **अत्तानं** । **परन्ति** अत्ततो अज्जं । **दिट्ठेति** पच्चक्खभूते । **धम्मेति** उपादानक्खन्धधम्मे । तत्थ हि अत्ता भवति, अत्तसज्जादिट्ठि भवतीति अत्तभावसमज्जा । तेनाह “**दिट्ठेव धम्मेति इमस्मियेव अत्तभावे**”ति । **छातं वुच्चति तण्हा** जिघच्छाहेतुताय । **अन्तो तापनकिलेसानन्ति** अत्तनो सन्ताने दरथपरिळाहजननेन सन्तापनकिलेसानं ।

परेसं हननघातनादिना रोदापनतो **लुद्धो** । तथा विघातकभावेन कायचित्तानं विदालनतो **दारुणो** । थद्धहदयो **कक्खळो** । बन्धनागारे नियुत्तो **बन्धनागारिको** ।

खत्तियाभिसेकेनाति खत्तियानं कातब्बअभिसेकेन । **सन्थागारन्ति** सन्थारवसेन कतं अगारं यज्जागारं । **सप्पितेलेनाति** सप्पिमिस्सेन तेलेन । यमकस्सेहेन हि एसा तदा कायं अब्भज्जति । वच्छभावं तरित्वा ठितो **वच्छतरो** । **परिक्खेपकरणत्थायाति** नवमालाहि सद्धिं दब्भेहि वेदिया परिक्खपनत्थाय । **यज्जभूमियन्ति** अवसेसयज्जट्ठाने ।

दूरसमुस्सारितमानस्सेव सासने सम्मापटिपत्ति सम्भवति, न मानजातिकस्साति आह “**निहतमानत्ता**”ति । **उस्सन्नत्ताति** बहुभावतो । भोगारोग्यादिवत्थुका मदा सुप्पहिया होन्ति निमित्तस्स अवट्ठानतो, न तथा कुलविज्जामदाति खत्तियब्राह्मणकुलानं पब्बजितानम्पि जातिविज्जा निस्साय मानजप्पनं दुप्पजहन्ति आह “**येभुय्येन हि... पे... मानं करोन्ती**”ति । **विजातितायाति** निहीनजातिताय । **पतिट्ठातुं न सक्कोन्तीति** सुविसुद्धं कत्वा सीलं रक्खितुं न सक्कोन्ति । सीलवसेन हि सासने पतिट्ठहन्ति । **पतिट्ठातुन्ति** वा सच्चप्पटिवेधेन लोकुत्तराय पतिट्ठाय पतिट्ठातुं । येभुय्येन हि उपनिस्सयसम्पन्ना सुजातायेव होन्ति, न दुज्जाता ।

परिसुद्धन्ति रागादीनं अच्चन्तमेव पहानदीपनतो निरुपक्विकलेसताय सब्बसो विसुद्धं । **सद्धं पटिलभतीति** पोथुज्जनिकसद्धावसेन सद्वहति । विज्जुजातिकानज्झि धम्मसम्पत्तिग्गहणपुब्बिका सद्धासिद्धि धम्मप्पमाणधम्मप्पसन्नभावतो । **जायम्पतिकाति** घरणिपतिका । कामं “जायम्पतिका”ति वुत्ते घरसामिकघरसामिनिवसेन द्विन्नयेव गहणं विज्जायति, यस्स पन पुरिसस्स अनेका पजापतियो होन्ति, तत्थ किं वत्तब्बन्ति एकायपि संवासो सम्बाधोति दस्सनत्थं “**द्वे**”ति वुत्तं । रागादिना सकिज्जनट्ठेन, खेत्तवत्थुआदिना सपलिबोधट्ठेन रागरजादीनं आगमनपथतापि उप्पज्जनट्ठानता एवाति द्वेपि वण्णना एकत्था, व्यज्जनमेव नानं । **अलग्गनट्ठेनाति** असज्जनट्ठेन अप्पटिबद्धभावेन । एवं

अकुसलकुसलप्पवत्तीनं ठानभावेन घरावासपब्बज्जानं सम्बाधब्भोकासतं दस्सेत्वा इदानीं कुसलप्पवत्तियायेव अट्टानट्टानभावेन तेसं तं दस्सेतुं “अपिचा”तिआदि वुत्तं ।

सङ्खेपकथाति विसुं विसुं पदुद्धारं अकत्वा सङ्खेपतो अत्थवण्णना । **एकम्पि दिवसन्ति** एकदिवसमत्तम्पि । **अखण्डं कत्वा**ति दुक्कटमत्तस्सपि अनापज्जनेन अखण्डितं कत्वा । **किलेसमलेन अमलिनन्ति** तण्हासंकिलेसादिवसेन असंकिलिटुं कत्वा । **परिदहित्वा**ति निवासेत्वा चेव पारुपित्वा च । अगारवासो अगारं उत्तरपदलोपेन, तस्स वट्ठिआवहं अगारस्स हितं ।

भोगक्खन्धोति भोगरासि भोगसमुदायो । **आबन्धनट्टेना**ति पुत्तो नत्तातिआदिना पेमवसेन सपरिच्छेदवसेन बन्धनट्टेन । अम्हाकमेतेति जायन्तीति **जाती**, पितामहपितुपुत्तादिवसेन परिवत्तनट्टेन **परिवट्टो** । सामज्जवाचीपि सिक्खा-सद्दो आजीवसद्दसन्निधानतो उपरिवुच्चमानविसेसापेक्खाय च विसेसनिविट्ठोव होतीति वुत्तं “**या भिक्खून् अधिसीलसङ्घाता सिक्खा**”ति । सिक्खितब्बट्टेन **सिक्खा**, सह आजीवन्ति एत्थाति **साजीवो** । **सिक्खनभावेना**ति सिक्खाय साजीवे च सिक्खनभावेन । **सिक्खं परिपूरेन्तो**ति सीलसंवरं परिपूरेन्तो । **साजीवज्च अवीतिक्कमन्तो**ति “नामकायो, पदकायो, निरुत्तिकायो, ब्यज्जनकायो”ति (पारा० अट्ठ० १.३९) वुत्तं सिक्खापदं भगवतो च वचनं अवीतिक्कमन्तो हुत्वाति अत्थो । इदमेव च “सिक्खन”न्ति वुत्तं, तत्थ साजीवानं अवीतिक्कमो सिक्खापारिपूरिया पच्चयो । ततो हि याव मग्गा सिक्खापारिपूरी होतीति ।

अनुप्पदाताति अनुबलप्पदाता, अनुवत्तनवसेन वा पदाता । कस्स पन अनुवत्तनं पदानज्जाति? “सहितान”न्ति वुत्तत्ता सन्धानस्साति विज्जायति । तेनाह “**सन्धानानुप्पदाता**”ति । यस्मा पन अनुवत्तनवसेन सन्धानस्स पदानं आधानं आरक्खनं वा दळ्ळकरणं होति, तेन वुत्तं “**द्वे जने समग्गे दिस्वा**”तिआदि । आरमन्ति एत्थाति **आरामो**, रमितब्बट्टानं । यस्मा पन आ-कारेण विनापि अयमत्थो लब्धति, तस्मा वुत्तं “**समग्गरामोतिपि पाळि, अयमेवत्थो**”ति ।

एत्थाति —

“नेलङ्गो सेतपच्छादो, एकारो वत्तती रथो ।

अनीघं पस्स आयन्तं, छिन्नसोतं अबन्धन”न्ति ॥ (सं० नि० ४.३४७; उदा० ६५; पेटको० २५) —

इमिस्सा गाथाय । सीलज्जेत्थ नेलङ्गन्ति वुत्तं । तेनेवाह — “चित्तो गहपति, नेलङ्गन्ति खो, भन्ते, सीलानमेतं अधिवचन”न्ति (सं० नि० ४.३४७) । **सुकुमारा**ति अप्फरुसताय मुदुका । **पुरस्स एसा**ति एत्थ **पुर**-सद्दो तन्निवासिवाचको दट्ठब्बो — “गामो आगतो”तिआदीसु विय । तेनेवाह “**नगरवासीन**”न्ति । मनं अप्पायति वट्ठेतीति **मनापो** । तेन वुत्तं “**चित्तवुट्ठिकरा**”ति ।

कालवादीतिआदि सम्फप्पलापा पटिविरतस्स पटिपत्तिदस्सनं । अत्थसंहितापि हि वाचा अयुत्तकालप्पयोगेन अत्थावहा न सियाति अनत्थविज्जापनवाचं अनुलोमेति, तस्मा सम्फप्पलापं पजहन्तेन अकालवादिता परिहरितब्बाति वुत्तं “**कालवादी**”ति । कालेन वदन्तेनपि उभयानत्थसाधनतो अभूतं परिवज्जेतब्बन्ति आह “**भूतवादी**”ति । भूतज्च वदन्तेन यं इधलोकपरलोकहितसम्पादकं, तदेव वत्तब्बन्ति दस्सेतुं “**अत्थवादी**”ति वुत्तं । अत्थं वदन्तेनपि लोकियधम्मसन्निस्सितमेव अवत्वा लोकुत्तरधम्मसन्निस्सितं कत्वा वत्तब्बन्ति दस्सनत्थं “**धम्मवादी**”ति वुत्तं । यथा च

अथो लोकुत्तरधम्मसन्निस्सितो होति, तं दस्सेतुं “**विनयवादी**”ति वुत्तं । पञ्चन्नज्झि संवरविनयानं पञ्चन्नज्ज्य प्हानविनयानं वसेन वुच्चमानो अथो निब्बानाधिगमनहेतुभावतो लोकुत्तरधम्मसन्निस्सितो होतीति । एवं गुणविसेसयुत्तोव अथो वुच्चमानो देसनाकोसल्ले सति सोभति, किच्चकरो च होति, न अज्जथाति दस्सेतुं “**निधानवतिं वाचं भासिता**”ति वुत्तं । इदानीं तं देसनाकोसल्लं विभावेतुं “**कालेना**”ति आदिमाह । पुच्छादिवसेन हि ओतिण्णवाचावत्थुस्मिं एकंसादिव्याकरणविभागं सल्लक्खेत्वा ठपनाहेतूदाहरणसन्दस्सनादिं तंतंकालानुरूपं विभावेन्तिया परिमितपरिच्छिन्नरूपाय विपुलतरगम्भीरोदारपरमत्थवित्थारसङ्गाहिकाय कथाय जाणबलानुरूपं परे याथावतो धम्मे पतिट्ठापेन्तो “देसनाकुसलो”ति वुच्चतीति एवमेत्थ अत्थयोजना वेदितब्बा ।

एवं पटिपाटिया सत्त मूलसिक्खापदानि विभजित्वा अभिज्झादिप्पहानं इन्द्रियसंवरजागरियानुयोगेहि विभावेतुं तम्पि नीहरित्वा आचारसीलस्सेव विभजनवसेन पाळि पवत्ताति तदत्थं विवरितुं “**बीजगामभूतगामसमारम्भा**”ति आदि वुत्तं । तत्थ बीजानं गामो समूहो **बीजगामो** । भूतानं जातानं निब्बत्तानं रुक्खगच्छलतादीनं समूहो **भूतगामो** । ननु च रुक्खादयो चित्तरहितताय न जीवा, चित्तरहितता च परिप्फन्दाभावतो छिन्ने विरुहनतो विसदिसजातिभावतो चतुयोनो अपरियापन्नतो च वेदितब्बा, वुद्धि पन पवाळसिलालवणानम्पि विज्जतीति न तेसं जीवभावे कारणं, विसयगगहणज्ज नेसं परिकप्पनामत्तं सुपनं विय चिज्जादीनं, तथा दोहळादयो, अथ कस्मा बीजगामभूतगामसमारम्भा पटिविरति इच्छिताति? समणसारुप्पतो तन्निवासिसत्तानुरक्खणतो च । तेनेवाह — “जीवसज्जिनो हि मोघपुरिस मनुस्सा रुक्खस्मि”न्ति आदि (पाचि० ८९) ।

मूलमेव बीजं **मूलबीजं**, मूलं बीजं एतस्सातिपि **मूलबीजं** । सेसेसुपि एसेव नयो । **फळुबीजन्ति** पब्बबीजं । पच्चयन्तरसमवाये सदिसफलुप्पत्तिया विसेसकारणभावतो विरुहनसमत्थे सारफले निरुळ्हो बीज-सद्दो तदत्थसंसिद्धिया मूलादीसुपि केसुचि पवत्ततीति मूलादितो निवत्तनत्थं एकेन बीज-सद्देन विसेसेत्वा वुत्तं “**बीजबीज**”न्ति “रूपरूपं, दुक्खदुक्ख”न्ति (सं० नि० ४.३२७) च यथा । कस्मा पनेत्थ बीजगामभूतगामं उद्धरित्वा बीजगामो एव निद्धिट्ठोति? न खो पनेतं एवं दट्ठब्बं, ननु अवोचुम्हा “मूलमेव बीजं मूलबीजं, मूलं बीजं एतस्सातिपि मूलबीज”न्ति । तत्थ पुरिमेन बीजगामो निद्धिट्ठो, दुतियेन भूतगामो । दुविधोपेस मूलबीजज्ज मूलबीजज्ज मूलबीजन्ति सामज्जनिद्वेसेन, एकसेसनयेन वा उद्धिट्ठोति वेदितब्बो । तेनेवाह “**पच्चविधस्सा**”ति आदि । **नीलतिणरुक्खादिकस्साति** अल्लतिणस्स चैव अल्लरुक्खादिकस्स च । **आदि-सद्देन** ओसधिगच्छलतादीनं सङ्गहो ।

एकं भत्तं एकभत्तं, तं अस्स अत्थीति **एकभत्तिको** । सो पन रत्तिभोजनेनपि सियाति तन्निवत्तनत्थं आह “**रत्तूपरतो**”ति । एवम्पि अपरहभोजीपि सिया एकभत्तिकोति तन्निवत्तनत्थं “**विरतो विकालभोजना**”ति वुत्तं । अरुणुगगमनतो पट्टाय याव मज्झन्हिका अयं बुद्धादीनं अरियानं आचिण्णसमाचिण्णो भोजनस्स कालो नाम, तदज्जो विकालो । अट्ठकथायं पन दुतियपदेन रत्तिभोजनस्स पटिक्खित्ता “अतिक्कन्ते मज्झन्हिके याव सूरियत्थङ्गमना भोजनं विकालभोजनं नामा”ति वुत्तं ।

दारुमासकोति ये वोहारं गच्छन्तीति इति-सद्देन एवंपकारे दस्सेति । अज्जेहि गाहापने उपनिक्खित्तसादियने च पटिग्गहणत्थो लब्धतीति “**नेव तं उग्गण्हाति, न उग्गहापेति, न उपनिक्खित्तं सादियती**”ति वुत्तं । अथ वा तिविधं पटिग्गहणं कायेन, वाचाय, मनसाति । तत्थ कायेन पटिग्गहणं **उग्गण्हनं**, वाचाय पटिग्गहणं **उग्गहापनं**, मनसा पटिग्गहणं **सादियनन्ति** तिविधम्पि पटिग्गहणं एकज्झं गहेत्वा पटिग्गहणाति वुत्तन्ति आह “**नेव तं उग्गण्हाती**”ति आदि । एस नयो **आमकधज्जपटिग्गहणाति** आदीसुपि । नीवारादिउपधज्जस्स सालिआदिमूलधज्जन्तो गधत्ता वुत्तं “**सत्तविधस्सा**”ति ।

“अनुजानामि, भिक्खवे, पञ्च वसानि भेसज्जानि अच्छवसं, मच्छवसं, सुसुकावसं, सूकरवसं, गद्रभवसं”न्ति (महाव० २६२) वुत्तत्ता इदं ओदिस्स अनुज्जातं नाम। तस्स पन “काले पटिग्गहित”न्ति (महाव० २६२) वुत्तत्ता पटिग्गहणं वट्टति सति पच्चयेति आह “अज्जत्र ओदिस्स अनुज्जाता”ति।

सारूपेण वञ्चनं रूपकूटं, पतिरूपेण वञ्चनाति अत्थो। अङ्गेन अत्तनो सरीरावयवेन वञ्चनं अङ्गकूटं। गणहनवसेन वञ्चनं गहणकूटं। पटिच्छन्नं कत्वा वञ्चनं पटिच्छन्नकूटं। अवक्कमतीति निष्पीळेति, पुब्बभागे अवक्कमतीति सम्बन्धो। हृदयन्ति नाळिआदिमानभाजनानं अब्भन्तरं। तेलादीनं नाळिआदीहि मिननकाले उस्सापिता सिखायेव सिखाभेदो, तस्सा हापनं। केचीति सारसमासाचरिया उत्तरविहारवासिनो च।

वधोति मुट्ठिप्पहारकसाताळनादीहि हिंसनं, विहेठनन्ति अत्थो। विहेठनत्थोपि हि वध-सद्दो दिस्सति “अत्तानं वधित्वा वधित्वा रोदती”तिआदीसु। यथा हि अपटिग्गहभावसामञ्जे सतिपि पब्बजितेहि अप्पटिग्गहितव्ववत्थुविसेसभावसन्दस्सनत्थं इत्थिकुमारिदासिदासादयो विभागेन वुत्ता, एवं परस्सहरणभावतो अदिन्नादानभावसामञ्जे सतिपि तुलाकूटादयो अदिन्नादानविसेसभावदस्सनत्थं विभागेन वुत्ता। न एवं पाणातिपातपरियायस्स वधस्स पुन गहणे पयोजनं अत्थि, तत्थ सयंकारो, इध परंकारोति च न सक्का वत्तुं “कायवचिप्पयोगसमुट्ठापिका चेतना छप्पयोगा”ति (दी० नि० टी० १.१०) वचनतो, तस्मा यथावुत्तो एवमेत्थ अत्थो युत्तो। अट्ठकथायं पन “वधोति मारण”न्ति वुत्तं। तम्पि पोथनमेव सन्धायाति च सक्का विज्जातुं मारणसद्दस्स विहिंसनेपि दिस्सनतो।

चीवरपिण्डपातानं यथाक्कमं कायकुच्छिपरिहरणमत्तजोतनायं अविसेसतो अट्ठन्नं परिकखारानं तप्पयोजनता सम्भवतीति दस्सेन्तो “ते सब्बेपी”तिआदिमाह। एतेपीति नवपरिकखारिकादयोपि अप्पिच्छा च सन्तुट्ठा च। न हि तत्तकेन महिच्छता असन्तुट्ठिता होतीति।

चतूसु दिसासु सुखं विहरति, ततो एव सुखविहारट्ठानभूता चतस्सो दिसा अस्स सन्तीति चातुदिसो। तत्थ चायं सत्ते वा सङ्खारे वा भयेन नप्पटिहज्जतीति अप्पटिघो। द्वादसविधस्स सन्तोसस्स वसेन सन्तुस्सनतो सन्तुस्समानो। इतरीतरेनाति उच्चावचेन परिस्सयानं बाहिरानं सीहव्यग्घादीनं, अब्भन्तरानञ्च कामच्छन्दादीनं कायचित्तूपद्वानं अभिभवनतो परिस्सयानं सहिता। बन्धनभावकरभयाभावेन अच्छम्भि। एको असहायो। ततो एव खग्गमिगसिङ्गसदिसताय खग्गविसाणकप्पो चरेय्याति अत्थो।

छिन्नपक्खो, असज्जातपक्खो वा सकुणो गन्तुं न सक्कोतीति पक्खि-सद्देन विसेसेत्वा सकुणो पाळियं वुत्तोति आह “पक्खयुत्तो सकुणो”ति। यस्स सन्निधिकारपरिभोगो किञ्चि ठपेतब्बं सापेक्खाठपनञ्च नत्थि, तादिसो अयं भिक्खूति दस्सेन्तो “अयमेत्थ सङ्केपत्थो”तिआदिमाह। अरियन्ति अपेन्ति ततो दोसा, तेहि वा आरकाति अरियोति आह “अरियेनाति निदोसेना”ति। अज्झत्तन्ति अत्तनि। निदोससुखन्ति निरामिससुखं किलेसवज्जरहितत्ता।

यथावुत्ते सीलसंवरे पतिट्ठितस्सेव इन्द्रियसंवरो इच्छितब्बो तदधिद्वानतो तस्स च परिपालकभावतोति वुत्तं “सो इमिना अरियेन सीलक्खन्धेन समन्नागतो भिक्खू”ति। सेसपदेसूति “न निमित्तग्गाही होती”तिआदिपदेसु। अयं पनेत्थ सङ्केपत्थो — न निमित्तग्गाहीति इत्थिपुरिसनिमित्तं वा सुभनिमित्तादिकं वा किलेसवत्थुभूतं निमित्तं न गणहाति, दिट्ठमत्तेयेव सण्ठाति। नानुब्यञ्जनग्गाहीति किलेसानं अनु अनु ब्यञ्जनतो पाकटभावकरणतो अनुब्यञ्जनन्तिलद्धवोहारं

हृत्थपादसितहसितकथितविलोकितादिभेदं आकारं न गण्हाति । यं तत्थ भूतं, तदेव गण्हाति ।
यत्वाधिकरणमेनन्ति आदिमिह यंकारणा यस्स चक्खुन्द्रियासंवरस्स हेतु एतं पुग्गलं सतिकवाटेन चक्खुन्द्रियं असंवृतं
 अपिहितचक्खुद्वारं हुत्वा विहरन्तं एते अभिज्झादयो धम्मा अन्वस्सवेय्युं अनुप्पबन्धेय्युं । **तस्स संवराय पटिपज्जतीति**
 तस्स चक्खुन्द्रियस्स सतिकवाटेन पिदहनत्थाय पटिपज्जति । एवं पटिपज्जन्तोयेव च “**रक्खति चक्खुन्द्रियं, चक्खुन्द्रिये**
संवरं आपज्जती”ति वुच्चति । **सोतेन सद्दं सुत्वा**ति आदीसुपि एसेव नयो । एवमिदं सङ्खेपतो रूपादीसु
 किलेसानुबन्धनिमित्तादिग्गाहपरिवज्जनलक्खणं इन्द्रियसंवरं सीलं वेदितब्बं । अयमेत्थ सङ्खेपो, वित्थारो पन
विसुद्धिमग्गसंवण्णनासु (विसुद्धि० महाटी० १.१३) वुत्तनयेनेव वेदितब्बो । **किलेसेहि अनवसित्तसुखन्ति** आदीसु
 रूपादीसु निमित्तादिग्गाहपरिवज्जनलक्खणत्ता इन्द्रियसंवरस्स किलेसेहि अनवसित्तसुखता अविकिण्णसुखता चस्स वुत्ता ।

अभिवक्कमनं **अभिवक्कन्तो**, पुरतो गमनं । पटिक्कमनं **पटिक्कन्तो**, पच्चागमनं । तदुभयमपि चतूसु इरियापथेसु
 लब्धति । गमने ताव पुरतो कायं अभिहरन्तो अभिवक्कमति नाम, पटिनिवत्तेन्तो पटिक्कमति नाम । ठानेपि ठितकोव कायं
 पुरतो ओणमन्तो अभिवक्कमति नाम, पच्छतो अपनामेन्तो पटिक्कमति नाम । निसज्जायपि निसिन्नकोव आसनस्स
 पुरिमअङ्गाभिमुखो संसरन्तो अभिवक्कमति नाम, पच्छिमं अङ्गप्पदेसं पच्चासंसरन्तो पटिक्कमति नाम । निपज्जायपि एसेव
 नयो ।

सात्थकसम्पज्जन्ति आदीसु समन्ततो पकारेहि, पकट्टं वा सविसेसं जानातीति सम्पजानो, सम्पजानस्स भावो
 सम्पजज्जं, तथापवत्तं जाणं । धम्मतो वड्डिसङ्घातेन सह अत्थेन वत्ततीति सात्थकं, अभिवक्कन्तादिसात्थकस्स सम्पजज्जं
सात्थकसम्पजज्जं । सप्पायस्स अत्तनो उपकारावहस्स सम्पजज्जं **सप्पायसम्पजज्जं** । अभिवक्कमादीसु भिक्खाचारगोचरे,
 अज्जत्थापि पवत्तेसु अविजहितकम्मट्ठानसङ्घाते गोचरे सम्पजज्जं **गोचरसम्पजज्जं** । अभिवक्कमादीसु असम्मुह्नमेव
 सम्पजज्जं **असम्मोहसम्पजज्जं** । तत्थ (दी० नि० अट्ठ० १.२१४; म० नि० अट्ठ० १.१०९) अभिवक्कमनचित्ते उप्पन्ने
 चित्तवसेनेव अगन्त्वा “किन्नु मे एत्थ गतेन अत्थो अत्थि नत्थी”ति अत्थानत्थं परिग्गहेत्वा अत्थपरिग्गहणं
सात्थकसम्पजज्जं । तत्थ च **अत्थो**ति चेतियदस्सनबोधिदस्सनसङ्खदस्सनथेरदस्सनअसुभदस्सनादिवसेन धम्मतो वड्डि ।
 चेतियं वा बोधिं वा दिस्वापि हि बुद्धारम्मणं, सङ्खदस्सनेन सङ्खारम्मणं पीतिं उप्पादेत्वा तदेव खयवयतो सम्मसन्तो अरहत्तं
 पापुणाति । थेरे दिस्वा तेसं ओवादे पतिट्ठाय असुभं दिस्वा तत्थ पठमज्झानं उप्पादेत्वा तदेव खयवयतो सम्मसन्तो अरहत्तं
 पापुणाति, तस्मा एतेसं दस्सनं “सात्थक”न्ति वुत्तं । केचि पन “आमिसतोपि वड्डि अत्थोयेव तं निस्साय
 ब्रह्मचरियानुग्गहाय पटिपन्नत्ता”ति वदन्ति ।

तस्मिं पन गमने सप्पायासप्पायं परिग्गहेत्वा सप्पायपरिग्गहणं **सप्पायसम्पजज्जं** । सेय्यथिदं — चेतियदस्सनं ताव
 सात्थं । सचे पन चेतियस्स महापूजाय दसद्वादसयोजनन्तरे परिसा सन्निपतन्ति, अत्तनो विभवानुरूपं इत्थियोपि पुरिसापि
 अलङ्कृतपटियत्ता चित्तकम्मरूपकानि विय सञ्चरन्ति । तत्र चस्स इट्ठे आरम्मणे लोभो, अनिट्ठे पटिघो, असमपेक्खने मोहो
 उप्पज्जति, कायसंसग्गापत्तिं वा आपज्जति, जीवितब्रह्मचरियानं वा अन्तरायो होति । एवं तं ठानं असप्पायं होति,
 वुत्तप्पकारअन्तरायाभावे सप्पायं । बोधिदस्सनेपि एसेव नयो । सङ्खदस्सनमपि सात्थं । सचे पन अन्तोगामे महामण्डपं
 कारेत्वा सब्बरत्तिं धम्मस्सवनं करोन्तेसु मनुस्सेसु वुत्तप्पकारेनेव जनसन्निपातो चेव अन्तरायो च होति । एवं तं ठानं
 असप्पायं, अन्तरायाभावे सप्पायं । महापरिसापरिवारानं थेरानं दस्सनेपि एसेव नयो । असुभदस्सनमपि सात्थं
 मग्गफलाधिगमहेतुभावतो । दन्तकट्ठत्थाय सामणेरं गहेत्वा गतदहरिभक्खुनो वत्थुपेत्य कथेतब्बं । एवं सात्थमपि पनेतं
 पुरिसस्स मातुगामासुभं असप्पायं, मातुगामस्स च पुरिसासुभं । सभागमेव सप्पायन्ति एवं सप्पायपरिग्गहणं

सप्पायसम्पज्जं नाम ।

एवं परिगृहीतसात्थकसप्पायस्स पन अट्ठतिंसाय कम्मट्ठानेसु अत्तनो चित्तरुचियं कम्मट्ठानसङ्घातं गोचरं उग्गहेत्वा भिक्खाचारगोचरे तं गहेत्वाव गमनं **गोचरसम्पज्जं** नाम ।

अभिवक्कमादीसु पन असम्मुहणं **असम्मोहसम्पज्जं** । तं एवं वेदितब्बं — इध भिक्खु अभिवक्कमन्तो वा पटिवक्कमन्तो वा यथा अन्धपथुज्जना अभिवक्कमादीसु “अत्ता अभिवक्कमति, अत्तना अभिवक्कमो निब्बत्तितो”ति वा, “अहं अभिवक्कमामि, मया अभिवक्कमो निब्बत्तितो”ति वा सम्मुहन्ति, तथा असम्मुहन्तो “अभिवक्कमामी”ति चित्ते उप्पज्जमाने तेनेव चित्तेन सद्धिं चित्तसमुट्ठाना वायोधातु विज्जन्ति जनयमाना उप्पज्जति, इति चित्तकिरियवायोधातुविष्फारवसेन अयं कायसम्मतो अट्ठिसङ्घाटो अभिवक्कमति, तस्सेवं अभिवक्कमतो एकेकपदुद्धरणे पथवीधातु, आपोधातूति द्वे धातुयो ओमत्ता होन्ति मन्दा, इतरा द्वे अधिमत्ता होन्ति बलवतियो । तथा अतिहरणवीतिहरणेषु । वोस्सज्जने तेजोधातु, वायोधातूति द्वे धातुयो ओमत्ता होन्ति मन्दा, इतरा द्वे अधिमत्ता बलवतियो । तथा सन्निक्खेपनसन्निरुम्भनेसु । तत्थ उद्धरणे पवत्ता रूपारूपधम्मा अतिहरणं न पापुणन्ति, तथा अतिहरणे पवत्ता वीतिहरणं, वीतिहरणे पवत्ता वोस्सज्जनं, वोस्सज्जने पवत्ता सन्निक्खेपनं, सन्निक्खेपने पवत्ता सन्निरुम्भनं न पापुणन्ति । तत्थ तत्थेव पब्बपब्बं सन्निसन्धि ओधिओधि हुत्वा तत्तकपाले पक्खित्तिलं विय पटपटायन्ता भिज्जन्ति । तत्थ को एको अभिवक्कमति, कस्स वा एकस्स अभिवक्कमनं? परमत्थतो हि धातूनंयेव गमनं, धातूनं ठानं, धातूनं निसज्जनं, धातूनं सयनं । तस्मिं तस्मिहि कोट्ठासे सद्धिं रूपेण —

“अज्जं उप्पज्जते चित्तं, अज्जं चित्तं निरुज्झति ।

अवीचिमनुसम्बन्धो, नदीसोतोव वत्तती”ति ॥ (दी० नि० अट्ठ० १.२१४; म० नि० अट्ठ० १.१०९; सं० नि० अट्ठ० ३.५.३६८) ।

एवं अभिवक्कमादीसु असम्मुहणं असम्मोहसम्पज्जं नामाति । **पच्चयसम्पत्ति**न्ति पच्चयपारिपूरिं । इमे चत्तारोति सीलसंवरो, सन्तोसो, इन्द्रियसंवरो, सतिसम्पज्जन्ति इमे चत्तारो अरज्जवासस्स सम्भारा । **वत्तब्बतं आपज्जती**ति “असुकस्स भिक्खुनो अरज्जे तिरच्छानगतानं विय वनचरकानं विय च निवासमत्तमेव, न अरज्जवासानुच्छविका काचि सम्पापटिपत्ती”ति अपवादवसेन वत्तब्बतं, आरज्जकेहि वा तिरच्छानगतेहि वनचरकविसभागजनेहि विप्पटिपत्तिवसेन वत्थब्बतं आपज्जति । **भेरवसदं सावेन्ति**, तावता अपलायन्तानं हत्थेहि **सीसं...पे०... करोन्ति** । काळकसदिसत्ता **काळकं**, वीतिक्कमसङ्घातं थुल्लवज्जं । तिलकसदिसत्ता **तिलकं**, मिच्छावितक्कसङ्घातं अणुमत्तवज्जं । तन्ति पीतिं । विभूतभावेन उपट्ठानतो **खयतो सम्मसन्तो** ।

विवित्तिन्ति जनविवित्तं । तेनाह “**सुज्जं**”न्ति । तं पन जनसद्वनिग्घोसाभावेन वेदितब्बं सद्वकण्टकत्ता ज्ञानस्साति आह “**अप्पसदं अप्पनिग्घोसन्ति अत्थो**”ति । एतदेवाति निस्सदत्तयेव । **विहारो** पाकारपरिच्छिन्नो सकलो आवासो । **अट्ठयोगो** दीघपासादो, “गरुळसण्ठानपासादो”तिपि वदन्ति । **पासादो** चतुरस्सपासादो । **हम्मियं** मुण्डच्छदनपासादो । **अट्ठो** पटिराजूनं पटिबाहनयोगो चतुप्पज्चभूमको पतिस्सयविसेसो । **माळो** एककूटसङ्गहितो अनेककोणवन्तो पतिस्सयविसेसो । अपरो नयो — **विहारो** नाम दीघमुखपासादो । **अट्ठयोगो** एकपस्सच्छदनकसेनासनं । तस्स किर एकपस्से भित्ति उच्चतरा होति, इतरपस्से नीचा । एतेन तं एकपस्सच्छदनकं होति । **पासादो** नाम आयतचतुरस्सपासादो । **हम्मियं** मुण्डच्छदनं चन्दिकङ्गणयुत्तं । **गुहा** नाम केवला पब्बतगुहा । **लेणं** द्वारबद्धं पब्भारं । **मण्डपो**ति साखामण्डपो । आवसथभूतं सेनासनं विहरितब्बट्टेन **विहारसेनासनं** । मसारकादि मज्चपीठं तत्थ अत्थरितब्बभिसि उपधानज्च मज्चपीठसम्बन्धतो

मज्जपीठसेनासनं । चिमिलिकादि भूमियं सन्थरितब्बताय **सन्थतसेनासनं** । अभिसङ्घताभावतो केवलं सयनस्स निसज्जाय च ओकासभूतं रुक्खमूलादि पटिक्कमितब्बट्टानं **ओकाससेनासनं** । **सेनासनग्गहणेन गहितमेवाति** “विवित्तं सेनासन”न्ति इमिना सेनासनग्गहणेन गहितमेव सामञ्जजोतनाभावतो ।

यदि एवं कस्मा “अरञ्ज”न्ति वुत्तन्ति आह “**इमस्स पना**”तिआदि । **भिक्षुनीनं वसेन आगतन्ति** इदं विनये तथा आगतं सन्धाय वुत्तं, **अभिधम्मेषि** (विभ० ५२९) पन “अरञ्जन्ति निक्खमित्वा बहि इन्दखिला सब्बमेतं अरञ्ज”न्ति आगतमेव । तत्थ हि यं न गामप्पदेसन्तो गंधं, तं अरञ्जन्ति निप्परियायवसेन तथा वुत्तं । **धुतङ्गनिद्वेसे** (विसुद्धि० १.३१) यं वुत्तं, तं युत्तं, तस्मा तत्थ वुत्तनयेन गहेतब्बन्ति अधिप्पायो । **रुक्खमूलन्ति** रुक्खसमीपं । वुत्तञ्हेतं “यावता मज्झन्हिके काले समन्ता छाया फरति, निवाते पण्णानि पतन्ति, एत्तावता रुक्खमूल”न्ति । **सेल-**सद्दो अविसेसतो पब्बतपरियायोति कत्वा वुत्तं “**पब्बतन्ति सेल**”न्ति, न सिलामयमेव । पंसुमयादिको हि तिविधोपि पब्बतो एवाति । **विवरन्ति** द्विन्नं पब्बतानं मिथो आसन्नतरे ठितानं ओवरकादिसदिसं विवरं । **एकस्मियेव वा** पब्बते । **उमङ्गसदिसन्ति** सुदुङ्गासदिसं । **मनुस्सानं अनुपचारट्टानन्ति** पकतिसञ्चारवसेन मनुस्सेहि न सञ्चरितब्बट्टानं । **आदि-**सद्देन “**वनपत्थन्ति** वनसण्डानमेतं सेनासनानं अधिवचनं । **वनपत्थन्ति** भिसनकानमेतं । **वनपत्थन्ति** सलोमहंसानमेतं । **वनपत्थन्ति** परियन्तानमेतं । **वनपत्थन्ति** न मनुस्सूपचारानमेतं सेनासनानं अधिवचन”न्ति (विभ० ५३१) इमं पाळिप्पदेसं सङ्गण्हाति । **अच्छन्नन्ति** केनचि छदनेन अन्तमसो रुक्खसाखायपि न छादितं । **निक्कट्ठित्वाति** नीहरित्वा । **पब्भारलेणसदिसेति** पब्भारसदिसे, लेणसदिसे वा ।

पिण्डपातपरियेसनं **पिण्डपातो** उत्तरपदलोपेनाति आह “**पिण्डपातपरियेसनतो पटिक्कन्तो**”ति । **पल्लङ्कन्ति** एत्थ **परि-**सद्दो समन्ततोति एतस्मिं अत्थे, तस्मा वामोरुं दक्खिणोरुञ्च समं ठपेत्वा उभो पादे अञ्जमञ्जं सम्बन्धे कत्वा निसज्जा पल्लङ्कन्ति आह “**समन्ततो ऊरुबद्धासन**”न्ति । ऊरूनं बन्धनवसेन निसज्जा पल्लङ्कं । **आभुजित्वाति** च यथा पल्लङ्कवसेन निसज्जा होति, एवं उभो पादे आभुजिते समिज्जिते कत्वा । तं पन उभिन्नं पादानं तथासम्बन्धताकरणन्ति आह “**बन्धित्वा**”ति । हेट्ठिमकायस्स अनुजुकं ठपनं निसज्जावचनेनेव बोधितन्ति **उजुं कायन्ति** एत्थ **काय-**सद्दो उपरिमकायविसयोति आह “**उपरिमसरीरं उजुकं ठपेत्वा**”ति । तं पन उजुकं ठपनं सरूपतो पयोजनतो च दस्सेतुं “**अट्टारसा**”तिआदि वुत्तं । **न पणमन्तीति** न ओणमन्ति । **न परिपततीति** न विगच्छति वीथिं न लङ्घेति, ततो एव पुब्बेनापरं विसेससम्पत्तिया कम्मट्टानं वुद्धिं फातिं गच्छति । **परिमुखन्ति** एत्थ **परि-**सद्दो अभि-सद्देन समानत्थोति आह “**कम्मट्टानाभिमुख**”न्ति, बहिद्धा पुथुत्तारम्मणतो निवारेत्वा कम्मट्टानंयेव पुरक्खत्वाति अत्थो । समीपत्थो वा **परि-**सद्दोति दस्सेन्तो “**मुखसमीपे वा कत्वा**”ति आह । एत्थ च यथा “विवित्तं सेनासनं भजती”तिआदिना भावनानुरूपं सेनासनं दस्सितं, एवं **निसीदतीति** इमिना अलीनानुद्धच्चपक्खियो सन्तो इरियापथो दस्सितो । “**पल्लङ्कं आभुजित्वा**”ति इमिना निसज्जाय दळ्ढभावो । “**परिमुखं सति उपट्ठपेत्वा**”ति इमिना आरम्मणपरिग्गहूपायो ।

परीति परिग्गहट्टो “परिणायिका”तिआदीसु (ध० स० १६, २०) विय । **मुखन्ति निय्यानट्टो** “सुञ्जतविमोक्खमुख”न्तिआदीसु विय । पटिपक्खतो निग्गमनट्टो हि निय्यानट्टो, तस्मा **परिग्गहितनिय्यानं सतिन्ति** सब्बथा गहितासम्मोसं परिच्चत्तसम्मोसं सतिं कत्वा, परमसतिनेपक्कं उपट्ठपेत्वाति अत्थो ।

अभिज्झायति गिज्झति अभिक्कति एतायाति **अभिज्झा**, लोभो । **लुज्जनट्टेनाति** भिज्जनट्टेन, खणे खणे भिज्जनट्टेनाति अत्थो । **विक्खम्भनवसेनाति** एत्थ विक्खम्भनं अनुप्पादनं अप्पवत्तनं पटिपक्खेन सुप्पहीनत्ता । **पहीनत्ताति**

च पहीनसदिसतं सन्धाय वुत्तं ज्ञानस्स अनधिगतत्ता । तथापि नयिदं चक्खुविज्जाणं विय सभावतो विगताभिज्झं, अथ खो भावनावसेन । तेनाह “न चक्खुविज्जाणसदिसेना”ति । एसेव नयोति यथा चक्खुविज्जाणं सभावेन विगताभिज्झं अब्यापन्नञ्च न भावनाय विक्खम्भितत्ता, न एवमिदं । इदं पन चित्तं भावनाय परिसोधितत्ता अब्यापन्नं विगतथिनमिद्धं अनुद्धतं निब्बिचिकिच्छञ्चाति अत्थो । पुरिमपकतिन्ति परिसुद्धपण्डरसभावं । “या तस्मिं समये चित्तस्स अकल्यता”तिआदिना (ध० स० ११६२; विभ० ५४६) थिनस्स, “या तस्मिं समये कायस्स अकल्यता”तिआदिना (ध० स० ११६३; विभ० ५४६) च मिद्धस्स अभिधम्मे निद्धित्ता वुत्तं “थिनं चित्तगेलज्जं, मिद्धं चेतसिकगेलज्जं”न्ति । सतिपि हि अज्जमज्जं अविप्पयोगे चित्तकायलहुतादीनं विय चित्तचेतसिकानं यथाक्कमं तंतंविसेसस्स या तेसं अकल्यतादीनं विसेसपच्चयता, अयमेतेसं सभावोति दडुब्बं । आलोकसज्जीति एत्थ अतिसयत्तविसिद्धात्थिअत्थावबोधकोयमीकारोति दस्सेन्तो आह “रत्तिम्पि...पे०... समन्नागतो”ति । इदं उभयन्ति सतिसम्पजज्जमाह ।

अतिक्कमित्वाति विक्खम्भनवसेन पजहित्वा । कथमिदं कथमिदन्ति पवत्तिया कथंकथा, विचिकिच्छा, सा एतस्स अत्थीति कथंकथी, न कथंकथीति अकथंकथी, निब्बिचिकिच्छो । लक्खणादिभेदतोति एत्थ आदि-सदेन पच्चयपरिहानपहायकादीनम्पि सङ्गहो दडुब्बो । तेपि हि पभेदतो दडुब्बाति । उच्छिन्दित्वा पातेन्तीति एत्थ उच्छिन्दनं पातनञ्च तासं पज्जानं अनुप्पन्नानं उप्पज्जितुं अप्पदानमेव । इति महग्गतानुत्तरपज्जानं एकच्चाय च परित्तपज्जाय अनुप्पत्तिहेतुभूता नीवरणधम्मा इतराय च समत्थतं विहनन्तियेवाति “पज्जाय दुब्बलीकरणा”ति वुत्ता । अप्पेन्तोति निगमेन्तो ।

अत्तन्तपसुत्तवण्णना निद्धिता ।

९-१०. तण्हासुत्तादिवण्णना

११९-२००. नवमे तयो भवे अज्झोत्थरित्वा ठितं “अज्झत्तिकस्स उपादाय अट्टारस तण्हाविचरितानी”तिआदिना वुत्तं तं तं अत्तनो कोट्टासभूतं जालमेतिस्सा अत्थीति जालिनी । तेनाह “तयो वा भवे”तिआदि । तत्थ तत्थाति तस्मिं तस्मिं भवे, आरम्मणे वा । अपिचातिआदिना निद्देसनयेन विसत्तिकापदस्स अत्थं दस्सेन्तो निद्देसपाळिया एकदेसं दस्सेति “विसमूला”तिआदिना । अयज्हेत्थ निद्देसपाळि (महानि० ३; चूळनि० मेत्तगूमाणवपुच्छानिद्देसो २२, खग्गविसाणसुत्तनिद्देसो १२४) —

“विसत्तिकाति केनट्ठेन विसत्तिका? विसताति विसत्तिका, विसटाति विसत्तिका, विसालाति विसत्तिका, विसक्कतीति विसत्तिका, विसंहरतीति विसत्तिका, विसंवादिकाति विसत्तिका, विसमूलाति विसत्तिका, विसफलाति विसत्तिका । विसपरिभोगाति विसत्तिका । विसाला वा पन सा तण्हा रूपे सद्दे गन्धे रसे फोडुब्बे कुले गणे आवासे लाभे यसे पसंसाय सुखे चीवरपिण्डपातसेनासनगिलानपच्चयभेसज्जपरिक्खारे कामधातुया रूपधातुया अरूपधातुया कामभवे रूपभवे अरूपभवे सज्जिभवे असज्जिभवे नेवसज्जिनासज्जिभवे एकवोकारभवे चतुवोकारभवे पच्चवोकारभवे अतीते अनागते पच्चुप्पन्ने दिट्ठसुतमुतविज्जातब्बेसु विसटा वित्थताति विसत्तिका”ति ।

तत्थ (महानि० अट्ठ० ३; सं० नि० टी० १.१.१ ओघतरणसुत्तवण्णना) विसताति वित्थता रूपादीसु

तेभूमकधम्मव्यापनवसेन । **विसटा**ति पुरिमवचनमेव त-कारस्स ट-कारं कत्वा वुत्तं । **विसाला**ति विपुला । **विसक्कती**ति परिसहति । रत्तो हि रागवत्थुना परेन ताळियमानोपि सहति, विप्फन्दनं वा “**विसक्कन**”न्ति वदन्ति । **विसंहरती**ति तथा तथा कामेसु आनिसंसं दस्सेन्ती विविधेहि आकारेहि नेक्खम्माभिमुखप्पवत्तितो चित्तं संहरति संखिपति । विसं वा दुक्खं, तं हरति उपनेतीति अत्थो । अनिच्चादिं निच्चादितो गणहन्ती **विसंवादिका** होति । दुक्खनिब्बत्तकस्स कम्मस्स हेतुभावतो **विसमूला**, विसं वा दुक्खदुक्खादिभूता वेदना मूलं एतिस्साति **विसमूला** । दुक्खसमुदयत्ता विसं फलं एतिस्साति **विसफला** । तण्हाय रूपादिकस्स दुक्खस्स परिभोगो होति, न अमतस्साति सा **विसपरिभोगा** वुत्ता । सब्बत्थ निरुत्तिवसेन पदसिद्धिं वेदितब्बा । यो पनेत्थ पधानो अत्थो, तं दस्सेतुं पुन “**विसटा वा पना**”तिआदि वुत्तं ।

तन्तं वुच्चति (दी० नि० टी० २.१५ अपसादनावण्णना; सं० नि० टी० २.२.६०) वत्थविननत्थं तन्तवायेहि दण्डके आसज्चित्वा पसारितसुत्तवट्ठि “**तनीयती**”ति कत्वा, तं पन सुत्तं सन्तानाकुलताय निदस्सनभावेन आकुलमेव गहितन्ति आह “**तन्तं विय आकुलजातो**”ति । सङ्खेपतो वुत्तमत्थं वित्थारतो दस्सेतुं “**यथा नामा**”तिआदि वुत्तं । **समानेतु**न्ति पुब्बेनापरं समं कत्वा आनेतुं, अविसमं उजुं कातुन्ति अत्थो । तन्तमेव वा आकुलं तन्ताकुलं, तन्ताकुलं विय जातो भूतोति **तन्ताकुलकजातो** । विननतो गुलाति इत्थिलिङ्गवसेन लद्धनामस्स तन्तवायस्स गुण्ठिकं नाम आकुलभावेन अगगतो वा मूलतो वा दुविज्जेय्यमेव खलिबद्धतन्तसुत्तन्ति आह “**गुलागुण्ठिकं वुच्चति पेसकारकज्जियसुत्त**”न्ति ।

सकुणिकाति पटपदसकुणिका । सा हि रुक्खसाखासु ओलम्बनकुटवा होति । तज्झि सा कुटवं ततो ततो तिण्हीरादिके आनेत्वा तथा विनति, यथा ते पेसकारकज्जियसुत्तं विय अग्गेन वा अग्गं, मूलेन वा मूलं समानेतुं विवेचेतुं वा न सक्का । तेनाह “**यथा**”तिआदि । **तदुभयम्पि** “**गुलागुण्ठिक**”न्ति वुत्तं कज्जियसुत्तं कुलावकज्ज । **पुरिमनयेनेवा**ति “**एवमेव सत्ता**”तिआदिना वुत्तनयेनेव । कामं मुज्जपब्बजतिणानि यथाजातानिपि दीघभावेन पतित्वा अरज्जट्टाने अज्जमज्जं विनन्धित्वा आकुलब्याकुलानि हुत्वा तिट्ठन्ति, तानि पन न तथा दुब्बिवेचियानि यथा रज्जुभूतानीति दस्सेतुं “**यथा तानी**”तिआदि वुत्तं । सेसमेत्थ हेट्ठा वुत्तनयमेव ।

अपायाति अवट्टिका, सुखेन, सुखहेतुना वा विरहिताति अत्थो । **दुक्खस्स गतिभावतो**ति आपायिकस्स दुक्खस्स पवत्तिट्ठानभावतो । **सुखसमुस्सयतो**ति अब्भुदयतो । **विनिपतितत्ता**ति विरूपं निपातत्ता, यथा तेनत्तभावेन सुखसमुस्सयो न होति, एवं निपतितत्ता । **इतरो**ति संसारो । ननु “**अपाय**”न्तिआदिना वुत्तोपि संसारो एवाति? सच्चमेतं, निरयादीनं पन अधिमत्तदुक्खभावदस्सनत्थं अपायादिगहणं । गोबलीबद्धजायेनायमत्थो वेदितब्बो ।

खन्धानज्ज पटिपाटीति पज्जनं खन्धानं हेतुफलभावेन अपरापरप्पवत्ति । **अब्बोच्छिन्नं वत्तमाना**ति अविच्छेदेन वत्तमाना । तं **सब्बम्पी**ति तं “**अपाय**”न्तिआदिना वुत्तं सब्बं अपायदुक्खज्ज वट्ठदुक्खज्ज । **महासमुद्वे वातक्खित्ता नावा विया**ति इदं परिब्भमनट्ठानस्स महन्तदस्सनत्थज्जेव परिब्भमनस्स अनवट्ठिततादस्सनत्थज्ज उपमा । **यन्ते युत्तगोणो विया**ति इदं पन अवसीभावदस्सनत्थज्जेव दुप्पमोक्खभावदस्सनत्थज्जाति वेदितब्बं ।

“**समूहग्गा**होति तण्हामानदिट्ठीनं साधारणग्गाहो”ति वदन्ति, “**इत्थं एवं अज्जथा**”ति पन विसेसं अकत्वा गहणं समूहग्गाहोति दट्ठब्बो । **विसेसं अकत्वा**ति च अनुपनिधानं समतो असमतो च उपनिधानन्ति इमं विभागं अकत्वाति अत्थो । **इत्थन्ति** हि अनुपनिधानं कथितं । **एवं अज्जथा**ति पन समतो असमतो च उपनिधानं । **अज्जं आकारन्ति** परसन्तानगतं आकारं ।

अत्थीति सदा संविज्जतीति अत्थो । सीदतीति नस्सति । संसयपरिवितक्कवसेनाति “किं नु खो अहं सियं, न सिय”न्ति एवं परिवितक्कवसेन । पत्थनाकप्पनवसेनाति “अपि नाम साधु पनाहं सिय”न्ति एवं पत्थनाय कप्पनवसेन । सुद्धसीसाति तण्हामानदिट्ठीनं साधारणा सीसा । “इत्थं एवं अज्जथा”ति वुत्तस्स विसेसस्स अनिस्सितत्ता “सुद्धसीसा”ति वुत्ता । तत्थ दिट्ठिसीसेहि दिट्ठिया गहिताय तदविनाभाविनी तण्हा दस्सिता, चतूहि सीसेहि द्वादसहि च सीसमूलकेहि मानदिट्ठीहि अयमेव तण्हा दस्सिताति आह “एवमेते...पे०... तण्हाविचरितधम्मा वेदितब्बा”ति । ननु च मानदिट्ठिगाहोपि इधाधिपेतो, यतो “तण्हामानदिट्ठिवसेन समूहग्गाहो”ति अट्ठकथायं वुत्तं, तस्मा कथं तण्हाविचरितानीति इदं वचनं? वुच्चते — दिट्ठिमानेसुपि तण्हाविचरितानीति वचनं अज्जमज्जं विप्पयोगीनं दिट्ठिमानानं तण्हाय अविप्पयोगानं तंमूलकत्ता तप्पधानताय कतन्ति वेदितब्बं । दसमं उत्तानमेव ।

तण्हासुत्तादिवण्णना निट्ठिता ।

महावग्गवण्णना निट्ठिता ।

चतुत्थपण्णासकं निट्ठितं ।

५. पञ्चमपण्णासकं

(२१) १. सप्पुरिसवग्गो

१-१०. सिक्खापदसुत्तादिवण्णना

२०१-२१०. पञ्चमस्स पठमे असप्पुरिसोति लामकपुरिसो । पाणं अतिपातेतीति पाणातिपाती । अदिन्नं आदियतीति अदिन्नादायी । कामेसु मिच्छा चरतीति कामेसुमिच्छाचारी । मुसा वदतीति मुसावादी । सुरामेरयमज्जपमादे तिट्ठतीति सुरामेरयमज्जपमादट्ठायी । पाणातिपाते समादपेतीति यथा पाणं अतिपातेति, तथा नं तत्थ गहणं गण्हापेति । सेसेसुपि एसेव नयो । अयं वुच्चतीति अयं एवरूपो पुगलो यस्मा सयंकतेन च दुस्सील्येन समन्नागतो, यच्च समादपितेन कतं, ततो उपट्ठस्स दायादो, तस्मा “असप्पुरिसेन असप्पुरिसतरो”ति वुच्चति । सप्पुरिसोति उत्तमपुरिसो । सप्पुरिसेन सप्पुरिसतरोति अत्तना च कतेन सुसील्येन समन्नागतत्ता यच्च समादपितो करोति, ततो उपट्ठस्स दायादत्ता उत्तमपुरिसेन उत्तमपुरिसतरो । एत्थ च परेन कतं दुस्सील्यं सुसील्यं वा आणत्तिया अत्तना च वचिप्पयोगेन कतन्ति आणापनवसेन पसुतपापस्स पुज्जस्स वा दायादो “ततो उपट्ठस्स दायादो”ति वुत्तो । दुतियादीनि उत्तानत्थानेव ।

सिक्खापदसुत्तादिवण्णना निट्ठिता ।

सप्पुरिसवग्गवण्णना निट्ठिता ।

२११-२२०. दुतियो परिसावग्गो उत्तानत्थोयेव ।

(२३) ३. दुच्चरितवग्गवण्णना

२२१-२३१. ततियस्स पठमादीनि उत्तानत्थानेव । चिन्ताकवीतिआदीसु वत्थुअनुसन्धिउभयमेव चिरेन चिन्तेत्वा करणवसेन चिन्ताकवि वेदितब्बो । किञ्चि सुत्वा सुतेन अस्सुतं अनुसन्धेत्वा करणवसेन सुतकवि, किञ्चि अत्थं उपधारेत्वा तस्स सङ्खिपनवित्थारणादिवसेन अत्थकवि यंकिञ्चि परेन कतं कब्बं नाटकं वा दिस्वा तंसदिसमेव अञ्जं अत्तनो ठानुप्पत्तिकप्पटिभानेन करणवसेन पटिभानकवि वेदितब्बो ।

दुच्चरितवग्गवण्णना निड्डिता ।

(२४) ४. कम्मवग्गो

१. संखित्तसुत्तवण्णना

२३२. चतुत्थस्स पठमे काळकन्ति मलीनं, चित्तस्स अप्पभस्सरभावकरन्ति अत्थो । तं पनेत्थ कम्मपथप्पत्तमेव अधिप्पेतन्ति आह “दसअकुसलकम्मपथ”न्ति । कण्हाभिजातिहेतुतो वा कण्हं । तेनाह “कण्हविपाक”न्ति । अपायूपपत्ति मनुस्सेसु च दोभगियं कण्हविपाको, यं तस्स तमभावो वुत्तो । निब्बत्तनतोति निब्बत्तापनतो । पण्डरकन्ति ओदातं, चित्तस्स पभस्सरभावकरन्ति अत्थो । सुक्काभिजातिहेतुतो वा सुक्कं । तेनाह “सुक्कविपाक”न्ति । सग्गूपपत्ति मनुस्ससोभगियञ्च सुक्कविपाको, यं तस्स जोतिभावो वुत्तो । उक्कट्टनिद्वेसेन पन “सग्गे निब्बत्तनतो”ति वुत्तं, निब्बत्तापनतोति अत्थो । मिस्सककम्मन्ति कालेन कण्हं कालेन सुक्कन्ति एवं मिस्सकवसेन कतकम्मं । सुखदुक्खविपाकन्ति वत्त्वा तत्थ सुखदुक्खानं पवत्तिआकारं दस्सेतुं “मिस्सककम्मं ही”तिआदि वुत्तं । कम्मस्स कण्हसुक्कसमञ्जा कण्हसुक्काभिजातिहेतुतायाति अपचयगामिताय तदुभयविद्धंसकस्स कम्मक्खयकरकम्मस्स इध सुक्कपरियायोपि इच्छितोति आह “उभय...पे०... अयमेत्थ अत्थो”ति । तत्थ उभयविपाकस्साति यथाधिगतस्स उभयविपाकस्स । सम्पत्तिभवपरियापन्नो हि विपाको इध सुक्कं सुक्कविपाकोति अधिप्पेतो, न अच्चन्तपरिसुद्धो अरियफलविपाको ।

संखित्तसुत्तवण्णना निड्डिता ।

२. वित्थारसुत्तवण्णना

२३३. दुतिये सब्बाबज्झन्ति वा सदुक्खं, अत्तना उप्पादेतब्बेन दुक्खेन सदुक्खन्ति अत्थो, दुक्खसंवत्तनिकन्ति वुत्तं होति । कायसङ्खारादीसु कायद्वारे गहणादिवसेन चोपनप्पत्ता द्वादस अकुसलचेतना अब्बाबज्झकायसङ्खारो नाम । वचीद्वारे हनुसंचोपनवसेन वचीभेदप्पवत्तिका तायेव द्वादस वचीसङ्खारो नाम । उभयचोपनं अप्पत्त्वा रहो चिन्तेन्तस्स मनोद्वारे पवत्ता मनोसङ्खारो नाम । इति तीसुपि द्वारेसु कायदुच्चरितादिभेदा अकुसला चेतनाव सङ्खाराति वेदितब्बा । अभिसङ्खरोतीति आयूहति, तं पन आयूहनं पच्चयसमवायसिद्धितो सङ्कट्टित्वा पिण्डनं विय होति । सदुक्खं लोकन्ति अपायलोकमाह । विपाकफस्साति फस्ससीसेन तत्थ विपाकप्पवत्तमाह । वेमानिकपेताति इदं बाहुल्लतो वुत्तं, इतरेसम्पि विनिपातिकानं कालेन सुखं, कालेन दुक्खं होति । तस्स पहानायाति तस्स यथावुत्तस्स कम्मस्स अनुप्पत्तिधम्मतापादनाय । या चेतनाति या अपचयगामिनिचेतना । तेनेवाह “विवट्टगामिनी मग्गचेतना वेदितब्बा”ति ।

वित्थारसुत्तवण्णना निड्डिता ।

३-९. सोणकायनसुत्तादिवण्णना

२३४-२४०. ततिये पुरिमानि, भन्ते, दिवसानि पुरिमतरानीति एत्थ हिंय्यो दिवसं पुरिमं नाम, ततो परं पुरिमतरन्ति आह “अतीतानन्तरदिवसतो पट्टाया”तिआदि। इति इमेसु द्वीसु पवत्तितो यथाक्कमं पुरिमपुरिमतरभावो दस्सितो। एवं सन्तेपि यदेत्थ “पुरिमतर”न्ति वुत्तं, ततो पभुति यं यं ओरं, तं तं पुरिमं। यं यं परं, तं तं पुरिमतरं ओरपारभावस्स विय पुरिमतरभावस्स च अपेक्खासिद्धत्ता। सेसं वुत्तनयमेव। चतुत्थादीनि उत्तानत्थानेव।

सोणकायनसुत्तादिवण्णना निट्ठिता।

१०-११. समणसुत्तादिवण्णना

२४१-२. दसमे सेसपदेसुपीति “इध दुतियो समणो”तिआदीसु सेसपदेसुपि। यथा हि “विविच्चेव कामेही”ति (दी० नि० १.२२६; म० नि० १.२७१, २८७, २९७; सं० नि० २.१५२; अ० नि० ४.१२३) एत्थ कतो नियमो “विविच्च अकुसलेही”ति एत्थापि कतोयेव होति सावधारणअत्थस्स इच्छितब्बत्ता, एवमिधापीति। तेनाह “दुतियादयोपि ही”तिआदि। सामञ्जफलाधिगमवसेन निप्परियायतो समणभावोति तेसं वसेनेत्थ चत्तारो समणा देसिता। इमस्मिंहे ठाने चत्तारो फलट्ठकसमणाव अधिप्पेता समितपापसमणगहणतो। कस्मा पनेत्थ महापरिनिब्बाने विय मग्गट्ठा तदत्थाय पटिपन्नापि न गहिताति? वेनेय्यज्झासयतो। तत्थ हि मग्गाधिगमत्थाय विपस्सनापि इतो बहिद्वा नत्थि, कुतो मग्गफलानीति दस्सेन्तेन भगवता “जायस्स धम्मस्स पदेसवत्ती, इतो बहिद्वा समणोपि नत्थी”ति (दी० नि० २.२१४) वुत्तं। इध पन निट्ठानप्पत्तमेव तंतंसमणभावं गणहन्तेन फलट्ठकसमणाव गहिता, मग्गट्ठतो फलट्ठो सविसेसं दक्खिण्योति। स्वायमत्थो द्वीसु सुत्तेसु देसनाभेदेनेव विज्जायतीति। रिताति विवित्ता। तुच्छाति निस्सारा पटिपन्नकसाराभावतो।

पवदन्ति एतेहीति पवादा। दिट्ठिगतिकानं नानादिट्ठिदीपकसमयाति आह “चत्तारो सस्सतवादा”तिआदि। तत्थ चत्तारो सस्सतवादाति लाभिवसेन तयो, तक्किवसेन एकोति एवं चत्तारो सस्सतवादा। पुब्बेनिवासजाणलाभी तित्थियो मन्दपज्जो अनेकजातिसतसहस्समत्तं अनुस्सरति, मज्झपज्जो दस संवट्ठविवट्ठकप्पानि, तिक्खपज्जो चत्तालीस संवट्ठविवट्ठकप्पानि, न ततो परं। सो एवं अनुस्सरन्तो “सस्सतो अत्ता च लोको चा”ति अभिवदति, तक्की पन तक्कपरियाहतं वीमंसानुचरितं सयंपटिभानं “सस्सतो अत्ता च लोको चा”ति अभिवदति। तेन वुत्तं “लाभिवसेन तयो, तक्किवसेन एकोति एवं चत्तारो सस्सतवादा”ति।

सत्तेसु सङ्खारेसु च एकच्चं सस्सतन्ति पवत्तो वादो एकच्चसस्सतवादो। सो पन ब्रह्मकायिकखिण्णपदोसिकमनोपदोसिकत्तभावतो चवित्वा इधागतानं तक्किनो च उप्पज्जनवसेन चतुब्बिधोति आह “चत्तारो एकच्चसस्सतवादा”ति।

चत्तारो अन्तानन्तिकाति एत्थ अमति गच्छति एत्थ वोसानन्ति अन्तो, मरियादा। तप्पटिसेधेन अनन्तो। अन्तो च अनन्तो च अन्तानन्तो सामञ्जनिद्वेसेन, एकसेसेन वा “नामरूपपच्चया सळायतन”न्तिआदीसु (म० नि० ३.१२६; उदा० १) विय। अन्तानन्तसहचरितो वादो अन्तानन्तो यथा “कुन्ता चरन्ती”ति। अन्तानन्तसन्निस्सयो वा यथा “मज्जा घोसन्ती”ति। सो एतेसं अत्थीति अन्तानन्तिका। “अन्तवा अत्ता च लोको च, अनन्तवा अत्ता च लोको च, अन्तवा च अनन्तवा च अत्ता च लोको च, नेवन्तवा नानन्तवा”ति एवं पवत्तवादा चत्तारो। अवट्ठितकसिणस्स तं कसिणं अत्ताति च

लोकोति च गणहन्तस्स वसेन पठमो वुत्तो, दुतियो वड्ढितकसिणस्स वसेन वुत्तो, ततियो तिरियं वड्ढेत्वा उद्धमधो अवड्ढितकसिणस्स, चतुत्थो तक्किवसेन वुत्तो। एत्थ च युत्तं ताव पुरिमानं तिण्णं वादानं अन्तज्च अनन्तज्च अन्तानन्तज्च आरब्भ पवत्तवादत्ता अन्तानन्तिकत्तं, पच्छिमस्स पन तदुभयनिसेधनवसेन पवत्तवादत्ता कथमन्तानन्तिकत्तन्ति? तदुभयप्पटिसेधनवसेन पवत्तवादत्ता एव। अन्तानन्तिकप्पटिसेधवादोपि हि अन्तानन्तविसयो एव तं आरब्भ पवत्तत्ता।

न मरतीति अमरा। का सा? “एवन्तिपि मे नो”तिआदिना (दी० नि० १.६२) नयेन परियन्तरहिता दिट्ठिगतिकस्स दिट्ठि चेव वाचा च। विविधो खेपोति विक्खेपो, अमराय दिट्ठिया, वाचाय वा विक्खेपोति अमराविक्खेपो, सो एतस्स अत्थीति **अमराविक्खेपिको**। अथ वा अमरा नाम मच्छजाति, सा उम्मुज्जनादिवसेन उदके सन्धावमाना गाहं न गच्छति, एवमेवं अयम्पि वादो इतो चितो च सन्धावति, गाहं न उपगच्छतीति अमराविक्खेपोति वुच्चति, सो एतेसं अत्थीति **अमराविक्खेपिका**। स्वायं वादो मुसावादानुयोगच्छन्दरागभयमोहभावहेतुकताय चतुधा पवत्तोति आह “**चत्तारो अमराविक्खेपिका**”ति।

अधिच्च यथिच्छकं यं किञ्चि कारणं कस्सचि बुद्धिपुब्बं वा विना समुप्पन्नोति अत्तलोकसज्जितानं खन्धानं अधिच्च पवत्तिआकारारम्भणं दस्सनं तदाकारसन्निस्सयेन पवत्तितो तदाकारसहचरितताय च “अधिच्चसमुप्पन्न”न्ति वुच्चति यथा “मज्जा घोसन्ति”, “कुन्ता चरन्ती”ति च। तं एतेसं अत्थीति **अधिच्चसमुप्पन्निका**। लाभिवसेन तक्किवसेन च “**द्वे अधिच्चसमुप्पन्निका**”ति वुत्तं।

सज्जीति पवत्तो वादो सज्जिवादो, सो एतेसं अत्थीति **सज्जिवादा**। रूपिचतुक्कं एकन्तसुखचतुक्कन्ति इमेसं चतुन्नं चतुक्कानं वसेन **सोळस सज्जिवादा**। इमेसुयेव पुरिमानं द्विन्नं चतुक्कानं वसेन **अट्ठ सज्जिवादा, अट्ठ नेवसज्जिनासज्जिवादा** वेदितब्बा। केवलज्हि तत्थ “सज्जी अत्ता”ति गणहन्तानं ता दिट्ठियो, इध असज्जीति च नेवसज्जीनासज्जीति च।

सत्त उच्छेदवादाति मनुस्सत्तभावे कामावचरदेवत्तभावे रूपावचरत्तभावे चतुब्बिधारूपत्तभावे च ठत्वा सत्तस्स उच्छेदपज्जापनवसेन सत्त उच्छेदवादा।

पज्ज दिट्ठधम्मनिब्बानवादाति पज्जकामगुणउपभोगवसेन चतुब्बिधरूपज्ज्ञानसुखपरिभोगवसेन च दिट्ठधम्मे निब्बूतिपज्जापनवादा। **दिट्ठधम्मो**ति पच्चक्खधम्मो वुच्चति, तत्थ तत्थ पटिलद्धत्तभावस्सेतं अधिवचनं। दिट्ठधम्मे निब्बानं दिट्ठधम्मनिब्बानं, इमस्मिंयेव अत्तभावे दुक्खवूपसमन्ति अत्थो। तं वदन्तीति **दिट्ठधम्मनिब्बानवादा**।

जायति कमति पटिविज्झतीति जायो, सो एव निब्बानसम्पापकहेतुताय धम्मोति आह “**जायस्स धम्मस्सा**”ति। **इतो बहिद्धा समणोपि नत्थीति**आदीसु कस्मा पनेते अज्जत्थ नत्थीति? अक्खेत्तताय। यथा हि न आरग्गे सासपो तिट्ठति, न उदकपिट्ठे अग्गि जलति, न पिट्ठिपासाणे बीजानि विरुहन्ति, एवमेवं बाहिरेसु तित्थायतनेसु न इमे समणा उपपज्जन्ति, इमस्मिंयेव सासने उपपज्जन्ति। कस्मा? सुक्खेत्तताय। सा पन नेसं अक्खेत्तता सुक्खेत्तता च अरियमग्गस्स अभावतो भावतो च वेदितब्बा। तेनाह भगवा —

“यस्मिं खो, सुभद, धम्मविनये अरियो अट्ठङ्गिको मग्गो न उपलब्भति, समणोपि तत्थ न उपलब्भति, दुतियोपि तत्थ समणो न उपलब्भति, ततियोपि तत्थ समणो न उपलब्भति, चतुत्थोपि तत्थ समणो न उपलब्भति।

यस्मिञ्च खो, सुभद, धम्मविनये अरियो अट्ठङ्गिको मग्गो उपलब्धति, समणोपि तत्थ उपलब्धति, दुतियोपि तत्थ... ततियोपि तत्थ... चतुत्थोपि तत्थ समणो उपलब्धति । इमस्मिं खो, सुभद, धम्मविनये अरियो अट्ठङ्गिको मग्गो उपलब्धति । इधेव, सुभद, समणो, इध दुतियो समणो, इध ततियो समणो, इध चतुत्थो समणो, सुज्जा परप्पवादा समणोभि अज्जेही'ति (दी० नि० २.२१४) ।

अरियमग्गस्स च अभावो भावो च सुपरिसुद्धस्स सीलस्स सुपरिसुद्धाय समथविपस्सनाभावनाय अभावतो भावतो च वेदितब्बो । तदुभयञ्च दुरक्खातस्वाक्खातभावहेतुकं । सो च असम्मासम्बुद्धप्पवेदितत्ता । यस्मा तित्थायतनं अक्खत्तं, सासनं खेत्तं, तस्मा यथा सुरत्तहत्थपादो भासुरकेसरभारो सीहो मिंगराजा न सुसाने वा सङ्कारकूटे वा पटिवसति, तियोजनसहस्सवित्थतं पन हिमवन्तं अज्झोगाहेत्वा मणिगुहायमेव वसति, यथा च छद्दन्तो नागराजा न गोचरियहत्थिकुलादीसु नवसु कुलेसु उप्पज्जति, यथा च वलाहको अस्सराराजा न गद्रभकुले वा घोटककुले वा उप्पज्जति, सिन्धुतीरे पन सिन्धवकुलेयेव उप्पज्जति, यथा च सब्बकामददं मनोहरं मणिरतनं न सङ्कारकूटे वा पंसुपब्बतादीसु वा उप्पज्जति, विपुलपब्बतम्भन्तरेयेव उप्पज्जति, यथा च तिमिरपिङ्गलो मच्छराजा न खुदकपोक्खरणीसु उप्पज्जति, चतुरासीतियोजनसहस्सगम्भीरे महासमुद्वेयेव उप्पज्जति, यथा च दियड्ढयोजनसतिको सुपण्णाराजा न गामद्वारे एरण्डवनादीसु पटिवसति, महासमुद्वं पन अज्झोगाहेत्वा सिम्बलिदहवनेयेव पटिवसति, यथा च धतरट्ठो सुवण्णहंसो न गामद्वारे आवाटकादीसु पटिवसति, नवुतिहंससहस्सपरिवारो पन हुत्वा चित्तकूटेयेव पटिवसति, यथा च चतुद्दीपिस्सरो चक्कवत्तिराजा न नीचकुले उप्पज्जति, असम्भिन्नजातियखत्तियकुलेयेव पन उप्पज्जति, एवमेवं इमेसु समणेषु एकसमणोपि न अज्जत्थ तित्थायतने उप्पज्जति, अरियमग्गपरिक्खते पन बुद्धसासनेयेव उप्पज्जति । तेनाह भगवा — “इधेव, भिक्खवे, समणो... पे०... सुज्जा परप्पवादा समणोभि अज्जेही'ति (म० नि० १.१३९-१४०; अ० नि० ४.२४१) । एकादसमे नत्थि वत्तब्बं ।

समणसुत्तादिवण्णना निड्ढिता ।

कम्मवग्गवण्णना निड्ढिता ।

(२५) ५. आपत्तिभयवग्गो

१. सङ्गभेदकसुत्तवण्णना

२४३. पञ्चमस्स पठमे विवादाधिकरणादीसूति विवादाधिकरणं अनुवादाधिकरणं आपत्ताधिकरणं किच्चाधिकरणन्ति इमेसु चतूसु । तत्थ धम्मोति वा अधम्मोति वा अट्ठारसहि वत्थूहि विवदन्तानं भिक्खूनं यो विवादो, इदं विवादाधिकरणं नाम । सीलविपत्तिया वा आचारदिट्ठिआजीवविपत्तिया वा अनुवदन्तानं यो अनुवादो उपवदना चेव चोदना च, इदं अनुवादाधिकरणं नाम । मातिकाय आगता पञ्च, विभङ्गे द्वेति सत्तपि आपत्तिक्खन्धा, इदं आपत्ताधिकरणं नाम । सङ्गस्स अपलोकनादीनं चतुन्नं कम्मानं करणं, इदं किच्चाधिकरणं नाम । सेसमेत्थ उत्तानमेव ।

सङ्गभेदकसुत्तवण्णना निड्ढिता ।

२-३. आपत्तिभयसुत्तादिवण्णना

२४४-५. दुतिये भस्सति निरत्थकभावेन खिपीयतीति भस्मं, छारिका । तस्स पुटं भण्डिका **भस्मपुटं** । तेनाह “**भस्मपुटन्ति छारिकाभण्डिकं**”न्ति । ततियं उत्तानत्थमेव ।

आपत्तिभयसुत्तादिवण्णना निट्ठिता ।

४-७. सेय्यासुत्तादिवण्णना

२४६-९. चतुत्थे पेताति पेच्चभावं गता । ते पन यस्मा इध कतकालकिरिया कालेन कतजीवितुच्छेदा होन्ति, तस्मा वुत्तं “**कालकता वुच्चन्ती**”ति, मताति अत्थो । अथ वा पेच्चभवं गता, पेत्तूपपत्तिवसेन निब्बत्तिं उपगताति अत्थो । तेनाह “**अथ वा पेत्तविसये निब्बत्ता पेता नामा**”ति । एकेन पस्सेन सयितुं न सक्कोन्ति दुक्खुप्पत्तितो ।

तेजुस्सदत्ताति इमिना सीहस्स अभीरुकभावं दस्सेति । भीरुका सेसमिगा अत्तनो आसयं पविसित्वा सन्तासपुब्बकं यथा तथा सयन्ति, सीहो पन अभीरुको सभावतो सतोकारी भिक्खु विय सतिं उपट्टपेत्त्वाव सयति । तेनाह “**द्वे पुरिमपादे**”तिआदि । दक्खिणे पुरिमपादे वामस्स पुरिमपादस्स ठपनवसेन द्वे **पुरिमपादे एकस्मिं ठाने ठपेत्त्वा । पच्छिमपादे** वुत्तनयेनेव इधापि एकस्मिं ठाने ठपनं वेदितब्बं, **ठितोकाससल्लक्खणं** अभीरुकवसेनेव । **सीसं पन उक्खिपित्वा**तिआदिना वुत्तसीहकिरिया अनुत्तस्तप्पबुज्झना विय अभीरुभावसिद्धधम्मतावसेनेवाति वेदितब्बा । **सीहविजम्भनं** अतिवेलं एकाकारे ठपितानं सरीरावयवानं गमनादिकिरियासु योग्यभावापादनत्थं । **तिक्खत्तुं सीहनादनदनं** अप्पेसक्खमिगराजेहि परित्तासपरिहरणत्थं ।

अयं वुच्चति, भिक्खवे, **तथागतसेय्या**ति इमिना चतुत्थज्झानसेय्या तथागतसेय्या नामाति दस्सेति । सेति अब्बावटभावेन पवत्तति एत्थाति सेय्या, चतुत्थज्झानमेव सेय्या **चतुत्थज्झानसेय्या** । किं पन तं चतुत्थज्झानन्ति? आनापानचतुत्थज्झानं । तत्थ हि ठत्वा विपस्सनं वट्टेत्वा भगवा अनुक्कमेन अग्गमग्गं अधिगन्त्वा तथागतो जातोति । तयिदं पदट्ठानं नाम न सेय्या, तथापि यस्मा “चतुत्थज्झानसमनन्तरा भगवा परिनिब्बायी”ति **महापरिनिब्बाने** (दी० नि० २.२१९) आगतं, तस्मा लोकीयचतुत्थज्झानसमापत्ति एव तथागतसेय्याति केचि । एवं सति परिनिब्बानकालिकाव तथागतसेय्या आपज्जति, न च भगवा लोकीयचतुत्थज्झानसमापज्जनबहुलो विहासि । अग्गफलवसेन पवत्तं पनेत्थ चतुत्थज्झानं वेदितब्बं । तत्थ यथा सत्तानं निहूपगमलक्खणा सेय्या भवङ्गचित्तवसेन होति, सा पन नेसं पठमजातिसमन्वया येभ्य्यवुत्तिका, एवं भगवतो अरियजातिसमन्वयं येभ्य्यवुत्तिकं अग्गफलभूतं चतुत्थज्झानं तथागतसेय्याति वेदितब्बं । पज्जमादीनि उत्तानत्थानि ।

सेय्यासुत्तादिवण्णना निट्ठिता ।

८. पठमवोहारसुत्तवण्णना

२५०-२५३. अट्ठमे **अनरियानन्ति** असाधूनं निहीनानं । **वोहारा**ति संवोहारा अभिलापा वा, “दिट्ठं मया”ति एवंवादिता । एत्थ च तंतंसमुट्ठापकचेतनावसेन अत्थो वेदितब्बो । नवमादीसु नत्थि वत्तब्बं ।

पठमवोहारसुत्तवण्णना निट्ठिता ।

आपत्तिभयवग्गवण्णना निट्ठिता ।

पञ्चमपण्णासकं निट्ठितं ।

(२६) ६. अभिञ्जावग्गो

१-३. अभिञ्जासुत्तादिवण्णना

२५४-२५६. छट्ठस्स पठमे पच्चनीकसमनतो समथो, समाधीति आह “चित्तेकग्गता”ति । अनिच्चादिना विविधेनाकारेण दस्सनतो विपस्सना, सङ्खारपरिग्गाहकजाणं । तेनाह “सङ्खारपरिग्गाहविपस्सनाजाण”न्ति ।

दुतिये अनरियेहि परियेसितब्बत्ता अनरियानं परियेसनाति अनरियपरियेसना । सयं लामकताय अनरियानं परियेसनाति वा अनरियपरियेसना । जरासभावन्ति जीरणपकतिकं । ततियं उत्तानमेव ।

अभिञ्जासुत्तादिवण्णना निट्ठिता ।

४-१०. मालुक्यपुत्तसुत्तादिवण्णना

२५७-२६३. चतुत्थे अपसादेतीति निग्गण्हाति । उस्सादेतीति पग्गण्हाति । अपसादनाकारं उस्सादनाकारञ्च विभावेतुं “कथ”न्तिआदि आरब्धं । पञ्चमादीनि उत्तानानेव । सेसं सुविज्जेय्यमेव ।

मालुक्यपुत्तसुत्तादिवण्णना निट्ठिता ।

अभिञ्जावग्गवण्णना निट्ठिता ।

इति मनोरथपूरणिया अङ्गुत्तरनिकाय-अट्ठकथाय

चतुक्कनिपातवण्णनाय अनुत्तानत्थदीपना समत्ता ।

दुतियो भागो निट्ठितो ।